

॥ नमो तस्स भगवतो अरहतो सम्मासम्बुद्धस्स ॥

खुद्दकनिकाये

इतिवुत्तक-अट्ठकथा

गन्थारम्भकथा

महाकारुणिकं नाथं, जेय्यसागरपारगुं ।
वन्दे निपुणगम्भीर-विचित्रनयदेसनं ॥

विज्जाचरणसम्पन्ना, येन निय्यन्ति लोकतो ।
वन्दे तमुत्तमं धम्मं, सम्मासम्बुद्धपूजितं ॥

सीलादिगुणसम्पन्नो, ठितो मग्गफलेसु यो ।
वन्दे अरियसङ्घं तं, पुज्जक्खेत्तं अनुत्तरं ॥

वन्दनाजनितं पुज्जं, इति यं रतनत्तये ।
हतन्तरायो सब्बत्थ, हुत्वाहं तस्स तेजसा ॥

एककादिप्पभेदेन, देसितानि महेसिना ।
लोभादीनं पहानानि, दीपनानि विसेसतो ॥

सुत्तानि एकतो कत्वा, इतिवुत्तपदक्खरं ।
धम्मसङ्गाहका थेरा, सङ्गायिंसु महेसयो ॥

इतिवुत्तकमिच्चेव, नामेन वसिनो पुरे ।
यं खुद्दकनिकायस्मिं, गम्भीरत्थपदक्कमं ॥

तस्स गम्भीरजाणेहि, ओगाहेतब्बभावतो ।
किञ्चापि दुक्करा कातुं, अत्थसंवण्णना मया ॥

सहसंवण्णनं यस्मा, धरते सत्थु सासनं ।
पुब्बाचरियसीहानं, तिट्ठतेव विनिच्छयो ॥

तस्मा तं अवलम्बित्वा, ओगाहेत्वान पञ्चपि ।
निकाये उपनिस्साय, पोरणट्ठकथानयं ॥

निस्सितं वाचनामग्गं, सुविसुद्धं अनाकुलं ।
महाविहारवासीनं, निपुणत्थविनिच्छयं ॥

पुनप्पुनागतं अत्थं, वज्जयित्वान साधुकं ।
यथाबलं करिस्सामि, इतिवुत्तकवण्णनं ॥

इति आकङ्खमानस्स, सद्धम्मस्स चिरट्ठिति ।
विभजन्तस्स तस्सत्थं, निसामयथ साधवोति ॥

तत्थ **इतिवुत्तकं** नाम एककनिपातो, दुकनिपातो, तिकनिपातो, चतुक्कनिपातोति चतुनिपातसङ्गहं । तम्पि विनयपिटकं, सुत्तन्तपिटकं, अभिधम्मपिटकन्ति तीसु पिटकेसु सुत्तन्तपिटकपरियापन्नं; दीघनिकायो मज्झिमनिकायो, संयुत्तनिकायो, अङ्गुत्तरनिकायो, खुद्दकनिकायोति पञ्चसु निकायेसु खुद्दकनिकायपरियापन्नं; सुत्तं, गेय्यं, वेय्याकरणं, गाथा, उदानं, इतिवुत्तकं, जातकं, अब्भुतधम्मं, वेदल्लन्ति नवसु सासनङ्गेसु इतिवुत्तकङ्गभूतं ।

“द्वासीति बुद्धतो गण्हिं, द्वेसहस्सानि भिक्खुतो ।
चतुरासीति सहस्सानि, ये मे धम्मा पवत्तिनो”ति ॥ (थेरगा० १०२७) —

एवं धम्मभण्डागारिकेन पटिज्जातेसु चतुरासीतिया धम्मक्खन्धसहस्सेसु कतिपयधम्मक्खन्धसङ्गहं । सुत्ततो एककनिपाते ताव सत्तवीसति सुत्तानि, दुकनिपाते द्वावीसति, तिकनिपाते पञ्चास, चतुक्कनिपाते तेरसाति द्वादसाधिकसुत्तसतसङ्गहं । तस्स निपातेसु एककनिपातो आदि, वग्गेसु पाटिभोगवग्गो, सुत्तेसु लोभसुत्तं । तस्सापि “वुत्तज्हेतं भगवता”तिआदिकं आयस्मता आनन्देन पठममहासङ्गीतिकाले वुत्तं निदानमादि । सा पनायं पठममहासङ्गीति विनयपिटके तन्तिमारुळ्हा एव । यो पनेत्थ निदानकोसल्लत्थं वत्तब्बो कथामग्गो, सोपि सुमङ्गलविलासिनिया **दीघनिकाय-अट्ठकथाय** वित्थारतो वुत्तोयेवाति तत्थ वुत्तनयेनेव वेदितब्बो ।

निदानवण्णना

यं पनेतं वुत्तज्हेतं भगवतातिआदिकं निदानं । एकधम्मं, भिक्खवे, पजहथातिआदिकं सुत्तं । तत्थ **वुत्तं भगवतातिआदीनि** नामपदानि । **इतीति** निपातपदं । **पजहथाति** एत्थ प-इति उपसगगपदं, जहथा-ति आख्यातपदं । इमिना नयेन सब्बत्थ पदविभागो वेदितब्बो ।

अत्थतो पन **वुत्तसद्दो** ताव सउपसगगो अनुपसगगो च वपने वापसमकरणे केसोहारणे जीवितवुत्तियं पवुत्तभावे पावचनभावेन पवत्तिते अज्झेसने कथनेति एवमादीसु दिस्सति । तथा हेस —

“गावो तस्स पजायन्ति, खेत्ते वुत्तं विरूहति ।
वुत्तानं फलमस्माति, यो मित्तानं न दुब्भती”ति ॥ —

आदीसु (जा० २.२२.१९) वपने आगतो । “नो च खो पटिवुत्त”न्तिआदीसु (पारा० २८९) अट्ठदन्तकादीहि वापसमकरणे । “कापटिको माणवो दहरो वुत्तसिरो”तिआदीसु (म० नि० २.४२६) केसोहारणे । “पन्नलोमो परदत्तवुत्तो मिगभूतेन चेतसा

विहरती'तिआदीसु (चूळव० ३३२) जीवितवुत्तियं । “सेय्यथापि नाम पण्डुपलासो बन्धना पवुत्तो अभब्बो हरितत्थाया'तिआदीसु (पारा० ९२; पाचि० ६६६; महाव० १२९) बन्धनतो पवुत्तभावे । “येसमिदं एतरहि, ब्राह्मणा, पोराणं मन्तपदं गीतं पवुत्तं समिहित'न्तिआदीसु पावचनभावेन पवत्तिते । लोके पन — “वुत्तो गणो वुत्तो पारायनो'तिआदीसु अज्जेने । “वुत्तं खो पनेतं भगवता धम्मदायादा मे, भिक्खवे, भवथ, मा आमिसदायादा'तिआदीसु (म० नि० १.३०) कथने । इधापि कथने दट्ठब्बो । तस्मा वुत्तं कथितं भासितन्ति अत्थो ।

दुतियो पन वुत्तसद्दो वचने चिण्णभावे च वेदितब्बो । हि-इति जातु विव्यत्तन्ति एतस्मिं अत्थे निपातो । सो इदानि वुच्चमानसुत्तस्स भगवतो विव्यत्तं भासितभावं जोतेति । वाचकसद्दसन्निधाने हि पयुत्ता निपाता । तेहि वत्तब्बमत्थं जोतेन्ति । एतन्ति अयं एतसद्दो —

“यो च बुद्धञ्च धम्मञ्च, सङ्खञ्च सरणं गतो ।
चत्तारि अरियसच्चानि, सम्मप्पञ्जाय पस्सति ॥

“दुक्खं दुक्खसमुप्पादं, दुक्खस्स च अतिक्कमं ।
अरियञ्चट्ठङ्गिकं मगं, दुक्खूपसमगामिनं ॥

“एतं खो सरणं खेमं, एतं सरणमुत्तमं ।
एतं सरणमागम्म, सब्बदुक्खा पमुच्चती'ति ॥ (ध० प० १९०-१९२) —

आदीसु यथावुत्ते आसन्नपच्चक्खे आगतो । “अप्पमत्तकं खो पनेतं, भिक्खवे, ओरमत्तकं सीलमत्तकं, येन पुथुज्जनो तथागतस्स वण्णं वदमानो वदेय्या'तिआदीसु (दी० नि० १.७) पन वक्खमाने आसन्नपच्चक्खे । इधापि वक्खमानेयेव दट्ठब्बो । सङ्गायनवसेन वक्खमानज्झि सुत्तं धम्मभण्डागारिकेन बुद्धियं ठपेत्वा तदा “एत'न्ति वुत्तं ।

भगवाति एत्थ भगवाति गरुवचनं । गरुं हि लोके भगवाति वदन्ति । तथागतो च सब्बगुणविसिद्धताय सत्तानं गरु, तस्मा भगवाति वेदितब्बो । पोराणेहिपि वुत्तं —

“भगवाति वचनं सेट्ठं, भगवाति वचनमुत्तमं ।
गरु गारवयुत्तो सो, भगवा तेन वुच्चती'ति ॥

सेट्ठवाचकज्झि वचनं सेट्ठगुणसहचरणतो सेट्ठन्ति वुत्तं । अथ वा वुच्चतीति वचनं, अत्थो । तस्मा **भगवाति वचनं** सेट्ठन्ति भगवाति इमिना वचनेन वचनीयो यो अत्थो, सो सेट्ठोति अत्थो । **भगवाति वचनमुत्तमन्ति** एत्थापि एसेव नयो । **गारवयुत्तो**ति गरुभावयुत्तो गरुगुणयोगतो, गरुकरणं वा सातिसयं अरहतीति गारवयुत्तो, गारवारहोति अत्थो । एवं गुणविसिद्धसत्तुत्तमगरुगारवाधिवचनमेतं यदिदं भगवाति । अपिच —

“भगी भजी भागी विभत्तवा इति,
अकासि भगन्ति गरूति भाग्यवा ।
बहूहि जायेहि सुभावित्तनो,
भवन्तगो सो भगवाति वुच्चती'ति ॥ —

निद्देसे आगतनयेन —

“भाग्यवा भगवा युतो, भगेहि च विभत्तवा ।
भत्तवा वन्तगमनो, भवेसु भगवा ततो”ति ॥

इमिस्सा गाथाय च वसेन भगवाति पदस्स अत्थो वत्तब्बो । सो पनायं अत्थो सब्बाकारेन **विसुद्धिमग्गे**
बुद्धानुस्सतिनिद्देसे वुत्तोति । तत्थ वुत्तनयेनेव वेदितब्बो ।

अपरो नयो — भागवाति भगवा, भतवाति भगवा, भागे वनीति भगवा, भगे वनीति भगवा, भत्तवाति भगवा, भगे वमीति भगवा, भागे वमीति भगवा ।

“भागवा भतवा भागे, भगे च वनि भत्तवा ।
भगे वमि तथा भागे, वमीति भगवा जिनो” ॥

तत्थ कथं **भागवाति भगवा?** ये ते सीलादयो धम्मकखन्धा गुणकोट्टासा, ते अनज्जसाधारणा निरतिसया तथागतस्स अत्थि उपलब्धन्ति । तथा हिस्स सीलं, समाधि, पज्जा, विमुत्ति, विमुत्तिजाणदस्सनं, हिरी, ओत्तप्पं, सद्धा, वीरियं, सति, सम्पज्झं, सीलविसुद्धि, चित्तविसुद्धि, दिट्ठिविसुद्धि, समथो, विपस्सना, तीणि कुसलमूलानि, तीणि सुचरितानि, तयो सम्मावितक्का, तिस्सो अनवज्जसज्जा, तिस्सो धातुयो, चत्तारो सतिपट्ठाना, चत्तारो सम्मप्पधाना, चत्तारो इद्धिपादा, चत्तारो अरियमग्गा, चत्तारि अरियफलानि, चतस्सो पटिसम्भिदा, चतुयोनिपरिच्छेदकजाणानि, चत्तारो अरियवंसा, चत्तारि वेसारज्जजाणानि, पच्च पधानियङ्गानि, पच्चङ्गिको सम्मासमाधि, पच्चजाणिको सम्मासमाधि, पच्चिन्द्रियानि, पच्च बलानि, पच्च निस्सारणीया धातुयो, पच्च विमुत्तायतनजाणानि, पच्च विमुत्तिपरिपाचनीया सज्जा, छ अनुस्सतिट्ठानानि, छ गारवा, छ निस्सारणीया धातुयो, छ सततविहारा, छ अनुत्तरियानि, छ निब्बेधभागिया सज्जा, छ अभिज्जा, छ असाधारणजाणानि, सत्त अपरिहानिया धम्मा, सत्त अरियधनानि, सत्त बोज्झङ्गा, सत्त सप्पुरिसधम्मा, सत्त निज्जरवत्थूनि, सत्त सज्जा, सत्त दक्खिण्येय्यपुगलदेसना, सत्त खीणासवबलदेसना, अट्ठ पज्जापटिलाभहेतुदेसना, अट्ठसम्मत्तानि, अट्ठ लोकधम्मातिक्कमो, अट्ठ आरम्भवत्थूनि, अट्ठ अक्खणदेसना, अट्ठ महापुरिसवितक्का, अट्ठ अभिभायतनदेसना, अट्ठ विमोक्खा, नव योनिमोमनसिकारमूलका धम्मा, नव पारिसुद्धिपधानियङ्गानि, नव सत्तावासदेसना, नव आघातप्पटिविनया, नव सज्जा, नव नानत्ता, नव अनुपुब्बविहारा, दस नाथकरणा धम्मा, दस कसिणायतनानि, दस कुसलकम्मपथा, दस सम्मत्तानि, दस अरियवासा, दस असेक्खा धम्मा, दस तथागतबलानि, एकादस मेत्तानिसंसा, द्वादस धम्मचक्काकारा, तेरस धुतगुणा, चुद्दस बुद्धजाणानि, पच्चदस विमुत्तिपरिपाचनीया धम्मा, सोळसविधा आनापानस्सति, सोळस अपरन्तपनीया धम्मा, अट्ठारस बुद्धधम्मा, एकूनवीसति पच्चवेक्खणजाणानि, चतुचत्तालीस जाणवत्थूनि, पज्जास उदयब्बयजाणानि, परोपण्णास कुसलधम्मा, सत्तसत्तति जाणवत्थूनि, चतुवीसतिकोटिसतसहस्ससमापत्तिसज्चारिमहावजिरजाणं, अनन्तनयसमन्तपट्टानपविचयपच्चवेक्खणदेसनाजाणानि, तथा अनन्तासु लोकधातूसु अनन्तानं सत्तानं आसयादिविभावनजाणानि चाति, एवमादयो अनन्ता अपरिमाणभेदा अनज्जसाधारणा निरतिसया गुणभागा गुणकोट्टासा विज्जन्ति उपलब्धन्ति । तस्मा यथावुत्तविभागा गुणभागा अस्स अत्थीति भागवाति वत्तब्बे । आकारस्स रस्सत्तं कत्वा “भगवा”ति वुत्तो । एवं ताव भागवाति भगवा ।

“यस्मा सीलादयो सब्बे, गुणभागा असेसतो ।

विज्जन्ति सुगते तस्मा, भगवाति पवुच्चति” ॥

कथं भतवाति भगवा? ये ते सब्बलोकहिताय उस्सुक्कमापन्नेहि मनुस्सत्तादिके अट्ठ धम्मे समोधानेत्वा सम्मासम्बोधिं कतमहाभिनीहारेहि महाबोधिसत्तेहि परिपूरेतब्बा दानपारमी, सीलनेक्खम्मपञ्जावीरियखन्तिसच्चअधिट्ठानमेत्ताउपेक्खापारमीति दस पारमियो, दस उपपारमियो, दस परमत्थपारमियोति समतिंस पारमियो, दानादीनि चत्तारि सङ्गहवत्थूनि, चत्तारि अधिट्ठानानि, अत्तपरिच्चागो, नयनधनरज्जपुत्तदारपरिच्चागोति पञ्च महापरिच्चागा, पुब्बयोगो, पुब्बचरिया, धम्मक्खानं, लोकत्थचरिया, जातत्थचरिया, बुद्धत्थचरियाति एवमादयो सङ्खेपतो वा पुञ्जसम्भारजाणसम्भारा बुद्धकरधम्मा, ते महाभिनीहारतो पट्ठाय कप्पानं सतसहस्साधिकानि चत्तारि असङ्ख्येय्यानि यथा हानभागिया, संकिलेसभागिया, ठितिभागिया, वा न होन्ति; अथ खो उत्तरुत्तरि विसेसभागियाव होन्ति; एवं सक्कच्चं निरन्तरं अनवसेसतो भता सम्भता अस्स अत्थीति भतवाति भगवा; निरुत्तिनयेन तकारस्स गकारं कत्वा । अथ वा भतवाति तेयेव यथावुत्ते बुद्धकरधम्मे वुत्तनयेन भरि सम्भरि परिपूरेसीति अत्थो । एवम्पि भतवाति भगवा ।

“यस्मा सम्बोधिं सब्बे, दानपारमिआदिके ।

सम्भारे भतवा नाथो, तस्मापि भगवा मतो” ॥

कथं भागे वनीति भगवा? ये ते चतुर्वीसतिकोटिसतसहस्ससङ्ख्वा देवसिकं वळज्जनकसमापत्तिभागा, ते अनवसेसतो लोकहितत्थं अत्तनो दिट्ठधम्मसुखविहारत्थञ्च निच्चकप्पं वनि भजि सेवि बहुलमकासीति भागे वनीति भगवा । अथ वा अभिज्जेय्येसु धम्मेसु कुसलादीसु खन्धादीसु च ये ते परिज्जेय्यादिवसेन सङ्खेपतो वा चतुर्विधा अभिसमयभागा, वित्थारतो पन “चक्खु परिज्जेय्यं ...पे०... जरामरणं परिज्जेय्य”न्तिआदिना (पटि० म० १.२१) अनेके परिज्जेय्यभागा, “चक्खुस्स समुदयो पहातब्बो...पे०... जरामरणस्स समुदयो पहातब्बो”तिआदिना पहातब्बभागा, “चक्खुस्स निरोधो सच्छिकातब्बो...पे०... जरामरणस्स निरोधो सच्छिकातब्बो”तिआदिना सच्छिकातब्बभागा, “चक्खुनिरोधगामिनीपटिपदा भावेतब्बा...पे०... चत्तारो सतिपट्ठाना भावेतब्बा”तिआदिना च अनेकभेदा भावेतब्बभागा च धम्मा, ते सब्बे वनि भजि यथारहं गोचरभावनासेवनानं वसेन सेवि । एवम्पि भागे वनीति भगवा । अथ वा ये इमे सीलादयो धम्मक्खन्धा सावकेहि साधारणा गुणकोट्टासा गुणभागा, किन्ति नु खो ते वेनेय्यसन्तानेसु पतिट्ठपेय्यन्ति महाकरुणाय वनि अभिपत्थयि । सा चस्स अभिपत्थना यथाधिप्पेतफलावहा अहोसि । एवम्पि भागे वनीति भगवा ।

“यस्मा जेय्यसमापत्ति-गुणभागे तथागतो ।

भजि पत्थयि सत्तानं, हिताय भगवा ततो” ॥

कथं भगे वनीति भगवा? समासतो ताव कतपुज्जेहि पयोगसम्पन्नेहि यथाविभवं भजीयन्तीति भागा, लोकियलोकुत्तरा सम्पत्तियो । तत्थ लोकिये ताव तथागतो सम्बोधितो पुब्बे बोधिसत्तभूतो परमुक्कंसगते वनि भजि सेवि, यत्थ पतिट्ठाय निरवसेसतो बुद्धकरधम्मे समन्नानेन्तो बुद्धधम्मे परिपाचेसि । बुद्धभूतो पन ते निरवज्जसुखूपसंहिते अनज्जसाधारणे लोकुत्तरेपि वनि भजि सेवि । वित्थारतो पन पदेसरज्जइस्सरियचक्कवत्तिसम्पत्तिदेवरज्जसम्पत्तिआदिवसेन ज्ञानविमोक्खसमाधिसमापत्तिजाणदस्सनमग्गभावनाफल-सच्छिकिरियादिउत्तरिमनुस्सधम्मवसेन च अनेकविहिते अनज्जसाधारणे भगे वनि भजि सेवि । एवं भगे वनीति भगवा ।

“या ता सम्पत्तियो लोके, या च लोकुत्तरा पुथू ।

सब्बा ता भजि सम्बुद्धो, तस्मापि भगवा मतो” ॥

कथं भत्तवाति भगवा? भत्ता दळ्हभत्तिका अस्स बहू अत्थीति भगवा । तथागतो हि महाकरुणासब्बञ्जुतञ्जाणादिअपरिमितनिरुपमप्पभावगुणविसेससमङ्गिभावतो सब्बसत्तुत्तमो, सब्बानत्थपरिहारपुब्बङ्गमाय निरवसेसहितसुखविधानतप्पराय निरतिसयाय पयोगसम्पत्तिया सदेवमनुस्साय पजाय अच्चन्तूपकारिताय द्वित्तिसमहापुरिसलक्खणअसीति अनुव्यञ्जनव्यामप्पभादि-
अनञ्जसाधारणगुणविसेसपटिमण्डितरूपकायताय, यथाभुच्चगुणाधिगतेन “इतिपि सो भगवा”ति आदिनयप्पवत्तेन लोकत्तयव्यापिना सुविपुलेन सुविसुद्धेन च श्रुतिघोसेन समन्नागतत्ता उक्कंसपारमिप्पत्तासु अप्पिच्छतासन्तुट्ठितादीसु सुप्पत्तिट्ठितभावतो दसबलचतुवेसारज्जादिनिरतिसयगुणविसेससमङ्गिभावतो च रूपप्पमाणो रूपप्पसन्नो, घोसप्पमाणो घोसप्पसन्नो, लूखप्पमाणो लूखप्पसन्नो, धम्मप्पमाणो धम्मप्पसन्नोति एवं चतुप्पमाणिके लोकसन्निवासे सब्बथापि पसादावहभावेन समन्तपासादिकत्ता अपरिमाणानं सत्तानं सदेवमनुस्सानं आदरबहुमानगारवायतनताय परमपेमसम्भत्तिट्ठानं । ये च तस्स ओवादे पतिट्ठिता अवेच्चप्पसादेन समन्नागता होन्ति, केनचि असंहारिया तेसं सम्भत्ति समणेन वा ब्राह्मणेन वा देवेन वा मारेन वा ब्रह्मना वा । तथा हि ते अत्तनो जीवितपरिच्चागेपि तत्थ पसादं न परिच्चजन्ति, तस्स वा आणं दळ्हभत्तिभावतो । तेनेवाह —

“यो वे कतञ्जू कतवेदि धीरो ।

कल्याणमित्तो दळ्हभत्ति च होती”ति ॥ (जा० २.१७.७८) ।

“सेय्यथापि, भिक्खवे, महासमुद्धो ठितधम्मो वेलं नातिवत्तति; एवमेव खो, भिक्खवे, यं मया सावकानं सिक्खापदं पज्जत्तं, तं मम सावका जीवितहेतुपि नातिक्कमन्ती”ति (अ० नि० ८.२०; उदा० ४५; चूळव० ३८५) च ।

एवं भत्तवाति भगवा निरुत्तिनयेन एकस्स तकारस्स लोपं कत्वा इतरस्स गकारं कत्वा ।

“गुणातिसययुत्तस्स, यस्मा लोकहितेसिनो ।

सम्भत्ता बहवो सत्थु, भगवा तेन वुच्चती”ति ॥

कथं भगे वमीति भगवा? यस्मा तथागतो बोधिसत्तभूतोपि पुरिमासु जातीसु पारमियो पूरेन्तो भगसङ्घातं सिरिं इस्सरियं यसञ्च वमि उगिरि खेळपिण्डं विय अनपेक्खो छड्डियि । तथा हिस्स सोमनस्सकुमारकाले, हत्थिपालकुमारकाले, अयोधरपण्डितकाले, मूगपक्खपण्डितकाले, चूळसुतसोमकालेति एवमादीसु नेक्खम्मपारमिपूरणवसेन देवरज्जसदिसाय रज्जसिरिया परिच्चत्तत्तभावानं परिमाणं नत्थि । चरिमत्तभावेपि हत्थगतं चक्कवत्तिसिरिं देवलोकाधिपच्चसदिसं चतुद्दीपिस्सरियं चक्कवत्तिसम्पत्तिसन्निस्सयं सत्तरतनसमुज्जलं यसञ्च तिणायपि अमञ्जमानो निरपेक्खो पहाय अभिनिक्खमित्वा सम्मासम्बोधिं अभिसम्बुद्धो । तस्मा इमे सिरिआदिके भगे वमीति भगवा । अथ वा भानि नाम नक्खत्तानि, तेहि समं गच्छन्ति पवत्तन्तीति भगा, सिनेरुयुगन्धरुत्तरकुरुहिमवन्तादिभाजनलोकविसेससन्निस्सया सोभा कप्पट्ठितियभावतो । तेपि भगवा वमि तंनिवासित्तावाससमतिक्कमनतोत्तप्पटिबद्धछन्दरागप्पहानेन पजहीति । एवम्पि भगे वमीति भगवा ।

“चक्कवत्तिसिरिं यस्मा, यसं इस्सरियं सुखं ।

पहासि लोकचित्तञ्च, सुगतो भगवा ततो” ॥

कथं भागे वमीति भगवा? भागा नाम कोट्टासा । ते खन्धायतनधातादिवसेन, तत्थापि रूपवेदनादिवसेन, अतीतादिवसेन च अनेकविधा । ते च भगवा सब्बं पपञ्चं, सब्बं योगं, सब्बं गन्धं, सब्बं संयोजनं, समुच्छिन्दित्वा अमतधातुं समधिगच्छन्तो वमि उगिरि अनपेक्खो छट्ठयि, न पच्चागमि । तथा हेस सब्बत्थकमेव पथविं, आपं, तेजं, वायं, चक्खुं, सोतं, घानं, जीव्हं, कायं, मनं, रूपे, सद्दे, गन्धे, रसे, फोटुब्बे, धम्मो, चक्खुविज्जाणं...पे०... मनोविज्जाणं, चक्खुसम्फस्सं ...पे०... मनोसम्फस्सं, चक्खुसम्फस्सजं वेदनं...पे०... मनोसम्फस्सजं वेदनं, चक्खुसम्फस्सजं सज्जं...पे०... मनोसम्फस्सजं सज्जं; चक्खुसम्फस्सजं चेतनं...पे०... मनोसम्फस्सजं चेतनं; रूपतण्हं ...पे०... धम्मतण्हं; रूपवितक्कं... पे०... धम्मवितक्कं; रूपविचारं...पे०... धम्मविचारन्तिआदिना अनुपदधम्मविभागवसेनपि सब्बेव धम्मकोट्टासे अनवसेसतो वमि उगिरि अनपेक्खपरिच्चागेन छट्ठयि । वुत्तज्हेतं —

“यं तं, आनन्द, चत्तं वन्तं मुत्तं पहीनं पटिनिस्सट्ठं, तं तथागतो पुन पच्चागमिस्सतीति नेतं ठानं विज्जती”ति ।
(दी० नि० २.१८३) —

एवमपि भागे वमीति भगवा । अथ वा भागे वमीति सब्बेपि कुसलाकुसले सावज्जानवज्जे हीनप्पणीते कण्हसुक्कसप्पटिभागे धम्मो अरियमग्गजाणमुखेन वमि उगिरि अनपेक्खो परिच्चजि पजहि, परेसज्ज तथत्ताय धम्मं देसेसि । वुत्तमि चेतं —

“धम्मापि वो, भिक्खवे, पहातब्बा पगेव अधम्मा, कुल्लूपमं, वो भिक्खवे, धम्मं देसेस्सामि, नित्थरणत्थाय नो गहणत्थाया”तिआदि । (म० नि० १.२४०) —

एवमपि भागे वमीति भगवा ।

“खन्धायतनधातादि-धम्मभेदा महेसिना ।
कण्हसुक्का यतो वन्ता, ततोपि भगवा मतो” ॥

तेन वुत्तं —

“भागवा भतवा भागे, भगे च वनि भत्तवा ।
भगे वमि तथा भागे, वमीति भगवा जिनो”ति ॥

तेन भगवता । अरहताति किलेसेहि आरकत्ता, अनवसेसानं वा किलेसारीनं हतत्ता, संसारचक्कस्स वा अरानं हतत्ता, पच्चयादीनं अरहत्ता, पापकरणे रहाभावाति इमेहि कारणेहि अरहता । अयमेत्थ सङ्खेपो । वित्थारो पन विसुद्धिमग्गे वुत्तनयेन वेदितब्बो ।

एत्थ च भगवताति इमिनास्स भाग्यवन्ततादीपनेन कप्पानं अनेकेसु असङ्ख्येय्येसु उपचितपुज्जसम्भारभावतो सतपुज्जलक्खणधरस्स द्वत्तिसमहापुरिसलक्खणअसीतिअनुब्यज्जन- ब्यामप्पभाकेतुमालादिपटिमण्डिता अनज्जसाधारणा रूपकायसम्पत्तिदीपिता होति । अरहताति इमिनास्स अनवसेसकिलेसप्पहानदीपनेन

आसवक्खयपदट्ठानसब्बज्जुतज्जाणाधिगमपरिदीपनतो

दसबलचतुवेसारज्जछअसाधारणजाणअट्ठारसावेणिकबुद्धधम्मादि- अचिन्तेय्यापरिमेय्यधम्मकायसम्पत्ति दीपिता होति । तदुभयेनपि लोकियसरिक्खकानं बहुमतभावो, गहट्ठपब्बजितेहि अभिगमनीयता, तथा अभिगतानञ्च तेसं कायिकचेतसिकदुक्खापनयने पटिबलभावो, आमिसदानधम्मदानेहि उपकारिता, लोकियलोकुत्तरेहि गुणेहि संयोजनसमत्थता च पकासिता होति ।

तथा भगवताति इमिना चरणधम्मेसु मुद्धभूतदिब्बविहारादिविहारविसेससमायोगपरिदीपनेन चरणसम्पदा दीपिता होति । अरहताति इमिना सब्बविज्जासु सिखाप्पत्तआसवक्खयजाणाधिगमपरिदीपनेन विज्जासम्पदा दीपिता होति । पुरिमेन वा अन्तरायिकनित्यानिक्खधम्मानं अविपरीतविभत्तभावदीपनेन पच्छिमवेसारज्जद्वयसमायोगो, पच्छिमेन सवासननिरवसेसकिलेसप्पहानदीपनेन पुरिमवेसारज्जद्वयसमायोगो विभावितो होति ।

तथा पुरिमेन तथागतस्स पटिज्जासच्चवचीसच्चजाणसच्चपरिदीपनेन, कामगुणलोकियाधिपच्चयसलाभसक्कारादिपरिच्चागपरिदीपनेन, अनवसेसकिलेसाभिसङ्खारपरिच्चागपरिदीपनेन, च सच्चाधिद्वानचागाधिद्वानपारिपूरि पकासिता होति; दुतियेन सब्बसङ्खारूपसमसमधिगमपरिदीपनेन, सम्मासम्बोधिपरिदीपनेन च, उपसमाधिद्वानपज्जाधिद्वानपारिपूरि पकासिता होति । तथा हि भगवतो बोधिसत्तभूतस्स लोकुत्तरगुणे कताभिनीहारस्स महाकरुणायोगेन यथापटिज्जं सब्बपारमितानुद्वानेन सच्चाधिद्वानं, पारमितापटिपक्खपरिच्चागेन चागाधिद्वानं, पारमितागुणेहि चित्तवूपसमेन उपसमाधिद्वानं, पारमिताहि एव परहितूपायकोसल्लतो पज्जाधिद्वानं पारिपूरिगतं ।

तथा ‘याचकजनं अविसंवादेत्वा दस्सामी’ति पटिजाननेन पटिज्जं अविसंवादेत्वा दानेन च सच्चाधिद्वानं, देय्यपरिच्चागतो चागाधिद्वानं, देय्यपटिग्गाहकदानदेय्यपरिक्खयेसु लोभदोसमोहभयवूपसमेन उपसमाधिद्वानं, यथारहं यथाकालं यथाविधि च दानेन पज्जुत्तरताय च पज्जाधिद्वानं पारिपूरिगतं । इमिना नयेन सेसपारमीसुपि चतुराधिद्वानपारिपूरि वेदितब्बा । सब्बा हि पारमियो सच्चप्पभाविता चागाभिव्यञ्जिता उपसमानुबूहिता पज्जापरिसुद्धाति एवं चतुराधिद्वानसमुदागतस्स तथागतस्स सच्चाधिद्वानं सच्चाधिद्वानसमुदागमेन सीलविसुद्धि, चागाधिद्वानसमुदागमेन आजीवविसुद्धि, उपसमाधिद्वानसमुदागमेन चित्तविसुद्धि, पज्जाधिद्वानसमुदागमेन दिट्ठिविसुद्धि । तथा सच्चाधिद्वानसमुदागमेनस्स संवासेन सीलं वेदितब्बं, चागाधिद्वानसमुदागमेन संवोहारेन सोचेय्यं वेदितब्बं, उपसमाधिद्वानसमुदागमेन आपदासु थामो वेदितब्बो, पज्जाधिद्वानसमुदागमेन साकच्छाय पज्जा वेदितब्बा ।

तथा सच्चाधिद्वानसमुदागमेन अदुद्धो अधिवासेति, चागाधिद्वानसमुदागमेन अलुद्धो पटिसेवति, उपसमाधिद्वानसमुदागमेन अभीतो परिवज्जेति, पज्जाधिद्वानसमुदागमेन अमूळ्हो विनोदेति । तथा सच्चाधिद्वानसमुदागमेन चस्स नेक्खम्मसुखप्पत्ति, चागाधिद्वानसमुदागमेन पविवेकसुखप्पत्ति, उपसमाधिद्वानसमुदागमेन उपसमसुखप्पत्ति, पज्जाधिद्वानसमुदागमेन सम्बोधिसुखप्पत्ति दीपिता होति । सच्चाधिद्वानसमुदागमेन वा विवेकजपीतिसुखप्पत्ति, चागाधिद्वानसमुदागमेन समाधिजपीतिसुखप्पत्ति, उपसमाधिद्वानसमुदागमेन अपीतिजकायसुखप्पत्ति, पज्जाधिद्वानसमुदागमेन सतिपारिसुद्धिजउपेक्खासुखप्पत्ति । तथा सच्चाधिद्वानसमुदागमेन परिवारसम्पत्तिलक्खणपच्चयसुखसमायोगो परिदीपितो होति अविसंवादनतो, चागाधिद्वानसमुदागमेन सन्तुट्ठिलक्खणसभावसुखसमायोगो अलोभभावतो, उपसमाधिद्वानसमुदागमेन कतपुज्जतालक्खणहेतुसुखसमायोगो किलेसेहि अनभिभूतभावतो, पज्जाधिद्वानसमुदागमेन विमुत्तिसम्पत्तिलक्खणदुक्खूपसमसुखसमायोगो परिदीपितो होति,

जाणसम्पत्तिया निब्बानाधिगमनतो ।

तथा सच्चाधिद्वानसमुदागमेन अरियस्स सीलक्खन्धस्स अनुबोधप्पटिवेधसिद्धि, चागाधिद्वानसमुदागमेन अरियस्स समाधिक्खन्धस्स, पज्जाधिद्वानसमुदागमेन अरियस्स पज्जाक्खन्धस्स, उपसमाधिद्वानसमुदागमेन अरियस्स विमुत्तिक्खन्धस्स अनुबोधप्पटिवेधसिद्धि दीपिता होति । सच्चाधिद्वानपरिपूरणेन च तपसिद्धि, चागाधिद्वानपरिपूरणेन सब्बनिस्सग्गसिद्धि, उपसमाधिद्वानपरिपूरणेन इन्द्रियसंवरसिद्धि, पज्जाधिद्वानपरिपूरणेन बुद्धिसिद्धि, तेन च निब्बानसिद्धि । तथा सच्चाधिद्वानपरिपूरणेन चतुअरियसच्चाभिसमयप्पटिलाभो, चागाधिद्वानपरिपूरणेन चतुअरियवंसप्पटिलाभो, ०.उपसमाधिद्वानपरिपूरणेन चतुअरियविहारप्पटिलाभो, पज्जाधिद्वानपरिपूरणेन चतुअरियवोहारप्पटिलाभो दीपितो होति ।

अपरो नयो — **भगवता**ति एतेन सत्तानं लोकियलोकुत्तरसम्पत्तिअभिकङ्खादीपनेन तथागतस्स महाकरुणा पकासिता होति । **अरहता**ति एतेन प्हानसम्पत्तिदीपनेन प्हानपज्जा पकासिता होति । तत्थ पज्जायस्स धम्मरज्जपत्ति, करुणाय धम्मसंविभागो; पज्जाय संसारदुक्खनिब्बिदा, करुणाय संसारदुक्खसहनं; पज्जाय परदुक्खपरिजाननं, करुणाय परदुक्खप्पटिकारारम्भो । पज्जाय परिनिब्बानाभिमुखभावो, करुणाय तदधिगमो; पज्जाय सयं तरणं, करुणाय परेसं तारणं; पज्जाय बुद्धभावसिद्धि, करुणाय बुद्धकिच्चसिद्धि । करुणाय वा बोधिसत्तभूमियं संसाराभिमुखभावो, पज्जाय तत्थ अनभिरति । तथा करुणाय परेसं अविहिंसनं, पज्जाय सयं परेहि अभायनं; करुणाय परं रक्खन्तो अत्तानं रक्खति, पज्जाय अत्तानं रक्खन्तो परं रक्खति । तथा करुणाय अपरन्तपो, पज्जाय अनत्तन्तपो । तेन अत्तहिताय पटिपन्नादीसु चतुत्थपुगलभावो सिद्धो होति ।

तथा करुणाय लोकनाथता, पज्जाय अत्तनाथता; करुणाय चस्स निन्नताभावो, पज्जाय उन्नताभावो । तथा करुणाय सब्बसत्तेसु जनितानुगहो, पज्जानुगतत्ता न च न सब्बत्थ विरत्तचित्तो; पज्जाय सब्बधम्मेषु विरत्तचित्तो, करुणानुगतत्ता न च न सब्बसत्तानुगहाय पवत्तो । यथा हि करुणा तथागतस्स सिनेहसोकविरहिता, एवं पज्जा अहंकारममंकारविनिमुत्ताति अज्जमज्जं विसोधिता परमविसुद्धाति दट्टब्बा । तत्थ पज्जाखेत्तं बलानि, करुणाखेत्तं वेसारज्जानि । तेसु बलसमायोगेन परेहि न अभिभुय्यति, वेसारज्जसमायोगेन परे अभिभवति । बलेहि सत्थुसम्पदासिद्धि, वेसारज्जेहि सासनसम्पदासिद्धि । तथा बलेहि बुद्धरतनसिद्धि, वेसारज्जेहि धम्मरतनसिद्धीति अयमेत्थ “भगवता अरहता”ति पदद्वयस्स अत्थयोजनाय मुखमत्तदस्सनं ।

कस्मा पनेत्थ “वुत्तज्हेतं भगवता”ति वत्वा पुन “वुत्त”न्ति वुत्तं? अनुस्सवपटिक्खेपेन नियमदस्सनत्थं । यथा हि केनचि परतो सुत्वा वुत्तं यदिपि च जानन्तेन वुत्तं, न तेनेव वुत्तं परेनपि वुत्तत्ता । न च तं तेन वुत्तमेव, अपिच खो सुतम्पि, न एवमिध । भगवता हि परतो असुत्वा सयम्भुजाणेन अत्तना अधिगतमेव वुत्तन्ति इमस्स विसेसस्स दस्सनत्थं द्विक्खत्तुं “वुत्त”न्ति वुत्तं । इदं वुत्तं होति — “वुत्तज्हेतं भगवता” तज्ज खो भगवताव वुत्तं, न अज्जेन, वुत्तमेव च, न सुतन्ति । अधिकवचनज्हि अज्जमत्थं बोधेतीति न पुनरुत्तिदोसो । एस नयो इतो परेसुपि ।

तथा पुब्बरचनाभावदस्सनत्थं द्विक्खत्तुं “वुत्त”न्ति वुत्तं । भगवा हि सम्मासम्बुद्धताय ठानुप्पत्तिकप्पटिभानेन सम्पत्तपरिसाय अज्झासयानुरूपं धम्मं देसेति, न तस्स कारणा दानादीनं विय पुब्बरचनाकिच्चं अत्थि । तेनेतं दस्सेति — “वुत्तज्हेतं भगवता, तज्ज खो न पुब्बरचनावसेन तक्कपरियाहतं वीमंसानुचरितं, अपिच खो वेनेय्यज्झासयानुरूपं ठानसो वुत्तमेवा”ति ।

अप्पटिवत्तियवचनभावदस्सनत्थं वा द्विक्खत्तुं “वुत्त”न्ति वुत्तं । यज्झि भगवता वुत्तं, वुत्तमेव तं, न केनचि पटिक्खपितुं सक्का अक्खरसम्पत्तिया अत्थसम्पत्तिया च । वुत्तं हेतं —

“एतं भगवता बाराणसियं इसिपतने मिगदाये अनुत्तरं धम्मचक्कं पवत्तितं अप्पटिवत्तियं केनचि समणेन वा ब्राह्मणेन वा”तिआदि (सं० नि० ५.१०८१; महाव० १७) ।

अपरम्पि वुत्तं —

“इध, भिक्खवे, आगच्छेय्य समणो वा ब्राह्मणो वा ‘न यिदं दुक्खं अरियसच्चं, यं समणेन गोतमेन पज्जत्तं, अहमिदं दुक्खं अरियसच्चं ठपेत्वा अज्जं दुक्खं अरियसच्चं पज्जापेस्सामी”ति, नेतं ठानं विज्जती”तिआदि । —

तस्मा अप्पटिवत्तियवचनभावदस्सनत्थम्पि द्विक्खत्तुं “वुत्त”न्ति वुत्तं ।

अथ वा सोतूनं अत्थनिप्फादकभावदस्सनत्थं द्विक्खत्तुं “वुत्त”न्ति वुत्तं । यज्झि परेसं आसयादिं अजानन्तेन असब्बज्जुना अदेसे अकाले वा वुत्तं, तं सच्चम्पि समानं सोतूनं अत्थनिप्फादने असमत्थताय अवुत्तं नाम सिया, पगेव असच्चं । भगवता पन सम्मासम्बुद्धभावतो सम्मदेव परेसं आसयादिं देसकालं अत्थसिद्धिञ्च जानन्तेन वुत्तं एकन्तेन सोतूनं यथाधिप्पेतत्थनिप्फादनतो वुत्तमेव, नत्थि तस्स अवुत्ततापरियायो । तस्मा सोतूनं अत्थनिप्फादकभावदस्सनत्थम्पि द्विक्खत्तुं “वुत्त”न्ति वुत्तं । अपिच यथा न तं सुतं नाम, यं न विज्जातत्थं यच्च न तथत्ताय पटिपन्नं, एवं न तं वुत्तं नाम, यं न सम्मा पटिग्गहितं । भगवतो पन वचनं चतस्सोपि परिसा सम्मदेव पटिग्गहेत्वा तथत्ताय पटिपज्जन्ति । तस्मा सम्मदेव पटिग्गहितभावदस्सनत्थम्पि द्विक्खत्तुं “वुत्त”न्ति वुत्तं ।

अथ वा अरियेहि अविरुद्धवचनभावदस्सनत्थं द्विक्खत्तुं “वुत्त”न्ति वुत्तं । यथा हि भगवा कुसलाकुसलसावज्जानवज्जभेदे धम्मे पवत्तिनिवत्तियो सम्मुतिपरमत्थे च अविस्वादेन्तो वदति, एवं धम्मसेनापतिप्पभुतयो अरियापि भगवति धरमाने परिनिब्बुते च तस्सेव देसनं अनुगन्त्वा वदन्ति, न तत्थ नानावादता । तस्मा वुत्तमरहता ततो परभागे अरहता अरियसङ्केनापीति एवं अरियेहि अविरुद्धवचनभावदस्सनत्थम्पि एवं वुत्तं ।

अथ वा पुरिमेहि सम्मासम्बुद्धेहि वुत्तनयभावदस्सनत्थं द्विक्खत्तुं “वुत्त”न्ति वुत्तं । सतिपि हि जातिगोत्तायुप्पमाणादिविसेसे दसबलादिगुणेहि विय धम्मदेसनाय बुद्धानं विसेसो नत्थि, अज्जमज्जं अत्तना च ते पुब्बेनापरं अविरुद्धमेव वदन्ति । तस्मा वुत्तज्हेतं यथा बुद्धेहि अत्तना च पुब्बे, इदानीपि अम्हाकं भगवता तथेव वुत्तं अरहताति एवं पुरिमबुद्धेहि अत्तना च सुत्तन्तरेसु वुत्तनयभावदस्सनत्थम्पि द्विक्खत्तुं “वुत्त”न्ति वुत्तं । तेन बुद्धानं देसनाय सब्बत्थ अविरोधो दीपितो होति ।

अथ वा “वुत्त”न्ति यदेतं दुतियं पदं, तं अरहन्तवुत्तभाववचनं दट्ठब्बं । इदं वुत्तं होति — वुत्तज्हेतं भगवता अरहतापि वुत्तं — “एकधम्मं, भिक्खवे”तिआदिकं इदानी वुच्चमानं वचनन्ति । अथ वा “वुत्त”न्ति यदेतं दुतियं पदं, तं न वचनत्थं, अथ खो वपनत्थं दट्ठब्बं । तेनेतं दस्सेति — “वुत्तज्हेतं भगवता, तज्ज खो न वुत्तमत्तं, न कथितमत्तं; अथ खो वेनेय्यानं कुसलमूलं वपितं”न्ति अत्थो । अथ वा यदेतं वुत्तन्ति दुतियं पदं, तं वत्तनत्थं । अयं हिस्स अत्थो — वुत्तज्हेतं भगवता अरहता, तज्ज खो न वुत्तमत्तं, अपिच तदत्थजातं वुत्तं चरितन्ति । तेन “यथा वादी भगवा तथा कारी”ति दस्सेति । अथ वा

वुत्तं भगवता, वुत्तवचनं अरहता वुत्तं युत्तेनाति अत्थो ।

अथ वा “वुत्त”न्ति सङ्खेपकथाउद्दिशनं सन्धायाह, पुन “वुत्त”न्ति वित्थारकथानिदस्सनं । भगवा हि सङ्खेपतो वित्थारतो च धम्मं देसेति । अथ वा भगवतो दुरुत्तवचनाभावदस्सनत्थं “वुत्तज्हेतं भगवता”ति वत्त्वा पुन “वुत्त”न्ति वुत्तं । सब्बदा जाणानुगतवचीकम्मताय हि भगवतो सवासनपहीनसब्बदोसस्स अक्खलितव्यप्पथस्स कदाचिपि दुरुत्तं नाम नत्थि । यथा केचि लोके सतिसम्मोसेन वा दवा वा रवा वा किञ्चि वत्त्वा अथ पटिलद्धसज्जा पुब्बे वुत्तं अवुत्तं वा करोन्ति पटिसङ्करोन्ति वा, न एवं भगवा । भगवा पन निच्चकालं समाहितो । असम्मोसधम्मो असम्मोहधम्मो च सब्बज्जुतज्जाणसमुपब्यूळ्हाय पटिभानपटिसम्भिदाय उपनीतमत्थं अपरिमितकालं सम्भतपुज्जसम्भारसमुदागतेहि अनज्जसाधारणेहि विसदविसुद्धेहि करणविसेसेहि सोतायतनरसायनभूतं सुणन्तानं अमतवस्सं वस्सन्तो विय सोतब्बसारं सवनानुत्तरियं चतुसच्चं पकासेन्तो करवीकरुतमज्जुना सरेन सभावनिरुत्तिया वेनेय्यज्झासयानुरूपं वचनं वदति, नत्थि तत्थ वालग्गमत्तम्पि अवक्खलितं, कुतो पन दुरुत्तावकासो । तस्मा “यं भगवता वुत्तं, तं वुत्तमेव, न अवुत्तं दुरुत्तं वा कदाचि होती”ति दस्सनत्थं — “वुत्तज्हेतं भगवता”ति वत्त्वा पुन — “वुत्तमरहता”ति वुत्तन्ति न एत्थ पुनरुत्तिदोसोति । एवमेत्थ पुनरुत्तसदस्स सात्थकता वेदितव्वा ।

इति मे सुतन्ति एत्थ इतीति अयं इतिसद्दो

हेतुपरिसमापनादिपदत्थविपरियायपकारनिदस्सनावधारणादिअनेकत्थप्पभेदो । तथा हेस — “रुप्पतीति खो, भिक्खवे, तस्मा रूपन्ति वुच्चती”तिआदीसु (सं० नि० ३.७९) हेतुअत्थे दिस्सति । “तस्मातिह मे, भिक्खवे, धम्मदायादा भवथ, मा आमिसदायादा । अत्थि मे तुम्हेसु अनुकम्पा — किन्ति मे सावका धम्मदायादा भवेय्युं, नो आमिसदायादा”तिआदीसु (म० नि० १.३०) परिसमापने । “इति वा इति एवरूपा विसूकदस्सना पटिविरतो”तिआदीसु (दी० नि० १.१०) आदिअत्थे । “मागण्डियोति वा तस्स ब्राह्मणस्स सङ्घा समज्जा पज्जति वोहारो नामं नामकम्मं नामधेय्यं निरुत्ति व्यज्जनं अभिलापो”तिआदीसु (महानि० ७५) पदत्थविपरियाये । “इति खो, भिक्खवे, सप्पटिभयो बालो, अप्पटिभयो पण्डितो; सउपद्वो बालो, अनुपद्वो पण्डितो; सउपसग्गो बालो, अनुपसग्गो पण्डितो”तिआदीसु (अ० नि० ३.१) पकारे । “सब्बमत्थीति खो, कच्चान, अयमेको अन्तो, सब्बं नत्थीति खो, कच्चान, अयं दुतियो अन्तो”तिआदीसु (सं० नि० २.१५) निदस्सने । “अत्थि इदप्पच्चया जरामरणन्ति इति पुट्ठेन सता, आनन्द, अत्थीतिस्स वचनीयं । किंपच्चया जरामरणन्ति इति चे वदेय्य, जातिपच्चया जरामरणन्ति इच्चस्स वचनीय”न्तिआदीसु (दी० नि० २.९६) अवधारणे, सन्निट्ठानेति अत्थो । स्वायमिध पकारनिदस्सनावधारणेषु दट्ठव्वो ।

तत्थ पकारत्थेन इतिसद्देन एतमत्थं दीपेति — नानानयनिपुणमनेकज्झासयसमुद्धानं अत्थव्यज्जनसम्पन्नं विविधपाटिहारियं धम्मत्थदेसनापटिवेधगम्भीरं सब्बसत्तानं सकसकभासानुरूपतो सोतपथमागच्छन्तं तस्स भगवतो वचनं सब्बप्पकारेण को समत्थो विज्जातुं, सब्बथामेन पन सोतुकामतं जनेत्वापि इति मे सुतं, मयापि एकेन पकारेण सुतन्ति ।

एत्थ च एकत्तनानत्तअव्यापारएवंधम्मतासङ्घाता नन्दियावत्ततिपुक्खलसीहविककीळितदिसालोचनअङ्कुससङ्घाता च विसयादिभेदेन नानाविधा नया नानानया । नया वा पाळिगतियो, ता च पज्जन्तिअनुपज्जन्तिआदिवसेन संकिलेसभागियादिलोकियादितदुभयवोमिस्सतादिवसेन, कुसलादिवसेन, खन्धादिवसेन, सङ्गहादिवसेन, समयविमुत्तादिवसेन, ठपनादिवसेन, कुसलमूलादिवसेन, तिकपट्टानादिवसेन च नानप्पकाराति नानानया । तेहि निपुणं सण्हं सुखुमन्ति नानानयनिपुणं ।

आसयोव अज्झासयो, सो च सस्सतादिभेदेन अप्परजक्खतादिभेदेन च अनेकविधो । अत्तज्झासयादिको एव वा अनेको अज्झासयो अनेकज्झासयो । सो समुद्धानं उप्पत्तिहेतु एतस्साति **अनेकज्झासयसमुद्धानं** ।

कुसलादिअत्थसम्पत्तिया तब्बिभावनव्यञ्जनसम्पत्तिया सङ्कासनपकासनविवरणविभजनउत्तानीकरणपञ्जत्तिवसेन छहि अत्थपदेहि अक्खरपदव्यञ्जनाकारनिरुत्तिनिद्वेसवसेन छहि व्यञ्जनपदेहि च समन्नागतत्ता **अत्थव्यञ्जनसम्पन्नं** ।

इद्धिआदेसनानुसासनीभेदेन तेसु च एकेकस्स विसयादिभेदेन विविधं बहुविधं वा पाटिहारियं एतस्साति **विविधपाटिहारियं** । तत्थ पटिपक्खहरणतो रागादिकिलेसापनयनतो पटिहारियन्ति अत्थे सति भगवतो पटिपक्खा रागादयो न सन्ति ये हरितब्बा, पुथुज्जनानम्पि विगतूपक्विकलेसे अट्टगुणसमन्नागते चित्ते हतपटिपक्खे इद्धिविधं पवत्तति । तस्मा तत्थ पवत्तवोहारेन च न सक्का इध पाटिहारियन्ति वत्तुं । यस्माआ पन महाकारुणिकस्स भगवतो वेनेय्यगता च किलेसा पटिपक्खा, तस्मा तेसं हरणतो पाटिहारियं । अथ वा भगवतो सासनस्स च पटिपक्खा तित्थिया, तेसं हरणतो पाटिहारियं । ते हि दिट्ठिहरणवसेन दिट्ठिपकासने असमत्थभावेन च इद्धिआदेसनानुसासनीहि हरिता अपनीता होन्ति । पटीति वा पच्छाति अत्थो । तस्मा समाहिते चित्ते विगतूपक्विकलेसे कतकिच्चेन पच्छा हरितब्बं पवत्तेतब्बन्ति पटिहारियं । अत्तनो वा उपक्विकलेसेसु चतुत्थज्झानमग्गेहि हरितेसु पच्छा हरणं पटिहारियं । इद्धिआदेसनानुसासिनयो च विगतूपक्विकलेसेन कतकिच्चेन सत्तहितत्थं पुन पवत्तेतब्बा, हरितेसु च अत्तनो उपक्विकलेसेसु परसन्ताने उपक्विकलेसहरणानि होन्तीति पटिहारियानि भवन्ति । पटिहारियमेव पाटिहारियं, पटिहारिये वा इद्धिआदेसनानुसासनिसमुदाये भवं एकेकं पाटिहारियन्ति वुच्चति । पटिहारियं वा चतुत्थज्झानं मग्गो च पटिपक्खहरणतो, तत्थ जातं, तस्मिं वा निमित्तभूते, ततो वा आगतन्ति पाटिहारियं ।

यस्मा पन तन्तिअत्थदेसनातब्बोहाराभिसमयसङ्काता हेतुहेतुफलतदुभयपञ्जत्तिपटिवेधसङ्काता वा धम्मत्थदेसनापटिवेधा गम्भीरा, अनुपचितसम्भारेहि ससादीहि विय महासमुद्दो दुक्खोगाळ्हा अलब्भनेय्यप्पतिट्ठा च । तस्मा तेहि चतूहि गम्भीरभावेहि युत्तन्ति **धम्मत्थदेसनापटिवेधगम्भीरं** ।

एको एव भगवतो धम्मदेसनाघोसो एकस्मिं खणे पवत्तमानो नानाभासानं सत्तानं अत्तनो अत्तनो भासावसेन अपुब्बं अचरिमं गहणूपगो हुत्वा अत्थाधिगमाय होति । अचिन्तेय्यो हि बुद्धानं बुद्धानुभावोति सब्बसत्तानं सकसकभासानुरूपतो सोतपथमागच्छतीति वेदितब्बं ।

निदस्सनत्थेन — “नाहं सयम्भू, न मया इदं सच्छिकत”न्ति अत्तानं परिमोचेन्तो — “इति मे सुतं, मयापि एवं सुत”न्ति इदानि वत्तब्बं सकलं सुत्तं निदस्सेति ।

अवधारणत्थेन — “एतदग्गं, भिक्खवे, मम सावकानं भिक्खून् बहुस्सुतानं यदिदं आनन्दो, गतिमन्तानं, सतिमन्तानं, धितिमन्तानं, उपट्ठाकानं यदिदं आनन्दो”ति (अ० नि० १.२१९-२२३) एवं भगवता, “आयस्मा आनन्दो अत्थकुसलो धम्मकुसलो व्यञ्जनकुसलो निरुत्तिकुसलो पुब्बापरकुसलो”ति (अ० नि० ५.१६९) एवं धम्मसेनापतिना च पसत्थभावानुरूपं अत्तनो धारणबलं दस्सेन्तो सत्तानं सोतुकम्यतं जनेति — “इति मे सुतं, तच्च खो अत्थतो वा व्यञ्जनतो वा अनूनमनधिकं, एवमेव, न अज्जथा, दट्ठब्ब”न्ति । **अज्जथा**ति भगवतो सम्मुखा सुताकारतो अज्जथा, न पन भगवता देसिताकारतो । अचिन्तेय्यानुभावा हि भगवतो देसना, सा न सब्बाकारेन सक्का विज्जातुन्ति वुत्तोवायमत्थो । सुताकाराविरुज्जनमेव हि धारणबलं । न हेत्थ अत्थन्तरतापरिहारो द्विन्मि अत्थानं एकविसयत्ता । इतरथा हि थेरो भगवतो

देसनाय सब्बथा पटिग्गहणे समत्थो असमत्थोति वा आपज्जेय्याति ।

मे-सद्वो तीसु अत्थेसु दिस्सति । तथा हिस्स — “गाथाभिगीतं मे अभोजनेय्य”न्तिआदीसु (सं० नि० १.१९४; सु० नि० ८१) मयाति अत्थो । “साधु मे, भन्ते, भगवा संखित्तेन धम्मं देसेतू”तिआदीसु (सं० नि० ४.८८; ५.३८१; अ० नि० ४.२५७) मयहन्ति अत्थो । “धम्मदायादा मे, भिक्खवे, भवथा”तिआदीसु (म० नि० १.२९) ममाति अत्थो । इध पन “मया सुत”न्ति च “मम सुत”न्ति च अत्थद्वये युज्जति ।

एत्थ च यो परो न होति, सो अत्ताति एवं वत्तब्बे नियकज्झत्तसङ्घाते सकसन्ताने वत्तनतो तिविधोपि मे-सद्वो यदिपि एकस्मिंयेव अत्थे दिस्सति, करणसम्पदानादिविसेससङ्घातो पनस्स विज्जतेवायं अत्थभेदोति आह — “मे-सद्वो तीसु अत्थेसु दिस्सती”ति ।

सुतन्ति अयं सुत-सद्वो सउपसग्गो अनुपसग्गो च गमनविस्सुतकिलिन्नूपचितानुयोगसोतविज्जेय्यसोतद्वारानुसारविज्जातादिअनेकत्थप्पभेदो । किञ्चापि हि किरियाविसेसको उपसग्गो, जोतकभावतो पन सतिपि तस्मिं सुत-सद्वो एव तं तं अत्थं वदतीति अनुपसग्गस्स सुतसद्वस्स अत्थुद्धारे सउपसग्गोपि उदाहरीयति ।

तत्थ “सेनाय पसुतो”तिआदीसु गच्छन्तोति अत्थो । “सुतधम्मस्स पस्सतो”तिआदीसु (उदा० ११) विस्सुतधम्मस्साति अत्थो । “अवस्सुता अवस्सुतस्सा”तिआदीसु (पाचि० ६५७) किलिन्ना किलिन्नस्साति अत्थो । “तुम्हेहि पुज्जं पसुतं अनप्पक”न्तिआदीसु (खु० पा० ७.१२) उपचितन्ति अत्थो । “ये ज्ञानप्पसुता धीरा”तिआदीसु (ध० प० १८१) ज्ञानानुयुत्ताति अत्थो । “दिट्ठं सुतं मुत”न्तिआदीसु (म० नि० १.२४१) सोतविज्जेय्यन्ति अत्थो । “सुतधरो सुतसन्निचयो”तिआदीसु (म० नि० १.३३९) सोतद्वारानुसारविज्जातधरोति अत्थो । इध पनस्स “सोतद्वारानुसारेण उपधारित”न्ति वा “उपधारण”न्ति वा अत्थो । मे-सद्वस्स हि मयाति अत्थे सति “इति मे सुतं, मया सोतद्वारानुसारेण उपधारित”न्ति अत्थो । ममाति अत्थे सति “इति मम सुतं सोतद्वारानुसारेण उपधारण”न्ति अत्थो ।

एवमेतेसु तीसु पदेसु यस्मा सुतसद्वसन्निधाने पयुत्तेन इतिसद्वेन सवनकिरियाजोतकेन भवितब्बं । तस्मा इतीति सोतविज्जाणादिविज्जाणकिच्चनिदस्सनं । मेति वुत्तविज्जाणसमङ्गिपुग्गलनिदस्सनं । सब्बानिपि वाक्यानि एवकारत्थसहितानियेव अवधारणफलत्ता । तेन सुतन्ति अस्सवनभावप्पटिक्खेपतो अनूनाविपरीतग्गहणनिदस्सनं । यथा हि सुतं सुतमेवाति वत्तब्बतं अरहति, तं सम्मा सुतं अनूनाग्गहणं अविपरीतग्गहणञ्च होतीति । अथ वा सद्वन्तरत्थापोहनवसेन सद्वो अत्थं वदतीति, यस्मा सुतन्ति एतस्स असुतं न होतीति अयमत्थो, तस्मा सुतन्ति अस्सवनभावप्पटिक्खेपतो अनूनाविपरीतग्गहणनिदस्सनं । इदं वुत्तं होति — इति मे सुतं, न दिट्ठं, न सयम्भुजाणेन सच्छिकतं, न अज्जथा वा उपलब्धं, अपिच सुतंव, तज्ज खो सम्मदेवाति । अवधारणत्थे वा इतिसद्वे अयमत्थयोजनाति तदपेक्खस्स सुत-सद्वस्स नियमत्थो सम्भवतीति अस्सवनभावप्पटिक्खेपो, अनूनाविपरीतग्गहणनिदस्सनता च वेदितब्बा । एवं सवनहेतुसवनविसेसवसेन पदत्तयस्स अत्थयोजना कताति दट्ठब्बं ।

तथा इतीति सोतद्वारानुसारेण पवत्ताय विज्जाणवीथिया नानत्थव्यज्जनग्गहणतो नानप्पकारेण आरम्मणे पवत्तिभावप्पकासनं आकारत्थो इतिसद्वोति कत्वा । मेति अत्तप्पकासनं । सुतन्ति धम्मप्पकासनं यथावुत्ताय विज्जाणवीथिया परियत्तिधम्मरम्मणत्ता । अयज्हेत्थ सङ्खेपो — नानप्पकारेण आरम्मणे पवत्ताय विज्जाणवीथिया

कारणभूताय मया न अज्जं कतं, इदं पन कतं, अयं धम्मो सुतोति ।

तथा इतीति निदस्सितब्बप्पकासनं निदस्सनत्थो इति-सद्दोति कत्वा निदस्सेतब्बस्स निदस्सितब्बत्ताभावाभावतो । तस्मा इतिसद्देन सकलम्पि सुतं पच्चामट्ठन्ति वेदितब्बं । मेति पुग्गलप्पकासनं । सुतन्ति पुग्गलकिच्चप्पकासनं । सुत-सद्देन हि लब्धमाना सवनकिरिया सवनविज्जाणप्पबन्धप्पटिबद्धा, तत्थ च पुग्गलवोहारो । न हि पुग्गलवोहाररहिते धम्मप्पबन्धे सवनकिरिया लब्धति । तस्सायं सङ्खेपत्थो — यं सुतं निद्विसिस्सामि, तं मया इति सुतन्ति ।

तथा इतीति यस्स चित्तसन्तानस्स नानारम्मणप्पवत्तिया नानत्थव्यञ्जनगहणं होति, तस्स नानाकारनिद्देशो आकारत्थो इतिसद्दोति कत्वा । इतीति हि अयं आकारपज्जति धम्मानं तं तं पवत्तिआकारं उपादाय पज्जापेतब्बसभावत्ता । मेति कत्तुनिद्देशो । सुतन्ति विसयनिद्देशो । सोतब्बो हि धम्मो सवनकिरियाकत्तुपुग्गलस्स सवनकिरियावसेन पवत्तिट्ठानं होति । एतावता नानप्पकारप्पवत्तेन चित्तसन्तानेन तंसमङ्गिनो कत्तु विसये गहणसन्निट्ठानं दस्सितं होति ।

अथ वा इतीति पुग्गलकिच्चनिद्देशो । सुतानज्झि धम्मानं गहिताकारस्स निदस्सनस्स अवधारणस्स वा पकासनभावेन इतिसद्देन तदाकारादिधारणस्स पुग्गलवोहारूपादानधम्मब्यापारभावतो पुग्गलकिच्चं नाम निद्विट्ठं होतीति । सुतन्ति विज्जाणकिच्चनिद्देशो । पुग्गलवादिनोपि हि सवनकिरिया विज्जाणनिरपेक्खा न होतीति । मेति उभयकिच्चयुत्तपुग्गलनिद्देशो । मेति हि सद्दप्पवत्ति एकन्तेनेव सत्तविसेसविसया, विज्जाणकिच्चज्ज तत्थेव समोदहितब्बन्ति । अयं पनेत्थ सङ्खेपो — मया सवनकिच्चविज्जाणसमङ्गिना पुग्गलेन विज्जाणवसेन लद्धस्सवनकिच्चवोहारेन सुतन्ति ।

तथा इतीति च मेति च सच्चिकट्टपरमत्थवसेन अविज्जमानपज्जति । सब्बस्स हि सद्दाधिगमनीयस्स अत्थस्स पज्जत्तिमुखेनेव पटिपज्जितब्बत्ता सब्बपज्जत्तीनज्ज विज्जमानादीसु छस्वेव पज्जत्तीसु अवरोधो, तस्मा यो मायामरीचिआदयो विय अभूतत्थो, अनुस्सवादीहि गहेतब्बो विय अनुत्तमत्थो च न होति । सो रूपसद्दादिको रुपनानुभवनादिको च परमत्थसभावो सच्चिकट्टपरमत्थवसेन विज्जति । यो पन इतीति च मेति च वुच्चमानो आकारादिअपरमत्थसभावो सच्चिकट्टपरमत्थवसेन अनुपलब्धमानो अविज्जमानपज्जति नाम, किमेत्थ तं परमत्थतो अत्थि, यं इतीति वा मेति वा निद्देशं लभेथ । सुतन्ति विज्जमानपज्जति । यज्झि तं सोतेन उपलब्धं, तं परमत्थतो विज्जमानन्ति ।

तथा इतीति सोतपथमागते धम्मे उपादाय तेसं उपधारिताकारादीनं पच्चामसनवसेन । मेति ससन्ततिपरियापन्ने खन्धे करणादिविसेसविसिट्ठे उपादाय वत्तब्बतो उपादापज्जति । सुतन्ति दिट्ठादीनि उपनिधाय वत्तब्बतो उपनिधापज्जति । दिट्ठादिसभावरहिते सद्दायतने पवत्तमानोपि सुतवोहारो दुतियं, ततियन्ति आदिको विय पठमादिं निस्साय “यं न दिट्ठमुतविज्जातनिरपेक्खं, तं सुत”न्ति विज्जेय्यत्ता दिट्ठादीनि उपनिधाय वत्तब्बो होति । असुतं न होतीति हि सुतन्ति पकासितोयमत्थोति ।

एत्थ च इतीति वचनेन असम्मोहं दीपेति । पटिविद्धा हि अत्थस्स पकारविसेसा इतीति इध आयस्मता आनन्देन पच्चामट्ठा, तेनस्स असम्मोहो दीपितो । न हि सम्मूळ्हो नानप्पकारप्पटिवेधसमत्थो होति, लोभप्पहानादिवसेन नानप्पकारा दुप्पटिविद्धा च सुत्तत्था निद्विसीयन्ति । सुतन्ति वचनेन असम्मोसं दीपेति सुताकारस्स याथावतो दस्सियमानत्ता यस्स हि सुतं सम्मुट्ठं होति, न सो कालन्तरे मया सुतन्ति पटिजानाति । इच्चस्स असम्मोहेन सम्मोहाभावेन पज्जाय एव वा

सवनकालसम्भूताय तदुत्तरिकालपञ्चासिद्धि, तथा असम्भोसेन सतिसिद्धि । तत्थ पञ्चापुब्बङ्गमाय सतिया ब्यञ्जनावधारणसमत्थता । ब्यञ्जनानञ्जि पटिविज्झितब्बो आकारो नातिगम्भीरो, यथासुतधारणमेव तत्थ करणीयन्ति सतिया ब्यापारो अधिको, पञ्चा तत्थ गुणीभूता होति पञ्चाय पुब्बङ्गमाति कत्वा । सतिपुब्बङ्गमाय पञ्चाय अत्थप्पटिवेधसमत्थता । अत्थस्स हि पटिविज्झितब्बो आकारो गम्भीरोति पञ्चाय ब्यापारो अधिको, सति तत्थ गुणीभूता होति सतिया पुब्बङ्गमाति कत्वा । तदुभयसमत्थतायोगेन अत्थब्यञ्जनसम्पन्नस्स धम्मकोसस्स अनुपालनसमत्थताय धम्मभण्डागारिकत्तिसिद्धि ।

अपरो नयो — इतीति वचनेन योनिसोमनसिकारं दीपेति । तेन वुच्चमानानं आकारनिदस्सनावधारणत्थानं उपरि वक्खमानानं नानप्पकारप्पटिवेधजोतकानं अविपरीतसद्भम्मविसयत्ता । न हि अयोनिसो मनसिकरोतो नानप्पकारप्पटिवेधो सम्भवति । सुतन्ति वचनेन अविक्खेपं दीपेति, निदानपुच्छावसेन पकरणप्पत्तस्स वक्खमानस्स सुत्तस्स सवनं न समाधानमन्तरेण सम्भवति विक्खित्तचित्तस्स सवनाभावतो । तथा हि विक्खित्तचित्तो पुगगलो सब्बसम्पत्तिया वुच्चमानोपि “न मया सुतं, पुन भणथा”ति वदति । योनिसोमनसिकारेण चेत्थ अत्तसम्मापणिधिं पुब्बेकतपुज्जतज्च साधेति, सम्मा अप्पणिहितत्तस्स पुब्बे अकतपुज्जस्स वा तदभावतो । अविक्खेपेन सद्भम्मस्सवनं सप्पुरिसूपनिस्सयज्च साधेति, अस्सुतवतो सप्पुरिसूपनिस्सयरहितस्स च तदभावतो । न हि विक्खित्तचित्तो सद्भम्मं सोतुं सक्कोति, न च सप्पुरिसे अनुपस्सयमानस्स सवनं अत्थि ।

अपरो नयो — “यस्स चित्तसन्तानस्स नानाकारप्पवत्तिया नानत्थब्यञ्जनग्गहणं होति, तस्स नानाकारनिद्वेसो”ति वुत्तं । यस्मा च सो भगवतो वचनस्स अत्थब्यञ्जनप्पभेदपरिच्छेदवसेन सकलसासनसम्पत्तिओगाहनेन निरवसेसपरहितपारिपूरिकारणभूतो एवंभद्दको आकारो न सम्मा अप्पणिहितत्तनो पुब्बे अकतपुज्जस्स वा होति, तस्मा इतीति इमिना भद्दकेन आकारेण पच्छिमचक्कद्वयसम्पत्तिमत्तनो दीपेति, सुतन्ति सवनयोगेन पुरिमचक्कद्वयसम्पत्तिं । न हि अप्पतिरूपे देसे वसतो सप्पुरिसूपनिस्सयरहितस्स वा सवनं अत्थि । इच्चस्स पच्छिमचक्कद्वयसिद्धिया आसयसुद्धि सिद्धा होति, सम्मा पणिहितत्तो पुब्बे च कतपुज्जो विसुद्धासयो होति, तदविसुद्धिहेतूनां किलेसानां दूरीभावतो । तथा हि वुत्तं — “सम्मा पणिहितं चित्तं, सेय्यसो नं ततो करे”ति (ध० प० ४३) “कतपुज्जोसि त्वं, आनन्द, पधानमनुयुज्ज, खिप्पं होहिसि अनासवो”ति (दी० नि० २.२०७) च । पुरिमचक्कद्वयसिद्धिया पयोगसुद्धि । पतिरूपदेसवासेन हि सप्पुरिसूपनिस्सयेन च साधूनां दिट्ठानुगतिआपज्जनेनपि विसुद्धप्पयोगो होति । ताय च आसयसुद्धिया अधिगमव्यत्तिसिद्धि, पुब्बे एव तण्हादिट्ठिसंकिलेसानां विसोधितत्ता पयोगसुद्धिया आगमव्यत्तिसिद्धि । सुपरिसुद्धकायवचीपयोगो हि विप्पटिसाराभावतो अविक्खित्तचित्तो परियत्तियं विसारदो होति । इति पयोगासयसुद्धस्स आगमाधिगमसम्पन्नस्स वचनं अरुणुग्गमनं विय सूरियस्स उदयतो, योनिसोमनसिकारो विय च कुसलधम्मस्स, अरहति भगवतो वचनस्स पुब्बङ्गमं भवितुन्ति ठाने निदानं ठपेन्तो इति मे सुतन्तिआदिमाह ।

अपरो नयो — इतीति इमिना पुब्बे वुत्तनयेन नानप्पकारप्पटिवेधदीपकेन अत्तनो अत्थपटिभानपटिसम्भिदासम्पत्तिसब्भावं दीपेति । सुतन्ति इमिना इतिसद्वसन्निधानतो वक्खमानापेक्खाय वा सोतब्बभेदप्पटिवेधदीपकेन धम्मनिरुत्तिपटिसम्भिदासम्पत्तिसब्भावं दीपेति । इतीति च इदं वुत्तनयेनेव योनिसोमनसिकारदीपकं वचनं भासमानो “एते मया धम्मा मनसानुपेक्खिता दिट्ठिया सुप्पटिविद्धा”ति दीपेति । परियत्तिधम्मा हि “इध सीलं कथितं, इध समाधि, इध पञ्चा, एत्तका एत्थ अनुसन्धियो”तिआदिना नयेन मनसा अनुपेक्खिता अनुस्सवाकारपरिवितक्कसहिताय धम्मनिज्झानक्खन्तिभूताय जातपरिज्जासङ्घाताय वा दिट्ठिया तत्थ तत्थ

वृत्तरूपारूपधम्मे “इति रूपं, एतत्तत्तं रूपं”न्ति आदिना नयेन सुदु ववत्थपेत्वा पटिविद्धा अत्तनो परेसञ्च हितसुखावहा होन्तीति । सुत्तन्ति इदं सवनयोगपरिदीपकवचनं भासमानो “बहू मया धम्मा सुता धाता वचसा परिचिता”ति दीपेति । सोतावधानपटिविद्धा हि परियत्तिधम्मस्स सवनधारणपरिचया । तदुभयेनपि धम्मस्स स्वाक्खातभावेन अत्थब्यञ्जनपारिपूरिं दीपेन्तो सवने आदरं जनेति । अत्थब्यञ्जनपरिपुण्णञ्चि धम्मं आदरेन अस्सुणन्तो महता हिता परिबाहिरो होतीति आदरं जनेत्वा सक्कच्चं धम्मो सोतब्बो ।

इति मे सुतन्ति इमिना पन सकलेन वचनेन आयस्मा आनन्दो तथागतप्यवेदितं धम्मविनयं अत्तनो अदहन्तो असप्पुरिसभूमिं अतिक्कमति, सावकत्तं पटिजानन्तो सप्पुरिसभूमिं ओक्कमति । तथा असद्धम्मा चित्तं वुट्ठापेति, सद्धम्मे चित्तं पतिट्ठापेति । “केवलं सुतमेवेतं मया, तस्सेव पन भगवतो वचनं”न्ति दीपेन्तो अत्तानं परिमोचेति, सत्थारं अपदिसति, जिनवचनं अप्पेति, धम्मनेत्ति पतिट्ठापेति ।

अपिच **इति मे सुतन्ति** अत्तना उप्पादितभावं अप्पटिजानन्तो पुरिमस्सवनं विवरन्तो सम्मुखा पटिग्गहितमिदं मया तस्स भगवतो चतुवेसारज्जविसारदस्स दसबलधरस्स आसभट्टानट्ठायिनो सीहनादनादिनो सब्बसत्तुत्तमस्स धम्मिस्सरस्स धम्मराजस्स धम्माधिपतिनो धम्मदीपस्स धम्मसरणस्स सद्धम्मवरचक्कवत्तिनो सम्मासम्बुद्धस्स । न एत्थ अत्थे वा धम्मे वा पदे वा ब्यञ्जने वा कङ्ख्वा वा विमति वा कातब्बाति सब्बदेवमनुस्सानं इमस्मिं धम्मविनये अस्सद्धियं विनासेति, सद्धासम्पदं उप्पादेति । तेनेतं वुच्चति —

“विनासयति अस्सद्धं, सद्धं वड्ढेति सासने ।

इति मे सुतमिच्चेवं, वदं गोतमसावको”ति ॥

एत्थाह — “कस्मा पनेत्थ यथा अञ्जेसु सुत्तेसु ‘एवं मे सुतं, एकं समयं भगवा’ति आदिना कालदेसे अपदिसित्वाव निदानं भासितं, एवं न भासितं”न्ति? अपरे ताव आहु — न पन थेरेन भासितत्ता । इदञ्चि निदानं न आयस्मता आनन्देन पठमं भासितं खुज्जुत्तराय पन भगवता उपासिकासु बहुस्सुतभावेन एतदग्गे ठपिताय सेक्खप्पटिसम्भिदाप्पत्ताय अरियसाविकाय सामावतिप्पमुखानं पञ्चन्नं इत्थिसतानं पठमं भासितं ।

तत्रायं अनुपुब्बीकथा — इतो किर कप्पसतसहस्समत्थके पदुमुत्तरो नाम सम्मासम्बुद्धो लोके उप्पज्जित्वा पवत्तितवरधम्मचक्को हंसवतियं विहरति । अथेकदिवसं हंसवतियं एका कुलधीता सत्थु धम्मदेसनं सोतुं गच्छन्तीहि उपासिकाहि सद्धिं आरामं गता । सत्थारं एकं उपासिकं बहुस्सुतानं एतदग्गे ठपेन्तं दिस्वा अधिकारं कत्वा तं ठानन्तरं पत्थेसि । सत्थापि नं ब्याकासि “अनागते गोतमस्स नाम सम्मासम्बुद्धस्स साविकानं उपासिकानं बहुस्सुतानं अग्गा भविस्सती”ति । तस्सा यावजीवं कुसलं कत्वा देवलोके निब्बत्तित्वा पुन मनुस्सेसूति एवं देवमनुस्सेसु संसरन्तिया कप्पसतसहस्सं अतिक्कन्तं । अथ इमस्मिं भद्दकप्पे अम्हाकं भगवतो काले सा देवलोकतो चवित्वा घोसकसेट्ठिस्स गेहे दासिया कुच्छिस्मिं पटिसन्धिं गण्णिह, उत्तरातिस्सा नाम अकंसु । सा जातकाले खुज्जा अहोसीति खुज्जुत्तरात्वेव पज्जायित्थ । सा अपरभागे घोसकसेट्ठिना रज्जो उतेनस्स सामावतिया दिन्नकाले तस्सा परिचारिकभावेन दिन्ना रज्जो उतेनस्स अन्तेपुरे वसति ।

तेन च समयेन कोसम्बियं घोसकसेट्ठिकुक्कुटसेट्ठिपावारिकसेट्ठिनो भगवन्तं उद्दिस्स तयो विहारे कारेत्वा जनपदचारिकं चरन्ते तथागते कोसम्बिनगरं सम्पत्ते बुद्धप्पमुखस्स भिक्खुसङ्घस्स विहारे निय्यादेत्वा महादानानि पवत्तेसुं,

मासमत्तं अतिक्कमि। अथ नेसं एतदहोसि — “बुद्धा नाम सब्बलोकानुकम्पका, अज्जेसम्पि ओकासं दस्सामा”ति कोसम्बिनगरवासिनोपि जनस्स ओकासं अकंसु। ततो पट्टाय नागरा वीथिसभागेन गणसभागेन महादानं देन्ति। अथेकदिवसं सत्था भिक्खुसङ्घपरिवृतो मालाकारजेट्टकस्स गेहे निसीदि। तस्मिं खणे खुज्जुत्तरा सामावतिया पुष्फानि गहेतुं अट्ट कहापणे आदाय तं गेहं अगमासि। मालाकारजेट्टको तं दिस्वा “अम्म उत्तरे, अज्ज तुहं पुष्फानि दातुं खणो नत्थि, अहं बुद्धप्पमुखं भिक्खुसङ्घं परिविसामि, त्वम्पि परिवेसनाय सहायिका होहि, एवं इतो परेसं वेय्यावच्चकरणतो मुच्चिस्ससी”ति आह। ततो खुज्जुत्तरा बुद्धानं भत्तगे वेय्यावच्चं अकासि। सा सत्थारा उपनिसिन्नकथावसेन कथितं सब्बमेव धम्मं उगगणिह, अनुमोदनं पन सुत्वा सोतापत्तिफले पतिट्ठासि।

सा अज्जेसु दिवसेसु चत्तारोव कहापणे दत्वा पुष्फानि गहेत्वा गच्छति, तस्मिं पन दिवसे दिट्ठसच्चभावेन परसन्तके चित्तं अनुप्पादेत्वा अट्टपि कहापणे दत्वा पच्छिं पूरेत्वा पुष्फानि गहेत्वा सामावतिया सन्तिकं अगमासि। अथ नं सा पुच्छि “अम्म उत्तरे, त्वं अज्जेसु दिवसेसु न बहूनि पुष्फानि आहरसि, अज्ज पन बहुकानि, किं नो राजा उत्तरितरं पसन्नो”ति? सा मुसा वत्तुं अभब्बताय अतीते अत्तना कतं अनिगूहित्वा सब्बं कथेसि। अथ “कस्मा अज्ज बहूनि आहरसी”ति च वुत्ता “अज्जाहं सम्मासम्बुद्धस्स धम्मं सुत्वा अमतं सच्छाकासिं, तस्मा तुम्हे न वज्जेमी”ति आह। तं सुत्वा “अरे दुट्ठदासि, एत्तकं कालं तथा गहिते कहापणे देही”ति अतज्जेत्वा पुब्बहेतुना चोदियमाना “अम्म, तथा पीतं अमतं, अम्हेपि पायेही”ति वत्वा “तेन हि मं न्हापेही”ति वुत्ते सोळसहि गन्धोदकघटेहि न्हापेत्वा द्वे मट्ठसाटके दापेसि। सा एकं निवासेत्वा एकं पारुपित्वा आसनं पज्जापेत्वा आसने निसीदित्वा विचित्रबीजनिं आदाय नीचासनेसु निसिन्नानि पज्ज मातुगामसतानि आमन्तेत्वा सेखप्पटिसम्भिदासु ठत्वा सत्थारा देसितनियामेनेव तासं धम्मं देसेसि। देसनावसाने ता सब्बा सोतापत्तिफले पतिट्ठहिंसु। ता सब्बापि खुज्जुत्तरं वन्दित्वा “अम्म, अज्ज पट्टाय त्वं किलिडुकम्मं मा करि, अम्हाकं मातुद्धाने आचरियद्धाने च पतिट्ठाही”ति गरुद्धाने ठपयिंसु।

कस्मा पनेसा दासी हुत्वा निब्बत्ताति? सा किर कस्सपसम्मासम्बुद्धकाले बाराणसियं सेट्ठिधीता हुत्वा निब्बत्ता। एकाय खीणासवत्थेरिया उपट्ठाककुलं गताय “एतं मे अय्ये, पसाधनपेळिकं देथा”ति वेय्यावच्चं कारेसि। थेरीपि “अदेन्तिया मयि आघातं उप्पादेत्वा निरये निब्बत्तिस्सति, देन्तिया परेसं दासी हुत्वा निब्बत्तिस्सति, निरयसन्तापतो दासिभावो सेय्यो”ति अनुद्दयं पटिच्च तस्सा वचनं अकासि। सा तेन कम्मेन पज्ज जातिसतानि परेसं दासीयेव हुत्वा निब्बत्ति।

कस्मा पन खुज्जा अहोसि? अनुप्पन्ने किर बुद्धे अयं बाराणसिरज्जो गेहे वसन्ती एकं राजकुलूपकं पच्चेकबुद्धं थोकं खुज्जधातुकं दिस्वा अत्तना सहवासीनं मातुगामानं पुरतो परिहासं करोन्ती यथावज्जं केळिवसेन खुज्जाकारं दस्सेसि, तस्मा खुज्जा हुत्वा निब्बत्ति।

किं पन कत्वा पज्जवन्ती जाताति? अनुप्पन्ने किर बुद्धे अयं बाराणसिरज्जो गेहे वसन्ती अट्ट पच्चेकबुद्धे राजगेहतो उण्हापायासस्स पूरिते पत्ते परिवत्तित्वा परिवत्तित्वा गणहन्ते दिस्वा अत्तनो सन्तकानि अट्ट दन्तवलयाणि “इध ठपेत्वा गणहथा”ति अदासि। ते तथा कत्वा ओलोकेसु। “तुम्हाकज्जेव तानि परिच्चत्तानि, गहेत्वा गच्छथा”ति आह। ते नन्दमूलकपब्भारं अगमंसु। अज्जापि तानि वलयाणि अरोगानेव। सा तस्स निस्सन्देन पज्जवन्ती जाता।

अथ नं सामावतिप्पमुखानि पज्ज इत्थिसतानि “अम्म, त्वं दिवसे दिवसे सत्थु सन्तिकं गन्त्वा भगवता देसितं धम्मं सुत्वा अम्हाकं देसेही”ति वदिंसु। सा तथा करोन्ती अपरभागे तिपिटकधरा जाता। तस्मा नं सत्था — “एतदग्गं, भिक्खवे,

मम साविकानं बहुस्सुतानं उपासिकानं यदिदं खुज्जुत्तरा”ति एतदगगे ठपेसि । इति उपासिकासु बहुस्सुतभावेन सत्थारा एतदगगे ठपिता पटिसम्भिदाप्पत्ता खुज्जुत्तरा अरियसाविका सत्थरि कोसम्बियं विहरन्ते कालेन कालं सत्थु सन्तिकं गन्त्वा धम्मं सुत्वा अन्तेपुरं गन्त्वा सामावतिप्पमुखानं पञ्चन्नं इत्थिसतानं अरियसाविकानं सत्थारा देसितनियामेन यथासुतं धम्मं कथेन्ती अत्तानं परिमोचेत्वा सत्थु सन्तिके सुतभावं पकासेन्ती “वुत्तज्हेतं भगवता वुत्तमरहताति मे सुत”न्ति निदानं आरोपेसि ।

यस्मा पन तस्मिंयेव नगरे भगवतो सम्मुखा सुत्वा तदहेव ताय तासं भासितं, तस्मा “एकं समयं भगवा कोसम्बियं विहरती”ति कालदेसं अपदिसितुं पयोजनसम्भवोव नत्थि सुपाकटभावतो । भिक्खुनियो चस्सा सन्तिके इमानि सुत्तानि गण्हिंसु । एवं परम्पराय भिक्खूसुपि ताय आरोपितं निदानं पाकटं अहोसि । अथ आयस्मा आनन्दो तथागतस्स परिनिब्बानतो अपरभागे सत्तपण्णिगुहायं अजातसत्तुना कारापिते सद्धम्ममण्डपे महाकस्सपप्पमुखस्स वसीगणस्स मज्झे निसीदित्वा धम्मं सङ्गायन्तो इमेसं सुत्तानं निदानस्स द्वेळ्हकं परिहरन्तो ताय आरोपितनियामेनेव निदानं आरोपेसीति ।

केचि पनेत्थ बहुप्पकारे पपञ्चेन्ति । किं तेहि? अपिच नानानयेहि सङ्गीतिकारा धम्मविनयं सङ्गायिंसु । अनुबुद्धा हि धम्मसङ्गाहकमहाथेरा, ते सम्मदेव धम्मविनयस्स सङ्गायनाकारं जानन्ता कत्थचि “एवं मे सुत”न्तिआदिना, कत्थचि “तेन समयेना”तिआदिना, कत्थचि गाथाबन्धवसेन निदानं ठपेन्ता, कत्थचि सब्बेन सब्बं निदानं अट्टपेन्ता वग्गसङ्गाहादिवसेन धम्मविनयं सङ्गायिंसु । तत्थ इध वुत्तज्हेतन्तिआदिना निदानं ठपेत्वा सङ्गायिंसु, किञ्चि सुत्तगेय्यादिवसेन नवङ्गमिदं बुद्धवचनं । यथा चेत्तं, एवं सब्बेसम्पि सम्मासम्बुद्धानं । वुत्तज्हेतं “अप्पकज्ज नेसं अहोसि सुत्तं गेय्य”न्तिआदि । तत्थ इतिवुत्तकङ्गस्स अज्जं किञ्चि न पज्जायति तब्भावनिमित्तं ठपेत्वा “वुत्तज्हेतं... पे०... मे सुत”न्ति इदं वचनं । तेनाहु अट्टकथाचरिया “वुत्तज्हेतं भगवताति आदिनयप्पवत्ता द्वादसुत्तरसतसुत्तन्ता इतिवुत्तक”न्ति । तस्मा सत्थु अधिप्पायं जानन्तेहि धम्मसङ्गाहकेहि अरियसाविकाय वा इमेसं सुत्तानं इतिवुत्तकङ्गभावजापनत्थं इमिनाव नयेन निदानं ठपितन्ति वेदितब्बं ।

किमत्थं पन धम्मविनयसङ्गहे कथिरमाने निदानवचनं? ननु भगवता भासितवचनस्सेव सङ्गहो कातब्बोति? वुच्चते — **देसनाय ठितिअसम्मोससद्धेय्यभावसम्पादनत्थं** । कालदेसदेसकपरिसापदेसेहि उपनिबन्धित्वा ठपिता हि देसना चिरट्टितिका होति असम्मोसधम्मा सद्धेय्या च देसकालकत्तुहेतुनिमित्तेहि उपनिबद्धो विय वोहारविनिच्छयो । तेनेव च आयस्मता महाकस्सपेन ब्रह्मजालमूलपरियायसुत्तादीनं देसादिपुच्छासु कतासु तासं विस्सज्जनं करोन्तेन धम्मभण्डागारिकेन “एवं मे सुत”न्तिआदिना निदानं भासितं । इध पन देसकालस्स अग्गहणे कारणं वुत्तमेव ।

अपिच सत्थु सम्पत्तिप्पकासनत्थं निदानवचनं । तथागतस्स हि भगवतो पुब्बरचनानुमानागमतक्काभावतो सम्मासम्बुद्धभावसिद्धि । न हि सम्मासम्बुद्धस्स पुब्बरचनादीहि अत्थो अत्थि सब्बत्थ अप्पटिहतजाणाचारताय एकप्पमाणत्ता च जेय्यधम्मसे । तथा आचरियमुट्ठिधम्ममच्छरियसासनसावकानुरागाभावतो खीणासवभावसिद्धि । न हि सब्बसो खीणासवस्स ते सम्भवन्तीति सुविसुद्धस्स परानुगहपवति । एवं देसकसंकिलेसभूतानं दिट्ठिशीलसम्पदादूसकानं अविज्जातण्हानं अच्चन्ताभावसंसूचकेहि जाणसम्पदापहानसम्पदाभिव्यज्जकेहि च सम्बुद्धविसुद्धभावेहि पुरिमवेसारज्जद्वयसिद्धि, ततो च अन्तरायिकनिय्यानिकधम्मसे असम्मोहभावसिद्धितो पच्छिमवेसारज्जद्वयसिद्धीति भगवतो चतुवेसारज्जसमन्नागमो अत्तहितपरहितपटिपत्ति च निदानवचनेन पकासिता होति, तत्थ तत्थ सम्पत्तपरिसाय अज्झासयानुरूपं ठानुप्पत्तिकप्पटिभानेन धम्मदेसनादीपनतो । इध पन अनवसेसतो कामदोसप्पहानं विधाय देसनादीपनतो

चाति योजेतब्बं । तेन वुत्तं “सत्थु सम्पत्तिप्पकासनत्थं निदानवचन”न्ति । एत्थ च “भगवता अरहता”ति इमेहि पदेहि यथावुत्तअत्थविभावनता हेट्ठा दस्सिता एव ।

तथा **सासनसम्पत्तिप्पकासनत्थं** निदानवचनं । जाणकरुणापरिग्गहितसब्बकिरियस्स हि भगवतो नत्थि निरत्थका पटिपत्ति अत्तहिता वा । तस्मा परेसंयेवत्थाय पवत्तसब्बकिरियस्स सम्मासम्बुद्धस्स सकलम्पि कायवचीमनोकम्मं यथापवत्तं वुच्चमानं दिट्ठधम्मिकसम्परायिकपरमत्थेहि यथारहं सत्तानं अनुसासनत्थेन सासनं, न कब्बरचना । तयिदं सत्थु चरितं कालदेसदेसकपरिसापदेसेहि तत्थ तत्थ निदानवचनेहि यथारहं पकासियति । इध पन देसकपरिसापदेसेहीति योजेतब्बं । तेन वुत्तं “सासनसम्पत्तिप्पकासनत्थं निदानवचन”न्ति ।

अपिच सत्थुनो **पमाणभावप्पकासनेन सासनस्स पमाणभावदस्सनत्थं** निदानवचनं । तज्ज्वस्स पमाणभावदस्सनं हेट्ठा वुत्तनयानुसारेन “भगवता अरहता”ति इमेहि पदेहि विभावितन्ति वेदितब्बं । इदमेत्थ निदानवचनप्पयोजनस्स मुखमत्तनिदस्सनन्ति ।

निदानवण्णना निट्ठिता ।

१. एककनिपातो

१. पठमवग्गो

१. लोभसुत्तवण्णना

१. इदानी **एकधम्मं, भिक्खवे, पजहथाति** आदिना नयेन भगवता निक्खित्तस्स सुत्तस्स वण्णनाय ओकासो अनुप्पत्तो । सा पनेसा अत्थवण्णना यस्मा सुत्तनिक्खेपं विचारेत्वा वुच्चमाना पाकटा होति, तस्मा सुत्तनिक्खेपं ताव विचारेस्साम । चत्तारो हि सुत्तनिक्खेपा — अत्तज्झासयो, परज्झासयो, पुच्छावसिको, अट्ठुप्पत्तिकोति । यथा हि अनेकसतअनेकसहस्सभेदानिपि सुत्तन्तानि संकिलेसभागियादिपट्टाननयेन सोळसविधतं नातिवत्तन्ति, एवं अत्तज्झासयादिसुत्तनिक्खेपवसेन चतुब्बिधतं नातिवत्तन्तीति । तत्थ यथा अत्तज्झासयस्स अट्ठुप्पत्तिया च परज्झासयपुच्छावसिकेहि सद्धिं संसग्गभेदो सम्भवति अत्तज्झासयो च परज्झासयो च, अत्तज्झासयो च पुच्छावसिको च, अट्ठुप्पत्तिको च परज्झासयो च, अट्ठुप्पत्तिको च पुच्छावसिको चाति अज्झासयपुच्छानुसन्धिसम्भवतो; एवं यदिपि अट्ठुप्पत्तिया अत्तज्झासयेनपि संसग्गभेदो सम्भवति, अत्तज्झासयादीहि पन पुरतो ठितेहि अट्ठुप्पत्तिया संसग्गो नत्थीति निरवसेसो पट्टाननयो न सम्भवति । तदन्तो गधत्ता वा सम्भवन्तानं सेसनिक्खेपानं मूलनिक्खेपवसेन चत्तारो सुत्तनिक्खेपा वुत्ताति वेदितब्बं ।

तत्रायं वचनत्थो — निक्खिपीयतीति निक्खेपो, सुत्तं एव निक्खेपो **सुत्तनिक्खेपो** । अथ वा निक्खिपनं निक्खेपो, सुत्तस्स निक्खेपो सुत्तनिक्खेपो, सुत्तदेसनाति अत्थो । अत्तनो अज्झासयो अत्तज्झासयो, सो अस्स अत्थि कारणभूतोति **अत्तज्झासयो**, अत्तनो अज्झासयो एतस्साति वा अत्तज्झासयो । **परज्झासये**पि एसेव नयो । पुच्छाय वसोति पुच्छावसो । सो एतस्स अत्थीति **पुच्छावसिको** । सुत्तदेसनाय वत्थुभूतस्स अत्थस्स उप्पत्ति अत्थुप्पत्ति, अत्थुप्पत्ति एव अट्ठुप्पत्ति थ-कारस्स ठ-कारं कत्वा, सा एतस्स अत्थीति **अट्ठुप्पत्तिको** । अथ वा निक्खिपीयति सुत्तं एतेनाति निक्खेपो, अत्तज्झासयादि एव ।

एतस्मिं पन अत्थविकप्पे अत्तनो अज्झासयो अत्तज्झासयो। परेसं अज्झासयो परज्झासयो। पुच्छीयतीति पुच्छा, पुच्छितब्बो अत्थो, पुच्छावसेन पवत्तं धम्मप्पटिग्गाहकानं वचनं पुच्छावसं, तदेव निक्खेपसद्वापेक्खाय पुच्छावसिकोति पुल्लिङ्गवसेन वुत्तं। तथा अट्ठप्पत्ति एव अट्ठप्पत्तिकोति एवमेत्थ अत्थो वेदितब्बो।

अपिच परेसं इन्द्रियपरिपाकादिकारणनिरपेक्खत्ता अत्तज्झासयस्स विसुं सुत्तनिक्खेपभावो युत्तो, केवलं अत्तनो अज्झासयेनेव धम्मतन्तिठपनत्थं पवत्तितदेसनत्ता। परज्झासयपुच्छावसिकानं पन परेसं अज्झासयपुच्छानं देसनापवत्तिहेतुभूतानं उप्पत्तियं पवत्तितानं कथं अट्ठप्पत्तियं अनवरोधो, पुच्छावसिकट्ठप्पत्तिकानं वा परज्झासयानुरोधेन पवत्तितानं कथं परज्झासये अनवरोधोति? न चोदेतब्बमेतं। परेसज्झि अभिनीहारपरिपुच्छादिविनिमुत्तस्सेव सुत्तदेसनाकारणुप्पादस्स अट्ठप्पत्तिभावेन गहितत्ता परज्झासयपुच्छावसिकानं विसुं गहणं। तथा हि ब्रह्मजालधम्मदायादसुत्तादीनं (दी० न० १.१ आदयो) वण्णावण्णआमिसुप्पादादिदेसनानिमित्तं अट्ठप्पत्ति वुच्चति। परेसं पुच्छं विना अज्झासयमेव निमित्तं कत्वा देसितो परज्झासयो, पुच्छावसेन देसितो पुच्छावसिकोति पाकटोयमत्थोति।

यानि भगवा परेहि अनज्झिट्ठो केवलं अत्तनो अज्झासयेनेव कथेति, सेय्यथिदं — आकङ्खेय्यसुत्तं, तुवट्ठकसुत्तन्ति एवमादीनि (सु० नि० ९२१ आदयो; म० नि० १.६४ आदयो), तेसं अत्तज्झासयो निक्खेपो।

यानि पन “परिपक्का खो राहुलस्स विमुत्तिपरिपाचनीया धम्मा, यन्नूनाहं राहुलं उत्तरिं आसवानं खये विनेय्य”न्ति एवं परेसं अज्झासयं खन्ति अभिनीहारं बुज्झनभावञ्च ओलोकेत्वा परज्झासयवसेन कथितानि, सेय्यथिदं — राहुलोवादसुत्तं, धम्मचक्कप्पवत्तनसुत्तन्ति एवमादीनि (म० नि० २.१०७ आदयो; ३.४१६ आदयो; सं० नि० ३.५९; महाव० १९-२०), तेसं परज्झासयो निक्खेपो।

भगवन्तं पन उपसङ्कमित्वा देवा मनुस्सा चतस्सो परिसा चत्तारो वण्णा च तथा तथा पज्जं पुच्छन्ति “बोज्झङ्गा बोज्झङ्गाति, भन्ते, वुच्चन्ति, नीवरणा नीवरणाति वुच्चन्ती”ति आदिना, एवं पुट्ठेन भगवता यानि कथितानि बोज्झङ्गसंयुत्तादीनि (सं० नि० ५.१८६) तेसं पुच्छावसिको निक्खेपो।

यानि पन तानि उप्पन्नं कारणं पटिच्च कथितानि, सेय्यथिदं — धम्मदायादं, पुत्तमंसूपमं, दारुक्खन्धूपमन्ति एवमादीनि (म० नि० १.२९; सं० नि० २.६३), तेसं अट्ठप्पत्तिको निक्खेपो।

एवमिमेसु चतूसु सुत्तनिक्खेपेसु इमस्स सुत्तस्स परज्झासयो निक्खेपो। परज्झासयवसेन हेतं निक्खित्तं। केसं अज्झासयेन? लोभे आदीनवदस्सीनं पुगलानं। केचि पन “अत्तज्झासयो”ति वदन्ति।

तत्थ **एकधम्मं, भिक्खवेति** आदीसु **एकसद्दो** अत्थेव अज्जत्थे “सस्सतो अत्ता च लोको च, इदमेव सच्चं मोघमज्जन्ति इत्थेके अभिवदन्ती”ति आदीसु (म० नि० ३.२७)। अत्थि सेट्ठे “चेतसो एकोदिभाव”न्ति आदीसु (दी० नि० १.२२८; पारा० ११)। अत्थि असहाये “एको वूपकट्ठो”ति आदीसु (दी० नि० १.४०५)। अत्थि सङ्घायं “एकोव खो, भिक्खवे, खणो च समयो च ब्रह्मचरियवासाया”ति आदीसु (अ० नि० ८.२९)। इथापि सङ्घायमेव दट्ठब्बो।

धम्म-सद्दो परियत्तिसच्चसमाधिपज्जापकतिपुज्जापत्तिसुज्जताजेय्यसभावादीसु दिस्सति। तथा हिस्स “इध भिक्खु धम्मं परियापुणाती”ति आदीसु (अ० नि० ५.७३) परियत्ति अत्थो। “दिट्ठधम्मो”ति आदीसु (दी० नि० १.२९९) सच्चानि।

“एवंधम्मा ते भगवन्तो अहेसु”न्तिआदीसु (दी० नि० २.१३; ३.१४२) समाधि । “सच्चं धम्मो धिति चागो, सवे पेच्च न सोचती”तिआदीसु (जा० १.१.५७) पज्जा । “जातिधम्मानं, भिक्खवे, सत्तानं एवं इच्छा उपपज्जती”तिआदीसु (दी० नि० २.३९८) पकति । “धम्मो हवे रक्खति धम्मचारि”न्तिआदीसु (जा० १.१०.१०२) पुज्जं । “तिण्णं धम्मानं अज्जतरेन वदेय्य पाराजिकेन वा सङ्गादिसेसेन वा पाचित्तियेन वा”तिआदीसु (पारा० ४४४) आपत्ति । “तस्मिं खो पन समये धम्मा होन्ती”तिआदीसु (ध० स० १२१) सुज्जता । “सब्बे धम्मा सब्बाकारेन बुद्धस्स भगवतो जाणमुखे आपाथं आगच्छन्ती”तिआदीसु (महानि० १५६; चूळनि० मोघराजमाणवपुच्छानिदेस ८५) जेय्यो । “कुसला धम्मा अकुसला धम्मा”तिआदीसु (ध० स० तिकमातिका १) सभावो अत्थो । इधापि सभावो । तस्मा **एकधम्मन्ति** एकं संकिलेससभावन्ति अधिप्पायो । एको च सो धम्मो चाति एकधम्मो, तं एकधम्मं ।

भिक्खवेति भिक्खू आलपति । किमत्थं पन भगवा धम्मं देसेन्तो भिक्खू आलपति, न धम्ममेव देसेतीति? सतिजननत्थं । भिक्खू हि अज्जं चिन्तेन्तापि धम्मं पच्चवेक्खन्तापि कम्मट्ठानं मनसि करोन्तापि निसिन्ना होन्ति । ते पठमं अनालपित्वा धम्मे देसियमाने “अयं देसना किंनिदाना, किंपच्चया”ति सल्लक्खेतुं न सक्कोन्ति । आलपिते पन सतिं उपट्ठपेत्वा सल्लक्खेतुं सक्कोन्ति, तस्मा सतिजननत्थं “भिक्खवे”ति आलपति । तेन च तेसं भिक्खनसीलतादिगुणयोगसिद्धेन वचनेन हीनाधिकजनसेवितं वृत्तिं पकासेन्तो उद्धतदीनभावनिग्गहं करोति । “भिक्खवे”ति इमिना करुणाविष्कारसोम्महदयनयननिपातपुब्बङ्गमेन वचनेन ते अत्तनो मुखाभिमुखे करोन्तो तेन च कथेतुकम्यतादीपकेन वचनेन नेसं सोतुकम्यतं जनेति । तेनेव च सम्बोधनत्थेन साधुकं सवनमनसिकारेपि नियोजेति । साधुकं सवनमनसिकारायत्ता हि सासनसम्पत्ति ।

अज्जेसुपि देवमनुस्सेसु परिसपरियापन्नेसु विज्जमानेसु कस्मा भिक्खू एव आमन्तेसीति? जेट्ठसेट्ठासन्नसदासन्निहितभावतो । सब्बपरिससाधारणा हि भगवतो धम्मदेसना, परिसाय च जेट्ठा भिक्खू पठमुप्पन्नत्ता, सेट्ठा अनगारियभावं आदिं कत्वा सत्थु चरियानुविधायकत्ता सकलसासनपटिग्गाहकत्ता च, आसन्ना तत्थ निसिन्नेसु समीपवुत्तिया, सदासन्निहिता सत्थुसन्निकावचरत्ता । अपिच ते धम्मदेसनाय भाजनं यथानुसिद्धं पटिपत्तिसम्भावतो, विसेसतो च एकच्चे भिक्खू सन्धाय अयं देसनाति ते एव आलपि ।

पजहथाति एत्थ **पहानं** नाम तदङ्गप्पहानं, विक्खम्भनप्पहानं, समुच्छेदप्पहानं, पटिप्पस्सद्विप्पहानं, निस्सरणप्पहानन्ति पज्चविधं । तत्थ यं दीपालोकेनेव तमस्स पटिपक्खभावतो अलोभादीहि लोभादिकस्स, नामरूपपरिच्छेदादिविपस्सनाजाणेहि तस्स तस्स अनत्थस्स पहानं । सेय्यथिदं — परिच्चागेन लोभादिमलस्स, सीलेन पाणातिपातादिदुस्सील्यस्स, सद्धादीहि अस्सद्वियादिकस्स, नामरूपववत्थानेन सक्कायदिट्ठिया, पच्चयपरिग्गहेन अहेतुविसमहेतुदिट्ठीनं, तस्सेव अपरभागेन कङ्कावितरणेन कथंकथीभावस्स, कलापसम्मसनेन “अहं ममा”ति गाहस्स, मग्गामग्गववत्थानेन अमग्गे मग्गसज्जाय, उदयदस्सनेन उच्छेददिट्ठिया, वयदस्सनेन सस्सतदिट्ठिया, भयदस्सनेन सभयेसु अभयसज्जाय, आदीनवदस्सनेन अस्सादसज्जाय, निब्बिदानुपस्सनेन अभिरतिसज्जाय, मुच्चितुकम्यताजाणेन अमुच्चितुकम्यताय उपेक्खाजाणेन अनुपेक्खाय, अनुलोमेन धम्मद्वितिया, निब्बानेन पटिलोमभावस्स, गोत्रभुना सङ्खारनिमित्तग्गाहस्स पहानं, एतं **तदङ्गप्पहानं** नाम ।

यं पन उपचारप्पनाभेदेन समाधिना पवत्तिभावनिवारणतो घटप्पहारेनेव उदकपिट्ठे सेवालस्स तेसं तेसं नीवरणादिधम्मानं पहानं, एतं **विक्खम्भनप्पहानं** नाम । यं चतुन्नं अरियमग्गानं भावितत्ता तंतंमग्गवतो अत्तनो सन्ताने

“दिट्ठिगतानं पहानाया”तिआदिना (ध० स० २७७; विभ० ६२८) नयेन वुत्तस्स समुदयपक्खियस्स किलेसगणस्स अच्चन्तं अप्पवत्तिभावेन समुच्छिन्दनं, इदं **समुच्छेदप्पहानं** नाम । यं पन फलक्खणे पटिप्पस्सद्धतं किलेसानं, एतं **पटिप्पस्सद्धिप्पहानं** नाम । यं पन सब्बसङ्खतनिस्सट्ठा पहीनसब्बसङ्खतं निब्बानं, एतं **निस्सरणप्पहानं** नाम । एवं पञ्चविधे पहाने अनागामिकभावकरस्स पहानस्स अधिप्पेतत्ता इध समुच्छेदप्पहानन्ति वेदितब्बं । तस्मा **पजहथा**ति परिच्चजथ, समुच्छिन्दथाति अत्थो ।

अहन्ति भगवा अत्तानं निदिसति । वोति अयं वोसद्धो पच्चत्तउपयोगकरणसामिवचनपदपूरणसम्पदानेसु दिस्सति । तथा हि “कच्चि, पन वो अनुरुद्धा, समग्गा सम्मोदमाना”तिआदीसु (म० नि० १.३२६) पच्चत्ते आगतो । “गच्छथ, भिक्खवे, पणामेमि वो”तिआदीसु (म० नि० २.१५७) उपयोगे । “न वो मम सन्तिके वत्थब्ब”न्तिआदीसु (म० नि० २.१५७) करणे । “सब्बेसं वो, सारिपुत्त, सुभासित”न्तिआदीसु (म० नि० १.३४५) सामिवचने । “ये हि वो अरिया परिसुद्धकायकम्मन्ता”तिआदीसु (म० नि० १.३५) पदपूरणे । “वनपत्थपरियायं वो, भिक्खवे, देसेस्सामी”तिआदीसु (म० नि० १.१९०) सम्पदाने । इधापि सम्पदाने एव दट्ठब्बो ।

पाटिभोगोति पटिभू । सो हि धारणकं पटिच्च धनिकस्स, धनिकं पटिच्च धारणकस्स पटिनिधिभूतो धनिकसन्तकस्स ततो हरणादिसङ्घातेन भुज्जनेन भोगोति पटिभोगो, पटिभोगो एव पाटिभोगो । **अनागामिताया**ति अनागामिभावत्थाय । पटिसन्धिगहणवसेन हि कामभवस्स अनागमनतो अनागामी । यो यस्स धम्मस्स अधिगमेन अनागामीति वुच्चति, सफलो सो ततियमग्गो अनागामिता नाम । इति भगवा वेनेय्यदमनकुसलो वेनेय्यज्झासयानुकूलं ततियमग्गाधिगमं लहुना उपायेन एकधम्मपूरणतामत्तेन थिरं कत्वा दस्सेसि यथा तं सम्मासम्बुद्धो । भिन्नभूमिकापि हि पटिघसंयोजनादयो ततियमग्गवज्झा किलेसा कामरागप्पहानं नातिवत्तन्तीति ।

कस्मा पनेत्थ भगवा अत्तानं पाटिभोगभावे ठपेसि? तेसं भिक्खूनां अनागामिमग्गाधिगमाय उस्साहजननत्थं । पस्सति हि भगवा “मया ‘एकधम्मं, भिक्खवे, पजहथ, अहं वो पाटिभोगो अनागामिताया’ति वुत्ते इमे भिक्खू अद्धा तं एकधम्मं पहाय सक्का ततियभूमिं समधिगन्तुं, यतो धम्मस्सामि पठममाह ‘अहं पाटिभोगो’ति उस्साहजाता तदत्थाय पटिपज्जितब्बं मज्जिस्सन्ती”ति । तस्मा उस्साहजननत्थं अनागामिताय तेसं भिक्खूनां अत्तानं पाटिभोगभावे ठपेसि ।

कतमं एकधम्मन्ति एत्थ **कतमन्ति** पुच्छावचनं । पुच्छा च नामेसा पञ्चविधा — अदिट्ठजोतनापुच्छा, दिट्ठसंसन्दनापुच्छा, विमतिच्छेदनापुच्छा, अनुमतिपुच्छा, कथेतुकम्यतापुच्छाति । तत्थ पकतिया लक्खणं अज्जातं होति अदिट्ठं अतुलितं अतीरितं अविभूतं अविभावितं, तस्स जाणाय दस्सनाय तुलनाय तीरणाय विभूतत्थाय विभावनत्थाय पज्जं पुच्छति, अयं **अदिट्ठजोतनापुच्छा** । पकतिया लक्खणं जातं होति दिट्ठं तुलितं तीरितं विभूतं विभावितं । सो अज्जेहि पण्डितेहि सद्धि संसन्दनत्थाय पज्जं पुच्छति, अयं **दिट्ठसंसन्दनापुच्छा** । पकतिया संसयपक्खन्दो होति विमतिपक्खन्दो द्वेळ्हकजातो — “एवं नु खो, न नु खो, किं नु खो, कथं नु खो”ति, सो विमतिच्छेदनत्थाय पज्जं पुच्छति, अयं **विमतिच्छेदनापुच्छा** । भगवा हि अनुमतिगहणत्थं पज्जं पुच्छति — “तं किं मज्जथ, भिक्खवे, रूपं निच्चं वा अनिच्चं वा”तिआदिना (सं० नि० ३.५९; महाव० २१), अयं **अनुमतिपुच्छा** । भगवा भिक्खूनां कथेतुकम्यताय पज्जं पुच्छति — “चत्तारोमे, भिक्खवे, आहारा भूतानं वा सत्तानं ठितिया सम्भवेसीनं वा अनुग्गहाय । कतमे चत्तारो”ति (सं० नि० २.११) अयं **कथेतुकम्यतापुच्छा** ।

तत्थ पुरिमा तिस्सो पुच्छा बुद्धानं नत्थि । कस्मा? तीसु हि अद्धासु किञ्चि सङ्खतं अद्धाविमुत्तं वा असङ्खतं

सम्मासम्बुद्धानं अदिट्ठं अतुलितं अतीरितं अविभूतं अविभावितं नाम नत्थि । तेन नेसं अदिट्ठजोतनापुच्छा नत्थि । यं पन तेहि अत्तनो जाणेन पटिविद्धं, तस्स अज्जेन समणेन वा ब्राह्मणेन वा देवेन वा मारेन वा ब्रह्मना वा सद्धिं संसन्दनकिच्चं नत्थि, तेन नेसं दिट्ठसंसन्दनापुच्छापि नत्थि । यस्मा पन बुद्धा भगवन्तो अकथंकथी तिण्णविचिकिच्छा सब्बधम्मेषु विगतसंसया, तेन नेसं विमतिच्छेदनापुच्छापि नत्थि । इतरा पन द्वे पुच्छा अत्थि, तासु अयं कथेतुकम्यतापुच्छाति वेदितब्बा ।

इदानीं तां पुच्छाय पुट्टमत्थं सरूपतो दस्सेन्तो “लोभं, भिक्खवे, एकधम्म”न्ति आदिमाह । तत्थ लुब्भन्ति तेन, सयं वा लुब्भति, लुब्भनमत्तमेव वा तन्ति लोभो । स्वायं आरम्मणग्गहणलक्खणो मक्कटालेपो विय, अभिसङ्गरसो तत्तकपाले पक्खित्तमंसपेसि विय, अपरिच्चागपच्चुपट्टानो तेलज्जनरागो विय, संयोजनियेसु धम्मेषु अस्साददस्सनपदट्टानो, तण्हानदिभावेन वड्डमानो यत्थ समुप्पन्नो, सीघसोता नदी विय महासमुद्धं अपायमेव तं सत्तं गहेत्वा गच्छतीति दट्ठब्बो । किञ्चापि अयं लोभसद्धो सब्बलोभसामज्जवचनो, इध पन कामरागवचनोति वेदितब्बो । सो हि अनागामिमग्गवज्झो ।

पुन भिक्खवेति आलपनं धम्मस्स पटिग्गाहकभावेन अभिमुखीभूतानं तत्थ आदरजननत्थं । पजहथाति इमिना पहानाभिसमयो विहितो, सो च परिज्जासच्छिकिरियाभावनाभिसमयेहि सद्धिं एव पवत्तति, न विसुन्ति चतुसच्चाधिट्टानानि चत्तारिपि सम्मादिट्ठिया किच्चानि विहितानेव होन्ति । यथा च “लोभं पजहथा”ति वुत्ते पहानेकट्टभावतो दोसादीनम्पि पहानं अत्थतो वुत्तमेव होति, एवं समुदयसच्चविसये सम्मादिट्ठिकिच्चे पहानाभिसमये वुत्ते तस्सा सहकारीकारणभूतानं सम्मासङ्कप्पादीनं सेसमग्गङ्गानम्पि समुदयसच्चविसयकिच्चं अत्थतो वुत्तमेव होतीति परिपुण्णो अरियमग्गब्यापारो इध कथितोति दट्ठब्बो । इमिना नयेन सतिपट्टानादीनम्पि बोधिपक्खयधम्मानं ब्यापारस्स इध वुत्तभावो यथारहं वित्थारेतब्बो ।

अपिचेत्थ लोभं पजहथाति एतेन पहानपरिज्जा वुत्ता । सा च तीरणपरिज्जाधिट्टाना, तीरणपरिज्जा च जातपरिज्जाधिट्टानाति अविनाभावेन तिस्सोपि परिज्जा बोधिता होन्ति । एवमेत्थ सह फलेन चतुसच्चकम्मट्टानं परिपुण्णं कत्वा पकासितन्ति दट्ठब्बं । अथ वा लोभं पजहथाति सह फलेन जाणदस्सनविसुद्धिं देसिता । सा च पटिपदाजाणदस्सनविसुद्धिसन्निस्सया... पे० ... चित्तविसुद्धिसीलविसुद्धिसन्निस्सया चाति नानन्तरिकभावेन सह फलेन सब्बापि सत्त विसुद्धियो विभाविताति वेदितब्बं ।

एवमेताय विसुद्धिक्कमभावनाय परिज्जात्तयसम्पादनेन लोभं पजहितुकामेन —

“अनत्थजननो लोभो, लोभो चित्तप्पकोपनो ।

भयमन्तरतो जातं, तं जनो नावबुज्झति ॥

“लुद्धो अत्थं न जानाति, लुद्धो धम्मं न पस्सति ।

अन्धतमं तदा होति, यं लोभो सहते नरं” ॥ (इतिवु० ८८) ।

रत्तो खो, आवुसो, रागेन अभिभूतो परियादिन्नचित्तो पाणम्पि हनति, अदिन्नम्पि आदियति, सन्धिम्पि छिन्दति, निल्लोपम्पि हरति, एकागारिकम्पि करोति, परिपन्थेपि तिट्ठति, परदारम्पि गच्छति, मुसापि भणति । तदपि तेसं भवतं समणब्राह्मणानं अजानतं अपस्सतं अवेदयतं तण्हानुगतानं परितस्सितं विप्फन्दितमेव (अ० नि० ३.५४) ।

“तण्हादुतियो पुरिसो, दीघमद्धान संसरं ।

इत्थभावज्जथाभावं, संसारं नातिवत्तति” ॥ (इतिवु० १५, १०५) ।

“नत्थि रागसमो अग्नि, नत्थि दोससमो कलि” ॥ (ध० प० २०२, २५१) ।

“कामरागेन ड्हामि, चित्तं मे परिड्हति” ॥ (सं० नि० १.२१२) ।

“ये रागरत्तानुपतन्ति सोतं, सयंकतं मक्कटकोव जाल”न्ति ॥ (ध० प० ३४७) च —

एवमादिसुत्तपदानुसारेण नानानयेहि लोभस्स आदीनवं पच्चवेक्खित्वा तस्स पहानाय पटिपज्जितब्बं ।

अपिच छ धम्मा कामरागस्स पहानाय संवत्तन्ति, असुभनिमित्तस्स उग्गहो, असुभभावनानुयोगो, इन्द्रियेसु गुत्तद्वारता, भोजने मत्तञ्जुता, कल्याणमित्तता, सप्पायकथाति । दसविधज्झि असुभनिमित्तं उग्गण्हन्तस्सापि कामरागो पहीयति, कायगतासतिभावनावसेन सविज्जाणके उद्धुमातकादिवसेन अविज्जाणके असुभे असुभभावनानुयोगमनुयुत्तस्सापि, मनच्छट्ठेसु इन्द्रियेसु संवरणवसेन सतिकवाटेन पिहितद्वारस्सापि, चतुन्नं पञ्चन्नं वा आलोपानं ओकासे सति उदकं पिवित्वा यापनसीलताय भोजने मत्तञ्जुनोपि । तेनेवाह —

“चत्तारो पञ्च आलोपे, अभुत्वा उदकं पिवे ।

अलं फासुविहाराय, पहितत्तस्स भिक्खुनो”ति ॥ (थेरगा० ९८३) ।

असुभकम्मट्ठानभावनारते कल्याणमित्ते सेवन्तस्सापि, ठाननिसज्जादीसु दसअसुभनिस्सितसप्पायकथायपि पहीयति । तेनेवाह —

“अत्थि, भिक्खवे, असुभनिमित्तं, तत्थ योनिसोमनसिकारबहुलीकारो, अयमाहारो अनुप्पन्नस्स वा कामच्छन्दस्स अनुप्पादाय उप्पन्नस्स वा कामच्छन्दस्स पहानाया”ति ।

एवं पुब्बभागे कामरागसङ्घातस्स लोभस्स पहानाय पटिपन्नो विपस्सनं उस्सुक्कापेत्वा ततियमग्गेण तं अनवसेसतो समुच्छिन्दति । तेन वुत्तं “लोभं, भिक्खवे, एकधम्मं पजहथ, अहं वो पाटिभोगो अनागामिताया”ति ।

एत्थाह “को पनेत्थ लोभो पहीयति, किं अतीतो, अथ अनागतो, उदाहु पच्चुप्पन्नो”ति? किञ्चेत्थ — न ताव अतीतो लोभो पहीयेय्य, न अनागतो वा तेसं अभावतो । न हि निरुद्धं अनुप्पन्नं वा अत्थीति वुच्चति, वायामो च अफलो आपज्जति । अथ पच्चुप्पन्नो, एवम्पि अफलो वायामो तस्स सरसभङ्गत्ता, संकिलिद्धा च मग्गभावना आपज्जति, चित्तविषयुत्तो वा लोभो सिया, न चायं नयो इच्छितोति । वुच्चते — न वुत्तनयेन अतीतानागतपच्चुप्पन्नो लोभो पहीयति । सेय्यथापि इध तरुणरुक्खो असज्जातफलो, तं पुरिसो कुठारिया मूले छिन्देय्य, तस्स रुक्खस्स छेदे असति यानि फलानि निब्बत्तेय्युं, तानि रुक्खस्स छिन्नत्ता अजातानि एव न जायेय्युं, एवमेव अरियमग्गाधिगमे असति उप्पज्जनारहो लोभो अरियमग्गाधिगमेन पच्चयघातस्स कतत्ता न उप्पज्जति । अयज्झि अट्ठकथासु “भूमिलद्धुप्पन्नो”ति वुच्चति । विपस्सनाय हि आरम्मणभूता पञ्चक्खन्धा तस्स उप्पज्जनट्ठानताय भूमि नाम । सा भूमि तेन लद्धाति कत्वा भूमिलद्धुप्पन्नो । आरम्मणाधिग्गाहितुप्पन्नो अविक्खम्भितुप्पन्नो असमूहतुप्पन्नोति च अयमेव वुच्चति ।

तत्थाति तस्मिं सुत्ते । एतन्ति एतं अत्थजातं । इदानीं गाथाबन्धवसेन वुच्चमानं । इति वुच्चतीति केन पन वुच्चति? भगवता व । अज्जेसु हि तादिसेसु ठानेसु सङ्गीतिकारेहि उपनिबन्धगाथा होन्ति, इध पन भगवता व गाथारुचिकानं पुग्गलानं अज्झासयवसेन वुत्तमेवत्थं सङ्गहेत्वा गाथा भासिता ।

तत्थ येन लोभेन लुब्धासे, सत्ता गच्छन्ति दुग्गतिन्ति येन आरम्मणग्गहणलक्खणेन ततो एव अभिसङ्गरसेन लोभेन लुब्धा अज्झत्तिकबाहिरेसु आयतनेसु गिब्धा गधिता । सेति हि निपातमत्तं । अक्खरचिन्तका पन ईदिसेसु ठानेसु से-कारागमं इच्छन्ति । तथा लुब्धत्ता एव कायसुचरितादीसु किञ्चि सुचरितं अकत्वा कायदुच्चरितादीनि च उपचिन्तिता रूपादीसु सत्तविसत्तताय सत्ताति लब्धनामा पाणिनो दुक्खस्स निब्बत्तिट्ठानताय दुग्गतीति सङ्खं गतं निरयं तिरच्छानयानि पेत्तिविसयञ्च पटिसन्धिग्गहणवसेन गच्छन्ति उपपज्जन्ति ।

तं लोभं सम्मदज्जाय, पजहन्ति विपस्सिनोति तं यथावुत्तं लोभं सभावतो समुदयतो अत्थङ्गमतो अस्सादतो आदीनवतो निस्सरणतोति इमेहि आकारेहि सम्मा अविपरीतं हेतुना जायेन अज्जाय जाततीरणपरिज्जासङ्घाताय पज्जाय जानित्वा रूपादिके पञ्चुपादानक्खन्धे अनिच्चादीहि विविधेहि आकारेहि पस्सनतो विपस्सिनो अवसिद्धिकिलेसे विपस्सनापज्जापुब्बङ्गमाय मग्गपज्जाय समुच्छेदप्पहानवसेन पजहन्ति, न पुन अत्तनो सन्ताने उप्पज्जितुं देन्ति । **पहाय न पुनायन्ति, इमं लोकं कुदाचनन्ति** एवं सहजेकट्ठपहानेकट्ठेहि अवसिद्धिकिलेसेहि सद्धिं तं लोभं अनागामिमग्गेन पजहित्वा पुन पच्छा इमं कामधातुसङ्घातं लोकं पटिसन्धिग्गहणवसेन कदाचिपि न आगच्छन्ति ओरम्भागियानं संयोजनानं सुप्पहीनत्ता । इति भगवा अनागामिफलेन देसनं निट्ठापेसि ।

अयम्पि अत्थोति निदानावसानतो पभुति याव गाथापरियोसाना इमिना सुत्तेन पकासितो अत्थो । **अपि**-सद्दो इदानीं वक्खमानसुत्तत्थसम्पिण्डनो । सेसं वुत्तनयमेव । इमस्मिं सुत्ते समुदयसच्चं सरूपेनेव आगतं, पहानापदेसेन मग्गसच्चं । इतरं सच्चद्वयञ्च तदुभयहेतुताय निद्धारेतब्बं । गाथाय पन दुक्खसमुदयमग्गसच्चानि यथारुतवसेनेव जायन्ति, इतरं निद्धारेतब्बं । एसेव नयो इतो परेसुपि सुत्तेसु ।

परमत्थदीपनिया खुद्दकनिकाय-अट्ठकथाय

इतिवुत्तकवण्णनाय पठमसुत्तवण्णना निट्ठिता ।

२. दोससुत्तवण्णना

२. वुत्तज्हेतं ...पे०... दोसन्ति दुतियसुत्तं । तत्रायं अपुब्बपदवण्णना । यथा एत्थ, एवं इतो परेसुपि सब्बत्थ अपुब्बपदवण्णनंयेव करिस्साम । यस्मा इदं सुत्तं दोसबहुलानं पुग्गलानं अज्झासयं ओलोकेत्वा दोसवूपसमनत्थं देसितं, तस्मा “**दोसं, भिक्खवे, एकधम्मं पजहथा**”ति आगतं । तत्थ दोसन्ति “अनत्थं मे अचरीति आघातो जायती”तिआदिना (विभ० ९६०) नयेन सुत्ते वुत्तानं नवन्नं, “अत्थं मे नाचरी”तिआदीनञ्च तप्पटिपक्खतो सिद्धानं नवन्नमेवाति अट्ठारसन्नं खाणुकण्टकादिना अट्ठानेन सद्धिं एकूनवीसतिया अज्जतराघातवत्थुसम्भवं आघातं । सो हि दुस्सन्ति तेन, सयं वा दुस्सति, दुस्सनमत्तमेव वा तन्ति दोसोति वुच्चति । सो चण्डिक्कलक्खणो पहटासीविसो विय, विसप्पनरसो विसनिपातो विय, अत्तनो निस्सयदहनरसो वा दावगि विय, दुस्सनपच्चुपट्ठानो लब्धोकासो विय सपत्तो, यथावुत्तआघातवत्थुपदट्ठानो विससंसट्ठपूतिमुत्तं विय दट्ठब्बो । **पजहथाति** समुच्छिन्दथ । तत्थ ये इमे —

“पञ्चिमे, भिक्खवे, आघातपटिविनया, यत्थ भिक्खुनो उप्पन्नो आघातो सब्बसो पटिविनेतब्बो । कतमे पञ्च? यस्मिं, भिक्खवे, पुग्गले आघातो जायेथ, मेत्ता तस्मिं पुग्गले भावेतब्बा...पे०... करुणा...पे०... उपेक्खा, असतिअमनसिकारो तस्मिं पुग्गले आपज्जितब्बो, एवं तस्मिं पुग्गले आघातो पटिविनेतब्बो । यस्मिं, भिक्खवे, पुग्गले आघातो जायेथ, कम्मस्सकता तस्मिं पुग्गले अधिट्ठातब्बा ‘कम्मस्सको अयमायस्मा कम्मदायादो...पे०... भविस्सती’ति (अ० नि० ५.१६१) —

एवं पञ्च आघातपटिविनया वृत्तायेव ।

“पञ्चिमे, आवुसो, आघातपटिविनया, यत्थ भिक्खुनो उप्पन्नो आघातो सब्बसो पटिविनेतब्बो । कतमे पञ्च? इधावुसो, एकच्चो पुग्गलो अपरिसुद्धकायसमाचारो होति परिसुद्धवचीसमाचारो; एवरूपेपि, आवुसो, पुग्गले आघातो पटिविनेतब्बो’ति (अ० नि० ५.१६२) —

एवमादिनापि नयेन पञ्च आघातपटिविनया वृत्ता, तेसु येन केनचि आघातपटिविनयविधिना पच्चवेक्खित्वा । अपिच यो —

“उभतोदण्डकेन चेपि, भिक्खवे, ककचेन चोरा ओचरका अङ्गमङ्गानि ओकन्तेय्युं, तत्रापि यो मनो पदूसेय्य, न मे सो तेन सासनकरो’ति (म० नि० १.२३२) सत्थु ओवादो ।

“तस्सेव तेन पापियो, यो कुद्धं पटिकुज्झति ।
कुद्धं अप्पटिकुज्झन्तो, सङ्गामं जेति दुज्जयं ॥

“उभिन्नमत्थं चरति, अत्तनो च परस्स च ।
परं सङ्कुपितं जत्वा, यो सतो उपसम्मति ॥ (सं० नि० १.१८८) ।

“सत्तिमे, भिक्खवे, धम्मा सपत्तकन्ता सपत्तकरणा कोधनं आगच्छन्ति इत्थिं वा पुरिसं वा । कतमे सत्त? इध, भिक्खवे, सपत्तो सपत्तस्स एवं इच्छति, ‘अहो वतायं दुब्बण्णो अस्सा’ति । तं किस्स हेतु? न, भिक्खवे, सपत्तो सपत्तस्स वण्णवताय नन्दति । कोधनोयं, भिक्खवे, पुरिसपुग्गलो कोधाभिभूतो कोधपरेतो किञ्चापि सो होति सुन्हातो सुविलित्तो कप्पितकेसमस्सु ओदातवत्थवसनो, अथ खो सो दुब्बण्णोव होति कोधाभिभूतो । अयं, भिक्खवे, पठमो धम्मो सपत्तकन्तो सपत्तकरणो कोधनं आगच्छति इत्थिं वा पुरिसं वा ।

“पुन चपरं, भिक्खवे, सपत्तो सपत्तस्स एवं इच्छति ‘अहो वतायं दुक्खं सयेय्या’ति...पे०... न पचुरत्थो अस्साति...पे०... न भोगवा अस्साति...पे०... न यसवा अस्साति...पे०... न मित्तवा अस्साति...पे०... कायस्स भेदा परं मरणा अपायं दुग्गतिं विनिपातं निरयं उपपज्जेय्याति । तं किस्स हेतु? न, भिक्खवे, सपत्तो सपत्तस्स सुगतिगमने नन्दति । कोधनोयं, भिक्खवे, पुरिसपुग्गलो कोधाभिभूतो कोधपरेतो कायेन दुच्चरितं चरति, वाचाय दुच्चरितं चरति, मनसा दुच्चरितं चरति । सो कायेन दुच्चरितं चरित्वा वाचाय दुच्चरितं चरित्वा मनसा दुच्चरितं चरित्वा कायस्स भेदा परं मरणा...पे०... निरयं उपपज्जति कोधाभिभूतो’ति (अ० नि० ७.६४) ।

“कुद्धो अत्थं न जानाति, कुद्धो धम्मं न पस्सति...पे०... ॥ (अ० नि० ७.६४) ।

“कोधं जहे विप्पजहेय्य मानं, संयोजनं सब्बमतिक्कमेय्य ॥ (ध० प० २२१) ।

“अनत्थजननो कोधो, कोधो चित्तप्पकोपनो...पे०... ॥ (अ० नि० ७.६४) ।

“कोधं छेत्वा सुखं सेति, कोधं छेत्वा न सोचति ।

कोधस्स विसमूलस्स, मधुरग्गस्स ब्राह्मणा”ति ॥ (सं० नि० १.१८७) ।

“एकापराधं खम भूरिपज्ज,

न पण्डिता कोधबला भवन्ती”ति ॥ —

एवमादिना नयेन दोसे आदीनवे वुत्तप्पटिपक्खतो दोसप्पहाने आनिसंसे च पच्चवेक्खित्वा पुब्बभागे दोसं तदङ्गप्पहानादिवसेन पजहित्वा विपस्सनं उस्सुक्कापेत्वा ततियमग्गेन सब्बसो दोसं समुच्छिन्दथ, पजहथाति तेसं भिक्खूनं तत्थ नियोजनं । तेन वुत्तं “दोसं, भिक्खवे, एकधम्मं पजहथा”ति । **दुट्ठा**सेति आघातेन दूसितचित्तताय पदुट्ठा । सेसमेत्थ यं वत्तब्बं, तं पठमसुत्तवण्णनायं वुत्तनयमेव ।

दुतियसुत्तवण्णना निड्डिता ।

३. मोहसुत्तवण्णना

३. ततिये **मोहन्ति** अज्जाणं । तज्झि दुक्खे अज्जाणं, दुक्खसमुदये अज्जाणं, दुक्खनिरोधे अज्जाणं, दुक्खनिरोधगामिनिया पटिपदाय अज्जाणन्ति आदिना नयेन विभागेन अनेकप्पभेदम्पि मुहन्ति । तेन सयं वा मुहति मुहनमत्तमेव वा तन्ति मोहोति वुच्चति । सो चित्तस्स अन्धभावलक्खणो, अज्जाणलक्खणो वा, असम्पटिवेधरसो, आरम्भणसभावच्छादनरसो वा, असम्माप्पटिपत्तिपच्चुपट्टानो, अन्धकारपच्चुपट्टानो वा, अयोनिमोमनसिकारपट्टानो, सब्बाकुसलानं मूलन्ति दट्ठब्बो । इथापि **पजहथाति** पदस्स —

“मूळ्हो अत्थं न जानाति, मूळ्हो धम्मं न पस्सति ।

अन्धतमं तदा होति, यं मोहो सहते नरं” ॥ (इतिवु० ८८) ।

“अनत्थजननो मोहो...पे०... ॥ (इतिवु० ८८) ।

“अविज्जा, भिक्खवे, पुब्बङ्गमा अकुसलानं धम्मानं समापत्तिया” (इतिवु० ४०) ।

“मोहसम्बन्धनो लोको, भब्बरूपोव दिस्सति” । (उदा० ७०) ।

“मोहो निदानं कम्मानं समुदयाय” (अ० नि० ३.३४) ।

“मूळ्हो खो, ब्राह्मण, मोहेन अभिभूतो परियादिन्नचित्तो दिट्ठधम्मिकम्पि भयं वेरं पसवति, सम्परायिकम्पि भयं वेरं पसवती”ति च —

आदिना नयेन “यो कोचि धम्मो कामच्छन्दादिसंकिलेसधम्मोहि निब्बत्तेतब्बो, अत्थतो सब्बो सो मोहेहेतुको”ति च मोहे आदीनवं तप्पटिपक्खतो मोहप्पहाने आनिसंसञ्च पच्चवेक्खित्वा कामच्छन्दादिप्पहानक्कमेनेव पुब्बभागे तदङ्गादिवसेन मोहं पजहन्ता ततियमग्गेन यथावुत्तलोभदोसेकट्ठं मोहं समुच्छेदवसेन पजहथाति अत्थो दट्ठब्बो । अनागामिमग्गवज्झो एव हि मोहो इधाधिप्पेतोति । **मूळहासे**ति कुसलाकुसलसावज्जानवज्जादिभेदे अत्तनो हिताहिते सम्मूळहा । सेसं वुत्तनयमेव ।

ततियसुत्तवण्णना निट्ठिता ।

४. कोधसुत्तवण्णना

४. चतुत्थे **कोधन्ति** दोसं । दोसो एव हि कोधपरियायेन बुज्जनकानं पुगलानं अज्झासयवसेन एवं वुत्तो । तस्मा दुतियसुत्ते वुत्तनयेनेवेत्थ अत्थो वेदितब्बो । अपिच कुज्जनलक्खणो कोधो, आघातकरणरसो, चित्तस्स व्यापत्तिभावपच्चुपट्टानो, चेतसो पूतिभावोति दट्ठब्बोति अयम्पि विसेसो वेदितब्बो ।

चतुत्थसुत्तवण्णना निट्ठिता ।

५. मक्खसुत्तवण्णना

५. पञ्चमे **मक्खन्ति** परगुणमक्खनं । यदिपि हि सो गूथं गहेत्वा परं पहरन्तो विय अत्तनो करं पठमतरं मक्खतियेव, तथापि परेसं गुणमक्खनाधिप्पायेन पवत्तेतब्बत्ता “परगुणमक्खनो”ति वुच्चति । तथा हि सो उदकपुञ्छनमिव न्हातस्स सरीरगतं उदकं परेसं गुणे मक्खेति पुञ्छति विनासेति, परेहि वा कतानं महन्तानम्पि कारानं खेपनतो धंसनतो मक्खोति वुच्चति । सो परगुणमक्खनलक्खणो, तेसं विनासनरसो, तदवच्छादनपच्चुपट्टानो । अत्थतो पन परेसं गुणमक्खनाकारेन पवत्तो दोमनस्ससहगतचित्तुप्पादोति दट्ठब्बं । **पजहथाति** तत्थ वुत्तप्पभेदं दोसं, दोसे च वुत्तनयं आदीनवं, पहाने चस्स आनिसंसं पच्चवेक्खित्वा पुब्बभागे तदङ्गादिवसेन पजहन्ता विपस्सनं उस्सुक्कापेत्वा ततियमग्गेन अनवसेसं समुच्छिन्दथाति अत्थो । **मक्खासे**ति मक्खिता मक्खितपरगुणा, परेसं गुणानं मक्खितारो, ततो एव अत्तनोपि धंसितगुणाति अत्थो । सेसं वुत्तनयमेव ।

पञ्चमसुत्तवण्णना निट्ठिता ।

६. मानसुत्तवण्णना

६. छट्ठे **मानन्ति** जातिआदिवत्थुकं चेतसो उन्नमनं । सो हि “सेय्योहमस्मी”तिआदिना नयेन मज्जन्ति तेन, सयं वा मज्जति, माननं सम्पग्गहोति वा मानोति वुच्चति । स्वायं सेय्योहमस्मीति मानो, सदिसोहमस्मीति मानो, हीनोहमस्मीति मानोति एवं तिविधो । पुन सेय्यस्स सेय्योहमस्मीति मानो, सेय्यस्स सदिसो, सेय्यस्स हीनो; सदिसस्स सेय्यो, सदिसस्स सदिसो, सदिसस्स हीनो; हीनस्स सेय्यो, हीनस्स सदिसो, हीनस्स हीनोहमस्मीति मानोति एवं नवविधोपि उन्नतिलक्खणो, अहंकाररसो, सम्पग्गहरसो वा, उद्धुमातभावपच्चुपट्टानो, केतुकम्यतापच्चुपट्टानो वा, दिट्ठिविप्पयुत्तलोभपदट्टानो उम्मादो वियाति दट्ठब्बो । **पजहथाति** तस्स सब्बस्सपि अत्तुक्कंसनपरवम्भननिमित्तता, गरुट्टानियेसु अभिवादनपच्चुपट्टानअज्जलिकम्मसामीचिकम्मादीनं अकरणे कारणता, जातिमदपुरिसमदादिभावेन पमादापत्तिहेतुभावोति एवमादिभेदं आदीनवं तप्पटिपक्खतो निरतिमानताय आनिसंसञ्च पच्चवेक्खित्वा राजसभं

अनुष्पत्तो चण्डालो विय सन्नह्यचारीसु नीचचित्तं पच्चुपट्टपेत्वा पुब्बभागे तदङ्गादिवसेन तं पजहन्ता विपस्सनं वड्ढेत्वा अनागामिमग्गेन समुच्छिन्दथाति अत्थो । अनागामिमग्गवज्झो एव हि मानो इधाधिप्पेतो । **मत्तासेति** जातिमदपुरिसमदादिवसेन मानेन पमादापत्तिहेतुभूतेन मत्ता अत्तानं पग्गहेत्वा चरन्ता । सेसं वुत्तनयमेव ।

इमेसु पन पटिपाटिया छसु सुत्तेसु गाथासु वा अनागामिफलं पापेत्वा देसना निट्ठापिता । तत्थ ये इमे अविहा अतप्पा सुदस्सा सुदस्सी अकनिट्ठाति उपपत्तिभववसेन पञ्च अनागामिनो, तेसु अविहेसु उपपन्ना अविहा नाम । ते अन्तरापरिनिब्बायी, उपहच्चपरिनिब्बायी, असङ्खारपरिनिब्बायी, ससङ्खारपरिनिब्बायी, उद्धंसोतो अकनिट्ठगामीति पञ्चविधा, तथा अतप्पा, सुदस्सा, सुदस्सिनो । अकनिट्ठेसु पन उद्धंसोतो अकनिट्ठगामी परिहायति । तत्थ यो अविहादीसु उपपज्जित्वा आयुवेमज्झं अनतिक्कमित्वा अरहत्तप्पत्तिया किलेसपरिनिब्बानेन परिनिब्बायति, अयं **अन्तरापरिनिब्बायी** नाम । यो पन अविहादीसु आदितो पञ्चकप्पसतादिभेदं आयुवेमज्झं अतिक्कमित्वा परिनिब्बायति, अयं **उपहच्चपरिनिब्बायी** नाम । यो असङ्खारेन अधिमत्तप्पयोगं अकत्वा अप्पदुक्खेन अकसिरेन परिनिब्बायति, अयं **असङ्खारपरिनिब्बायी** नाम । यो पन ससङ्खारेन अधिमत्तप्पयोगं कत्वा दुक्खेन किच्चेन कसिरेन परिनिब्बायति, अयं **ससङ्खारपरिनिब्बायी** नाम । इतरो पन अविहादीसु उद्धंवाहितभावेन उद्धमस्स तण्हासोतं, वट्ठसोतं, मग्गसोतमेव वाति उद्धंसोतो । अविहादीसु उपपज्जित्वा अरहत्तं पत्तुं असक्कोन्तो तत्थ तत्थ यावतायुकं ठत्वा पटिसन्धिग्गहणवसेन अकनिट्ठं गच्छतीति अकनिट्ठगामी ।

एत्थ च उद्धंसोतो अकनिट्ठगामी, उद्धंसोतो न अकनिट्ठगामी, न उद्धंसोतो अकनिट्ठगामी, न उद्धंसोतो न अकनिट्ठगामीति चतुक्कं वेदितव्वं । कथं? यो अविहतो पट्टाय चत्तारो देवलोके सोधेत्वा अकनिट्ठं गन्त्वा परिनिब्बायति, अयं उद्धंसोतो अकनिट्ठगामी नाम । यो पन हेट्ठा तयो देवलोके सोधेत्वा सुदस्सीदेवलोके ठत्वा परिनिब्बायति, अयं उद्धंसोतो न अकनिट्ठगामी नाम । यो इतो अकनिट्ठमेव गन्त्वा परिनिब्बायति, अयं न उद्धंसोतो अकनिट्ठगामी नाम । यो पन हेट्ठा चतूसु देवलोकेसु तत्थ तत्थेव परिनिब्बायति, अयं न उद्धंसोतो, न अकनिट्ठगामी नामाति ।

तत्थ अविहेसु उपपज्जित्वा कप्पसततो उद्धं परिनिब्बायिको, द्विन्नं कप्पसतानं मत्थके परिनिब्बायिको, पञ्चकप्पसते असम्पत्ते परिनिब्बायिकोति तयो अन्तरापरिनिब्बायिनो । वुत्तज्हेतं “उपपन्नं वा समनन्तरा अप्पत्तं वा वेमज्झ”न्ति (पु० प० ३६) । वा-सद्धेन हि पत्तमत्तोपि सङ्गहितोति । एवं तयो अन्तरापरिनिब्बायिनो, एको उपहच्चपरिनिब्बायी एको उद्धंसोतो । तेसु असङ्खारपरिनिब्बायिनो पञ्च, ससङ्खारपरिनिब्बायिनो पञ्चाति दस होन्ति । तथा अतप्पासुदस्सासुदस्सीसूति चत्तारो दसका चत्तारीसं अकनिट्ठे पन उद्धंसोतस्स अभावतो तयो अन्तरापरिनिब्बायिनो, एको उपहच्चपरिनिब्बायीति असङ्खारपरिनिब्बायिनो चत्तारो, ससङ्खारपरिनिब्बायिनो चत्तारोति अट्ठ, एवमेते अट्ठचत्तारीसं अनागामिनो । ते सब्बेपि इमेसु सुत्तेसु अविसेसवचनेन गहिताति दट्ठव्वं ।

छट्ठसुत्तवण्णना निट्ठिता ।

७. सब्बपरिज्जासुत्तवण्णना

७. सत्तमे सब्बन्ति अनवसेसं । अनवसेसवाचको हि अयं सब्ब-सद्धो । सो येन येन सम्बन्धं गच्छति, तस्स तस्स अनवसेसतं दीपेति; यथा “सब्बं रूपं, सब्बा वेदना, सब्बसक्कायपरियापन्नेसु धम्मेषू”ति । सो पनायं सब्ब-सद्धो सप्पदेसनिप्पदेसविसयताय दुविधो । तथा हेस सब्बसब्बं, पदेससब्बं, आयतनसब्बं, सक्कायसब्बन्ति चतूसु विसयेसु

दिदृप्पयोगो। तत्थ “सब्बे धम्मा सब्बाकारेण बुद्धस्स भगवतो जाणमुखे आपाथमागच्छन्ती”तिआदीसु (चूळनि० मोघराजमाणवपुच्छानिदेस ८५) सब्बसब्बस्मिं आगतो। “सब्बेसं वो, सारिपुत्ता, सुभासितं परियायेना”तिआदीसु (म० नि० १.३४५) पदेससब्बस्मिं। “सब्बं वो, भिक्खवे, देसेस्सामि, चक्खुञ्चेव रूपञ्च... पे०...। मनञ्चेव धम्मे चा”ति (सं० नि० ४.२३-२५) एत्थ आयतनसब्बस्मिं। “सब्बधम्ममूलपरियायं वो, भिक्खवे, देसेस्सामी”तिआदीसु (म० नि० १.१) सक्कायसब्बस्मिं। तत्थ सब्बसब्बस्मिं आगतो निष्पदेसविसयो, इतरेसु तीसुपि आगतो सप्पदेसविसयो। इध पन सक्कायसब्बस्मिं वेदितब्बो। विपस्सनाय आरम्भणभूता तेभूमकधम्मा हि इध “सब्ब”न्ति अनवसेसतो गहिता।

अनभिजानन्ति “इमे धम्मा कुसला, इमे अकुसला, इमे सावज्जा, इमे अनवज्जा”तिआदिना “इमे पञ्चक्खन्धा, इमानि द्वादसायतनानि, इमा अट्ठारस धातुयो, इदं दुक्खं अरियसच्चं, अयं दुक्खसमुदयो अरियसच्च”न्ति च आदिना सब्बे अभिञ्जेय्ये धम्मे अविपरीतसभावतो अनभिजानन्तो अभिविसिट्ठेन जाणेन न जानन्तो। **अपरिजानन्ति** न परिजानन्तो। यो हि सब्बं तेभूमकधम्मजातं परिजानाति, सो तीहि परिज्जाहि परिजानाति — जातपरिज्जाय, तीरणपरिज्जाय, पहानपरिज्जाय। तत्थ कतमा जातपरिज्जा? सब्बं तेभूमकं नामरूपं — “इदं रूपं, एत्तकं रूपं, न इतो भिय्यो। इदं नामं, एत्तकं नामं, न इतो भिय्यो”ति भूतप्पसादादिप्पभेदं रूपं, फस्सादिप्पभेदं नामञ्च, लक्खणरसपच्चुपट्टानपदट्टानतो ववत्थपेति। तस्स अविज्जादिकञ्च पच्चयं परिगणहाति। अयं जातपरिज्जा। कतमा तीरणपरिज्जा? एवं जातं कत्वा तं सब्बं तीरेति अनिच्चतो दुक्खतो रोगतोति द्वाचत्तालीसाय आकारेहि। अयं तीरणपरिज्जा। कतमा पहानपरिज्जा? एवं तीरयित्वा अगमगगेन सब्बस्मिं छन्दरागं पजहति। अयं पहानपरिज्जा।

दिद्विविसुद्धिकङ्कावितरणविसुद्धियोपि जातपरिज्जा। मग्गामग्गपटिपदाजाणदस्सनविसुद्धियो कलापसम्मसनादिअनुलोमपरियोसाना वा पज्जा तीरणपरिज्जा। अरियमग्गेन पजहनं पहानपरिज्जा। यो सब्बं परिजानाति, सो इमाहि तीहि परिज्जाहि परिजानाति। इध पन विरागप्पहानानं पटिक्खेपवसेन विसुं गहितत्ता जातपरिज्जाय तीरणपरिज्जाय च वसेन परिजानना वेदितब्बा। यो पनेवं न परिजानाति, तं सन्धाय वुत्तं “अपरिजान”न्ति।

तत्थ चित्तं अविराजयन्ति तस्मिं अभिञ्जेय्यविसेसे परिञ्जेय्ये अत्तनो चित्तसन्तानं न विराजयं, न विरज्जन्तो; यथा तत्थ रागो न होति, एवं विरागानुपस्सनं न उप्पादेन्तोति अत्थो। **अप्पजहन्ति** विपस्सनापज्जासहिताय मग्गपज्जाय तत्थ पहातब्बयुत्तकं किलेसवट्ठं अनवसेसतो न पजहन्तो। यथा चेतं, एवं अभिजाननादयोपि मिस्सकमग्गवसेन वेदितब्बा। पुब्बभागे हि नानाचित्तवसेन जाततीरणपहानपरिज्जाहि कमेन अभिजाननादीनि सम्पादेत्वा मग्गकाले एकक्खणेनेव किच्चवसेन तं सब्बं निष्पादेन्तं एकमेव जाणं पवत्ततीति। **अभब्बो दुक्खक्खयायाति** निब्बानाय सकलस्स वट्ठदुक्खस्स खेपनाय न भब्बो, नालं न समत्थोति अत्थो।

सब्बञ्च खोति एत्थ च-सद्दो ब्यतिरेके, **खो-**सद्दो अवधारणे। तदुभयेन अभिजाननादितो लद्धब्बं विसेसं दुक्खक्खयस्स च एकन्तकारणं दीपेति। अभिजाननादीसु यं वत्तब्बं, तं वुत्तमेव। तत्थ पन पटिक्खेपवसेन वुत्तं, इध विधानवसेन वेदितब्बं। अयमेव विसेसो। अपिच **अभिजानन्ति** उपादानक्खन्धपञ्चकसङ्घातं सक्कायसब्बं सरूपतो पच्चयतो च जाणस्स अभिमुखीकरणवसेन अभिजानन्तो हुत्वा अभावाकारादिपरिगगहेन तं अनिच्चादिलक्खणेहि परिच्छिज्जमानवसेन परिजानन्तो। **विराजयन्ति** सम्मदेवस्स अनिच्चतादिवबोधेन उप्पन्नभयादीनवनिब्बिदादिजाणानुभावेन अत्तनो चित्तं विरत्तं करोन्तो तत्थ अणुमत्तम्पि रागं अनुप्पादेन्तो। **पजहन्ति** वुट्ठानगामिनिविपस्सनासहिताय मग्गपज्जाय समुदयपक्खियं किलेसवट्ठं पजहन्तो समुच्छिन्दन्तो। **भब्बो**

दुक्खक्खयायाति एवं किलेसमलप्पहानेनेव सब्बस्स कम्मवट्टस्स परिकखीणत्ता अनवसेसविपाकवट्टखेपनाय सकलसंसारवट्टदुक्खपरिक्खयभूताय वा अनुपादिसेसाय निब्बानधातुया भब्बो एकन्तेनेतं पापुणितुन्ति एवमेत्थ अत्थो दट्ठब्बो ।

यो सब्बं सब्बतो जत्वाति यो युत्तयोगो आरद्धविपस्सको सब्बं तेभूमकधम्मजातं सब्बतो सब्बभागेन कुसलादिक्खन्धादिविभागतो दुक्खादिपीळनादिविभागतो च । अथ वा सब्बतोति सब्बस्मा कक्खळफुसनादिलक्खणादितो अनिच्चादितो चाति सब्बाकारतो जानित्वा विपस्सनापुब्बङ्गमेन मग्गजाणेन पटिविज्झित्वा, विपस्सनाजाणेनेव वा जाननहेतु । सब्बत्थेसु न रज्जतीति सब्बेसु अतीतादिवसेन अनेकभेदभिन्नेसु सक्कायधम्मेषु न रज्जति, अरियमग्गाधिगमेन रागं न जनेति । इमिनास्स तण्हागाहस्स अभावं दस्सेन्तो तं निमित्तत्ता दिट्ठमानग्गाहानं “एतं मम एसोहमस्मि, एसो मे अत्ता”ति इमस्स मिच्छागाहत्तयस्सपि अभावं दस्सेति । स वेति एत्थ स-इति निपातमत्तं । वे-ति ब्यत्तं, एकंसेनाति वा एतस्मिं अत्थे निपातो । सब्बपरिज्जाति सब्बपरिजाननतो, यथावुत्तस्स सब्बस्स अभिसमयवसेन परिजाननतो । सोति यथावुत्तो योगावचरो, अरियो एव वा । सब्बदुक्खमुपच्चगाति सब्बं वट्टदुक्खं अच्चगा अतिक्कमि, समतिक्कमीति अत्थो ।

सत्तमसुत्तवण्णना निट्ठिता ।

८. मानपरिज्जासुत्तवण्णना

८. अट्ठमे अपुब्बं नत्थि, केवलं मानवसेन देसना पवत्ता । गाथासु पन मानुपेता अयं पजाति कम्मकिलेसेहि पजायतीति पजाति लद्धनामा इमे सत्ता मज्जनलक्खणेन मानेन उपेता उपगता । मानगन्था भवे रताति किमिकीटपटङ्गादिअत्तभावेपि मानेन गन्थिता मानसंयोजनेन संयुत्ता । ततो एव दीघरत्तं परिभाविताहंकारवसेन “एतं ममा”ति सङ्खारेसु अज्झोसानबहुलत्ता तत्थ निच्चसुखअत्तादिविपल्लासवसेन च कामादिभवे रता । मानं अपरिजानन्ताति मानं तीहि परिज्जाहि न परिजानन्ता । अरहत्तमग्गजाणेन वा अनतिक्कमन्ता, “मानं अपरिज्जाया”ति केचि पठन्ति । आगन्तारो पुनर्भवन्ति पुन आयातिं उपपत्तिभवं । पुनप्पुनं भवनतो वा पुनर्भवसङ्खातं संसारं अपरापरं परिवत्तनवसेन गन्तारो उपगन्तारो होन्ति, भवतो न परिमुच्चन्तीति अत्थो । ये च मानं पहन्त्वान, विमुत्ता मानसङ्खयेति ये पन अरहत्तमग्गेन सब्बसो मानं पजहित्वा मानस्स अच्चन्तसङ्खयभूते अरहत्तफले निब्बाने वा तदेकद्विसब्बकिलेसविमुत्तिया विमुत्ता सुट्ठु मुत्ता । ते मानगन्थाभिभुनो, सब्बदुक्खमुपच्चगुन्ति ते परिकखीणभवसंयोजना अरहन्तो सब्बसो मानगन्थं मानसंयोजनं समुच्छेदप्पहानेन अभिभवित्वा ठिता, अनवसेसं वट्टदुक्खं अतिक्कमिंसूति अत्थो । एवमेतस्मिं सत्तमसुत्ते च अरहत्तं कथितन्ति ।

अट्ठमसुत्तवण्णना निट्ठिता ।

९-१०. लोभदोसपरिज्जासुत्तद्वयवण्णना

९-१०. नवमदसमेसु अपुब्बं नत्थि । देसनाविलासवसेन तथा बुज्जनकानं वेनेय्यानं अज्झासयवसेन वा तथा देसितानीति दट्ठब्बं ।

नवमदसमसुत्तवण्णना निट्ठिता ।

पठमवग्गवण्णना निट्ठिता ।

२. दुतियवग्गो

१-३. मोहपरिज्जादिसुत्तवण्णना

११-१३. दुतियवग्गोपि पठमादीनि तीणि सुत्तानि वुत्तनयानेव, तथा देसनाकारणम्पि वुत्तमेव ।

४. अविज्जानीवरणसुत्तवण्णना

१४. चतुत्थे — “नाहं, भिक्खवे”तिआदीसु न-कारो पटिसेधत्थो । अहन्ति भगवा अत्तानं निद्विसति । अज्जन्ति इदानि वत्तब्बअविज्जानीवरणतो अज्जं । एकनीवरणम्पीति एकनीवरणधम्मम्पि । समनुपस्सामीति द्वे समनुपस्सना — दिट्ठिसमनुपस्सना च जाणसमनुपस्सना च । तत्थ “रूपं अत्ततो समनुपस्सती”तिआदिना (अ० नि० ४.२००; पटि० म० १.१३०) आगता अयं दिट्ठिसमनुपस्सना नाम । “अनिच्चतो समनुपस्सति, नो निच्चतो”तिआदिना (पटि० म० ३.३५) पन आगता अयं जाणसमनुपस्सना नाम । इधापि जाणसमनुपस्सनाव अधिप्पेता । “समनुपस्सामी”ति च पदस्स न-कारेन सम्बन्धो । इदं वुत्तं होति — “अहं, भिक्खवे, सब्बज्जुतज्जाणसङ्घातेन समन्तचक्खुना सब्बधम्मे हत्थामलकं विय ओलोकेन्तोपि अज्जं एकनीवरणम्पि न समनुपस्सामी”ति ।

येन नीवरणेन निवुता पजा दीघरत्तं सन्धावन्ति संसरन्तीति येन नीवरणकसभावत्ता नीवरणेन धम्मसभावं जानितुं पस्सितुं पटिविज्झितुं अदत्त्वा छादेत्त्वा परियोनन्धित्वा ठानेन अन्धकारेण निवुता सत्ता अनादिमतसंसारे अपरिमाणे कप्पे महन्तेसु चेव खुद्दकेसु च भवादीसु अपरापरुप्पत्तिवसेन सब्बतो धावन्ति चेव संसरन्ति, च । आरम्भणन्तरसङ्कमनवसेन वा सन्धावनं, भवन्तरसङ्कमनवसेन संसरणं । किलेसानं बलवभावेन वा सन्धावनं, दुब्बलभावेन संसरणं । खणिकमरणवसेन वा एकजातियं सन्धावनं, वोहारमरणवसेन अनेकासु जातीसु संसरणं । चित्तवसेन वा सन्धावनं, “चित्तमस्स विधावती”ति हि वुत्तं, कम्मवसेन संसरणं । एवं सन्धावनसंसरणानं विसेसो वेदितब्बो ।

यथयिदन्ति यथा इदं । य-कारो पदसन्धिकरो, सन्धिवसेन रस्सत्तं । अविज्जानीवरणन्ति एत्थ पूरेतुं अयुत्तट्ठेन कायदुच्चरितादि अविन्दियं नाम, अलब्धवन्ति अत्थो । तं अविन्दियं विन्दतीति अविज्जा । विपरीततो कायसुचरितादि विन्दियं नाम, तं विन्दियं न विन्दतीति अविज्जा । खन्धानं रासट्ठं, आयतनानं आयतनट्ठं, धातूनं सुज्जट्ठं, इन्द्रियानं आधिपतेय्यट्ठं, सच्चानं तथट्ठं दुक्खादीनं पीळनादिवसेन वुत्तं चतुब्बिधं अत्थं अविदितं करोतीतिपि अविज्जा । अन्तविरहिते संसारे सत्ते जवापेतीति वा अविज्जा, परमत्थतो वा अविज्जमानेसु इत्थिपुरिसादीसु जवति पवत्तति, विज्जमानेसु खन्धादीसु न जवति, न पवत्ततीति अविज्जा । अपिच चक्खुविज्जाणादीनं वत्थारम्भणानं पटिच्चसमुप्पादपटिच्चसमुप्पन्नानज्ज धम्मानं छादनतोपि अविज्जा । अविज्जाव नीवरणन्ति अविज्जानीवरणं ।

अविज्जानीवरणेन हि, भिक्खवे, निवुता पजा दीघरत्तं सन्धावन्ति संसरन्तीति इदं पुरिमस्सेव दळ्हीकरणत्थं वुत्तं । पुरिमं वा — “यथयिदं, भिक्खवे, अविज्जानीवरण”न्ति एवं ओपम्मदस्सनवसेन वुत्तं, इदं नीवरणानुभावदस्सनवसेन । कस्मा पनेत्थ अविज्जाव एवं वुत्ता, न अज्जे धम्माति? आदीनवपटिच्छादनेन कामच्छन्दादीनं विसेसप्पच्चयभावतो । तथा हि तां पटिच्छादितादीनवे विसये कामच्छन्दादयो पवत्तन्ति ।

नत्थञ्जोति आदिका गाथा वुत्तस्स अवुत्तस्स च अत्थस्स सङ्गहनवसेन भासिता । तत्थ निवुत्ताति निवारिता पलिगुण्ठिता, पटिच्छादिताति अत्थो । अहोरत्तन्ति दिवा चेव रत्तिञ्च, सब्बकालन्ति वुत्तं होति । यथा मोहेन आवुत्ताति येन प्रकारेण अविज्जानीवरणसङ्घातेन मोहेन आवुत्ता पटिच्छादिता सुविज्जेय्यम्पि अजानन्तियो पजा संसारे संसरन्ति, तथारूपो अञ्जो एकधम्मोपि एकनीवरणम्पि नत्थीति योजेतब्बं । ये च मोहं पहन्त्वान्, तमोखन्धं पदालयुन्ति ये पण अरियसावका पुब्बभागे तदङ्गादिप्पहानवसेन, हेट्ठिममग्गेहि वा तंतंमग्गवज्झं मोहं पजहित्वा अग्गमग्गेण वजिरूपमजाणेन मोहसङ्घातमेव तमोरासिं पदालयिंसु, अनवसेसतो समुच्छिन्दिंसु । न ते पुन संसरन्तीति ते अरहन्तो —

“खन्धानञ्च पटिपाटि, धातुआयतनान च ।

अब्बोच्छिन्नं वत्तमाना, संसारोति पवुच्चती”ति ॥ —

एवं वुत्ते इमस्मिं संसारे न संसरन्ति न परिब्भमन्ति । किं कारणा? हेतु तेसं न विज्जति, यस्मा संसारस्स हेतु मूलकारणं अविज्जा, सा तेसं न विज्जति, सब्बसो नत्थि समुच्छिन्नत्ताति ।

चतुत्थसुत्तवण्णना निट्ठिता ।

५. इत्तण्हासंयोजनसुत्तवण्णना

१५. पञ्चमे यस्स विज्जति, तं पुग्गलं दुक्खेहि, कम्मं वा विपाकेहि, भवयोनिगतिविज्जाणट्ठितिसत्तावासे वा भवन्तरादीहि संयोजेतीति संयोजनं । तण्हायनट्ठेन तण्हा, तसति सयं परितसति, तसन्ति वा एतायाति तण्हा । सञ्जुत्ताति चक्खादीसु अभिनिवेसवत्थूसु बद्धा । सेसं वुत्तनयमेव । कामञ्चेत्थ अविज्जायपि संयोजनभावो तण्हाय च नीवरणभावो अत्थियेव, तथापि अविज्जाय पटिच्छादितादीनवेहि भवेहि तण्हा सत्ते संयोजेतीति इमस्स विसेसस्स दस्सनत्थं पुरिमसुत्ते अविज्जा नीवरणभावेन, इध च तण्हा संयोजनभावेनेव वुत्ता । किञ्च नीवरणसंयोजनप्पधानस्स दस्सनत्थं । यथा हि नीवरणभावेन अविज्जा संकिलेसधम्मनं पधानभूता पुब्बङ्गमा च, एवं संयोजनभावेन नेसं तण्हाति तदधीनप्पधानभावं दस्सेतुं सुत्तद्वये एवमेते धम्मा वुत्ता । अपिच विसेसेन अविज्जा निब्बानसुखं निवारेतीति “नीवरण”न्ति वुत्ता, तण्हा संसारदुक्खेन सत्ते संयोजेतीति “संयोजन”न्ति ।

दस्सनगमनन्तरायकरणतो वा विज्जाचरणविपक्खतो द्वयं द्विधा वुत्तं । विज्जाय हि उज्जुविपच्चनीकभूता अविज्जा निब्बानदस्सनस्स अविपरीतदस्सनस्स च विसेसतो अन्तरायकरा, चरणधम्मनं उज्जुविपच्चनीकभूता तण्हा गमनस्स सम्मापटिपत्तिया अन्तरायकराति; एवमयं अविज्जाय निवुत्तो अन्धीकतो तण्हाय संवुत्तो बद्धो अस्सुतवा पुथुज्जनो अन्धो विय बद्धो महाकन्तारं, संसारकन्तारं नातिवत्तति । अनत्थुप्पत्तिहेतुद्वयदस्सनत्थम्पि द्वयं द्विधा वुत्तं । अविज्जागतो हि पुग्गलो बालभावेन अत्थं परिहापेति, अनत्थञ्च अत्तनो करोति, अकुसलो विय आतुरो असप्पायकिरियाय । जानन्तोपि बालो बालभावेन अत्थं परिहापेति, अनत्थञ्च करोति जानन्तो विय रोगी असप्पायसेवी । मक्कटालेपोपमसुत्तं चेतस्स अत्थस्स साधकं ।

पटिच्चसमुप्पादस्स मूलकारणदस्सनत्थम्पेत्थ द्वयं द्विधा वुत्तं । विसेसेन हि सम्मोहस्स बलवभावतो अविज्जाखेत्तं अतीतो अद्धा, पत्थनाय बलवभावतो तण्हाखेत्तं अनागतो अद्धा । तथा हि बालजनो सम्मोहबहुलो अतीतमनुसोचति, तस्स अविज्जापच्चया सङ्घाराति सब्बं नेतब्बं । पत्थनाबहुलो अनागतं पजप्पति, तस्स तण्हापच्चया उपादानन्तिआदि सब्बं

नेतब्बं । तेनेव तासं पुब्बन्ताहरणेन अपरन्तपटिसन्धानेन चस्स यथाक्कमं मूलकारणता दस्सिताति वेदितब्बन्ति ।

गाथासु तण्हादुतियोति तण्हासहायो । तण्हा हि निरुदककन्तारे मरीचिकाय उदकसञ्जा विय पिपासाभिभूतं अप्पटिकारदुक्खाभिभूतम्पि सत्तं अस्सादसन्दस्सनवसेन सहायकिच्चं करोन्ती भवादीसु अनिब्बिन्दं कत्वा परिब्भमापेति, तस्मा तण्हा पुरिसस्स “दुतिया”ति वुत्ता । ननु च अज्जेपि किलेसादयो भवाभिनिब्बत्तिया पच्चयाव? सच्चमेतं, न पन तथा विसेसप्पच्चयो यथा तण्हा । तथा हि सा कुसलेहि विना अकुसलेहि, कामावचरादिकुसलेहि च विना रूपावचरादिकुसलेहि भवनिब्बत्तिया विसेसप्पच्चयो, यतो समुदयसच्चन्ति वुच्चतीति । इत्थभावज्जथाभावन्ति इत्थभावो च अज्जथाभावो च इत्थभावज्जथाभावो । सो एतस्स अत्थीति इत्थभावज्जथाभावो संसारो, तं तत्थ इत्थभावो मनुस्सत्तं, अज्जथाभावो ततो अवसिद्धसत्तावासा । इत्थभावो वा तेसं तेसं सत्तानं पच्चुप्पन्नो अत्तभावो, अज्जथाभावो अनागतत्तभावो । एवरूपो वा अज्जोपि अत्तभावो इत्थभावो, न एवरूपो अज्जथाभावो । तं इत्थभावज्जथाभावं संसारं खन्धधातुआयतनपटिपाटिं नातिवत्तति, न अतिक्कमति ।

एतमादीनवं जत्वा, तण्हं दुक्खस्स सम्भवन्ति एतं सकलवट्टदुक्खस्स सम्भवं समुदयं तण्हं आदीनवं आदीनवतो जत्वाति अत्थो । अथ वा एतमादीनवं जत्वाति एतं यथावुत्तं संसारनातिवत्तनं आदीनवं दोसं जत्वा । तण्हं दुक्खस्स सम्भवन्ति तण्हज्ज वुत्तनयेन वट्टदुक्खस्स पधानकारणन्ति जत्वा । वीततण्हो अनादानो, सतो भिक्खु, परिब्बजेति एवं तीहि परिज्जाहि परिजानन्तो विपस्सनं वट्ठेत्वा मग्गपटिपाटिया तण्हं विगमेन्तो अग्गमग्गेन सब्बसो वीततण्हो विगततण्हो, ततो एव चतूसु उपादानेसु कस्सचिपि अभावेन आर्याति पटिसन्धिसङ्घातस्स वा आदानस्स अभावेन अनादानो, सतिवेपुल्लप्पत्तिया सब्बत्थ सतोकारिताय सतो भिन्नकिलेसो भिक्खु परिब्बजे चरेय्य, खन्धपरिनिब्बानेन वा सङ्खारप्पवत्तितो अपगच्छेय्याति अत्थो ।

पञ्चमसुत्तवण्णना निट्ठिता ।

६. पठमसेखसुत्तवण्णना

१६. छट्ठे सेखस्साति एत्थ केनट्ठेन सेखो? सेक्खधम्मपटिलाभतो सेखो । वुत्तज्हेतं —

“कित्तावता नु खो, भन्ते, सेखो होतीति? इध, भिक्खु, सेखाय सम्मादिट्ठिया समन्नागतो होति...पे०... सेखेन सम्मासमाधिना समन्नागतो होति । एत्तावता खो, भिक्खु, सेखो होती”ति (सं० नि० ५.१३) ।

अपिच सिक्खतीति सेखो । वुत्तम्पि चेतं —

“सिक्खतीति खो, भिक्खु, तस्मा सेखोति वुच्चति । किञ्च सिक्खति? अधिसीलम्पि सिक्खति, अधिचित्तम्पि सिक्खति, अधिपज्जम्पि सिक्खति । सिक्खतीति खो, भिक्खु, तस्मा सेखोति वुच्चती”ति (अ० नि० ३.८६) ।

योपि कल्याणपुथुज्जनो अनुलोमप्पटिपदाय परिपूरकारी सीलसम्पन्नो इन्द्रियेसु गुत्तद्वारो भोजने मत्तञ्जू जागरियानुयोगमनुयुत्तो पुब्बरत्तापररत्तं बोधिपक्खियानं धम्मनं भावनानुयोगमनुयुत्तो विहरति — “अज्ज वा स्वे वा अज्जतरं सामज्जफलं अधिगमिस्सामी”ति, सोपि वुच्चति सिक्खतीति सेखोति । इमस्मिं अत्थे न पटिविज्झन्तोव सेखो अधिप्पेतो, अथ खो कल्याणपुथुज्जनोपि । अप्पत्तं मानसं एतेनाति अप्पत्तमानसो । मानसन्ति “अन्तलिक्खचरो पासो,

ख्यायं चरति मानसो”ति (सं० नि० १.१५१; महाव० ३३) एत्थ रागो मानसन्ति वुत्तो । “चित्तं मनो मानस”न्ति (ध० स० ६३, ६५) एत्थ चित्तं । “अप्पत्तमानसो सेखो, कालं कयिरा जने सुता”ति (सं० नि० १.१५९) एत्थ अरहत्तं । इधापि अरहत्तमेव अधिप्पेतं । तेन अप्पत्तअरहत्तस्साति वुत्तं होति ।

अनुत्तरन्ति सेट्ठं, असदिसन्ति अत्थो । चतूहि योगेहि खेमं अनुपद्दुतन्ति **योगक्खेमं**, अरहत्तमेव अधिप्पेतं । **पत्थयमानस्साति** द्वे पत्थना तण्हापत्थना, कुसलच्छन्दपत्थना च । “पत्थयमानस्स हि जप्पितानि, पवेधितं वापि पकप्पितेसू”ति (सु० नि० ९०८; महानि० १३७) एत्थ तण्हापत्थना ।

“छिन्नं पापिमतो सोतं, विद्धस्तं विनळीकतं ।

पामोज्जबहुला होथ, खेमं पत्थेथ भिक्खवो”ति ॥ (म० नि० १.३५२) ।

एत्थ कत्तुकम्यताकुसलच्छन्दपत्थना, अयमेव इधाधिप्पेता । तेन पत्थयमानस्साति तं योगक्खेमं गन्तुकामस्स तन्निन्नस्स तप्पोणस्स तप्पब्भारस्साति अत्थो । **विहरतोति** एकं इरियापथदुक्खं अज्जेन इरियापथेन विच्छिन्दित्वा अपरिपतन्तं अत्तभावं हरतो । अथ वा “सब्बे सङ्खारा अनिच्चाति अधिमुच्चन्तो सद्भाय विहरती”ति आदिना निद्देसनयेन चेत्थ अत्थो दट्ठब्बो । **अज्झत्तिकन्ति** नियकज्झत्तसङ्खाते अज्झत्ते भवं अज्झत्तिकं । **अज्झन्ति** कारणं । **इति करित्वाति** एवं कत्वा । **न अज्जं एकङ्गम्पि समनुपस्सामीति** एत्थ अयं सङ्खेपत्थो — भिक्खवे, अज्झत्तं अत्तनो सन्ताने समुद्धितं कारणन्ति कत्वा अज्जं एककारणम्पि न समनुपस्सामि यं एवं बहूपकारं, **यथयिदं योनिसो मनसिकारोति** उपायमनसिकारो, पथमनसिकारो, अनिच्चादीसु अनिच्चादिनयेनेव मनसिकारो, अनिच्चानुलोमिकेन वा चित्तस्स आवट्टना अन्वावट्टना आभोगो समन्नाहारो मनसिकारो । अयं योनिसो मनसिकारो ।

इदानीं योनिसो मनसिकारस्स आनुभावं दस्सेतुं “**योनिसो, भिक्खवे, भिक्खु मनसि करोन्तो अकुसलं पजहति, कुसलं भावेती**”ति वुत्तं । तत्थ **योनिसो मनसि करोन्तोति** “इदं दुक्खं अरियसच्चं, अयं दुक्खसमुदयो अरियसच्चं, अयं दुक्खनिरोधो अरियसच्चं, अयं दुक्खनिरोधगामिनी पटिपदा अरियसच्चं”न्ति चतूसु अरियसच्चेसु योनिसो मनसिकारं पवत्तेन्तो ।

तत्रायं अत्थविभावना — यदिपि इदं सुत्तं अविसेसेन सेक्खपुग्गलवसेन आगतं, चतुमग्गसाधारणवसेन पन सङ्खेपेनेव कम्मट्ठानं कथयिस्साम । यो चतुसच्चकम्मट्ठानिको योगावचरो “तण्हावज्जा तेभूमका खन्धा दुक्खं, तण्हा समुदयो, उभिन्नं अप्पवत्ति निरोधो, निरोधसम्पापको मग्गो”ति एवं पुब्बे एव आचरियसन्तिके उग्गहितचतुसच्चकम्मट्ठानो । सो अपरेन समयेन विपस्सनामग्गं समारुहो समानो तेभूमके खन्धे “इदं दुक्खं”न्ति योनिसो मनसि करोति, उपायेन पथेन समन्नाहरति चेव विपस्सति च । विपस्सना हि इध मनसिकारसीसेन वुत्ता । या पनायं तस्स दुक्खस्स समुट्ठापिका पुरिमभविका तण्हा, अयं दुक्खसमुदयोति योनिसो मनसि करोति । यस्मा पन इदं दुक्खं, अयज्ज समुदयो इदं ठानं पत्वा निरुज्झन्ति न पवत्तन्ति, तस्मा यदिदं निब्बानं नाम, अयं दुक्खनिरोधोति योनिसो मनसि करोति । निरोधसम्पापकं अट्ठङ्गिकं मग्गं, “अयं दुक्खनिरोधगामिनी पटिपदा”ति योनिसो मनसि करोति, उपायेन पथेन समन्नाहरति चेव विपस्सति च ।

तत्रायं उपायो — अभिनिवेशो नाम खन्धे होति, न विवट्टे, तस्मा अयमत्थो — “इमस्मिं काये पथवीधातु, आपोधातू”ति आदिना (दी० नि० २.३७८) नयेन चत्तारि महाभूतानि तदनुसारेण उपादारूपानि च परिग्गहेत्वा “अयं रूपक्खन्धो”ति ववत्थपेति । तं ववत्थापयतो उप्पन्ने तदारम्मणे चित्तचेतसिकधम्मे “इमे चत्तारो अरूपक्खन्धा”ति

ववत्थपेति । ततो “इमे पञ्चक्खन्धा दुक्खं”न्ति ववत्थपेति । ते पन सङ्खेपतो नामञ्च रूपञ्चाति द्वे भागा होन्ति । इदञ्च नामरूपं सहेतु सप्पच्चयं उप्पज्जति, तस्स अयं अविज्जाभवतण्हादिको हेतु, अयं आहारादिको पच्चयोति हेतुप्पच्चये ववत्थपेति । सो तेसं पच्चयानञ्च पच्चयुप्पन्नानञ्च याथावसरसलक्खणं ववत्थपेत्वा “इमे धम्मा अहुत्वा भवन्ति, हुत्वा निरुज्झन्ति, तस्मा अनिच्चा”ति अनिच्चलक्खणं आरोपेति, “उदयब्बयपटिपीळितत्ता दुक्खा”ति दुक्खलक्खणं आरोपेति, “अवसवत्तनतो अनत्ता”ति अनत्तलक्खणं आरोपेति ।

एवं तिलक्खणानि आरोपेत्वा विपस्सन्तो उदयब्बयजाणुप्पत्तिया उप्पन्ने ओभासादिके विपस्सनुपक्विलेसे ‘अमग्गो’ति उदयब्बयजाणमेव “अरियमग्गस्स उपायभूतो पुब्बभागमग्गो”ति मग्गामग्गं ववत्थपेत्वा पुन उदयब्बयजाणं पटिपाटिया भङ्गजाणादीनि च उप्पादेन्तो सोतापत्तिमग्गादयो पापुणाति । तस्मिं खणे चत्तारि सच्चानि एकप्पटिवेधेनेव पटिविज्झति, एकाभिसमयेन अभिसमेति । तत्थ दुक्खं परिज्जापटिवेधेन पटिविज्झन्तो, समुदयं पहाणप्पटिवेधेन पटिविज्झन्तो सब्बं अकुसलं पजहति, निरोधं सच्छिकिरियापटिवेधेन पटिविज्झन्तो मग्गं भावनापटिवेधेन पटिविज्झन्तो सब्बं कुसलं भावेति । अरियमग्गो हि निप्परियायतो कुच्छित्तसलनादिअत्थेन कुसलो, तस्मिञ्च भाविते सब्बेपि कुसला अनवज्जबोधिपक्खियधम्मा भावनापारिपूरिं गच्छन्तीति । एवं योनिसो मनसि करोन्तो अकुसलं पजहति, कुसलं भावेति । तथा हि वुत्तं — “इदं दुक्खन्ति योनिसो मनसि करोति, अयं दुक्खसमुदयोति योनिसो मनसि करोती”तिआदि (म० नि० १.२१) । अपरम्पि वुत्तं “योनिसो मनसिकारसम्पन्नस्सेतं, भिक्खवे, भिक्खुनो पाटिकङ्कं — अरियं अट्ठङ्गिकं मग्गं भावेस्सति, अरियं अट्ठङ्गिकं मग्गं बहुलीकरिस्सती”ति (सं० नि० ५.५५) ।

योनिसो मनसिकारोति गाथाय अयं सङ्खेपत्थो — सिक्खति, सिक्खापदानि तस्स अत्थि, सिक्खनसीलोति वा **सेखो** । संसारे भयं इक्खतीति **भिक्खु** । तस्स सेखस्स भिक्खुनो **उत्तमत्थस्स** अरहत्तस्स **पत्तिया** अधिगमाय यथा योनिसो मनसिकारो, एवं **बहुकारो** बहुपकारो अज्जो कोचि धम्मो नत्थि । कस्मा? यस्मा योनिसो उपायेन मनसिकारं पुरक्खत्वा **पदहं** चतुब्बिधसम्मप्पधानवसेन पदहन्तो, **खयं दुक्खस्स पापुणे** संकिलेसवट्टदुक्खस्स परिकखयं परियोसानं निब्बानं पापुणे अधिगच्छेय्य, तस्मा योनिसो मनसिकारो बहुकारोति ।

छट्ठसुत्तवण्णना निट्ठिता ।

७. दुतियसेखसुत्तवण्णना

१७. सत्तमे बाहिरन्ति अज्झत्तसन्तानतो बहि भवं । **कल्याणमित्तताति** यस्स सीलादिगुणसम्पन्नो अघस्स घाता, हितस्स विधाता सब्बाकारेण उपकारको मित्तो होति, सो पुग्गलो कल्याणमित्तो, तस्स भावो कल्याणमित्तता । तत्रायं कल्याणमित्तो पकतिया सद्भासम्पन्नो होति सीलसम्पन्नो सुतसम्पन्नो चागसम्पन्नो वीरियसम्पन्नो सतिसम्पन्नो समाधिसम्पन्नो पज्जासम्पन्नो । तत्थ सद्भासम्पत्तिया सद्वहति तथागतस्स बोधिं, तेन सम्मासम्बोधिहेतुभूतं सत्तेसु हितसुखेसितं न परिच्चजति, सीलसम्पत्तिया सब्रह्मचारीनं पियो होति गरु च भावनीयो चोदको पापगरही वत्ता वचनक्खमो, सुतसम्पत्तिया खन्धायतनसच्चपटिच्चसमुप्पादादिकानं गम्भीरानं कथानं कत्ता होति, चागसम्पत्तिया अप्पिच्छो होति सन्तुट्ठो पविवित्तो असंसट्ठो, वीरियसम्पत्तिया अत्तनो परेसञ्च हितप्पटिपत्तियं आरद्धवीरियो होति, सतिसम्पत्तिया उपट्ठितस्सति होति परमेन सतिनेपक्केन समन्नागतो चिरकतम्पि चिरभासितम्पि सरिता अनुस्सरिता, समाधिसम्पत्तिया अविक्खित्तो होति समाहितो एकगचित्तो, पज्जासम्पत्तिया अविपरीतं पजानाति । सो सतिया कुसलाकुसलानं धम्मानं गतियो समन्वेसन्तो पज्जाय सत्तानं हितसुखं यथाभूतं जानित्वा समाधिना तत्थ अब्यग्गचित्तो हुत्वा वीरियेन सत्ते अहिततो

निसेधेत्वा एकन्तहिते नियोजेति । तेनेवाह —

“पियो गरु भावनीयो, वत्ता च वचनक्खमो ।

गम्भीरञ्च कथं कत्ता, नो चाट्टाने नियोजको”ति ॥ (नेत्ति० ११३) ।

कल्याणमित्तो, भिक्खवे, भिक्खु अकुसलं पजहति, कुसलं भावेतीति कल्याणमित्तो पुगलो कल्याणमित्तं निस्साय कम्मस्सकताजाणं उप्पादेति, उप्पन्नं सद्धं फातिं करोति, सद्धाजातो उपसङ्कमति उपसङ्कमित्वा धम्मं सुणाति । तं धम्मं सुत्वा तथागते सद्धं पटिलभति, तेन सद्धापटिलाभेन घरावासं पहाय पब्बज्जं अनुतिट्ठति, चतुपारिसुद्धिसीलं सम्पादेति, यथाबलं धृतधम्मे समादाय वत्तति, दसकथावत्थुलाभी होति, आरद्धवीरियो विहरति उपट्ठितस्सति सम्पजानो पुब्बरत्तापररत्तं बोधिपक्खियानं धम्मानं भावनानुयोगमनुयुत्तो, नचिरस्सेव विपस्सनं उस्सुक्कापेत्वा अरियमग्गाधिगमेन सब्बं अकुसलं समुच्छिन्दति, सब्बञ्च कुसलं भावनापारिपूरिं गमेन्तो वट्ठेति । वुत्तञ्हेतं —

“कल्याणमित्तस्सेतं, मेघिय, भिक्खुनो पाटिकङ्खं कल्याणसहायस्स कल्याणसम्पवङ्कस्स ‘यं सीलवा भविस्सति, पातिमोक्खसंवरसंवृतो विहरिस्सति आचारगोचरसम्पन्नो, अणुमत्तेसु वज्जेसु, भयदस्सावी समादाय सिक्खिस्सति, सिक्खापदेसु’ ।

“कल्याणमित्तस्सेतं...पे०... कल्याणसम्पवङ्कस्स ‘यं यायं कथा अभिसल्लेखिका चेतोविवरणसप्पाया एकन्तनिब्बिदाय...पे०... निब्बानाय संवत्तति । सेय्यथिदं — अप्पिच्छकथा, सन्तुट्ठिकथा, पविवेककथा, असंसग्गकथा, वीरियारम्भकथा, सीलकथा, समाधिकथा...पे०... विमुत्तिजाणदस्सनकथा । एवरूपाय कथाय निकामलाभी भविस्सति अकिच्छलाभी अकसिरलाभी’ ।

“कल्याणमित्तस्सेतं ...पे०... कल्याणसम्पवङ्कस्स ‘यं आरद्धवीरियो विहरिस्सति अकुसलानं धम्मानं पहानाय कुसलानं धम्मानं उपसम्पदाय थामवा दळ्ळपरक्कमो अनिक्खित्तधुरो कुसलेसु धम्मेसु’ ।

“कल्याणमित्तस्सेतं...पे०... कल्याणसम्पवङ्कस्स ‘यं पज्जवा भविस्सति, उदयत्थगामिनिया पज्जाय समन्नागतो अरियाय निब्बेधिकाय सम्मा दुक्खक्खयगामिनिया”’ति (उदा० ३१) ।

एवं सकलवट्ठदुक्खपरिमुच्चननिमित्तं कल्याणमित्तताति वेदितब्बं । तेनेवाह —

“ममज्झि, आनन्द, कल्याणमित्तं आगम्म जातिधम्मा सत्ता जातिया परिमुच्चन्ति, जराधम्मा सत्ता जराय परिमुच्चन्ती”तिआदि (सं० नि० १.१२९) ।

तेन वुत्तं — “कल्याणमित्तो, भिक्खवे, भिक्खु अकुसलं पजहति, कुसलं भावेती”ति ।

गाथाय सप्पतिस्सोति पतिस्सवसङ्गातेन सह पतिस्सेनाति सप्पतिस्सो, कल्याणमित्तस्स ओवादं सिरसा सम्पटिच्छको सुब्बचोति अत्थो । अथ वा हितसुखे पतिट्ठापनेन पति इसेतीति पतिस्सो, ओवाददायको । गरुआदरयोगेन तेन पतिस्सेन सह वत्ततीति सप्पतिस्सो, गरूसु गरुचित्तीकारबहुलो । सगारवोति छब्बिधेनपि गारवेन युत्तो । करं मित्तानं वचनन्ति कल्याणमित्तानं ओवादं करोन्तो यथोवादं पटिपज्जन्तो । सम्पजानोति सत्तट्ठानियेन सम्पजज्जेन समन्नागतो । पतिस्सतोति

कम्मद्वानं फातिं, गमेतुं समत्थाय सतिया पतिस्सतो सतोकारी। **अनुपुब्बेना**ति सीलादिविसुद्धिपटिपाटिया, तत्थ च विपस्सनापटिपाटिया चेव मग्गपटिपाटिया च। **सब्बसंयोजनक्खयन्ति** कामरागसंयोजनादीनं सब्बेसं संयोजनानं खेपनतो सब्बसंयोजनक्खयसङ्घातस्स अरियमग्गस्स परियोसानभूतं अरहत्तं, तस्स आरम्मणभूतं निब्बानमेव वा। **पापुणे** अधिगच्छेय्याति अत्थो। इति इमेसु द्वीसु सुत्तेसु अरियमग्गाधिगमस्स सत्थारा पधानङ्गं नाम गहितन्ति वेदितब्बं।

सत्तमसुत्तवण्णना निट्ठिता।

८. सङ्गभेदसुत्तवण्णना

१८. अट्टमे **एकधम्मो**ति कतरोयं सुत्तनिक्खेपो? अट्ठुप्पत्तिको। तत्रायं सङ्खेपकथा — देवदत्तो हि अजातसत्तुं दुग्गहणं गाहापेत्वा तस्स पितरं राजानं बिम्बिसारं तेन मारापेत्वापि अभिमारे पयोजेत्वापि सिलापविज्झनेन लोहितुप्पादकम्मं कत्वापि न तावता पाकटो जातो, नाळागिरिं विस्सज्जेत्वा पन पाकटो जातो। अथ महाजनो “एवरूपम्पि नाम पापं गहेत्वा राजा विचरती”ति कोलाहलं अकासि, महाघोसो अहोसि। तं सुत्वा राजा अत्तना दीयमानानि पञ्च थालिपाकसतानि पच्छिन्दापेसि, उपट्टानम्पिस्स नागमासि। नागरापि कुलं उपगतस्स कटच्छुभत्तम्पिस्स नादंसु। सो परिहीनलाभसक्कारो कोहज्जेन जीवितुकामो सत्थारं उपसङ्कमित्वा पञ्च वत्थूनि याचित्वा “अलं, देवदत्त, यो इच्छति, सो आरज्जिको होतू”तिआदिना (पारा० ४०९; चूळव० ३४३) भगवता पटिक्खित्तो तेहि पञ्चहि वत्थूहि बालं लूखप्पसन्नं जनं सज्जापेन्तो पञ्चसते वज्जिपुत्तके सलाकं गाहापेत्वा सङ्गं भिन्दित्वाव ते आदाय गयासीसं अगमासि। अथ द्वे अग्गसावका सत्थु आणाय तत्थ गन्त्वा धम्मं देसेत्वा ते अरियफले पतिट्ठापेत्वा आनयिंसु। ये पनस्स सङ्गभेदाय परक्कमन्तस्स लद्धिं रोचेत्वा तथेव पग्गय्ठ ठिता सङ्गे भिज्जन्ते भिन्ने च समनुज्जा अहेसुं, तेसं तं दीघरत्तं अहिताय दुक्खाय अहोसि।

देवदत्तोपि न चिरस्सेव रोगाभिभूतो बाळहगिलानो मरणकाले “सत्थारं वन्दिस्सामी”ति मज्जकसिविकाय नीयमानो जेतवनपोक्खरणितीरे ठपितो पथविया विवरे दिन्ने पतित्वा अवीचिम्हि निब्बत्ति, योजनसतिको चस्स अत्तभावो अहोसि कप्पट्टियो तालक्खन्धपरिमाणेहि अयसूलेहि विनिविद्धो। देवदत्तपक्खिकानि च पञ्चमत्तानि कुलसतानि तस्स लद्धियं ठितानि सह बन्धवेहि निरये निब्बत्तानि। एकदिवसं भिक्खू धम्मसभायं कथं समुट्ठापेसुं “आवुसो, देवदत्तेन सङ्गं भिन्दन्तेन भारियं कम्मं कत”न्ति। अथ सत्था धम्मसभं उपगन्त्वा “काय नुत्थ, भिक्खवे, एतरहि कथाय सन्निसिन्ना”ति पुच्छित्वा “इमाय नामा”ति वुत्ते सङ्गभेदे आदीनवं दस्सेन्तो इमं सुत्तं अभासि। केचि पन भणन्ति “देवदत्तस्स तप्पक्खिकानञ्च तथा निरये निब्बत्तभावं दिस्वा सङ्गभेदे आदीनवं दस्सेन्तो भगवा अत्तनो अज्झासयेनेव इमं सुत्तं देसेसी”ति।

तत्थ **एकधम्मो**ति एको अकुसलो महासावज्जधम्मो। **लोके**ति सत्तलोके। **उप्पज्जमानो उप्पज्जती**ति एत्थ भेदसंवत्तनिकेसु भण्डनादीसु सङ्गे उप्पन्नेसुपि “धम्मो अधम्मो”तिआदीसु अट्टारसभेदकरवत्थूसु यस्स कस्सचि दीपनवसेन वोहरन्तेसुपि तत्थ रुचिजननत्थं अनुस्सावेन्तेसुपि अनुस्सावेत्वा सलाकाय गाहितायपि सङ्गभेदो उप्पज्जमानो नाम होति, सलाकाय पन गाहिताय चत्तारो वा अतिरेका वा यदा आवेणिकं उद्देसं वा सङ्गकम्मं वा करोन्ति, तदा सङ्गभेदो उप्पज्जति नाम। कते पन तस्मिं सङ्गभेदो उप्पन्नो नाम? कम्मं, उद्देसो, वोहारो, अनुस्सावना, सलाकग्गाहोति इमेसु हि पञ्चसु सङ्गस्स भेदकारणेषु कम्मं वा उद्देसो वा पमाणं, वोहारानुस्सावनसलाकग्गाहा पन पुब्बभागाति।

बहुजनाहितायातिआदीसु ०.महाजनस्स ज्ञानमग्गादिसम्पत्तिनिवारणेन अहिताय, सग्गसम्पत्तिनिवारणेन असुखाय, अपायूपपत्तिहेतुभावेन अनत्थाय। अकुसलधम्मवसेन वा अहिताय, हितमत्तस्सपि अभावा सुगतियम्पि

निब्बत्तनककायिकचेतसिकदुक्खाय उप्पज्जतीति सम्बन्धो । **देवमनुस्सानन्ति** इदं “बहुनो जनस्सा”ति वुत्तेसु उक्कट्टुपुग्गलनिद्देशो । अपरो नयो — **बहुजनाहितायाति** बहुजनस्स महतो सत्तकायस्स अहितत्थाय, दिट्ठधम्मिकसम्परायिकअनत्थायाति अत्थो । **असुखायाति** दिट्ठधम्मिकसम्परायिकअसुखत्थाय, दुविधदुक्खत्थायाति अत्थो । **अनत्थायाति** परमत्थपटिक्खेपाय । निब्बानज्झि परमत्थो, ततो उत्तरिं अत्थो नत्थि । **अहितायाति** मग्गपटिक्खेपाय । निब्बानसम्पापकमग्गतो हि उत्तरिं हितं नाम नत्थि । **दुक्खायाति** अरियसुखविराधनेन वट्टदुक्खताय । ये हि अरियसुखतो विरद्धा तं अधिगन्तुं अभब्बा, ते वट्टदुक्खे परिभमन्ति, अरियसुखतो च उत्तरिं सुखं नाम नत्थि । वुत्तज्हेतं “अयं समाधि पच्चुप्पन्नसुखो चेव आयतिच्च सुखविपाको”ति (दी० नि० ३.३५५; अ० नि० ५.२७) ।

इदानीं “सङ्गभेदो”ति सरूपतो दस्सेत्वा तस्स अहितादीनां एकान्तहेतुभावं पकासेतुं “**सङ्गे खो पन, भिक्खवे, भिन्ने**”ति आदिमाह । तत्थ **भिन्ने**ति निमित्तत्थे भुम्मं यथा “अधनानं धने अननुपदीयमाने”ति (दी० नि० ३.९१), भेदहेतूति अत्थो । **अज्जमज्जं भण्डनानीति** चतुन्नं परिसानं तप्पक्खिकानञ्च “एसो धम्मो, नेसो धम्मो”ति अज्जमज्जं विवदनानि । भण्डनज्झि कलहस्स पुब्बभागो । **परिभासाति** “इदञ्चिदञ्च वो अनत्थं करिस्सामा”ति भयुप्पादनवसेन तज्जना । **परिक्खेपाति** जातिआदिवसेन परितो खेपा, दसहि अक्कोसवत्थूहि खुंसनवम्भना । **परिच्चजनाति** उक्खेपनियकम्मकरणादिवसेन निस्सारणा । **तत्थाति** तस्मिं सङ्गभेदे, तन्निमित्ते वा भण्डनादिके । **अप्पसन्नाति** रतनत्तयगुणानं अनभिज्जा । **न पसीदन्तीति** “धम्मचारिनो समचारिनो”ति आदिना ख्यायं भिक्खूसु पसादनाकारो, तथा न पसीदन्ति, तेसं वा सोतब्बं सद्भातब्बं न मज्जन्ति । तथा च धम्मे सत्थरि च अप्पसन्नाव होन्ति । **एकच्चानं अज्जथत्तन्ति** पुथुज्जनानं अविरुद्धसद्धानं पसादज्जथत्तं ।

गाथायं **आपायिको**ति आदीसु अपाये निब्बत्तनारहताय आपायिको । तत्थपि अवीचिसङ्घाते महानिरये उप्पज्जतीति **नेरयिको** । एकं अन्तरकप्पं परिपुण्णमेव कत्वा तत्थ तिट्ठतीति **कप्पट्टो** । सङ्गभेदसङ्घाते वग्गे रतोति **वग्गरतो** । अधम्मियताय **अधम्मो** । भेदकरवत्थूहि सङ्गभेदसङ्घाते एव च अधम्मे ठितोति **अधम्मट्टो** । **योगक्खेमा पधंसतीति** योगक्खेमतो हिततो पधंसति परिहायति, चतूहि वा योगेहि अनुपदुत्ता योगक्खेमं नाम अरहत्तं निब्बानञ्च, ततो पनस्स धंसने वत्तब्बमेव नत्थि । दिट्ठिसीलसामज्जतो संहतट्ठेन **सङ्गं**, ततो एव एककम्मादिविधानयोगेन **समग्गं** सहितं । **भेत्वानाति** पुब्बे वुत्तलक्खणेन सङ्गभेदेन भिन्दित्वा । **कप्पन्ति** आयुकप्पं । सो पनेत्थ अन्तरकप्पोव । **निरयम्हीति** अवीचिमहानिरयम्हि ।

अट्टमसुत्तवण्णना निट्ठिता ।

९. सङ्गसामग्गीसुत्तवण्णना

१९. नवमे एकधम्मोति एको कुसलधम्मो अनवज्जधम्मो । “अयं धम्मो, नायं धम्मो”ति आदिना सचे सङ्गे विवादो उप्पज्जेय्य, तत्थ धम्मकामेन विज्जुना इति पटिसञ्चिक्खितब्बं “ठानं खो, पनेतं विज्जति, यदिदं विवादो वट्ठमानो सङ्गराजिया वा सङ्गभेदाय वा संवत्तेय्या”ति । सचे तं अधिकरणं अत्तना पग्गहेत्वा ठितो, अग्गिं अक्कन्तेन विय सहसा ततो ओरमितब्बं । अथ परेहि तं पग्गहितं सयज्जेतं सक्कोति वूपसमेतुं, उस्साहजातो हुत्वा दूरम्पि गन्त्वा तथा पटिपज्जितब्बं, यथा तं वूपसम्मति । सचे पन सयं न सक्कोति, सो च विवादो उपरूपरि वट्ठतेव, न वूपसम्मति । ये तत्थ पतिरूपा सिक्खाकामा सब्रह्मचारिनो, ते उस्साहेत्वा येन धम्मेन येन विनयेन येन सत्थुसासनेन तं अधिकरणं यथा वूपसम्मति, तथा वूपसमेतब्बं । एवं वूपसमेतस्स यो सङ्गसामगिकरो कुसलो धम्मो, अयमेत्थ एकधम्मोति अधिप्पेतो । सो

हि उभतोपक्खियानं द्वेळ्हकजातानं भिक्खून्, तेसं अनुवत्तनवसेन ठितानं भिक्खुनीनं उपासकानं उपासिकानं तेसं आरक्खदेवतानं यावदेव ब्रह्मानम्पि उप्पज्जनारहं अहितं दुक्खावहं संकिलेसधम्मं अपनेत्वा महतो पुज्जरासिस्स कुसलाभिसन्दस्स हेतुभावतो सदेवकस्स लोकस्स हितसुखावहो होति । तेन वुत्तं “**एकधम्मो, भिक्खवे, लोके उप्पज्जमानो उप्पज्जति बहुजनहिताया**”तिआदि । तस्सत्थो अनन्तरसुत्ते वुत्तविपरियायेन वेदितब्बो । **सङ्घसामग्गीति** सङ्घस्स समग्गभावो भेदाभावो एककम्मता एकुद्देसता च ।

गाथायं **सुखा सङ्घस्स सामग्गीति** सुखस्स पच्चयभावतो सामग्गी सुखाति वुत्ता । यथा “**सुखो बुद्धानमुप्पादो**”ति (ध० प० १९४) । **समग्गानञ्चनुग्गहोति** समग्गानं सामग्गिअनुमोदनेन अनुग्गण्हनं सामग्गिअनुरूपं, यथा ते सामग्गिं न विजहन्ति, तथा गहणं ठपनं अनुबलप्पदानन्ति अत्थो । **सङ्घं समग्गं कत्त्वानाति** भिन्नं सङ्घं राजिपत्तं वा समग्गं सहितं कत्वा । **कप्पन्ति** आयुकप्पमेव । **सग्गम्हि मोदतीति** कामावचरदेवलोके अज्जे देवे दसहि ठानेहि अभिभवित्वा दिब्बसुखं अनुभवन्तो इच्छितनिष्फत्तियाव मोदति पमोदति ललति कीळतीति ।

नवमसुत्तवण्णना निट्ठिता ।

१०. पदुट्ठचित्तसुत्तवण्णना

२०. दसमस्स का उप्पत्ति? अट्ठुप्पत्तियेव । एकदिवसं किर भिक्खू धम्मसभायं सन्निसिन्ना कथं समुट्ठापेसुं — “आवुसो, इधेकच्चो बहुं पुज्जकम्मं करोति, एकच्चो बहुं पापकम्मं, एकच्चो उभयवोमिस्सकं करोति । तत्थ वोमिस्सकारिनो कीदिसो अभिसम्परायो”ति? अथ सत्था धम्मसभं उपगन्वा पज्जत्तवरबुद्धासने निसिन्नो तं कथं सुत्वा “**भिक्खवे, मरणासन्नकाले संकिलिट्ठचित्तस्स दुग्गति पाटिकङ्का**”ति दस्सेन्तो इमाय अट्ठुप्पत्तिया इदं सुत्तं देसेसि ।

तत्थ **इधाति** देसापदेसे निपातो । स्वायं कत्थचि पदेसं उपादाय वुच्चति “**इधेव तिट्ठमानस्स, देवभूतस्स मे सतो**”तिआदीसु (दी० नि० २.३६९) । कत्थचि सासनं उपादाय “**इधेव, भिक्खवे, समणो इध दुतियो समणो**”तिआदीसु (म० नि० १.१३९; अ० नि० ४.२४१) । कत्थचि पदपूरणमत्ते “**इधाहं, भिक्खवे, भुत्तावी अस्सं पवारितो**”तिआदीसु (म० नि० १.३०) । कत्थचि लोकं उपादाय वुच्चति “**इध तथागतो लोके उप्पज्जती**”तिआदीसु (अ० नि० ३.६१) । इधापि लोके एव दट्ठब्बो । **एकच्चन्ति** एकं, अज्जतरन्ति अत्थो । **पुग्गलन्ति** सत्तं । सो हि यथापच्चयं कुसलाकुसलानं तब्बिपाकानञ्च पूरणतो मरणवसेन गलनतो च पुग्गलोति वुच्चति । **पदुट्ठचित्तन्ति** पदोसेन आघातेन दुट्ठचित्तं । अथ वा **पदुट्ठचित्तन्ति** दोसेन रागादिना पदूसितचित्तं । एत्थ च **एकच्चन्ति** इदं पदुट्ठचित्तस्स पुग्गलस्स विसेसनं । यस्स हि पटिसन्धिदायककम्मं ओकासमकासि, सो तथा वुत्तो । यस्स च अकुसलप्पवत्तितो चित्तं निवत्तेत्वा कुसलवसेन ओतारेतुं न सक्का, एवं आसन्नमरणो । **एवन्ति** इदानि वत्तब्बाकारं दस्सेति । **चेतसाति** अत्तनो चित्तेन चेतोपरियजाणेन । **चेतोति** तस्स पुग्गलस्स चित्तं । **परिच्चाति** परिच्छिन्दित्वा **पजानामि** । ननु च यथाकम्मुपगजाणस्सायं विसयोति? सच्चमेतं, तदा पवत्तमानअकुसलचित्तवसेन पनेतं वुत्तं ।

इमम्हि चायं समयेति इमस्मिं काले, इमायं वा पच्चयसामग्गियं, अयं पुग्गलो जवनवीथिया अपरभागे कालं करेय्य चेति अत्थो । न हि जवनक्खणे कालंकिरिया अत्थि । **यथाभतं निक्खित्तो एवं निरयेति** यथा आभतं किञ्चि आहरित्वा ठपितं, एवं अत्तनो कम्मुना निक्खित्तो निरये ठपितो एवाति अत्थो । **कायस्स भेदाति** उपादिन्नक्खन्धपरिच्चागा । **परं मरणाति** तदनन्तरं अभिनिब्बत्तक्खन्धगहणे । अथ वा **कायस्स भेदाति** जीवितिन्द्रियस्स उपच्छेदा । **परं मरणाति** चुतितो

उद्धं ।

अपायन्तिआदि सब्बं निरयस्सेव वेवचनं । निरयो हि अयसङ्गाता सुखा अपेतोति **अपायो**; सग्गमोक्खहेतुभूता वा पुञ्जसम्मता अया अपेतोतिपि अपायो । दुक्खस्स गति पटिसरणन्ति **दुग्गति**; दोसबहुलत्ता वा दुट्ठेन कम्मुना निब्बत्ता गतीतिपि दुग्गति । विवसा निपतन्ति एत्थ दुक्कटकम्मकारिनो, विनस्सन्ता वा एत्थ निपतन्ति सम्भिज्जमानङ्गपच्चङ्गाति **विनिपातो** । नत्थि एत्थ अस्सादसज्जितो अयोति निरस्सादट्ठेन **निरयो** । अथ वा अपायग्गहणेन तिरच्छानयोनि वुच्चति । तिरच्छानयोनि हि अपायो सुगतितो अपेतत्ता, न दुग्गति महेसक्खानं नागराजादीनं सम्भवतो । दुग्गतिग्गहणेन पेत्तिविसयो । सो हि अपायो चेव दुग्गति च सुगतितो अपेतत्ता दुक्खस्स च गतिभूतत्ता, न विनिपातो असुरसदिसं अविनिपातत्ता । विनिपातग्गहणेन असुरकायो । सो हि यथावुत्तेन अत्थेन अपायो चेव दुग्गति च, सब्बसम्पत्तिसमुस्सयेहि विनिपतितत्ता विनिपातोति च वुच्चति । निरयग्गहणेन अवीचिआदिअनेकप्पकारो निरयोव वुच्चति । इध पन सब्बपदेहिपि निरयोव वुत्तो । **उपपज्जन्तीति** पटिसन्धिं गणहन्ति ।

गाथासु पठमगाथा सङ्गीतिकाले धम्मसङ्गाहकत्थेरेहि ठपिता । **जत्वानाति** पुब्बकालकिरिया । जाणपुब्बकज्झि ब्याकरणं । हेतुअत्थो वा त्वा-सद्दो यथा “सीहं दिस्वा भयं होती”ति, जाननहेतूति अत्थो । **बुद्धो, भिक्खूनं सन्तिकेति** बुद्धो भगवा अत्तनो सन्तिके भिक्खूनं एतं परतो द्वीहि गाथाहि वुच्चमानं अत्थं ब्याकासि । सेसं वुत्तनयमेव ।

दसमसुत्तवण्णना निट्ठिता ।

दुतियवग्गवण्णना निट्ठिता ।

३. ततियवग्गो

१. पसन्नचित्तसुत्तवण्णना

२१. ततियवग्गस्स पठमे **पसन्नचित्तन्ति** रतनत्तयसद्भाय कम्मफलसद्भाय च पसन्नमानसं । **सुगतिन्ति** सुन्दरं गतिं, सुखस्स वा गतिन्ति सुगतिं । **सग्गन्ति** रूपादिसम्पत्तीहि सुट्ठु अग्गन्ति **सग्गं** । **लोकन्ति** लोकियन्ति एत्थ पुञ्जपापफलानि, लुज्जनट्ठेनेव वा लोकं । एत्थ च सुगतिग्गहणेन मनुस्सगतिपि सङ्गहति, सग्गग्गहणेन देवगति एव । सेसं हेट्ठा वुत्तनयमेव ।

पठमसुत्तवण्णना निट्ठिता ।

२. मेत्तसुत्तवण्णना

२२. दुतिये **मा, भिक्खवे, पुज्जानन्ति** एत्थ माति पटिसेधे निपातो । **पुज्ज**सद्दो “कुसलानं, भिक्खवे, धम्मानं समादानहेतु एवमिदं पुज्जं पवड्ढती”तिआदीसु (दी० नि० ३.३८०) पुज्जफले आगतो । “अविज्जागतोयं, भिक्खवे, पुरिसपुग्गलो पुज्जञ्चे सङ्खारं अभिसङ्खरोती”तिआदीसु (सं० नि० २.५१) कामरूपावचरसुचरिते । “पुज्जूपगं भवति विज्जाण”न्तिआदीसु सुगतिविसेसभूते उपपत्तिभवे । “तीणिमानि, भिक्खवे, पुज्जकिरियवत्थूनि — दानमयं पुज्जकिरियवत्थु, सीलमयं पुज्जकिरियवत्थु, भावनामयं पुज्जकिरियवत्थू”तिआदीसु (इतिवु० ६०; अ० नि० ८.३६) कुसलचेतनायं । इध पन तेभूमककुसलधम्मे वेदितब्बो । **भायित्थाति** एत्थ दुविधं भयं जाणभयं, सारज्जभयन्ति । तत्थ

“येपि ते, भिक्खवे, देवा दीघायुका वण्णवन्तो सुखबहुला उच्चेसु विमानेसु चिरद्वितिका, तेपि तथागतस्स धम्मदेसनं सुत्वा येभ्य्येन भयं संवेगं सन्तासं आपज्जन्ती”तिआदीसु (अ० नि० ४.३३) आगतं जाणभयं। “अहुदेव भयं, अहु छम्भितत्तं, अहु लोमहंसो”तिआदीसु (दी० नि० २.३१८) आगतं सारज्जभयं। इधापि सारज्जभयमेव। अयज्हेत्थ अत्थो — भिक्खवे, दीघरत्तं कायवचीसंयमो वत्तपटिवत्तपूरणं एकासनं, एकसेय्यं, इन्द्रियदमो, धुतधम्मोहि चित्तस्स निग्गहो, सतिसम्पज्जं, कम्मट्ठानानुयोगवसेन वीरियारम्भोति एवमादीनि यानि भिक्खुना, निरन्तरं पवत्तेतब्बानि पुज्जानि, तेहि मा भायित्थ, मा भयं सन्तासं आपज्जित्थ, एकच्चस्स दिट्ठधम्मसुखस्स उपरोधभयेन सम्परायिकनिब्बानसुखदायकेहि पुज्जेहि मा भायित्थाति। निस्सक्के हि इदं सामिवचनं।

इदानी ततो अभायितब्बभावे कारणं दस्सेन्तो “**सुखस्सेत**”न्तिआदिमाह। तत्थ **सुख**सद्वो “सुखो बुद्धानं उप्पादो, सुखा विरागता लोके”तिआदीसु (ध० प० १९४) सुखमूले आगतो। “यस्मा च खो, महालि, रूपं सुखं सुखानुपतितं सुखावक्कन्त”न्तिआदीसु (सं० नि० ३.६०) सुखारम्भणे। “यावज्जिदं, भिक्खवे, न सुकरं अक्खानेन पापुणितुं याव सुखा सग्गा”तिआदीसु (म० नि० ३.२५५) सुखपच्चयद्धाने। “सुखो पुज्जस्स उच्चयो”तिआदीसु (ध० प० ११८) सुखहेतुम्हि। “दिट्ठधम्मसुखविहारा एते धम्मा”तिआदीसु (म० नि० १.८२) अब्यापज्जे। “निब्बानं परमं सुख”न्तिआदीसु (ध० प० २०४; म० नि० २.२१५) निब्बाने। “सुखस्स च पहाना”तिआदीसु (चूळनि० खग्गविसाणसुत्तनिद्देस १२५) सुखवेदनायं। “अदुक्खमसुखं सन्तं, सुखमिच्चेव भासित”न्तिआदीसु (सं० नि० ४.२५३; इतिवु० ५३) उपेक्खावेदनायं। “द्वेपि मया, आनन्द, वेदना वुत्ता परियायेन सुखा वेदना, दुक्खा वेदना”तिआदीसु (म० नि० २.८९) इट्ठसुखे। “सुखो विपाको पुज्जान”न्तिआदीसु (पेटको० २३) सुखविपाके। इधापि इट्ठविपाके एव दट्ठब्बो। **इट्ठस्सा**तिआदीसु एसितब्बतो अनिट्ठपटिक्खेपतो च इट्ठस्स, कमनीयतो मनस्मिञ्च कमनतो पविसनतो **कन्तस्स**, पियायितब्बतो सन्तप्पनतो च **पियस्स**, माननीयतो मनस्स पवड्ढनतो च **मनापस्सा**ति अत्थो वेदितब्बो। **यदिदं पुज्जानी**ति “पुज्जानी”ति यदिदं वचनं, एतं सुखस्स इट्ठस्स विपाकस्स अधिवचनं नामं, सुखमेव तं यदिदं पुज्जन्ति फलेन कारणस्स अभेदूपचारं वदति। तेन कतूपचितानं पुज्जानं अवस्संभावफलं सुत्वा अप्पमत्तेन सक्कच्चं पुज्जानि कातब्बानीति पुज्जकिरियायं नियोजेति, आदरञ्च नेसं तत्थ उप्पादेति।

इदानी अत्तना सुनेत्तकाले कतेन पुज्जकम्मेन दीघरत्तं पच्चनुभूतं भवन्तरपटिच्छन्नं उळारतमं पुज्जविपाकं उदाहरित्वा तमत्थं पाकटं करोन्तो “**अभिजानामि खो पनाह**”न्तिआदिमाह। तत्थ **अभिजानामी**ति अभिविसिट्ठेन जाणेन जानामि, पच्चक्खतो बुज्झामि। **दीघरत्तन्ति** चिरकालं। **पुज्जानन्ति** दानादिकुसलधम्मानं। **सत्त वस्सानी**ति सत्त संवच्छरानि। **मेत्तचित्तन्ति** मिज्जतीति मेत्ता, सिनिह्मतीति अत्थो। मित्ते भवा, मित्तस्स वा एसा पवत्तीतिपि मेत्ता। लक्खणादितो पन हिताकारप्पवत्तिलक्खणा, हितूपसंहाररसा, आघातविनयपच्चुपट्टाना, सत्तानं मनापभावदस्सनपदट्टाना। ब्यापादूपसमो एतस्सा सम्पत्ति, सिनेहासम्भवो विपत्ति। सा एतस्स अत्थीति मेत्तचित्तं। **भावेत्वा**ति मेत्तासहगतं चित्तं, चित्तसीसेन समाधि वुत्तोति मेत्तासमाधिं मेत्ताब्रह्मविहारं उप्पादेत्वा चेव वट्ठेत्वा च। **सत्त संवट्ठविवट्ठकप्पे**ति सत्त महाकप्पे। संवट्ठ-विवट्ठगहणेनेव हि संवट्ठट्ठायि-विवट्ठट्ठायिनोपि गहिता। **इमं लोकन्ति** कामलोकं। **संवट्ठमाने सुदन्ति** संवट्ठमाने। **सुदन्ति** निपातमत्तं विनस्समानेति अत्थो। “संवत्तमाने सुद”न्ति च पठन्ति। **कप्पे**ति काले। कप्पसीसेन हि कालो वुत्तो। काले खीयमाने कप्पोपि खीयतेव। यथाह —

“कालो घसति भूतानि, सब्बानेव सहत्तना”ति॥ (जा० १.२.१९०)।

“आभस्सरूपगो होमी”ति वुत्तत्ता तेजोसंवट्टवसेनेत्थ कप्पवुट्ठानं वेदितब्बं । आभस्सरूपगोति तत्थ पटिसन्धिग्गहणवसेन आभस्सरब्रह्मलोकं उपगच्छामीति आभस्सरूपगो होमि । विवट्टमानेति सण्ठहमाने, जायमानेति अत्थो । **सुज्जं ब्रह्मविमानं उपपज्जामीति** कस्सचि सत्तस्स तत्थ निब्बत्तस्स अभावतो सुज्जं, यं पठमज्झानभूमिसङ्घातं ब्रह्मविमानं आदितो निब्बत्तं, तं पटिसन्धिग्गहणवसेन उपपज्जामि उपेमि । **ब्रह्माति** कामावचरसत्तेहि सेट्टुट्ठेन तथा तथा ब्रूहितगुणताय ब्रह्मविहारतो निब्बत्तुट्ठेन च ब्रह्मा । ब्रह्मपारिसज्जब्रह्मपुरोहितेहि महन्तो ब्रह्माति **महाब्रह्मा** । ततो एव ते अभिभवित्वा ठितत्ता **अभिभू** । तेहि केनचि गुणेन न अभिभूतोति **अनभिभूतो** । **अज्जदत्थूति** एकंसवचने निपातो । **दसोति** दस्सनसीलो, सो अतीतानागतपच्चुप्पन्नानं दस्सनसमत्थो, अभिज्जाणेन पस्सितब्बं पस्सामीति अत्थो । सेसब्रह्मानं इद्धिपादभावनाबलेन अत्तनो चित्तज्ज मम वसे वत्तेमीति **वसवत्ती** होमीति योजेतब्बं । तदा किर बोधिसत्तो अट्टसमापत्तिलाभीपि समानो तथा सत्तहितं अत्तनो पारमिपरिपूरणज्ज ओलोकेन्तो तासु एव द्वीसु ज्ञानभूमीसु निकन्तिं उप्पादेत्वा मेत्ताब्रह्मविहारवसेन अपरापरं संसरि । तेन वुत्तं “**सत्तवस्सानि...पे०... वसवत्ती**”ति ।

एवं भगवा रूपावचरपुज्जस्स विपाकमहन्तं पकासेत्वा इदानि कामावचरपुज्जस्सापि तं दस्सेन्तो “**छत्तिसक्खत्तु**”न्तिआदिमाह । तत्थ **सक्को अहोसिन्ति** छत्तिस वारे अज्जत्थ अनुपपज्जित्वा निरन्तरं सक्को देवानमिन्दो तावत्तिसदेवराजा अहोसि । **राजा अहोसिन्ति**आदीसु चतूहि अच्छरियधम्मोहि चतूहि च सङ्गहवत्थूहि लोकं रज्जेतीति **राजा** । चक्करतनं वत्तेति, चतूहि सम्पत्तिचक्केहि वत्तति, तेहि च परं वत्तेति, परहिताय च इरियापथचक्कानं वत्तो एतस्मिं अत्थीति **चक्कवत्ती** । **राजाति** चेत्थ सामज्जं, **चक्कवत्तीति** विसेसं । धम्मेन चरतीति **धम्मिको** । जायेन समेन वत्ततीति अत्थो । धम्मेनेव रज्जं लभित्वा राजा जातोति **धम्मराजा** । परहितधम्मचरणेन वा **धम्मिको**, अत्तहितधम्मचरणेन **धम्मराजा**, चतुरन्ताय इस्सरोति **चातुरन्तो**, चतुसमुद्दन्ताय चतुब्बिधदीपविभूसिताय च पथविद्या इस्सरोति अत्थो । अज्जत्तं कोपादिपच्चत्थिके, बहिद्धा च सब्बराजानो अदण्डेन असत्थेन विजेसीति **विजितावी** । जनपदे थावरभावं ध्रुवभावं पत्तो, न सक्का केनचि ततो चालेतुं जनपदो वा तम्हि थावरियप्पत्तो अनुयुत्तो सक्कम्मनिरतो अचलो असम्पवेधीति **जनपदत्थावरियप्पत्तो** ।

चक्करतनं, हत्थिरतनं, अस्सरतनं, मणिरतनं, इत्थिरतनं, गहपतिरतनं, परिणायकरतनन्ति इमेहि सत्तहि रतनेहि समुपेतोति **सत्तरतनसमन्नागतो** । तेसु हि राजा चक्कवत्ति चक्करतनेन अजितं जिनाति, हत्थिअस्सरतनेहि विजिते सुखेनेव अनुविचरति, परिणायकरतनेन विजितमनुरक्खति, सेसेहि उपभोगसुखमनुभवति । पठमेन चस्स उस्साहसत्तियोगो, पच्छिमेन मन्तसत्तियोगो, हत्थिअस्सगहपतिरतनेहि पभूसत्तियोगो सुपरिपुण्णो होति, इत्थिमणिरतनेहि तिविधसत्तियोगफलं । सो इत्थिमणिरतनेहि परिभोगसुखमनुभवति, सेसेहि उपभोगसुखं । विसेसतो चस्स पुरिमानि तीणि अदोसकुसलमूलजनितकम्मानुभावेन सम्पज्जन्ति, मज्झिमानि अलोभकुसलमूलजनितकम्मानुभावेन, पच्छिममेकं अमोहकुसलमूलजनितकम्मानुभावेनाति वेदितब्बं **पदेसरज्जस्साति** खुट्ठकरज्जस्स ।

एतदहोसीति अत्तनो सम्पत्तियो पच्चवेक्खन्तस्स पच्छिमे चक्कवत्तिकाले एतं “किस्स नु खो मे इदं कम्मस्स फलं”न्तिआदिकं अहोसि । सब्बत्थकमेव तस्मिं तस्मिम्पि भवे एतदहोसियेव । तत्थायं चक्कवत्तिकालवसेन योजना । **एवंमहिद्धिकोति** मणिरतनहत्थिरतनादिप्पमुखाय कोसवाहनसम्पत्तिया जनपदत्थावरियप्पत्तिया च एवंमहिद्धिको । **एवंमहानुभावोति** चक्करतनादिसमन्नागमेन कस्सचिपि पीळं अकरोन्तोव सब्बराजूहि सिरसा सम्पटिच्छितसासनवेहासगमनादीहि एवं महानुभावो । **दानस्साति** अन्नादिदेय्यधम्मपरिच्चागस्स । **दमस्साति** चक्खादिइन्द्रियदमनस्स चेव समाधानवसेन रागादिकिलेसदमनस्स च । **संयमस्साति** कायवचीसंयमस्स । तत्थ यं

समाधानवसेन किलेसदमनं, तं भावनामयं पुञ्जं, तच्च खो मेत्ताब्रह्मविहारभूतं इधाधिप्पेतं । तस्मिञ्च उपचारप्पनाभेदेन दुविधे यं अप्पनाप्पत्तं, तेनस्स यथावुत्तासु द्वीसु ज्ञानभूमीसु उपपत्ति अहोसि । इतरेण तिविधेनापि यथारहं पत्तचक्कवत्तिआदिभावोति वेदितब्बं ।

इति भगवा अत्तानं कायसक्खि कत्वा पुञ्जानं विपाकमहन्ततं पकासेत्वा इदानीं तमेवत्थं गाथाबन्धेन दस्सेन्तो “पुञ्जमेवा”तिआदिमाह । तत्थ पुञ्जमेव सो सिकखेय्याति यो अत्थकामो कुलपुत्तो, सो पुञ्जफलनिब्बत्तनतो, अत्तनो सन्तानं पुननतो च “पुञ्ज”न्ति लद्धनामं तिविधं कुसलमेव सिकखेय्य निवेसेय्य उपचिनेय्य पसवेय्याति अत्थो । आयतगगन्ति विपुलफलताय उळारफलताय आयतगगं, पियमनापफलताय वा आयतिं उत्तमन्ति आयतगगं, आयेन वा योनिसोमनसिकारादिप्पच्चयेन उळारतमेन अगगन्ति आयतगगं । तकारो पदसन्धिकरो । अथ वा आयेन पुञ्जफलेन अगगं पधानन्ति आयतगगं । ततो एव सुखुद्रयं सुखविपाकन्ति अत्थो ।

कतमं पन तं पुञ्जं, कथञ्च नं सिकखेय्याति आह “दानञ्च समचरियञ्च, मेत्तचित्तञ्च भावये”ति । तत्थ समचरियन्ति कायविसमादीनि वज्जेत्वा कायसमादिचरितं, सुविसुद्धं सीलन्ति अत्थो । भावयेति अत्तनो सन्ताने उप्पादेय्य वड्ढेय्य । एते धम्मेति एते दानादिके सुचरितधम्मे । सुखसमुद्दयेति सुखानिसंसे, आनिसंसफलम्पि नेसं सुखमेवाति दस्सेति । अब्बापज्जं सुखं लोकन्ति कामच्छन्दादिब्बापादविरहितत्ता अब्बापज्जं निदुक्खं, परपीळाभावे पन वत्तब्बं नत्थि । ज्ञानसमापत्तिवसेन सुखबहुलत्ता सुखं, एकन्तसुखञ्च ब्रह्मलोकं ज्ञानपुञ्जानं, इतरपुञ्जानं पन तदञ्जं सम्पत्तिभवसङ्घातं सुखं लोकं पण्डितो सप्पञ्जो उपपज्जति उपेति । इति इमस्मिं सुत्ते गाथासु च वट्टसम्पत्ति एव कथिता ।

दुतियसुत्तवण्णना निड्डिता ।

३. उभयत्थसुत्तवण्णना

२३. ततिये भावितोति उप्पादितो च वड्डितो च । बहुलीकतोति पुनप्पुनं कतो । अत्थोति हितं । तज्झि अरणीयतो उपगन्तब्बतो अत्थोति वुच्चति । समधिगह्णं तिद्वतीति सम्मा परिगगहेत्वा अविजहित्वा वत्तति । दिद्वधम्मिकन्ति दिद्वधम्मो वुच्चति पच्चक्खभूतो अत्तभावो, दिद्वधम्मो भवं दिद्वधम्मिकं, इधलोकपरियापन्नन्ति अत्थो । सम्परायिकन्ति धम्मवसेन सम्परेतब्बतो सम्परायो, परलोको, सम्पराये भवं सम्परायिकं, परलोकपरियापन्नन्ति वुत्तं होति ।

को पनेस दिद्वधम्मिको नाम अत्थो, को वा सम्परायिकोति? सङ्खेपेन ताव यं इधलोकसुखं, यञ्चेतरहि इधलोकसुखावहं, अयं दिद्वधम्मिको अत्थो । सेय्यथिदं — गहट्टानं ताव इध यं किञ्चि वित्तूपकरणं, अनाकुलकम्मन्तता, आरोग्यसंविधानं, वत्थुविसदकिरियायोगविहितानि सिप्पायतनविज्जाट्टानानि सङ्गहितपरिजनताति एवमादि । पब्बजितानं पन ये इमे जीवितपरिक्खारा चीवरपिण्डपातसेनासनगिलानप्पच्चयभेसज्जपरिक्खारा । तेसं अकिच्छलाभो, तत्थ च सङ्घाय पटिसेवना, सङ्घाय परिवज्जना, वत्थुविसदकिरिया, अप्पिच्छता, सन्तुट्ठि, पविवेको, असंसग्गोति एवमादि । पतिरूपदेसवाससप्पुरिसूपनिस्सयसद्धम्मस्सवनयोनिमनसिकारादयो पन उभयेसं साधारणा उभयानुरूपा चाति वेदितब्बा ।

अप्पमादोति एत्थ अप्पमादो पमादप्पटिपक्खतो वेदितब्बो । को पनेस पमादो नाम? पमज्जनाकारो । वुत्तं हेतं —

“तत्थ कतमो पमादो? कायदुच्चरिते वा वचीदुच्चरिते वा मनोदुच्चरिते वा पञ्चसु वा कामगुणेषु चित्तस्स

वोस्सगो वोस्सगानुप्पादनं कुसलानं वा धम्मनं भावनाय असक्कच्चकिरियता असातच्चकिरियता अनट्ठितकिरियता ओलीनवुत्तिता निक्खित्तच्छन्दता निक्खित्तधुरता अनासेवना अभावना अबहुलीकम्मं अनधिद्धानं अननुयोगोपमादो । यो एवरूपो पमादो पमज्जना पमज्जिततत्तं । अयं वुच्चति पमादो”ति (विभ० ८४६) ।

तस्मा वुत्तप्पटिपक्खतो अप्पमादो वेदितब्बो । अत्थतो हि सो सतिया अविप्पवासो, निच्चं उपट्ठितस्सतिया एतं नामं । अपरे पन “सतिसम्पज्जयोगेन पवत्ता चत्तारो अरूपिनो खन्धा अप्पमादो”ति वदन्ति ।

“भावितो बहुलीकतो”ति वुत्तं, कथं पनायं अप्पमादो भावेतब्बोति? न अप्पमादभावना नाम विसुं एकभावना अत्थि । या हि काचि पुज्जकिरिया कुसलकिरिया, सब्बा सा अप्पमादभावनात्वेव वेदितब्बा । विसेसतो पन विवट्ठूपनिस्सयं सरणगमनं कायिकवाचसिकसंवरज्ज उपादाय सब्बा सीलभावना, सब्बा समाधिभावना, सब्बा पज्जाभावना, सब्बा कुसलभावना, अनवज्जभावना, अप्पमादभावनाति वेदितब्बा । “अप्पमादो”ति हि इदं महन्तं अत्थं दीपेति, महन्तं अत्थं परिग्गहेत्वा तिष्ठति । सकलम्पि तेपिटकं बुद्धवचनं आहरित्वा अप्पमादपदस्स अत्थं कत्वा कथेन्तो धम्मकथिको “अतित्थेन पक्खन्दो”ति न वत्तब्बो । कस्मा? अप्पमादपदस्स महन्तभावतो । तथा हि सम्मासम्बुद्धो कुसिनारायं यमकसालानमन्तरे परिनिब्बानसमये निपन्नो अभिसम्बोधितो पट्टाय पञ्चचत्तालीसाय वस्सेसु अत्तना भासितं धम्मं एकेन पदेन सङ्गहेत्वा दस्सेन्तो — “अप्पमादेन सम्पादेथा”ति भिक्खूनां ओवादमदासि । तथा च वुत्तं —

“सेय्यथापि, भिक्खवे, यानि कानिचि जङ्गलानं पाणानं पदजातानि, सब्बानि तानि हत्थिपदे समोधानं गच्छन्ति, हत्थिपदं तेसं अगमक्खायति यदिदं महन्तट्ठेन; एवमेव खो, भिक्खवे, ये केचि कुसला धम्मा, सब्बेते अप्पमादमूलका अप्पमादसमोसरणा, अप्पमादो तेसं धम्मनं अगमक्खायती”ति (म० नि० १.३००) ।

गाथासु **अप्पमादं पसंसन्ती**ति दानादिपुज्जकिरियासु अप्पमादं अप्पमज्जनं पण्डिता सप्पज्जा बुद्धादयो पसंसन्ति, वण्णेन्ति थोमेन्ति । कस्मा? यस्मा **अप्पमत्तो उभो अत्थे अधिगण्हाति पण्डितो** । के पन ते उभो अत्थाति आह — “दिट्ठे धम्मे च यो अत्थो, यो चत्थो सम्परायिको”ति, एवमेत्थ पदयोजना वेदितब्बा । इथापि **दिट्ठे धम्मे च यो अत्थो**ति गहट्ठस्स ताव “अनवज्जानि कम्मनि, अनाकुला च कम्मन्ता”ति आदिना नयेन वुत्तो कसिगोरक्खादिविधिना लद्धब्बो अत्थो, पब्बजितस्स पन अविप्पटिसारादिअत्थो वेदितब्बो । **यो चत्थो सम्परायिको**ति पन उभयेसम्पि धम्मचरियाव वुत्ताति वेदितब्बा । **अत्थाभिसमया**ति दुविधस्सपि अत्थस्स हितस्स पटिलाभा, लद्धब्बेन समिति सङ्गति समोधानन्ति समयो, लाभो । समयो एव **अभिसमयो**, अभिमुखभावेन वा समयो अभिसमयोति एवमेत्थ अभिसमयो वेदितब्बो । धितिसम्पन्नत्ता **धीरो** । ततियेन चेत्थ अत्थ-सद्देन परमत्थस्स निब्बानस्सापि सङ्गहो वेदितब्बो । सेसं सुविज्जेय्यमेव । इति इमस्मिं सुत्ते वट्ठसम्पत्ति एव कथिता । गाथायं पन विवट्ठस्सपि सङ्गहो दट्ठब्बो । तथा हि वुत्तं —

“अप्पमादो अमतपदं, पमादो मच्चुनो पदं ।

अप्पमत्ता न मीयन्ति, ये पमत्ता यथा मता ॥

“एवं विसेसतो जत्वा, अप्पमादमहि पण्डिता ।

अप्पमादे पमोदन्ति, अरियानं गोचरे रता ॥

“ते ज्ञायिनो साततिका, निच्चं दळ्ळपरक्कमा ।

फुसन्ति धीरा निब्बानं, योगक्खेमं अनुत्तरं”न्ति ॥ (ध० प० २१-२३) ।

तस्मा “अत्थाभिसमया”ति एत्थ लोकोत्तरत्थवसेनपि अत्थो वेदितब्बो ।

ततियसुत्तवण्णना निड्डिता ।

४. अट्ठिपुज्जसुत्तवण्णना

२४. चतुत्थे एकपुग्गलस्साति एत्थ पुग्गलोति अयं वोहारकथा । बुद्धस्स हि भगवतो दुविधा देसना सम्मुतिदेसना च परमत्थदेसना चाति । तत्थ “पुग्गलो, सत्तो, इत्थी, पुरिसो, खत्तियो, ब्राह्मणो, देवो, मारो”ति एवरूपा सम्मुतिदेसना । “अनिच्चं, दुक्खं, अनत्ता, खन्धा, धातु, आयतना, सतिपट्टाना”ति एवरूपा परमत्थदेसना । तत्थ भगवा ये सम्मुतिवसेन देसनं सुत्वा विसेसमधिगन्तुं समत्था, नेसं सम्मुतिदेसनं देसेति । ये पन परमत्थवसेन देसनं सुत्वा विसेसमधिगन्तुं समत्था, तेसं परमत्थदेसनं देसेति ।

तत्थायं उपमा — यथा हि देसभासाकुसलो तिण्णं वेदानं अत्थसंवण्णनको आचरियो ये दमिळभासाय वुत्ते अत्थं जानन्ति, तेसं दमिळभासाय आचिक्खति । ये अन्धकभासादीसु अज्जतराय, तेसं ताय ताय भासाय । एवं ते माणवका छेकं ब्यत्तं आचरियमागम्म खिप्पमेव सिप्पं उग्गण्हन्ति । तत्थ आचरियो विय बुद्धो भगवा, तयो वेदा विय कथेतब्बभावे ठितानि तीणि पिटकानि, देसभासाकोसल्लमिव सम्मुतिपरमत्थकोसल्लं, नानादेसभासा माणवका विय सम्मुतिपरमत्थवसेन पटिविज्झनसमत्था वेनेय्या, आचरियस्स दमिळभासादिआचिक्खनं विय भगवतो सम्मुतिपरमत्थवसेन देसना वेदितब्बा । आह चेत्थ —

“दुवे सच्चानि अक्खासि, सम्बुद्धो वदतं वरो ।

सम्मुतिं परमत्थञ्च, ततियं नूपलब्भति ॥

“सङ्केतवचनं सच्चं, लोकसम्मुतिकारणा ।

परमत्थवचनं सच्चं, धम्मनं भूतकारणा ॥

“तस्मा वोहारकुसलस्स, लोकनाथस्स सत्थुनो ।

सम्मुतिं वोहरन्तस्स, मुसावादो न जायती”ति ॥

अपिच अट्ठहि कारणेहि भगवा पुग्गलकथं कथेति — हिरोत्तप्पदीपनत्थं, कम्मस्सकतादीपनत्थं, पच्चत्तपुरिसकारदीपनत्थं, आनन्तरियदीपनत्थं, ब्रह्मविहारदीपनत्थं, पुब्बेनिवासदीपनत्थं, दक्खिणाविसुद्धिदीपनत्थं, लोकसम्मुतिया अप्पहानत्थं, चाति । “खन्धधातुआयतनानि हिरियन्ति ओत्तप्पन्ती”ति हि वुत्ते महाजनो न जानाति, सम्मोहं आपज्जति, पटिसत्तु वा होति — “किमिदं खन्धधातुआयतनानि हिरियन्ति ओत्तप्पन्ति नामा”ति? “इत्थी हिरियति ओत्तप्पति, पुरिसो, खत्तियो, ब्राह्मणो, देवो, मारो”ति पन वुत्ते जानाति, न सम्मोहं आपज्जति, न पटिसत्तु वा होति । तस्मा भगवा हिरोत्तप्पदीपनत्थं पुग्गलकथं कथेति ।

“खन्धा कम्मस्सका, धातुयो आयतनानी”ति वुत्तेपि एसेव नयो । तस्मा कम्मस्सकतादीपनत्थमपि पुग्गलकथं

कथेति ।

“वेळुवनादयो महाविहारा खन्धेहि कारापिता, धातूहि आयतनेही”ति वुत्तेपि एसेव नयो । तथा “खन्धा मातरं जीविता वोरोपेन्ति, पितरं, अरहन्तं, रुहिरुप्पादकम्मं, सङ्गभेदकम्मं करोन्ति, धातुयो आयतनानी”ति वुत्तेपि एसेव नयो । “खन्धा मेत्तायन्ति, धातुयो आयतनानी”ति वुत्तेपि एसेव नयो । “खन्धा पुब्बेनिवासं अनुस्सरन्ति, धातुयो आयतनानी”ति वुत्तेपि एसेव नयो । तस्मा भगवा पच्चत्तपुरिसकारदीपनत्थं आनन्तरियदीपनत्थं ब्रह्मविहारदीपनत्थं पुब्बेनिवासदीपनत्थञ्च पुग्गलकथं कथेति ।

“खन्धा दानं पटिगणहन्ति, धातुयो आयतनानी”ति वुत्तेपि महाजनो न जानाति, सम्मोहं आपज्जति, पटिसत्तु वा होति “किमिदं खन्धा धातुयो आयतनानि पटिगणहन्ति नामा”ति? “पुग्गला पटिगणहन्ती”ति पन वुत्ते जानाति, न सम्मोहं आपज्जति, न पटिसत्तु वा होति । तस्मा भगवा दक्खिणाविसुद्धिदीपनत्थं पुग्गलकथं कथेति ।

लोकसम्मुतिञ्च बुद्धा भगवन्तो न पजहन्ति, लोकसमञ्जाय लोकनिरुत्तिया लोकाभिलापे ठितायेव धम्मं देसेन्ति । तस्मा भगवा लोकसम्मुतिया अप्पहानत्थम्पि पुग्गलकथं कथेति । सो इधापि लोकवोहारवसेन देसेतब्बमत्थं दस्सेन्तो “एकपुग्गलस्सा”तिआदिमाह ।

तत्थ एकपुग्गलस्साति एकसत्तस्स । कप्पन्ति महाकप्पं । यदिपि अच्चन्तसंयोगे इदं उपयोगवचनं, यत्थ पन सत्तानं सन्धावनं संसरणं सम्भवति, तस्स वसेन गहेतब्बं । अट्टिकङ्कलोति अट्टिभागो । “अट्टिखलो”तिपि पठन्ति, अट्टिसञ्चयोति अत्थो । अट्टिपुज्जोति अट्टिसमूहो । अट्टिरासीति तस्सेव वेवचनं । केचि पन “कटिप्पमाणतो हेट्ठा समूहो कङ्कलो नाम, ततो उपरि याव तालप्पमाणं पुज्जो, ततो उपरि रासी”ति वदन्ति । तं तेसं मतिमत्तं । सब्बमेतं समूहस्सेव परियायवचनं वेपुल्लस्सेव उपमाभावेन आहटत्ता ।

सचे संहारको अस्साति अविप्पकिरणवसेन संहारित्वा ठपेता कोचि यदि सियाति परिकप्पनवसेन वदति । सम्भतञ्च न विनस्सेय्याति तथा केनचि सम्भतञ्च तं अट्टिकङ्कलं अन्तरधानाभावेन पूतिभूतं चुण्णविचुण्णञ्च अहुत्वा सचे न विनस्सेय्याति परिकप्पनवसेनेव वदति । अयञ्हेत्थ अत्थो — भिक्खवे, एकस्स सत्तस्स कम्मकिलेसेहि अपरापरुप्पत्तिवसेन एकं महाकप्पं सन्धावन्तस्स संसरन्तस्स एवं महाअट्टिसञ्चयो भवेय्य, आरोहपरिणाहेहि यत्तकोयं वेपुल्लपब्बतो । सचे पनस्स कोचि संहारित्वा ठपेता भवेय्य, सम्भतञ्च तं सचे अविनस्सन्तं तिट्ठेय्याति । अयञ्च नयो निब्बुतप्पदीपे विय भिज्जनसभावे कळेवरनिक्खेपरहिते ओपपातिकत्तभावे सब्बेन सब्बं अनट्टिके च खुद्दकत्तभावे वज्जेत्वा वुत्तो । केचि पन “परिकप्पनवसेन इमस्स नयस्स आहटत्ता तेसम्पि यदि सिया अट्टिकङ्कलो, तेनापि सहेव अयं अट्टिपुज्जपरिमाणो वुत्तो”ति वदन्ति । अपरे पन “नयिदमेवं लब्भमानस्सेव अट्टिपुज्जस्स वसेन सब्बञ्जुतज्जाणेन परिच्छिन्दित्वा इमस्स परिमाणस्स वुत्तता । तस्मा वुत्तनयेनेव अत्थो गहेतब्बो”ति ।

गाथासु महेसिनाति महन्ते सीलखन्धादयो एसति गवेसतीति महेसी, सम्मासम्बुद्धो । “इति वुत्तं महेसिना”ति च भगवा “दसबलसमन्नागतो, भिक्खवे, तथागतो”तिआदीसु विय अत्तानं अज्जं विय कत्वा दस्सेति । वेपुल्लोति राजगहं परिवारेत्वा ठितेसु पञ्चसु पब्बतेसु विपुलभावतो वेपुल्लोति लद्धनामो । ततो एव महा, ठितदिसाभागवसेन उत्तरो गिज्झकूटस्स । गिरिब्बजेति गिरिब्बजपुरनामकस्स राजगहस्स समीपे ।

एतावता भगवा “एतकेनापि कालेन अनुपच्छिन्नभवमूलस्स अपरिज्जातवत्थुकस्स पुथुज्जनस्स अयमीदिसी कटसिवट्ठना”ति वट्ठे आदीनवं दस्सेत्वा इदानी येसं अरियसच्चानं अननुबोधा अप्पटिवेधा अन्धपुथुज्जनस्स एवं कटसिवट्ठना, तानि अरियसच्चानि दिट्ठवतो अरियपुग्गलस्स अयं नत्थीति दस्सेन्तो “यतो च अरियसच्चानी”ति आदिमाह ।

तत्थ यतोति यदा । अरियसच्चानीति अरणीयतो अरियानि, अवितथभावेन सच्चानि चाति अरियसच्चानि, अरियभावकरानि वा सच्चानि अरियसच्चानि, अरियेहि वा बुद्धादीहि पटिविज्झितब्बानि सच्चानि अरियसच्चानि । अथ वा अरियस्स सच्चानि अरियसच्चानि । सदेवकेन हि लोकेन सरणन्ति अरणीयतो अरियो भगवा, तेन सयम्भुजाणेन दिट्ठता तस्स सच्चानीति अरियसच्चानि । सम्मप्यज्जाय पस्सतीति सम्मा हेतुना जायेन विपस्सनापज्जासहिताय मग्गपज्जाय परिज्जापहानसच्छिकिरियाभावनाभिसमयवसेन पस्सति । दुक्खन्तिआदि अरियसच्चानं सरूपदस्सनं । तत्थ अनेकूपद्ववाधिद्वानताय कुच्छितभावतो बालजनपरिकप्पितधुवसुभसुखत्तविरहेन तुच्छभावतो च दुक्खं । दुक्खं समुप्पज्जति एतेनाति दुक्खसमुप्पादो, दुक्खसमुदयो । दुक्खं अतिक्कमति एतेन आरम्भणप्पच्चयभूतेन, एत्थ वाति दुक्खस्स अतिक्कमो, निब्बानं । आरकत्ता किलेसेहि अरणीयतो च अरियो । सम्मादिट्ठिआदीनं अट्ठन्नं अङ्गानं वसेन अट्ठङ्गिको । मारेन्तो किलेसे गच्छति, निब्बानत्थिकेहि मग्गीयति, सयं वा निब्बानं मग्गतीति मग्गो । ततो एव दुक्खस्स उपसमं निरोधं गच्छतीति दुक्खूपसमगामी । यतो सम्मप्यज्जाय पस्सतीति सम्बन्धो ।

स सत्तक्खत्तुं परमं, सन्धावित्त्वान पुग्गलोति सो एवं चतुसच्चदस्सावी अरियपुग्गलो सोतापन्नो सब्बमुदिन्द्रियो समानो सत्तवारपरमंयेव भवादीसु अपरापरुप्पत्तिवसेन सन्धावित्त्वा संसरित्वा । एकबीजी, कोलंकोलो, सत्तक्खत्तुपरमोति इन्द्रियानं तिवक्खमज्झिममुदुभावेन तयो हि सोतापन्ना । तेसु सब्बमुदिन्द्रियस्स वसेनिदं वुत्तं “स सत्तक्खत्तुं परमं, सन्धावित्त्वाना”ति । दुक्खस्सन्तकरो होतीति वट्ठदुक्खस्स अन्तकरो परियोसानकरो होति । कथं? सब्बसंयोजनक्खया अनुपुब्बेन अग्गमग्गं अधिगन्त्वा निरवसेसानं संयोजनानं खेपनाति अरहत्तफलेनेव देसनाय कूटं गण्हि ।

चतुत्थसुत्तवण्णना निट्ठिता ।

५. मुसावादसुत्तवण्णना

२५. पञ्चमे एकधम्मं अतीतस्साति का उप्पत्ति? भगवतो भिक्खुसङ्घस्स च महालाभसक्कारो उप्पज्जि, तित्थियानं परिहायि । ते हतलाभसक्कारा निप्पभा नित्तेजा इस्सापकता चिज्चमाणविकं नाम परिब्बाजिकं उय्योजेसुं — “एहि, त्वं भगिनि, समणं गोतमं अभूतेन अब्भाचिक्खस्सू”ति । सा भगवन्तं चतुपरिसमज्झे धम्मं देसेन्तं उपगन्त्वा अभूतेन अब्भाचिक्खित्वा सक्केनस्सा अभूतभावे पकासिते महाजनेन “धी काळकण्णी”ति विहारतो निक्कट्ठापिता पथविया विवरे दिन्ने अवीचिजालानं इन्धनं हुत्वाव अवीचिनिरये निब्बत्ति, भिय्योसोमत्ताय तित्थियानं लाभसक्कारो परिहायि । भिक्खू धम्मसभायं कथं समुट्ठापेसुं “आवुसो, चिज्चमाणविका एवं उळारगुणं अग्गदक्खिणेय्यं सम्मासम्बुद्धं अभूतेन अक्कोसित्वा महाविनासं पत्ता”ति । सत्था आगन्त्वा “काय नुत्थ, भिक्खवे, एतरहि कथाय सन्निसिन्ना”ति पुच्छित्वा “इमाय नामा”ति वुत्ते “न, भिक्खवे, इदानेव, पुब्बेपि सा मं अभूतेन अक्कोसित्वा महाविनासं पत्तायेवा”ति महापदुमजातकम्पि वित्थारेत्वा उपरि धम्मं देसेन्तो इमिस्सा अट्ठुप्पत्तिया “एकधम्मं अतीतस्सा”ति इदं सुत्तं देसेसि ।

तत्थ एकधम्मन्ति एकं वचीसच्चसङ्घातं धम्मं । अतीतस्साति या सा अट्ठ अनरियवोहारे वज्जेत्वा अट्ठसु

अरियवोहारेसु पतिट्ठापनत्थं “सच्चं, भणे, नालिक”न्ति अरियेहि ठपिता मरियादा, तं अतिक्कमित्वा ठितस्स । पुरिसो एव पुग्गलोति **पुरिसपुग्गलो**, तस्स । **अकरणीयन्ति** कातुं असक्कुण्यं । सम्पजानमुसावादी हि पुग्गलो किञ्चि पापकम्मं कत्वा “इदं नाम तया कत”न्ति वुत्ते “न मया कत”न्ति मुसावादेनेव परिहरिस्सति । एवञ्च पटिपज्जन्तो किञ्चि पापकम्मं करोतियेव, न तत्थ लज्जति सच्चमरियादाय समतिक्कन्तत्ता । तेन वुत्तं “कतमं एकधम्मं, यदिदं, भिक्खवे, सम्पजानमुसावादो”ति ।

गाथायं **मुसावादिस्सा**ति मुसा अभूतं अतच्छं परेसं विज्जापनवसेन वदनसीलस्स । यस्स दससु वचनेसु एकम्पि सच्चं नत्थि, एवरूपे वत्तब्बमेव नत्थि । **जन्तुनोति** सत्तस्स । सत्तो हि जायनट्ठेन “जन्तू”ति वुच्चति । **वितिण्णपरलोकस्सा**ति विस्सट्ठपरलोकस्स । ईदिसो हि मनुस्ससम्पत्ति देवलोकसम्पत्ति अवसाने निब्बानसम्पत्तीति इमा तिस्सोपि सम्पत्तियो न पस्सति । **नत्थि पापन्ति** तस्स तादिसस्स इदं नाम पापं न कत्तब्बन्ति नत्थीति ।

पञ्चमसुत्तवण्णना निट्ठिता ।

६. दानसुत्तवण्णना

२६. छट्ठे एवञ्चेति एत्थ एवन्ति उपमाकारे निपातो, चेति परिकप्पने । **सत्ताति** रूपादीसु सत्ता विसत्ता । **जानेय्युन्ति** बुज्जेय्युं । **दानसंविभागस्सा**ति याय हि चेतनाय अन्नादिदेय्यधम्मं संहरित्वा अनुकम्पापूजासु अज्जतरवसेन परेसं दीयति, तं दानं । याय पन अत्तना परिभुज्जितब्बभावेन गहितवत्थुस्स एकदेसो संविभजित्वा दीयति, अयं संविभागो । **विपाकन्ति** फलं । **यथाहं जानामीति** यथा अहं जानामि । इदं वुत्तं होति — तिरच्छानगतस्सपि दानं दत्वा अत्तभावसते पवत्तसुखविपच्चनवसेन सतगुणा दक्खिणा होतीति एवमादिना, भिक्खवे, येन पकारेन अहं दानस्स संविभागस्स च विपाकं कम्मविपाकं जाणबलेन पच्चक्खतो जानामि, एवं इमे सत्ता यदि जानेय्युन्ति । **न अदत्वा भुज्जेय्युन्ति** यं भुज्जितब्बयुत्तकं अत्तनो अत्थि, ततो परेसं न अदत्वा मच्छरियचित्तेन च तण्हालोभवसेन च भुज्जेय्युं, दत्ताव भुज्जेय्युं । **न च नेसं मच्छेरमलं चित्तं परियादाय तिट्ठेय्याति** अत्तनो सम्पत्तीनं परेहि साधारणभावासहनलक्खणं चित्तस्स पभस्सरभावदूसकानं उपक्विलेसभूतानं कण्हधम्मानं अज्जतरं मच्छेरमलं । अथ वा यथावुत्तमच्छेरञ्चेव अज्जम्पि दानन्तरायकरं इस्सालोभदोसादिमलञ्च नेसं सत्तानं चित्तं यथा दानचेतना न पवत्तति, न वा सुपरिसुद्धा होति, एवं परियादाय परितो गहेत्वा अभिभवित्वा न तिट्ठेय्य । को हि सम्मदेव दानफलं जानन्तो अत्तनो चित्ते मच्छेरमलस्स ओकासं ददेय्य ।

योपि नेसं अस्स चरिमो आलोपोति नेसं सत्तानं यो सब्बपच्छिमको आलोपो सिया । **चरिमं कबळन्ति** तस्सेव वेवचनं । इदं वुत्तं होति — इमे सत्ता पकतिया यत्तकेहि आलोपेहि सयं यापेय्युं, तेसु एकमेव आलोपं अत्तनो अत्थाय ठपेत्वा तदज्जे सब्बे आलोपे आगतागतानं अत्थिकानं दत्वा यो ठपितो आलोपो अस्स, सो इध चरिमो आलोपो नाम । **ततोपि न असंविभजित्वा भुज्जेय्युं, सचे नेसं पटिग्गाहका अस्सूति** नेसं सत्तानं पटिग्गाहका यदि सियुं, ततोपि यथावुत्तचरिमालोपतोपि संविभजित्वाव एकदेसं दत्ताव भुज्जेय्युं, यथाहं दानसंविभागस्स विपाकं पच्चक्खतो जानामि, एवं यदि जानेय्युन्ति । **यस्मा च खोति**आदिना कम्मफलस्स अप्पच्चक्खभावतो एवमेते सत्ता दानसंविभागेसु न पवत्तन्तीति यथाधिप्पेतमत्थं कारणेन सम्पटिपादेति । एतेनेव तेसं तदज्जपुज्जेसु च अप्पटिपत्तिया अपुज्जेसु च पटिपत्तिया कारणं दस्सितन्ति दट्ठब्बं ।

गाथासु यथावुत्तं महेसिनाति महेसिना भगवता “तिरच्छानगते दानं दत्त्वा सतगुणा दक्खिणा पाटिकङ्घितब्बा” तिआदिना, इधेव वा “एवं चे सत्ता जानेय्यु”न्तिआदिना यथावुत्तं, जाणचारेन तं यथावुत्तं चित्तं जातन्ति अत्थो। **विपाकं संविभागस्साति** संविभागस्सपि विपाकं, को पन वादो दानस्स। **यथा होति महप्फलन्ति** यथा सो विपाको महन्तं फलं होति, एवं इमे सत्ता यदि जानेय्युन्ति सम्बन्धो। **विनेय्य मच्छेरमलन्ति** मच्छेरियमलं अपनेत्वा कम्मफलसद्भाय रतनत्तयसद्भाय च विसेसतो पसन्नेन चित्तेन येसु किलेसेहि आरकत्ता अरियेसु सीलादिगुणसम्पन्नेसु दिन्नं अप्पकम्पि दानं महप्फलं होति, तेसु युत्तकालेन दज्जुं ददेय्युं।

महप्फलभावकरणतो दक्खिणं अरहन्तीति दक्खिणेय्या, सम्पापटिपन्ना, तेसु **दक्खिणेय्येसु**। **दक्खिणं** परलोकं सहहित्वा दातब्बं देय्यधम्मं यथा तं दानं होति महादानं, एवं दत्त्वा। अथ वा बहूना अन्नं दत्त्वा, कथं पन अन्नं दातब्बन्ति आह “दक्खिणेय्येसु दक्खिण”न्ति। **इतो मनुस्सत्ता** मनुस्सत्तभावतो **चुता** पटिसन्धिवसेन **सग्गं गच्छन्ति दायका**। **कामकामिनो**ति कामेतब्बानं उळारानं देवभोगानं पटिलद्धरूपविभवेन कम्मुना उपगमने साधुकारिताय कामकामिनो सब्बकामसमङ्गिनो। **मोदन्ति** यथारुचि परिचारेन्तीति अत्थो।

छट्सुत्तवण्णना निड्ढिता।

७. मेत्ताभावनासुत्तवण्णना

२७. सत्तमे यानि कानिचीति अनवसेसपरियादानं। ओपधिकानि पुज्जकिरियवत्थूनीति

तेसं नियमनं। तत्थ उपधि वुच्चन्ति खन्धा, उपधिस्स करणं सीलं एतेसं, उपधिप्पयोजनानि वा **ओपधिकानि**। सम्पत्तिभवे अत्तभावजनकानि पटिसन्धिपवत्तिविपाकदायकानि। **पुज्जकिरियवत्थूनीति** पुज्जकिरिया च ता तेसं तेसं फलानिसंसां वत्थूनि चाति पुज्जकिरियवत्थूनि। तानि पन सङ्खेपतो दानमयं, सीलमयं, भावनामयन्ति तिविधानि होन्ति। तत्थ यं वत्तब्बं, तं परतो तिकनिपातवण्णनायं आवि भविस्सति। **मेत्ताय चेतोविमुत्तियाति** मेत्ताभावनावसेन पटिलद्धतिकचतुक्कज्झानसमापत्तिया। “मेत्ता”ति हि वुत्ते उपचारोपि लब्धति अप्पनापि, “चेतोविमुत्ती”ति पन वुत्ते अप्पनाझानमेव लब्धति। तज्झि नीवरणादिपच्चनीकधम्मतो चित्तस्स सुट्ठु विमुत्तिभावेन चेतोविमुत्तीति वुच्चति। **कलं नाग्घन्ति सोळसिन्ति** मेत्ताब्रह्मविहारस्स सोळसभागं ओपधिकानि पुज्जकिरियवत्थूनि न अग्घन्ति। इदं वुत्तं होति — मेत्ताय चेतोविमुत्तिया यो विपाको, तं सोळस कोट्टासे कत्वा ततो एकं पुन सोळस कोट्टासे कत्वा तत्थ यो एककोट्टासो, न तं अज्जानि ओपधिकानि पुज्जकिरियवत्थूनि अग्घन्तीति। **अधिग्गहेत्वाति** अभिभवित्वा। **भासतेति** उपक्विकलेसविसुद्धिया दिप्पति। **तपतेति** ततो एव अनवसेसे पटिपक्खधम्मे सन्तपति। **विरोचतीति** उभयसम्पत्तिया विरोचति। मेत्ता हि चेतोविमुत्ति चन्दा लोकसङ्घाता विगतूपक्विकलेसा जुण्हा विय दिप्पति, आतपो विय अन्धकारं पच्चनीकधम्मे विधमन्ती तपति, ओसधितारका विय विज्जोतमाना विरोचति च।

सेय्यथापीति ओपम्मदस्सनत्थे निपातो। **तारकरूपानन्ति** जोतीनं। **चन्दियाति** चन्दस्स अयन्ति चन्दी, तस्सा चन्दिया, पभाय जुण्हायाति अत्थो। **वस्सानन्ति** वस्सानं बहुवसेन लद्धवोहारस्स उतुनो। **पच्छिमे मासेति** कत्तिकमासे। **सरदसमयेति** सरदकाले। अस्सयुजकत्तिकमासा हि लोके “सरदउतू”ति वुच्चन्ति। **विद्धेति** उब्बिद्धे, मेघविगमेन दूरीभूतेति अत्थो। तेनेवाह “**विगतवलाहके**”ति। **देवेति** आकासे। **नभं अब्भुस्सक्कमानोति** उदयट्टानतो आकासं उल्लङ्घन्तो। **तमगतन्ति** तमं। **अभिविहच्चाति** अभिहन्त्वा विधमित्वा। **ओसधितारकाति** उस्सन्ना पभा एताय धीयति,

ओसधीनं वा अनुबलप्यदायिकता ओसधीति लब्धनामा तारका ।

एत्थाह — कस्मा पन भगवता समानेपि ओपधिकभावे मेत्ता इतरेहि ओपधिकपुज्जेहि विसेसेत्वा वुत्ताति? वुच्चते — सेट्ठेन निदोसभावेन च सत्तेसु सुप्पटिपत्तिभावतो । सेट्ठा हि एते विहारा, सब्बसत्तेसु सम्पाटिपत्तिभूतानि यदिदं मेत्ताज्ञानानि । यथा च ब्रह्मानो निदोसचित्ता विहरन्ति, एवं एतेहि समन्नागता योगिनो ब्रह्मसमाव हुत्वा विहरन्ति । तथा हिमे “ब्रह्मविहारा”ति वुच्चन्ति । इति सेट्ठेन निदोसभावेन च सत्तेसु सुप्पटिपत्तिभावतो मेत्ताव इतरेहि ओपधिकपुज्जेहि विसेसेत्वा वुत्ता ।

एवम्पि कस्मा मेत्ताव एवं विसेसेत्वा वुत्ता? इतरेसं ब्रह्मविहारानं अधिद्वानभावतो दानादीनं सब्बेसं कल्याणधम्मानं परिपूरिकता च । अयज्जि सत्तेसु हिताकारप्पवत्तिलक्खणा मेत्ता, हितूपसंहारसा, आघातविनयपच्चुपट्टाना । यदि अनोधिसो भाविता बहुलीकता, अथ सुखेनेव करुणादिभावना सम्पज्जन्तीति मेत्ता इतरेसं ब्रह्मविहारानं अधिद्वानं । तथा हि सत्तेसु हितज्झासयताय सति नेसं दुक्खासहनता, सम्पत्तिविसेसानं चिरद्वितिकामता, पक्खपाताभावेन सब्बत्थ सम्पवत्तचित्ता च सुखेनेव इज्जन्ति । एवज्ज सकललोकहितसुखविधानाधिमुत्ता महाबोधिसत्ता “इमस्स दातब्बं, इमस्स न दातब्बं”न्ति उत्तमविचयवसेन विभागं अकत्वा सब्बसत्तानं निरवसेससुखनिदानं दानं देन्ति, हितसुखत्थमेव नेसं सीलं समादियन्ति, सीलपरिपूरणत्थं नेक्खम्मं भजन्ति, तेसं हितसुखेसु असम्मोहत्थाय पज्जं परियोदपेन्ति, हितसुखाभिवट्ठनत्थमेव दळ्हं वीरियमारभन्ति, उत्तमवीरियवसेन वीरभावं पत्तापि सत्तानं नानप्पकारं हितज्झासयेनेव अपराधं खमन्ति, “इदं वो दस्साम, करिस्सामा”तिआदिना कतं पटिज्जातं न विसंवादेन्ति, तेसं हितसुखायेव अचलाधिद्वाना होन्ति । तेसु अचलाय मेत्ताय पुब्बकारिनो हितज्झासयेनेव नेसं विप्पकारे उदासीना होन्ति, पुब्बकारितायपि न पच्चुपकारमासिसन्तीति । एवं ते पारमियो पूरेत्वा याव दसबलचतु-वेसारज्ज-छासाधारणजाण-अट्टारसावेणिकबुद्धधम्मप्पभेदे सब्बेपि कल्याणधम्मे परिपूरेन्ति । एवं दानादीनं सब्बेसं कल्याणधम्मानं पारिपूरिका मेत्ताति च इमस्स विसेसस्स दस्सनत्थं सा इतरेहि विसेसेत्वा वुत्ता ।

अपिच मेत्ताय इतरेहि ओपधिकपुज्जेहि महानुभावता वेलामसुत्तेन दीपेतब्बा । तत्थ हि यथा नाम महता वेलामस्स दानतो एकस्स सोतापन्नस्स दानं महप्फलतरं वुत्तं, एवं सोतापन्नसततो एकस्स सकदागामिस्स दानं...पे०... पच्चेकबुद्धसततो भगवतो, ततोपि बुद्धप्पमुखस्स सङ्गस्स दानं, ततोपि चातुदिसस्स सङ्गस्स विहारदानं, ततोपि सरणगमनं, ततोपि सीलसमादानं, ततोपि गद्धहनमत्तं कालं मेत्ताभावना महप्फलतरा वुत्ता । यथाह —

“यं गहपति वेलामो ब्राह्मणो दानं अदासि महादानं । यो चेकं दिट्ठिसम्पन्नं भोजेय्य, इदं ततो महप्फलतरं । यो च सतं दिट्ठिसम्पन्नं भोजेय्य...पे०... सुरामेरयमज्जप्पमादट्ठाना वेरमणिं । यो च अन्तमसो गद्धहनमत्तम्पि मेत्तचित्तं भावेय्य, इदं ततो महप्फलतरं”न्ति (अ० नि० १.२०) ।

महग्गतपुज्जभावेन पनस्सा परित्तपुज्जतो सातिसयताय वत्तब्बमेव नत्थि । वुत्तज्हेतं “यं पमाणकतं कम्मं, न तं तत्रावसिस्सति, न तं तत्रावतिट्ठती”ति (दी० नि० १.५५६; सं० नि० ४.३६०) । कामावचरकम्मज्जि पमाणकतं नाम, महग्गतकम्मं पन पमाणं अतिक्कमित्वा ओधिसकानोधिसकफरणवसेन वट्ठित्वा कतत्ता अप्पमाणकतं नाम । कामावचरकम्मं तस्स महग्गतकम्मस्स अन्तरा लगितुं वा तं कम्मं अभिभवित्वा अत्तनो विपाकस्स ओकासं गहेत्वा ठातुं वा न सक्कोति, अथ खो महग्गतकम्ममेव तं परित्तकम्मं महोद्यो विय परित्तं उदकं अभिभवित्वा अत्तनो ओकासं गहेत्वा तिट्ठति, तस्स विपाकं पटिबाहित्वा सयमेव ब्रह्मसहब्यतं उपनेतीति अयज्जि तस्स अत्थोति ।

गाथासु योति यो कोचि गहद्दो वा पब्बजितो वा । मेत्तन्ति मेत्ताज्ञानं । अप्पमाणन्ति भावनावसेन आरम्मणवसेन च अप्पमाणं । असुभभावनादयो विय हि आरम्मणे एकदेसगगहणं अकत्वा अनवसेसफरणवसेन अनोधिसोफरणवसेन च अप्पमाणारम्मणताय पगुणभावनावसेन अप्पमाणं । तनू संयोजना होन्तीति मेत्ताज्ञानं पादकं कत्वा सम्मसित्वा हेट्टिमे अरियमग्गे अधिगच्छन्तस्स सुखेनेव पटिघसंयोजनादयो पहीयमाना तनू होन्ति । तेनाह “पस्सतो उपधिकखय”न्ति । “उपधिकखयो”ति हि निब्बानं वुच्चति । तच्चस्स सच्छिकिरियाभिसमयवसेन मग्गजाणेन पस्सति । अथ वा तनू संयोजना होन्तीति मेत्ताज्ञानपदद्वानाय विपस्सनाय अनुक्कमेन उपधिकखयसङ्घातं अरहत्तं पत्वा तं पस्सतो पगेव दसपि संयोजना तनू होन्ति, पहीयन्तीति अत्थो । अथ वा तनू संयोजना होन्तीति पटिघो चेव पटिघसम्पयुत्तसंयोजना च तनुका होन्ति । पस्सतो उपधिकखयन्ति तेसंयेव किलेसूपधीनं खयसङ्घातं मेत्तं अधिगमवसेन पस्सन्तस्साति एवमेत्थ अत्थो दट्ठब्बो ।

एवं किलेसप्पहानं निब्बानाधिगमच्च मेत्ताभावनाय सिखाप्पत्तमानिसंसं दस्सेत्वा इदानी अज्जे आनिसंसं दस्सेतुं “एकप्पि चे”ति आदिमाह । तत्थ अदुट्ठचित्तोति मेत्ताबलेन सुट्ठु विक्खम्भितव्यापादताय व्यापादेन अदूसितचित्तो । मेत्तायतीति हितफरणवसेन मेत्तं करोति । कुसलोति अतिसयेन कुसलवा महापुज्जो, पटिघादिअनत्थविगमेन वो । खेमी तेनाति तेन मेत्तायितेन । सब्बे च पाणेति चसद्दो व्यतिरेके । मनसानुकम्पन्ति चित्तेन अनुकम्पन्तो । इदं वुत्तं होति — एकसत्तविसयापि ताव मेत्ता महाकुसलरासि, सब्बे पन पाणे अत्तनो पियपुत्तं विय हितफरणेन मनसा अनुकम्पन्तो पहूतं बहुं अनप्पकं अपरियन्तं चतुसट्ठिमहाकप्पेपि अत्तनो विपाकप्पबन्धं पवत्तेतुं समत्थं उळारपुज्जं अरियो परिसुद्धचित्तो पुग्गलो पकरोति निष्फादेति ।

सत्तसण्डन्ति सत्तसङ्घातेन सण्डेन समन्नागतं भरितं, सत्तेहि अविरळं आकिण्णमनुस्सन्ति अत्थो । विजित्वाति अदण्डेन असत्थेन धम्मेनेव विजिनित्वा । राजिसयोति इसिसदिसा धम्मिकराजानो । यजमानाति दानानि ददमाना । अनुपरियगाति विचरिंसु ।

अस्समेधन्ति आदीसु पोरणकराजकाले किर सस्समेधं, पुरिसमेधं, सम्मापासं, वाचापेय्यन्ति चत्तारि सङ्गहवत्थूनि अहेसुं, येहि राजानो लोकं सङ्गहिंसु । तत्थ निप्फन्नसस्सतो दसमभागगगहणं सस्समेधं नाम, सस्ससम्पादने, मेधाविताति अत्थो । महायोधानं छमासिकं भत्तवेतनानुप्पदानं पुरिसमेधं नाम, पुरिससङ्गहने मेधाविताति अत्थो । दलिदमनुस्सानं पोत्थके लेखं गहेत्वा तीणि वस्सानि विना वड्डिया सहस्सद्विसहस्समत्तधनानुप्पदानं सम्मापासं नाम । तज्जि सम्मा मनुस्से पासेति हृदये बन्धित्वा विय ठपेति, तस्मा “सम्मापास”न्ति वुच्चति । “तात मातुला”ति आदिना पन सणहवाचाय सङ्गहणं वाचापेय्यं नाम, पेय्यवज्जं पियवाचताति अत्थो । एवं चतूहि सङ्गहवत्थूहि सङ्गहितं रट्ठं इद्धज्जेव होति फीतज्ज पहूतअन्नपानं खेमं निरब्बुदं । मनुस्सा मुदा मोदमाना उरे पुत्ते नच्चेन्ता अपारुतधरा विहरन्ति । इदं घरद्वारेसु अगगळानं अभावतो “निरग्गळ”न्ति वुच्चति । अयं पोरणिका पवेणि, अयं पोरणिका पकति ।

अपरभागे पन ओक्काकराजकाले ब्राह्मणा इमानि चत्तारि सङ्गहवत्थूनि इमज्ज रट्ठसम्पत्तिं परिवत्तेन्ता उद्धम्मूलं कत्वा अस्समेधं पुरिसमेधन्ति आदिके पज्ज यज्जे नाम अकंसु । वुत्तज्हेतं भगवता ब्राह्मणधम्मियसुत्ते —

“तेसं आसि विपल्लासो, दिस्वान अणुतो अणुं...पे०... ॥

“ते तत्थ मन्ते गन्थेत्वा, ओक्काकं तदुपागमु”न्ति ॥ (सु० नि० ३०१-३०४) ।

तत्थ अस्समेत्थ मेधन्ति बाधेन्तीति **अस्समेधो** । द्वीहि परियज्जेहि यजितब्बस्स एकवीसतियूपस्स एकस्मिं पच्छिमदिवसे एव सत्तनवृत्तिपञ्चपसुसतघातभीसनस्स ठपेत्वा भूमिञ्च पुरिसे च अवसेससब्बविभवदक्खिणस्स यज्जस्सेतं अधिवचनं । पुरिसमेत्थ मेधन्ति बाधेन्तीति **पुरिसमेधो** । चतूहि परियज्जेहि यजितब्बस्स सद्धिभूमिया अस्समेधे वृत्तिविभवदक्खिणस्स यज्जस्सेतं अधिवचनं । सम्ममेत्थ पासन्ति खिपन्तीति **सम्मापासो** । युगच्छिगगळे पवेसनदण्डकसङ्घातं सम्मं खिपित्वा तस्स पतितोकासे वेदिं कत्वा संहारिमेहि यूपादीहि सरस्सतिनदिया निमुग्गोकासतो पभुत्ति पटिलोमं गच्छन्तेन यजितब्बस्स सत्रयागस्सेतं अधिवचनं वाजमेत्थ पिवन्तीति **वाजपेय्यो** । एकेन परियज्जेन सत्तरसहि पसूहि यजितब्बस्स बेळुवयूपस्स सत्तरसकदक्खिणस्स यज्जस्सेतं अधिवचनं । नत्थि एत्थ अगगळोति **निरगगळो** । नवहि परियज्जेहि यजितब्बस्स सद्धि भूमिया पुरिसेहि च अस्समेधे वृत्तिविभवदक्खिणस्स सब्बमेधपरियायनामस्स अस्समेधविकप्पस्सेतं अधिवचनं ।

चन्दप्पभाति चन्दप्पभाय । **तारगणाव सब्बेति** यथा सब्बेपि तारागणा चन्दिमसोभाय सोळसिम्पि कलं नाग्घन्ति, एवं ते अस्समेधादयो यज्जा मेत्तचित्तस्स वृत्तलक्खणेन सुभावितस्स सोळसिम्पि कलं नानुभवन्ति, न पापुणन्ति, नाग्घन्तीति अत्थो ।

इदानीं अपरेपि दिट्ठधम्मिकसम्परायिके मेत्ताभावनाय आनिसंसे दस्सेतुं “**यो न हन्ती**”तिआदि वृत्तं । तत्थ **यो**ति मेत्ताब्रह्मविहारभावनानुयुत्तो पुगगलो । **न हन्ती**ति तेनेव मेत्ताभावनानुभावेन दूरविक्खम्भितव्यापादताय न कज्जि सत्तं हिंसति, लेडुदण्डादीहि न विबाधति वा । **न घातेतीति** परं समादपेत्वा न सत्ते हनापेति न विबाधापेति च । **न जिनातीति** सारम्भविग्गाहिककथादिवसेन न कज्जि जिनाति सारम्भस्सेव अभावतो, जानिकरणवसेन वा अड्डकरणादिना न कज्जि जिनाति । **न जापयेति** परेपि पयोजेत्वा परेसं धनजानिं न कारापेय्य । **मेत्तंसो**ति मेत्तामयचित्तकोट्टासो, मेत्ताय वा अंसो अविजहनट्टेन अवयवभूतोति मेत्तंसो । **सब्बभूतेसूति** सब्बसत्तेसु । ततो एव **वेरं तस्स न केनचीति** अकुसलवेरं तस्स केनचिपि कारणेन नत्थि, पुगगलवेरसङ्घातो विरोधो केनचि पुरिसेन सद्धि तस्स मेत्ताविहारिस्स नत्थीति ।

एवमेतस्मिं एककनिपाते पटिपाटिया तेरससु सुत्तेसु सिक्खासुत्तद्वये चाति पन्नरससु सुत्तेसु विवट्टं कथितं, नीवरणसुत्तं संयोजनसुत्तं अप्पमादसुत्तं अट्टिसञ्चयसुत्तन्ति एतेसु चतूसु सुत्तेसु वट्टविवट्टं कथितं । इतरेसु पन वट्टमेव कथितन्ति ।

सत्तमसुत्तवण्णना निट्ठिता ।

परमत्थदीपनिया

खुद्दकनिकाय-अड्डकथाय

इतिवृत्तकस्स एककनिपातवण्णना निट्ठिता ।

२. दुकनिपातो

१. पठमवग्गो

१. दुक्खविहारसुत्तवण्णना

२८. दुकनिपातस्स पठमे द्वीहीति गणनपरिच्छेदो । धम्मेहीति परिच्छिन्नधम्मनिदस्सनं । द्वीहि धम्मेहीति द्वीहि अकुसलधम्मेहि । समन्नागतोति युत्तो । दिट्ठेव धम्मेति इमस्मिंयेव अत्तभावे । दुक्खं विहरतीति चतूसुपि इरियापथेसु किलेसदुक्खेन चैव कायिकचेतसिकदुक्खेन च दुक्खं विहरति । सविघातन्ति चित्तूपघातेन चैव कायूपघातेन च सविघातं । सउपायासन्ति किलेसूपायासेन चैव सरीरखेदेन च बलवआयासवसेन सउपायासं । सपरिळाहन्ति किलेसपरिळाहेन चैव कायपरिळाहेन च सपरिळाहं । कायस्स भेदाति उपादिन्नक्खन्धपरिच्चागा । परं मरणाति तदनन्तरं अभिनिब्बत्तक्खन्धगहणे । अथ वा कायस्स भेदाति जीवितिन्द्रियुपच्छेदा । परं मरणाति चुतितो उद्धं । दुग्गति पाटिकङ्काति दुग्गतिसङ्कातानं चतुन्नं अपायानं अज्जतरा गति इच्छितब्बा, अवस्संभाविनीति अत्थो ।

अगुत्तद्वारोति अपिहितद्वारो । कथं पन अगुत्तद्वारोति आह “इन्द्रियेसू”ति । तेन मनच्छट्ठानं इन्द्रियानं असंवरमाह । पटिग्गहणपरिभोगवसेन भोजने मत्तं न जानातीति भोजने अमत्तज्जू । “इन्द्रियेसु अगुत्तद्वारताय भोजने अमत्तज्जूताया”तिपि पठन्ति ।

कथं इन्द्रियेसु अगुत्तद्वारता, कथं वा गुत्तद्वारताति? किञ्चापि हि चक्खुन्द्रिये संवरो वा असंवरो वा नत्थि । न हि चक्खुपसादं निस्साय सति वा मुट्ठस्सच्चं वा उप्पज्जति । अपिच यदा रूपारम्मणं चक्खुस्स आपाथं आगच्छति, तदा भवङ्गे द्विक्खत्तुं उप्पज्जित्वा निरुद्धे किरियामनोधातु आवज्जनकिच्चं साधयमाना उप्पज्जित्वा निरुज्झति, ततो चक्खुविज्जाणं दस्सनकिच्चं, ततो विपाकमनोधातु सम्पटिच्छनकिच्चं, ततो विपाकाहेतुकमनोविज्जाणधातु सन्तीरणकिच्चं, ततो किरियाहेतुकमनोविज्जाणधातु वोट्ठब्बनकिच्चं साधयमाना उप्पज्जित्वा निरुज्झति, तदनन्तरं जवनं जवति । तथापि नेव भवङ्गसमये, न आवज्जनादीनं अज्जतरसमये संवरो वा असंवरो वा अत्थि, जवनक्खणे पन सचे दुस्सील्यं वा मुट्ठस्सच्चं वा अज्जाणं वा अक्खन्ति वा कोसज्जं वा उप्पज्जति, असंवरो होति । एवं होन्तोपि सो “चक्खुद्वारे असंवरो”ति वुच्चति । कस्मा? यस्मा तस्मिं सति द्वारमि अगुत्तं होति भवङ्गमि आवज्जनादीनि वीथिचित्तानिपि । यथा किं? यथा नगरे चतूसु द्वारेसु असंवृतेसु किञ्चापि अन्तोघरद्वारकोट्टकगम्भादयो सुसंवृता तथापि अन्तोनगरे सब्बं भण्डं अरक्खितं अगोपितमेव होति । नगरद्वारेहि पविसित्वा चोरा यदिच्छन्ति, तं हरेय्युं । एवमेव जवने दुस्सील्यादीसु उप्पन्नेसु तस्मिं असंवरे सतिद्वारमि अगुत्तं होति, भवङ्गमि आवज्जनादीनि वीथिचित्तानिपि । तस्मिं पन असति जवने सीलादीसु उप्पन्नेसु द्वारमि गुत्तं होति भवङ्गमि आवज्जनादीनि वीथिचित्तानिपि । यथा किं? यथा नगरद्वारेसु संवृतेसु किञ्चापि अन्तोघरद्वारादयो असंवृता, तथापि अन्तोनगरे सब्बं भण्डं सुरक्खितं सुगोपितमेव होति । नगरद्वारेसु हि पिहितेसु चोरानं पवेसो नत्थि । एवमेव जवने सीलादीसु उप्पन्नेसु द्वारमि गुत्तं होति, भवङ्गमि, आवज्जनादीनि वीथिचित्तानिपि । तस्मा जवनक्खणे उप्पज्जमानोपि “चक्खुद्वारे संवरो”ति वुच्चति । सेसद्वारेसुपि एसेव नयो । एवं इन्द्रियेसु अगुत्तद्वारता, गुत्तद्वारता च वेदितब्बा ।

कथं पन भोजने अमत्तज्जू, कथं वा मत्तज्जूति? यो हि पुग्गलो महिच्छो हुत्वा पटिग्गहणे मत्तं न जानाति । महिच्छपुग्गलो हि यथा नाम कच्छपुटवाणिजो पिळन्धनभण्डकं हत्थेन गहेत्वा उच्छङ्गेपि पक्खिपितब्बयुत्तकं पक्खिपित्वा महाजनस्स पस्सन्तस्सेव “असुकं गणहथ, असुकं गणहथा”ति मुखेन उग्घोसेति, एवमेव अप्पमत्तकमि अत्तनो सीलं वा गन्थं वा धुतङ्गगुणं वा अन्तमसो अरज्जवासमत्तकमि महाजनस्स जानन्तस्सेव सम्भावेति, सम्भावेत्वा च पन सकटेहिपि उपनीते पच्चये “अल”न्ति अवत्वा पटिग्गहन्ति । तयो हि पूरेतुं न सक्का अग्गि उपादानेन, समुदो उदकेन, महिच्छो पच्चयेहीति —

“अग्गिक्खन्धो समुदो च, महिच्छो चापि पुग्गलो ।

बहुके पच्चये दिन्ने, तयोपेते न पूरयेति” ॥

महिच्छपुग्गलो हि विजातमातुयापि मनं गण्हितुं न सक्कोति । एवरूपो हि अनुप्पन्नं लाभं न उप्पादेति, उप्पन्नलाभतो च परिहायति । एवं ताव पटिग्गहणे अमत्तञ्जू होति । यो पन धम्मेन समेन लद्धमि आहारं गधितो मुच्छितो अज्झोपन्नो अनादीनवदस्सावी अनिस्सरणपञ्जो आहरहत्थकअलंसाटकतत्थवट्टककाकमासकभुत्तवमितकब्राह्मणानं अज्जतरो विय अयोनिस्सो अनुपायेन यावदत्थं उदरावदेहकं परिभुज्जित्वा सेय्यसुखं पस्ससुखं मिद्धसुखं अनुयुत्तो विहरति । अयं परिभोगे अमत्तञ्जू नाम ।

यो पन “यदिपि देय्यधम्मो बहु होति, दायको अप्पं दातुकामो, दायकस्स वसेन अप्पं गण्हाति । देय्यधम्मो अप्पो, दायको बहुं दातुकामो, देय्यधम्मस्स वसेन अप्पं गण्हाति । देय्यधम्मो बहु, दायकोपि बहुं दातुकामो, अत्तनो थामं जत्वा पमाणयुत्तमेव गण्हाती”ति एवं वुत्तस्स पटिग्गहणे पमाणजाननस्स चेव, “पटिसङ्ख्वा योनिस्सो आहारं आहारेति, नेव दवाय, न मदाया”तिआदिना (ध० स० १३५५) “लद्धञ्च पिण्डपातं अगधितो अमुच्छितो अनज्झोपन्नो आदीनवदस्सावी निस्सरणपञ्जो परिभुज्जती”ति च आदिना नयेन वुत्तस्स पच्चवेक्खित्वा पटिसङ्ख्यानपञ्जाय जानित्वा आहारपरिभुज्जनसङ्घातस्स परिभोगे पमाणजाननस्स च वसेन भोजने मत्तञ्जू होति, अयं भोजने मत्तञ्जू नाम । एवं भोजने अमत्तञ्जुता मत्तञ्जुता च होतीति वेदितब्बं ।

गाथासु पन चक्खुन्तिआदीसु चक्खतीति चक्खु, रूपं अस्सादेति, समविसमं आचिक्खन्तं विय होतीति वा अत्थो । सुणातीति सोतं । घायतीति घानं । जीवितनिमित्तं आहाररसो जीवितं, तं अक्खयतीति जिह्वा । कुच्छितानं आयोति कायो । मनते विजानातीति मनो । पोराणा पनाहु मुनातीति मनो, नाळिया मिनमानो विय महातुलाय धारयमानो विय च आरम्माणं विजानातीति अत्थो । एवं तावेत्थ पदत्थो वेदितब्बो ।

भावत्थतो पन दुविधं चक्खु — मंसचक्खु च पञ्जाचक्खु च । तेसु बुद्धचक्खु, समन्तचक्खु, जाणचक्खु, दिब्बचक्खु, धम्मचक्खुति पञ्चविधं पञ्जाचक्खु । तत्थ “अद्वसं खो अहं, भिक्खवे, बुद्धचक्खुना लोकं वोलोकेन्तो”ति (म० नि० १.२८३) इदं बुद्धचक्खु नाम । “समन्तचक्खु वुच्चति सब्बज्जुतज्जाण”न्ति (चूळव० धोतकमाणवपुच्छानिद्देस ३२) इदं समन्तचक्खु नाम । “चक्खुं उदपादी”ति (सं० नि० ५.१०८१; महाव० १५) इदं जाणचक्खु नाम । “अद्वसं खो अहं, भिक्खवे, दिब्बेन चक्खुना विसुद्धेना”ति (म० नि० १.२८४) इदं दिब्बचक्खु नाम । “विरजं वीतमलं धम्मचक्खुं उदपादी”ति (म० नि० २.३९५; महाव० १६) इदं हेट्ठिममगगतयसङ्घातं धम्मचक्खु नाम ।

मंसचक्खुपि दुविधं — ससम्भारचक्खु, पसादचक्खुति । तत्थ य्वायं अक्खिकूपके पतिट्ठितो हेट्ठा अक्खिकूपकट्टिकेन, उपरि भमुकट्टिकेन, उभतो अक्खिकूपकेहि, अन्तो मत्थलुङ्गेन, बहिद्धा अक्खिलोमेहि परिच्छिन्नो मंसपिण्डो, सङ्खेपतो चतस्सो धातुयो — वण्णो, गन्धो, रसो, ओजासम्भवो सण्ठानं जीवितं भावो कायपसादो चक्खुपसादोति चुदस सम्भारा । वित्थारतो चतस्सो धातुयो तंनिस्सिता वण्णगन्धरसओजासण्ठानसम्भवाति इमानि दस चतुसमुट्ठानिकत्ता चत्तालीसं होन्ति, जीवितं भावो कायपसादो चक्खुपसादोति चत्तारि एकन्तकम्मसमुट्ठानेवाति इमेसं चतुचत्तालीसाय रूपानं वसेन चतुचत्तालीस सम्भारा । यं लोके “सेतं वट्ठं पुथुलं विसटं विपुलं चक्खू”ति सज्जानन्तो न चक्खुं सज्जानाति, वत्थुं चक्खुतो सज्जानाति, यो मंसपिण्डो अक्खिकूपके पतिट्ठितो न्हारुसुत्तकेन मत्थलुङ्गेन आबद्धो, यत्थ सेतमि अत्थि कण्हमि लोहितकमि पथवीपि आपोपि तेजोपि वायोपि । यं सेम्हुस्सदत्ता सेतं, पित्तुस्सदत्ता कण्हं, रुहिरुस्सदत्ता लोहितकं, पथवुस्सदत्ता पत्थद्धं, आपुस्सदत्ता पग्घरति, तेजुस्सदत्ता परिडक्कति, वायुस्सदत्ता सम्भमति, इदं

ससम्भारचक्खु नाम । यो पन एत्थ सितो एत्थ पटिबद्धो चतुन्नं महाभूतानं उपादाय पसादो, इदं पसादचक्खु नाम । इदञ्चि चक्खुविज्जाणादीनं यथारहं वत्थुद्वारभावेन पवत्तति ।

सोतादीसुपि सोतं दिब्बसोतं, मंससोतन्ति दुविधं । एत्थ “दिब्बाय सोतधातुया विसुद्धाय अतिक्कन्तमानुसिकाय उभो सद्दे सुणाती”ति इदं दिब्बसोतं नाम । मंससोतं पन ससम्भारसोतं पसादसोतन्ति दुविधन्तिआदि सब्बं चक्खुम्हि वुत्तनयेनेव वेदितब्बं, तथा घानजिक्का । कायो पन चोपनकायो, करजकायो, समूहकायो, पसादकायोतिआदिना बहुविधो । तत्थ —

“कायेन संवुता धीरा, अथो वाचाय संवुता”ति ॥ (ध० प० २३४) —

अयं चोपनकायो नाम । “इमम्हा काया अज्जं कायं अभिनिम्मिनाती”ति (दी० नि० १.२३६; पटि० म० ३.१४) अयं करजकायो नाम । समूहकायो पन विज्जाणादिसमूहवसेन अनेकविधो आगतो । तथा हि “छ इमे, आवुसो, विज्जाणकाया”तिआदीसु (म० नि० १.१०१) विज्जाणसमूहो वुत्तो । “छ फस्सकाया”तिआदीसु (दी० नि० ३.३२३; म० नि० १.९८) फस्सादिसमूहो । तथा “कायपस्सद्भि कायलहुता”तिआदीसु (ध० स० ११४) वेदनाखन्धादयो । “इधेक्कच्चो पथविकायं अनिच्चतो अनुपस्सति, आपोकायं तेजोकायं वायोकायं केसकायं लोमकाय”न्तिआदीसु (पटि० म० ३.३५) पथवादिसमूहो । “कायेन फोडुब्बं फुसित्वा”ति (अ० नि० ३.१६) अयं पसादकायो । इधापि पसादकायो वेदितब्बो । सो हि कायविज्जाणादीनं यथारहं वत्थुद्वारभावेन पवत्तति । मनोति पन किञ्चापि सब्बं विज्जाणं वुच्चति, तथापि द्वारभावस्स इधाधिप्पेतत्ता द्वारभूतं सावज्जनं भवङ्गं वेदितब्बं ।

एतानि यस्स द्वारानि अगुत्तानि च भिक्खुनोति यस्स भिक्खुनो एतानि मनच्छट्ठानि द्वारानि सतिवोस्सग्गेन पमादं आपन्नत्ता सतिकवाटेन अपिहितानि । भोजनम्हि... पे०... अधिगच्छतीति सो भिक्खु वुत्तनयेन भोजने अमत्तज्जू इन्द्रियेसु च संवररहितो दिट्ठधम्मिकज्च रोगादिवसेन, सम्परायिकज्च दुग्गतिपरियापन्नं कायदुक्खं रागादिकिलेससन्तापवसेन, इच्छाविघातवसेन च चेतोदुक्खन्ति सब्बथापि दुक्खमेव अधिगच्छति पापुणाति । यस्मा चेतदेवं, तस्मा दुविधेनपि दुक्खग्गिना इधलोके च परलोके च ड्हमानेन कायेन ड्हमानेन चेतसा दिवा वा यदि वा रत्तिं निच्चकालमेव तादिसो पुग्गलो दुक्खमेव विहरति, न तस्स सुखविहारस्स सम्भवो, वट्टदुक्खानतिककमे पन वत्तब्बमेव नत्थीति ।

पठमसुत्तवण्णना निट्ठिता ।

२. सुखविहारसुत्तवण्णना

२९. दुतिये वुत्तविपरियायेन अत्थो वेदितब्बो ।

दुतियसुत्तवण्णना निट्ठिता ।

३. तपनीयसुत्तवण्णना

३०. ततिये तपनीयाति इध चेव सम्पराये च तपन्ति विबाधेन्ति विहेठेन्तीति तपनीया । तपनं वा दुक्खं दिट्ठे चेव धम्मे अभिसम्पराये च तस्स उप्पादनेन चेव अनुबलप्पदानेन च हिताति तपनीया । अथ वा तपन्ति तेनाति तपनं, पच्छानुतापो, विप्पटिसारोति अत्थो, तस्स हेतुभावतो हिताति तपनीया । अकतकल्याणोति अकतं कल्याणं भद्दकं पुज्जं एतेनाति

अकतकल्याणो । सेसपदद्वयं तस्सेव वेवचनं । पुञ्जज्झि पवत्तिहितताय आयतिंसुखताय च भद्दकट्टेन कल्याणन्ति च कुच्छित्तसलनादिअत्थेन कुसलन्ति च दुक्खभीरूनं संसारभीरूनञ्च रक्खनट्टेन भीरुत्ताणन्ति च वुच्चति । कतपापोति कतं उपचितं पापं एतेनाति कतपापो । सेसपदद्वयं तस्सेव वेवचनं । अकुसलकम्मज्झि लामकट्टेन पापन्ति च अत्तनो पवत्तिक्खणे विपाकक्खणे च घोरसभावताय लुद्धन्ति च किलेसेहि दूसितभावेन किब्बिसन्ति च वुच्चति । इति भगवा “द्वे धम्मा तपनीया”ति धम्माधिद्वानेन उद्दिसित्वा अकतं कुसलं धम्मं कतञ्च अकुसलं धम्मं पुग्गलाधिद्वानेन निदिसि । इदानी तेसं तपनीयभावं दस्सेन्तो “सो अकतं मे कल्याणन्तिपि तप्पति, कतं मे पापन्तिपि तप्पती”ति आह । चित्तसन्तासेन तप्पति अनुतप्पति अनुसोचतीति अत्थो ।

गाथासु दुट्ठु चरितं, किलेसपूतिकत्ता वा दुट्ठं चरितन्ति दुच्चरितं । कायेन दुच्चरितं, कायतो वा पवत्तं दुच्चरितं कायदुच्चरितं । एवं वचीमनोदुच्चरितानिपि दट्ठुब्बानि । इमानि च कायदुच्चरितादीनि कम्मपथप्पत्तानि अधिप्पेतानीति यं न कम्मपथप्पत्तं अकुसलजातं, तं सन्धायाह “यञ्चञ्जं दोससज्झित”न्ति । तस्सत्थो — यम्पि च अञ्जं कम्मपथभावं अप्पत्तत्ता निप्परियायेन कायकम्मादिसङ्खं न लभति, रागादिकिलेससंसद्वत्ता दोससहितं अकुसलं तम्पि कत्वाति अत्थो । निरयन्ति निरतिअत्थेन निरस्सादट्टेन वा निरयन्ति लद्धनामं सब्बम्पि दुग्गतिं, अयसङ्घातसुखप्पटिक्खेपेन वा सब्बत्थ सुगतिदुग्गतीसु निरयदुक्खं । सो तादिसो पुग्गलो उपगच्छतीति एवमेत्थ अत्थो दट्ठुब्बो ।

एत्थ च कायदुच्चरितस्स तपनीयभावे नन्दो यक्खो नन्दो माणवको नन्दो गोघातको द्वे भातिकाति एतेसं वत्थूनि कथेतब्बानि । ते किर गाविं वधित्वा मंसं द्वे कोट्टासे अकंसु । ततो कनिट्ठो जेट्ठं आह — “मय्हं दारका बहू, इमानि मे अन्तानि देही”ति । अथ नं जेट्ठो — “सब्बं मंसं द्वेधा विभत्तं, पुन किमग्गहेसी”ति पहरित्वा जीवितक्खयं पापेसि । निवत्तित्वा च नं ओलोकेन्तो मतं दिस्वा “भारियं वत मया कतं, स्वाहं अकारणेनेव नं मारेसि”न्ति चित्तं उप्पादेसि । अथस्स बलवविप्पटिसारो उप्पज्जि । सो ठितद्वानेपि निसिन्नद्वानेपि तदेव कम्मं आवज्जेति, चित्तस्सादं न लभति, असितपीतखायितम्पिस्स सरीरे ओजं न फरति, अट्ठिचम्ममतमेव अहोसि । अथ नं एको थेरो पुच्छि “उपासक, त्वं अतिविय किसो अट्ठिचम्ममतो जातो, कीदिसो ते रोगो, उदाहु अत्थि किञ्चि तपनीयं कम्मं कत”न्ति? सो “आम, भन्ते”ति सब्बं आरोचेसि । अथस्स सो “भारियं ते, उपासक, कम्मं कतं, अनपराधद्वाने अपरद्ध”न्ति आह । सो तेनेव कम्मुना कालं कत्वा निरये निब्बत्ति । वचीदुच्चरितस्स पन सुप्पबुद्धसक्ककोकालिकचिञ्चमाणविकादीनं वत्थूनि कथेतब्बानि, मनोदुच्चरितस्स उक्कलजयभञ्जादीनं ।

ततियसुत्तवण्णना निट्ठिता ।

४. अतपनीयसुत्तवण्णना

३१. चतुत्थे ततिये वुत्तविपरियायेन अत्थो वेदितब्बो ।

चतुत्थसुत्तवण्णना निट्ठिता ।

५. पठमसीलसुत्तवण्णना

३२. पञ्चमे पापकेन च सीलेनाति पापकं नाम सीलं सीलभेदकरो असंवरोति वदन्ति । तत्थ यदि असंवरो असीलमेव तंदुस्सील्यभावतो, कथं सीलन्ति वुच्चति? तत्थायं अधिप्पायो सिया — यथा नाम लोके अदिट्ठं “दिट्ठु”न्ति

वुच्चति, असीलवा “सीलवा”ति, एवमिधापि असीलम्पि असंवरोपि “सील”न्ति वोहरीयति । अथ वा “कतमे च, थपति, अकुसला सीला? अकुसलं कायकम्मं, अकुसलं वचीकम्मं, पापको आजीवो”ति (म० नि० २.२६४) वचनतो अकुसलधम्मेषुपि अत्थेव सीलसमञ्जा, तस्मा परिचयवसेन सभावसिद्धि विषय पकतिभूतो सब्बो समाचारो “सील”न्ति वुच्चति । तत्थ यं अकोसल्लसम्भूतद्वेन अकुसलं लामकं, तं सन्धायाह “पापकेन च सीलेना”ति । **पापिकाय च दिट्ठियाति** सब्बापि मिच्छादिट्ठियो पापिकाव । विसेसतो पन अहेतुकदिट्ठि, अकिरियदिट्ठि, नत्थिकदिट्ठीति इमा तिविधा दिट्ठियो पापिकतरा । तत्थ पापकेन सीलेन समन्नागतो पुग्गलो पयोगविपन्नो होति, पापिकाय दिट्ठिया समन्नागतो आसयविपन्नो होति, एवं पयोगासयविपन्नो पुग्गलो निरयूपगो होतियेव । तेन वुत्तं “इमेहि खो, भिक्खवे, द्वीहि धम्मोहि समन्नागतो पुग्गलो यथाभतं निक्खित्तो, एवं निरये”ति । एत्थ च “द्वीहि धम्मोहि समन्नागतो”ति इदं लक्खणवचनं दट्ठब्बं, न तन्तिनिद्देशो । यथा तं लोके “यदिमे ब्याधिता सियुं, इमेसं इदं भेसज्जं दातब्ब”न्ति । अज्जेसुपि ईदिसेसु ठानेसु एसेव नयो । **दुप्पज्जोति** निप्पज्जो ।

पञ्चमसुत्तवण्णना निट्ठिता ।

६. दुतियसीलसुत्तवण्णना

३३. छट्ठे **भद्वकेन च सीलेना**ति कायसुचरितादिचतुपारिसुद्धिसीलेन । तज्जि अखण्डादिसीलभावेन सयज्ज कल्याणं, समथविपस्सनादिकल्याणगुणावहं चाति “भद्वक”न्ति वुच्चति । **भद्विकाय च दिट्ठियाति** कम्मस्सकताजाणेन चेव कम्मपथसम्मादिट्ठिया च । तत्थ भद्वकेन सीलेन पयोगसम्पन्नो होति, भद्विकाय दिट्ठिया आसयसम्पन्नो । इति पयोगासयसम्पन्नो पुग्गलो सग्गूपगो होति । तेन वुत्तं — “इमेहि, खो, भिक्खवे, द्वीहि धम्मोहि समन्नागतो पुग्गलो यथाभतं निक्खित्तो, एवं सग्गे”ति । **सप्पज्जोति** पज्जवा । सेसं सुविज्जेय्यमेव ।

छट्ठसुत्तवण्णना निट्ठिता ।

७. आतापीसुत्तवण्णना

३४. सत्तमे **अनातापी**ति किलेसानं आतापनद्वेन आतापो, वीरियं, सो एतस्स अत्थीति आतापी, न आतापी अनातापी, सम्मप्यधानविरहितो कुसीतोति वुत्तं होति । ओत्तापो वुच्चति पापुत्रासो, सो एतस्स अत्थीति ओत्तापी, न ओत्तापी **अनोत्तापी**, ओत्तापरहितो । अथ वा आतापपटिपक्खो अनातापो, कोसज्जं सो अस्स अत्थीति अनातापी । यं “न ओत्तपति ओत्तप्पितब्बेन, न ओत्तपति पापकानं अकुसलानं धम्मानं समापत्तिया”ति एवं वुत्तं, तं अनोत्तप्यं अनोत्तापो । सो अस्स अत्थीति अनोत्तापीति एवमेत्थ अत्थो वेदितब्बो ।

अभब्बोति अनरहो । **सम्बोधायाति** अरियमग्गत्थाय । **निब्बानायाति** किलेसानं अच्चन्तवूपसमाय अमतमहानिब्बानाय । **अनुत्तरस्स योगक्खेमस्साति** अरहत्तफलस्स । तज्जि उत्तरितरस्स अभावतो अनुत्तरं, चतूहि योगेहि अनुपदुत्तत्ता खेमं निब्भयन्ति योगक्खेमन्ति च वुच्चति । **अधिगमायाति** पत्तिया । **आतापी**ति वीरियवा । सो हि “आरद्धवीरियो विहरति अकुसलानं धम्मानं पहानाय, कुसलानं धम्मानं उपसम्पदाय, थामवा दळ्ळपरक्कमो अनिक्खित्तधुरो कुसलेसु धम्मेषू”ति (दी० नि० ३.३४५) एवं वुत्तेन वीरियारम्भेन समन्नागतो किलेसानं अच्चन्तमेव आतापनसीलोति आतापी । **ओत्तापी**ति “यं ओत्तपति ओत्तप्पितब्बेन, ओत्तपति पापकानं अकुसलानं धम्मानं

समापत्तियां'ति (ध० स० ३१) एवं वृत्तेन ओत्तप्पेन समन्नागतत्ता ओत्तपनसीलोति ओत्तप्पी। अयञ्हि ओत्तापीति वृत्तो। तदविनाभावतो हिरिया च समन्नागतो एव होतीति हिरोत्तप्पसम्पन्नो अणुमत्तेपि वज्जे भयदस्सावी सीलेसु परिपूरकारी होति। इच्चस्स सीलसम्पदा दस्सिता। आतापीति इमिना नयेनस्स किलेसपरितापितादीपनेन समथविपस्सनाभावनानुयुत्तता दस्सिता। यथावुत्तञ्च वीरियं सद्भासतिसमाधिपज्जाहि विना न होतीति विमुत्तिपरिपाचकानि सद्भापज्जमानि इन्द्रियानि अत्थतो वृत्तानेव होन्ति। तेसु च सिद्धेसु अनिच्चे अनिच्चसज्जा, अनिच्चे दुक्खसज्जा, दुक्खे अनत्तसज्जा, पहानसज्जा, विरागसज्जा, निरोधसज्जाति छ निब्बेधभागिया सज्जा सिद्धा एवाति। एवं इमेहि द्वीहि धम्मेहि समन्नागतस्स लोकियानं सीलसमाधिपज्जानं सिञ्जनतो मग्गफलनिब्बानाधिगमस्स भव्वतं दस्सेन्तो “आतापी च खो...पे... अधिगमाया”ति आह।

गाथासु कुसीतोति मिच्छावितक्कबहुलताय कामब्यापादविहिंसावितक्कसङ्घातेहि कुच्छित्तेहि पापधम्मेहि सितो सम्बन्धो युत्तोति कुसीतो। कुच्छितं वा सीदति सम्मापटिपत्तितो अवसीदतीति कुसीतो, द-कारस्स त-कारं कत्वा। **हीनवीरियो**ति निब्बीरियो, चतूसुपि इरियापथेसु वीरियकरणरहितो। अनुस्साहसंहननसभावस्स चित्तालसियस्स थिनस्स, असत्तिविघातसभावस्स कायालसियस्स मिद्धस्स च अभिणहप्पवत्तिया **थिनमिद्धबहुलो**। पापजिगुच्छनलक्खणाय हिरिया अभावेन तप्पटिपक्खेन अहिरिकेन समन्नागतत्ता च **अहिरिको**। हिरोत्तप्पवीरियानं अभावेनेव सम्मापटिपत्तियं नत्थि एतस्स आदरोति **अनादरो**। उभयथापि तथा धम्मपुग्गलेन दुविधकिरियाकरणेन अनादरो। **फुटुन्ति** फुसितुं। **सम्बोधिमुत्तमन्ति** सम्बोधिसङ्घातं उत्तमं अरहत्तं अधिगन्तुं अभव्वोति अत्थो।

सतिमाति चिरकतचिरभासितानं अनुस्सरणे समत्थस्स सतिनेपक्कस्स भावेन चतुसतिपट्टानयोगेन सतिमा। **निपको**ति सत्तट्टानियसम्पज्जसङ्घातेन चेव कम्मट्टानपरिहरणपज्जासङ्घातेन च नेपक्केन समन्नागतत्ता निपको। **झायी**ति आरम्मणूपनिज्झानेन लक्खणूपनिज्झानेन चाति द्वीहिपि झानेहि झायी। **अप्पमत्तो**ति “दिवसं चङ्कमेन निसज्जाय आवरणियेहि धम्मेहि चित्तं परिसोधेती”तिआदिना नयेन कम्मट्टानभावनाय अप्पमत्तो। **संयोजनं जातिजराय छेत्वा**ति जातिया चेव जराय च सत्ते संयोजेतीति संयोजनन्ति लद्धनामं कामरागादिकं दसविधम्पि किलेसजातं अनुसयसमुग्धातवसेन मूलतो छिन्दित्वा। अथ वा **संयोजनं जातिजराय छेत्वा**ति जातिजराय संयोजनं छिन्दित्वा। यस्स हि संयोजनानि अच्छिन्नानि, तस्स जातिजराय अच्छेदो असमुग्धातोव। यस्स पन तानि छिन्नानि, तस्स जातिजरापि छिन्नाव कारणस्स समुग्धातितत्ता। तस्मा संयोजनं छिन्दन्तो एव जातिजरापि छिन्दति। तेन वृत्तं “संयोजनं जातिजराय छेत्वा”ति। **इधेव सम्बोधिमुत्तरं फुसे**ति इमस्मियेव अत्तभावे अग्गमग्गं अरहत्तं वा फुसे पापुणेय्य।

सत्तमसुत्तवण्णना निड्डिता।

८. पठमनकुहनसुत्तवण्णना

३५. अट्टमे नयिदन्ति एत्थ नइति पटिसेधे निपातो, तस्स “वुस्सती”ति इमिना सम्बन्धो, यकारो पदसन्धिकरो। **इदं-** सद्दो “एकमिदाहं, भिक्खवे, समयं उक्कट्टायं विहरामि सुभगवने सालराजमूले”तिआदीसु (म० नि० १.५०१) निपातमत्तं। “इदं खो तं, भिक्खवे, अप्पमत्तकं ओरमत्तकं सीलमत्तकं”न्तिआदीसु (दी० नि० १.२७) यथावृत्ते आसन्नपच्चक्खे आगतो।

“इदञ्चि तं जेतवनं, इसिसङ्घनिसेवितं।

आवुत्थं धम्मराजेन, पीतिसज्जननं ममा”ति ॥ —

आदीसु (सं० नि० १.४८) वक्खमाने आसन्नपच्चक्खे । इधापि वक्खमानेयेव आसन्नपच्चक्खे दट्ठब्बो ।

ब्रह्मचरिय-सद्वो —

“किं ते वतं किं पन ब्रह्मचरियं,
किस्स सुचिण्णस्स अयं विपाको ।
इद्धी जुती बलवीरियूपपत्ति,
इदञ्च ते नाग महाविमानं ॥

“अहञ्च भरिया च मनुस्सलोके,
सद्धा उभो दानपती अहुम्हा ।
ओपानभूतं मे घरं तदासि,
सन्तप्पिता समणब्राह्मणा च ॥

“तं मे वतं तं पन ब्रह्मचरियं,
तस्स सुचिण्णस्स अयं विपाको ।
इद्धी जुती बलवीरियूपपत्ति,
इदञ्च मे धीर महाविमान”न्ति ॥ (जा० २.२२.१५९२-१५९३, १५९५) —

इमस्मिं पुण्णकजातके दाने आगतो ।

“केन पाणि कामददो, केन पाणि मधुस्सवो ।
केन ते ब्रह्मचरियेन, पुञ्जं पाणिमिह इज्झति ॥

“तेन पाणि कामददो, तेन पाणि मधुस्सवो ।
तेन मे ब्रह्मचरियेन, पुञ्जं पाणिमिह इज्झती”ति ॥ (पे० व० २७५, २७७) —

इमस्मिं अङ्कुरपेतवत्थुस्मिं वेय्यावच्चे । “इदं खो तं, भिक्खवे, तित्तिरियं नाम ब्रह्मचरियं अहोसी”ति (चूळव० ३११) इमस्मिं तित्तिरजातके पञ्चसिक्खापदसीले । “तं खो पन, पञ्चसिख, ब्रह्मचरियं नेव निब्बिदाय न विरागाय...पे०... यावदेव ब्रह्मलोकूपपत्तिया”ति (दी० नि० २.३२९) इमस्मिं महागोविन्दसुत्ते ब्रह्मविहारे । “परे अब्रह्मचारी भविस्सन्ति, मयमेत्थ ब्रह्मचारिनो भविस्सामा”ति (म० नि० १.८३) सल्लेखसुत्ते मेथुनविरतियं ।

“मयञ्च भरिया नातिक्कमाम,
अम्हे च भरिया नातिक्कमन्ति ।
अञ्जत्र ताहि ब्रह्मचरियं चराम,
तस्मा हि अम्हं दहरा न मीयरे”ति ॥ (जा० १.१०.९७) —

महाधम्मपालजातके सदारसन्तोसे । “अभिजानामि खो पनाहं, सारिपुत्त, चतुरङ्गसमन्नागतं ब्रह्मचरियं चरिता — तपस्सी सुदं होमी”ति (म० नि० १.१५५) लोमहंससुत्ते वीरिये ।

“हीनेन ब्रह्मचरियेन, खत्तिये उपपज्जति ।

मज्झिमेन च देवत्तं, उत्तमेन विसुज्झती”ति ॥ (जा० १.८.७५) —

निमिजातके अत्तदमनवसेन कते अट्ठङ्गिकउपोसथे । “इदं खो पन, पञ्चसिख, ब्रह्मचरियं एकन्तनिब्बिदाय विरागाय...पे०... अयमेव अरियो अट्ठङ्गिको मग्गो”ति (दी० नि० २.३२९) महागोविन्दसुत्तेयव अरियमग्गे । “तयिदं ब्रह्मचरियं इद्धञ्चेव फीतञ्च वित्थारिकं बाहुजञ्जं पुथुभूतं याव देवमनुस्सेहि सुप्पकासित”न्ति (दी० नि० ३.१७४) पासादिकसुत्ते सिक्खत्तयसङ्गहे सकलस्मिं सासने । इधापि अरियमग्गे सासने च वत्तति ।

वुस्सतीति वसीयति, चरीयतीति अत्थो । **जनकुहनत्थन्ति** “अहो अय्यो सीलवा वत्तसम्पन्नो अपिच्छो सन्तुट्ठो महिद्धिको महानुभावो”ति आदिना जनस्स सत्तलोकस्स विम्हापनत्थं । **जनलपनत्थन्ति** “एवरूपस्स नाम अय्यस्स दिन्नं महप्फलं भविस्सती”ति पसन्नचित्तेहि “केनत्थो, किं आहरीयतू”ति मनुस्सेहि वदापनत्थं । **लाभसक्कारसिलोकानिसंसत्थन्ति** य्वायं “आकङ्खेय्य चे, भिक्खवे, भिक्खु ‘लाभी अस्सं चीवरपिण्डपातसेनासनगिलानप्पच्चयभेसज्जपरिक्खारान’न्ति, सीले-स्वेवस्स परिपूरकारी”ति (म० नि० १.६५) सीलानिसंसंभावेन वुत्तो चतुपच्चयलाभो, यो च चतुन्नं पच्चयानं सक्कच्चदानसङ्घातो आदरबहुमानगरुकरणसङ्घातो च सक्कारो, यो च “सीलसम्पन्नो बहुस्सुतो सुतधरो आरद्धवीरियो”ति आदिना नयेन उगगतथुतिघोससङ्घातो सिलोको ब्रह्मचरियं चरन्तानं दिट्ठधम्मिको आनिसंसो, तदत्थं । **इति मं जनो जानातू**ति “एवं ब्रह्मचरियवासे सति ‘अयं सीलवा कल्याणधम्मो’ति आदिना मं जनो जानातु सम्भावेतू”ति अत्तनो सन्तगुणवसेन सम्भावनत्थम्पि न इदं ब्रह्मचरियं वुस्सतीति सम्बन्धो ।

केचि पन “**जनकुहनत्थन्ति** पापिच्छस्स इच्छापकतस्स सतो सामन्तजप्पनइरियापथनिस्सितपच्चयपटिसेवनसङ्घातेन तिविधेन कुहनवत्थुना कुहनभावेन जनस्स विम्हापनत्थं । **जनलपनत्थन्ति** पापिच्छस्सेव सतो पच्चयत्थं परिक्थोभासादिवसेन लपनभावेन उपलापनभावेन वा जनस्स लपनत्थं । **लाभसक्कारसिलोकानिसंसत्थन्ति** पापिच्छस्सेव सतो लाभादिगरुताय लाभसक्कारसिलोकसङ्घातस्स आनिसंसउदयस्स निष्पादनत्थं । **इति मं जनो जानातू**ति पापिच्छस्सेव सतो असन्तगुणसम्भावनाधिप्पायेन ‘इति एवं मं जनो जानातू’ति न इदं ब्रह्मचरियं वुस्सती”ति एवमेत्थ अत्थं वदन्ति । पुरिमोयेव पन अत्थो सारतरो ।

अथ खोति एत्थ **अथाति** अज्जदत्थे निपातो, **खोति** अवधारणे । तेन कुहनादितो अज्जदत्थायेव पन इदं, भिक्खवे, ब्रह्मचरियं वुस्सतीति दस्सेति । इदानीं तं पयोजनं दस्सेन्तो “**संवरत्थञ्चेव पहानत्थञ्चा**”ति आह । तत्थ पञ्चविधो संवरो — पातिमोक्खसंवरो, सतिसंवरो, जाणसंवरो, खन्तिसंवरो, वीरियसंवरोति ।

तत्थ “इमिना पातिमोक्खसंवरेण उपेतो होति समुपेतो”ति (विभ० ५११) हि आदिना नयेन आगतो अयं **पातिमोक्खसंवरो** नाम, यो सीलसंवरोति च पवुच्चति । “रक्खति चक्खुन्द्रियं, चक्खुन्द्रिये संवरं आपज्जती”ति (दी० नि० १.२१३; म० नि० १.२९५; सं० नि० ४.२३९; अ० नि० ३.१६) आगतो अयं **सतिसंवरो** ।

“यानि सोतानि लोकस्मिं (अजिताति भगवा),
 सति तेसं निवारणं ।
 सोतानं संवरं ब्रूमि,
 पज्जायेते पिधीयरे”ति ॥ (सु० नि० १०४१) —

आगतो अयं **जाणसंवरो** । “खमो होति सीतस्स उण्हस्सा”ति आदिना (म० नि० १.२४; अ० नि० ४.११४; ६.५८) नयेन आगतो अयं **खन्तिसंवरो** । “उप्पन्नं कामवितक्कं नाधिवासेती”ति आदिना (म० नि० १.२६; अ० नि० ४.११४; ६.५८) नयेन आगतो अयं **वीरियसंवरो** । अत्थतो पन पाणातिपातादीनं पजहनवसेन, वत्तपटिवत्तानं करणवसेन च पवत्ता चेतना विरतियो च । सङ्खेपतो सब्बो कायवचीसंयमो, वित्थारतो सत्तन्नं आपत्तिक्खन्धानं अवीतिक्कमो सीलसंवरो । सति एव सतिसंवरो, सतिप्पधाना वा कुसला खन्धा । जाणमेव जाणसंवरो । अधिवासनवसेन अदोसो, अदोसप्पधाना वा तथा पवत्ता कुसला खन्धा खन्तिसंवरो, पज्जाति एके । कामवितक्कादीनं अनधिवासनवसेन पवत्तं वीरियमेव वीरियसंवरो । तेसु पठमो कायदुच्चरितादिदुस्सील्यस्स संवरणतो संवरो, दुतियो मुटुस्सच्चस्स, ततियो अज्जाणस्स, चतुत्थो अक्खन्तिया, पच्चमो कोसज्जस्स संवरणतो पिदहनतो संवरोति वेदितब्बो । एवमेतस्स संवरस्स अत्थाय संवरत्थं, संवरनिष्पादनत्थन्ति अत्थो ।

पहानम्पि पञ्चविधं — तदङ्गप्पहानं, विक्खम्भनप्पहानं, समुच्छेदप्पहानं, पटिप्पस्सद्धिप्पहानं, निस्सरणप्पहानन्ति । तत्थ यं वत्तब्बं, तं हेट्ठा एककनिपाते पठमसुत्तवण्णनायं वुत्तमेव । तस्स पन पञ्चविधस्सपि तथा तथा रागादिकिलेसानं पटिनिस्सज्जनट्टेन समतिक्कमनट्टेन वा पहानस्स अत्थाय पहानत्थं, पहानसाधनत्थन्ति अत्थो । तत्थ संवरेन किलेसानं चित्तसन्ताने पवेसननिवारणं पहानेन पवेसननिवारणञ्चेव समुग्धातो चाति वदन्ति । उभयेनापि पन यथारहं उभयं सम्पज्जतीति दट्ठब्बं । सीलादिधम्मा एव हि संवरणतो संवरो, पजहनतो पहानन्ति ।

गाथासु **अनीतिहन्ति** ईतियो वुच्चन्ति उपदवा — दिट्ठधम्मिका च सम्परायिका च । ईतियो हनति विनासेति पजहतीति ईतिहं, अनु ईतिहन्ति **अनीतिहं**, सासनब्रह्मचरियं मग्गब्रह्मचरियञ्च । अथ वा ईतीहि अनत्थेहि सद्धिं हनन्ति गच्छन्ति पवत्तन्तीति ईतिहा, तण्हादिउपक्किलेसा । नत्थि एत्थ ईतिहाति **अनीतिहं** । ईतिहा वा यथावुत्तेनट्टेन तित्थियसमया, तप्पटिपक्खतो इदं अनीतिहं । “अनीतिह”न्तिपि पाठो । तस्सत्थो — “इतिहाय”न्ति धम्मेसु अनेकंसग्गाहभावतो विचिकिच्छा इतिहं नाम, सम्मासम्बुद्धप्पवेदितत्ता यथानुसिद्धं पटिपज्जन्तानं निक्कङ्खभावसाधनतो नत्थि एत्थ इतिहन्ति **अनीतिहं**, अपरप्पच्चयन्ति अत्थो । वुत्तज्जेतं “पच्चत्तं वेदितब्बो विज्जूही”ति “अतक्कावचरो”ति च । गाथासुखत्थं पन “अनीतिह”न्ति दीघं कत्वा पठन्ति ।

निब्बानसङ्घातं ओगधं पतिट्ठं पारं गच्छतीति **निब्बानोगधगामी**, विमुत्तिरसत्ता एकन्तेनेव निब्बानसम्पापकोति अत्थो । तं निब्बानोगधगामिनं ब्रह्मचरियं । सोति यो सो समतिसं पारमियो पूरेत्वा सब्बकिलेसे भिन्दित्वा अनुत्तरं सम्मासम्बोधिं अभिसम्बुद्धो, सो भगवा **अदेसयि** देसेसि । निब्बानोगधोति वा अरियमग्गो वुच्चति । तेन विना निब्बानोगाहनस्स असम्भवतो तस्स च निब्बानं अनालम्बित्वा अप्पवत्तनतो, तज्ज तं एकन्तं गच्छतीति निब्बानोगधगामी । अथ वा **निब्बानोगधगामिनन्ति** निब्बानस्स अन्तोगामिनं मग्गब्रह्मचरियं, निब्बानं आरम्भणं करित्वा तस्स अन्तो एव वत्तति पवत्ततीति । **महत्तेही**ति महाआतुमेहि उळ्ळारज्झासयेहि । महन्तं निब्बानं, महन्ते वा सीलक्खन्धादिके एसन्ति गवेसन्तीति महेसिनो बुद्धादयो अरिया । तेहि **अनुयातो** पटिपन्नो । **यथा बुद्धेन देसितन्ति** यथा अभिज्जेय्यादिधम्मे अभिज्जेय्यादिभावेनेव सम्मासम्बुद्धेन मया देसितं, एवं ये एतं मग्गब्रह्मचरियं तदत्थं सासनब्रह्मचरियञ्च पटिपज्जन्ति । ते

दिदुधम्मिकसम्परायिकत्येहि यथारहं अनुसासन्तस्स सत्थु मय्हं सासनकारिनो ओवादप्पटिकरा सकलस्स वट्टदुक्खस्स अन्तं परियन्तं अप्पवत्तिं करिस्सन्ति, दुक्खस्स वा अन्तं निब्बानं सच्छिकरिस्सन्तीति ।

अट्टमसुत्तवण्णना निट्ठिता ।

९. दुतियनकुहनसुत्तवण्णना

३६. नवमे अभिञ्जत्थन्ति कुसलादिविभागेन खन्धादिविभागेन च सब्बधम्मे अभिविसिट्ठेन जाणेन अविपरीततो जाननत्थं । परिञ्जत्थन्ति तेभूमकधम्मे “इदं दुक्खं”न्ति आदिना परिजाननत्थं समतिक्कमनत्थञ्च । तत्थ अभिञ्जेय्यअभिजानना चतुसच्चविसया । परिञ्जेय्यपरिजानना पन यदिपि दुक्खसच्चविसया, पहानसच्छिकिरियाभावनाभिसमयेहि पन विना न पवत्ततीति पहानादयोपि इध गहिताति वेदितब्बं । सेसं अनन्तरसुत्ते वुत्तत्थमेव ।

नवमसुत्तवण्णना निट्ठिता ।

१०. सोमनस्ससुत्तवण्णना

३७. दसमे सुखसोमनस्सबहुलोति एत्थ सुखन्ति कायिकं सुखं, सोमनस्सन्ति चेतसिकं । तस्मा यस्स कायिकं चेतसिकञ्च सुखं अभिण्हं पवत्तति, सो सुखसोमनस्सबहुलोति वुत्तो । योनीति “चतस्सो खो इमा, सारिपुत्त, योनियो”ति आदीसु (म० नि० १.१५२) खन्धकोट्टासो योनीति आगतो । “योनि हेसा, भूमिज, फलस्स अधिगमाया”ति आदीसु (म० नि० ३.२२६) कारणं ।

“न चाहं ब्राह्मणं ब्रूमि, योनिजं मत्तिसम्भव”न्ति च ॥ (म० नि० २.४५७; ध० प० ३९६; सु० नि० ६२५) ।

“तमेनं कम्मजा वाता निब्बत्तित्वा उद्धंपादं अधोसिरं सम्परिवत्तेत्वा मातु योनिमुखे सम्पटिपादेन्ती”ति च आदीसु पस्सावमग्गो । इध पन कारणं अधिप्पेतं । अस्साति अनेन । आरब्धाति पट्टपिता पग्गहिता परिपुण्णा सम्पादिता वा ।

आसवानं खयायाति एत्थ आसवन्तीति आसवा, चक्खुतोपि...पे०... मनतोपि सवन्ति पवत्तन्तीति वुत्तं होति । धम्मतो याव गोत्रभू, ओकासतो याव भवग्गा सवन्तीति वा आसवा । एते धम्मे एतञ्च ओकासं अन्तो करित्वा पवत्तन्तीति अत्थो । अन्तोकरणत्थो हि अयं आकारो । चिरपारिवासियट्ठेन मदिरादयो आसवा वियातिपि आसवा । लोके हि चिरपारिवासिका मदिरादयो आसवाति वुच्चन्ति । यदि च चिरपारिवासियट्ठेन आसवा, एते एव भवितुं अरहन्ति । वुत्तं हेतं — “पुरिमा, भिक्खवे, कोटि न पज्जायति अविज्जाय, इतो पुब्बे अविज्जा नाहोसी”ति आदि (अ० नि० १०.६१) । आयतं संसारदुक्खं सवन्ति पसवन्तीतिपि आसवा । पुरिमानि चेत्य निब्बचनानि यत्थ किलेसा आसवाति आगता, तत्थ युज्जन्ति; पच्छिमं कम्मेपि । न केवलञ्च कम्मकिलेसा एव आसवा, अपिच खो नानप्पकारा उपद्दवापि । अभिधम्मे हि “चत्तारो आसवा — कामासवो, भवासवो, दिट्ठासवो, अविज्जासवो”ति (ध० स० ११०२) कामरागादयो किलेसा आसवाति आगता । सुत्तेपि “नाहं, चुन्द, दिदुधम्मिकानंयेव आसवानं संवराय धम्मं देसेमी”ति (दी० नि० ३.१८२) एत्थ विवादमूलभूता किलेसा आसवाति आगता ।

“येन देवूपपत्यस्स, गन्धब्बो वा विहङ्गमो ।
यक्खत्तं येन गच्छेय्य, मनुस्सत्तञ्च अब्बजे ।
ते मय्हं, आसवा खीणा, विद्धस्ता विनळीकता”ति ॥ (अ० नि० ४.३६) —

एत्थ तेभूमकं कम्मं अवसेसा च अकुसला धम्मा । “दिट्ठधम्मिकानं आसवानं संवराय सम्परायिकानं आसवानं पटिघाताया”ति (पारा० ३९) एत्थ परूपघातविष्पटिसारवधबन्धादयो चेव अपायदुक्खभूता नानप्पकारा उपद्दवा च ।

ते पनेते आसवा विनये “दिट्ठधम्मिकानं आसवानं संवराय, सम्परायिकानं आसवानं पटिघाताया”ति द्वेधा आगता । सळायतने “तयोमे, आवुसो, आसवा — कामासवो, भवासवो, अविज्जासवो”ति (सं० नि० ४.३२१) तिधा आगता । तथा अज्जेसु सुत्तन्तेसु । अभिधम्मे तेयेव दिट्ठासवेन सद्धिं चतुधा आगता । निब्बेधिकपरियाये पन “अत्थि, भिक्खवे, आसवा निरयगमनीया, अत्थि आसवा तिरच्छानयोनिगमनीया, अत्थि आसवा पेत्तिविसयगमनीया, अत्थि आसवा मनुस्सलोकगमनीया, अत्थि आसवा देवलोकगमनीया”ति (अ० नि० ६.६३) पञ्चधा आगता । कम्ममेव चेत्य आसवाति अधिप्पेतं । छक्कनिपाते “अत्थि, भिक्खवे, आसवा संवरा पहातब्बा”तिआदिना (अ० नि० ६.५८) नयेन छधा आगता । सब्बासवपरियाये तेयेव दस्सनपहातब्बेहि धम्मेहि सद्धिं सत्तधा आगता । इध पन अभिधम्मपरियायेन चत्तारो आसवा अधिप्पेताति वेदितब्बा ।

खयायाति एत्थ पन “यो आसवानं खयो वयो भेदो परिभेदो अनिच्चता अन्तरधान”न्ति आसवानं सरसभेदो आसवानं खयोति वुत्तो । “जानतो अहं, भिक्खवे, पस्सतो आसवानं खयं वदामी”ति (म० नि० १.१५) एत्थ आसवानं खीणाकारो नत्थिभावो अच्चन्तं असमुप्पादो आसवक्खयोति वुत्तो ।

“सेखस्स सिक्खमानस्स, उजुमग्गानुसारिनो ।
खयस्मिं पठमं जाणं, ततो अज्जा अनन्तरा”ति ॥ (इतिवु० ६२) —

एत्थ अरियमग्गो आसवक्खयोति वुत्तो । “आसवानं खया समणो होती”ति (म० नि० १.४३८) एत्थ फलं ।

“परवज्जानुपस्सिस्स, निच्चं उज्झानसज्जिनो ।
आसवा तस्स वट्ठन्ति, आरा सो आसवक्खया”ति ॥ (ध० प० २५३) —

एत्थ निब्बानं । इध पन फलं सन्धाय “आसवानं खयाया”ति वुत्तं, अरहत्तफलत्थायाति अत्थो ।

संवेजनीयेसु ठानेसूति संवेगजनकेसु जातिआदीसु संवेगवत्थूसु । जाति, जरा, ब्याधि, मरणं, अपायदुक्खं, अतीते वट्टमूलकं दुक्खं, अनागते वट्टमूलकं दुक्खं, पच्चुप्पन्ने आहारपरियेड्डिमूलकं दुक्खन्ति इमानि हि संवेगवत्थूनि संवेजनीयट्ठानानि नाम । अपिच “आदित्तो लोकसन्निवासो उय्युत्तो पयातो कुम्मगप्पटिपन्नो, उपनीयति लोको अब्धुवो, अताणो लोको अनभिस्सरो, अस्सको लोको, सब्बं पहाय गमनीयं, ऊनो लोको अतित्तो तण्हादासो”ति एवमादीनि (पटि० म० १.११७) चेत्य संवेजनीयट्ठानानीति वेदितब्बानि । **संवेजनेनाति** जातिआदिसंवेगवत्थूनि पटिच्च उप्पन्नभयसङ्घातेन संवेजनेन । अत्थतो पन सहोत्तप्पजाणं संवेगो नाम ।

संविग्गस्साति गब्भोक्कन्तिकादिवसेन अनेकविधेहि जातिआदिदुक्खेहि संवेगजातस्स । “संवेजित्वा”ति च पठन्ति ।

योनिःसो पधानेनाति उपायपधानेन, सम्मावायामेनाति अत्थो । सो हि यथा अकुसला धम्मा पहीयन्ति, कुसला धम्मा भावनापारिपूरिं गच्छन्ति, एवं पदहनतो उत्तमभावसाधनतो च “पधान”न्ति वुच्चति । तत्थ संवेगेन भवादीसु किञ्चि ताणं लेणं पटिसरणं अपस्सन्तो तत्थ अनोलीयन्तो अलग्गमानसो तप्पटिपक्खेन च विनिवत्तितविसज्जितो अज्जदत्थु निब्बाननिन्नो होति निब्बानपोणो निब्बानपब्भारो । सो कल्याणमित्तसन्निस्सयेन योनिःसोमनसिकारबहुलो विसुद्धासयप्पयोगो समथविपस्सनासु युत्तप्पयुत्तो सब्बस्मिम्पि सङ्खारगते निब्बिन्दति विरज्जति, विपस्सनं उस्सुक्कापेति । तत्थ यदिदं योनिःसोमनसिकारबहुलो विसुद्धासयप्पयोगो समथविपस्सनासु युत्तप्पयुत्तो, तेनस्स दिट्ठेव धम्मे सुखसोमनस्सबहुलता वेदितब्बा । यं पनायं समथे पतिट्ठितो विपस्सनाय युत्तप्पयुत्तो सब्बस्मिम्पि सङ्खारगते निब्बिन्दति विरज्जति, विपस्सनं उस्सुक्कापेति, तेनस्स योनि आरद्धा आसवानं खयायाति वेदितब्बं ।

गाथासु संविज्जेथेवाति संविज्जेय्य एव संवेगं करेय्य एव । “संविज्जित्वाना”ति च पठन्ति । वुत्तनयेन संविग्गो हुत्वाति अत्थो । पण्डितोति सप्पज्जो, तिहेतुकपटिसन्धीति वुत्तं होति । पज्जाय समवेक्खियाति संवेगवत्थूनि संविज्जनवसेन पज्जाय सम्मा अवेक्खिय । अथ वा पज्जाय सम्मा अवेक्खित्वाति । सेसं सब्बत्थ उत्तानत्थमेव ।

दसमसुत्तवण्णना निट्ठिता ।

इति परमत्थदीपनिया इतिवुत्तक-अट्ठकथाय

दुकनिपाते पठमवग्गवण्णना निट्ठिता ।

२. दुतियवग्गो

१. वितक्कसुत्तवण्णना

३८. दुतियवग्गस्स पठमे तथागतं, भिक्खवेति एत्थ तथागत-सद्दो ताव सत्तवोहारसम्मासम्बुद्धादीसु दिस्सति । तथा हेस “होति तथागतो परं मरणा”तिआदीसु (दी० नि० १.६५) सत्तवोहारे ।

“तथागतं देवमनुस्सपूजितं,
बुद्धं नमस्साम सुवत्थि होतू”ति ॥ (खु० पा० ६.१६) —

आदीसु सम्मासम्बुद्धे ।

“तथागतं देवमनुस्सपूजितं,
धम्मं नमस्साम सुवत्थि होतू”ति ॥ (खु० पा० ६.१७) —

आदीसु धम्मे ।

“तथागतं देवमनुस्सपूजितं,
सङ्गं नमस्साम सुवत्थि होतू”ति ॥ (खु० पा० ६.१८) —

आदीसु सङ्गे । इध पन सम्मासम्बुद्धे । तस्मा तथागतन्ति एत्थ अट्ठहि कारणेहि भगवा तथागतोति वुच्चति । कतमेहि अट्ठहि? तथा आगतोति तथागतो, तथा गतोति तथागतो, तथलक्खणं आगतोति तथागतो, तथधम्मं याथावतो अभिसम्बुद्धोति तथागतो, तथदस्सिताय तथागतो, तथवादिताय तथागतो, तथाकारिताय तथागतो, अभिभवनट्ठेन तथागतोति ।

कथं भगवा तथा आगतोति तथागतो? यथा येन अभिनीहारेन दानपारमिं पूरेत्वा सीलनेक्खम्मपज्जावीरियखन्तिसच्चअधिट्ठानमेत्ताउपेक्खापारमिं पूरेत्वा इमा दस पारमियो, दस उपपारमियो, दस परमत्थपारमियोति समतिंस पारमियो पूरेत्वा अङ्गपरिच्चागं, अत्तपरिच्चागं, धनपरिच्चागं, दारपरिच्चागं, रज्जपरिच्चागन्ति इमानि पच्च महापरिच्चागानि परिच्चजित्वा यथा विपस्सिआदयो सम्मासम्बुद्धा आगता, तथा अम्हाकं भगवापि आगतोति तथागतो । यथाह —

“यथेव लोकम्हि विपस्सिआदयो,
सब्बज्जुभावं मुनयो इधागता ।
तथा अयं सक्थमुनीपि आगतो,
तथागतो वुच्चति तेन चक्खुमा”ति ॥ —

एवं तथा आगतोति तथागतो ।

कथं तथा गतोति तथागतो? यथा सम्पतिजाताव विपस्सिआदयो समेहि पादेहि पथवियं पतिट्ठाय उत्तराभिमुखा सत्तपदवीतिहारेन गता, तथा अम्हाकं भगवापि गतोति तथागतो । यथाहु —

“मुहुत्तजातोव गवंपती यथा,
समेहि पादेहि फुसी वसुन्धरं ।
सो विक्कमी सत्त पदानि गोतमो,
सेतज्ज छत्तं अनुधारयुं मरू ॥

“गन्त्वान सो सत्त पदानि गोतमो,
दिसा विलोकेसि समा समन्ततो ।
अट्ठङ्गुपेतं गिरमम्भुदीरयि,
सीहो यथा पब्बतमुद्धनिट्ठितो”ति ॥ —

एवं तथा गतोति तथागतो ।

कथं तथलक्खणं आगतोति तथागतो? सब्बेसं रूपारूपधम्मनं सलक्खणं, सामज्जलक्खणं, तथं, अवितथं, जाणगतिया आगतो, अविरज्झित्वा पत्तो, अनुबुद्धोति तथागतो । यथाह —

“सब्बेसं पन धम्मनं, सकसामज्जलक्खणं ।
तथमेवागतो यस्मा, तस्मा नाथो तथागतो”ति ॥ —

एवं तथलखणं आगतोति तथागतो ।

कथं तथधम्मं याथावतो अभिसम्बुद्धोति तथागतो? तथधम्मा नाम चत्तारि अरियसच्चानि । यथाह “चत्तारिमानि, भिक्खवे, तथानि अवितथानि अनञ्जथानि । कतमानि चत्तारि? इदं दुक्खं अरियसच्चन्ति, भिक्खवे, तथमेतं अवितथमेतं अनञ्जथमेतं”न्ति (सं० नि० ५.१०९०) वित्थारो । तानि च भगवा अभिसम्बुद्धो, तस्मापि तथानं अभिसम्बुद्धत्ता तथागतो । अभिसम्बुद्धत्थो हि एत्थ गत-सद्दो । एवं तथधम्मं याथावतो अभिसम्बुद्धोति तथागतो ।

कथं तथदस्सिताय तथागतो? यं सदेवके लोके...पे०... सदेवमनुस्साय पजाय अपरिमाणासु लोकधातूसु अपरिमाणानं सत्तानं चक्खुद्वारे आपाथमागच्छन्तं रूपारम्मणं नाम अत्थि, तं भगवा सब्बाकारतो जानाति पस्सति । एवं जानता पस्सता चानेन तं इट्ठादिवसेन वा दिट्ठसुतमुतविज्जातेसु लब्भमानपदवसेन वा “कतमं तं रूपं रूपायतनं, यं रूपं चतुन्नं महाभूतानं उपादाय वण्णनिभा सनिदस्सनं सप्पटिघं नीलं पीतक”न्तिआदिना (ध० स० ६१६) नयेन अनेकेहि नामेहि तेरसहि वारेहि द्वेपज्जासाय नयेहि विभज्जमानं तथमेव होति, वितथं नत्थि । एस नयो सोतद्वारादीसु आपाथमागच्छन्तेसु सद्दादीसु । वुत्तज्हेतं भगवता —

“यं, भिक्खवे, सदेवकस्स लोकस्स...पे०... सदेवमनुस्साय दिट्ठं सुतं मुतं विज्जातं पत्तं परियेसितं अनुविचरितं मनसा, तमहं जानामि...पे०... तमहं अब्भज्जासिं, तं तथागतस्स विदितं, तं तथागतो न उपट्ठासी”ति (अ० नि० ४.२४) ।

एवं तथदस्सिताय तथागतो । एत्थ तथदस्सिअत्थे तथागतोति पदस्स सम्भवो वेदितब्बो ।

कथं तथवादिताय तथागतो? यं रत्तिं भगवा अनुत्तरं सम्मासम्बोधिं अभिसम्बुद्धो, यज्च रत्तिं अनुपादिसेसाय निब्बानधातुया परिनिब्बायि, एत्थन्तरे पज्चचत्तालीसवस्सपरिमाणकाले यं भगवता भासितं सुत्तगेय्यादि, सब्बं तं परिसुद्धं परिपुण्णं रागमदादिनिम्मदनं एकसदिसं तथं अवितथं । तेनाह —

“यज्च, चुन्द, रत्तिं तथागतो अनुत्तरं सम्मासम्बोधिं अभिसम्बुज्झति, यज्च रत्तिं अनुपादिसेसाय निब्बानधातुया परिनिब्बायति, यं एतस्मिं अन्तरे भासति लपति निद्विसति, सब्बं तं तथेव होति, नो अज्जथा । तस्मा ‘तथागतो’ति वुच्चती”ति (दी० नि० ३.१८८; अ० नि० ४.२३) ।

गदअत्थो हि एत्थ गतसद्दो । एवं तथवादिताय तथागतो । अपिच आगदनं आगदो, वचनन्ति अत्थो । तथो अविपरीतो आगदो अस्साति दकारस्स तकारं कत्वा तथागतोति, एवम्पेत्थ पदसिद्धि वेदितब्बा ।

कथं तथाकारिताय तथागतो? भगवतो हि वाचाय कायो अनुलोमेति, कायस्सपि वाचा । तस्मा यथावादी तथाकारी, यथाकारी तथावादी च होति । एवंभूतस्स चस्स यथा वाचा, कायोपि तथा गतो पवत्तो । यथा च कायो, वाचापि तथा गताति तथागतो । तेनाह “यथावादी, भिक्खवे, तथागतो तथाकारी, यथाकारी तथावादी । इति यथावादी तथाकारी, यथाकारी तथावादी । तस्मा ‘तथागतो’ति वुच्चती”ति । एवं तथाकारिताय तथागतो ।

कथं अभिभवनट्टेन तथागतो? यस्मा भगवा उपरि भवगं हेट्ठा अवीचिं परियन्तं करित्वा तिरियं अपरिमाणासु लोकधातूसु सब्बसत्ते अभिभवति सीलेनपि समाधिनापि पज्जायपि विमुत्तियापि विमुत्तिजाणदस्सनेनपि, न तस्स तुला वा

पमाणं वा अत्थि, अथ खो अतुलो अप्पमेय्यो अनुत्तरो देवानं अतिदेवो सक्कानं अतिसक्को ब्रह्मानं अतिब्रह्मा
सब्बसत्तुत्तमो, तस्मा तथागतो । तेनाह —

“सदेवके, भिक्खवे, लोके...पे०... मनुस्साय तथागतो अभिभू अनभिभूतो अज्जदत्थु दसो वसवत्ती, तस्मा
‘तथागतो’ति वुच्चती’ति (दी० नि० ३.१८८; अ० नि० ४.२३) ।

तत्रायं पदसिद्धि — अगदो विय अगदो, देसनाविलासो चेव पुज्जुस्सयो च । तेन हेस महानुभावो भिसक्को विय
दिब्बागदेन सप्पे, सब्बपरप्पवादिनो सदेवकञ्च लोकं अभिभवति । इति सब्बलोकाभिभवने तथो अविपरीतो यथावुत्तो
अगदो एतस्साति दकारस्स तकारं कत्वा तथागतोति वेदितब्बो । एवं अभिभवनट्टेन तथागतो ।

अपिच तथाय गतोति तथागतो, तथं गतोति तथागतो । तत्थ सकललोकं तीरणपरिज्जाय तथाय गतो अवगतोति
तथागतो, लोकसमुदयं पहाणपरिज्जाय तथाय गतो अतीतोति तथागतो, लोकनिरोधं सच्छिकिरियाय तथाय गतो
अधिगतोति तथागतो । लोकनिरोधगामिनिं पटिपदं तथं गतो पटिपन्नोति तथागतो । वुत्तज्हेतं भगवता —

“लोको, भिक्खवे, तथागतेन अभिसम्बुद्धो । लोकस्मा तथागतो विसंयुत्तो । लोकसमुदयो, भिक्खवे,
तथागतेन अभिसम्बुद्धो, लोकसमुदयो तथागतस्स पहीनो । लोकनिरोधो, भिक्खवे, तथागतेन अभिसम्बुद्धो,
लोकनिरोधो तथागतस्स सच्छिकतो । लोकनिरोधगामिनी पटिपदा, भिक्खवे, तथागतेन अभिसम्बुद्धा,
लोकनिरोधगामिनी पटिपदा तथागतस्स भाविता । यं, भिक्खवे, सदेवकस्स...पे०... सब्बं तं तथागतेन
अभिसम्बुद्धं । तस्मा ‘तथागतो’ति वुच्चती’ति (अ० नि० ४.२३) ।

अपरेहिपि अट्ठहि कारणेहि भगवा तथागतो । तथाय आगतोति तथागतो, तथाय गतोति तथागतो, तथानि आगतोति
तथागतो, तथा गतोति तथागतो, तथाविधोति तथागतो, तथापवत्तिकोति तथागतो, तथेहि आगतोति तथागतो, तथा
गतभावेन तथागतोति ।

कथं तथाय आगतोति तथागतो? या सा भगवता सुमेधभूतेन दीपङ्करदसबलस्स पादमूले —

“मनुस्सत्तं लिङ्गसम्पत्ति, हेतु सत्थारदस्सनं ।
पब्बज्जा गुणसम्पत्ति, अधिकारो च छन्दता ।
अट्ठधम्मसमोधाना, अभिनीहारो समिज्जती’ति ॥ (बु० वं० २.५९) —

एवं वुत्तं अट्ठङ्गसमन्नागतं अभिनीहारं सम्पादेन्तेन “अहं सदेवकं लोकं तिण्णो तारेस्सामि, मुत्तो मोचेस्सामि, दन्तो
दमेस्सामि, अस्सत्थो अस्सासेस्सामि, परिनिब्बुतो परिनिब्बापेस्सामि, सुद्धो सोधेस्सामि, बुद्धो बोधेस्सामी’ति महापटिज्जा
पवत्तिता । वुत्तं हेतं —

“किं मे एकेन तिण्णेन, पुरिसेन थामदस्सिना ।
सब्बज्जुतं पापुणित्वा, सन्तारेस्सं सदेवकं ॥

“इमिना मे अधिकारेन, कतेन पुरिसुत्तमे ।

सब्बञ्जुतं पापुणित्वा, तारेमि जनतं बहुं ॥

“संसारसोतं छिन्दित्वा, विद्धंसेत्वा तयो भवे ।

धम्मनावं समारुह, सन्तारेस्सं सदेवकं ॥

“किं मे अज्जातवेसेन, धम्मं सच्छिकतेनिध ।

सब्बञ्जुतं पापुणित्वा, बुद्धो हेस्सं सदेवके”ति ॥ (बु० वं० ५५-५८) ।

तं पनेतं महापटिज्जं सकलस्सपि बुद्धकरधम्मसमुदायस्स पविचयपच्चवेक्खणसमादानानं कारणभूतं अविशंवादेन्तो लोकनाथो यस्मा महाकप्पानं सतसहस्साधिकानि चत्तारि असङ्ख्येय्यानि सक्कच्चं निरन्तरं निरवसेसतो दानपारमिआदयो समतिसपारमियो पूरेत्वा, अङ्गपरिच्चागादयो पञ्च महापरिच्चागे परिच्चजित्वा, सच्चाधिद्वानादीनि चत्तारि अधिद्वानानि परिब्रूहेत्वा, पुञ्जजाणसम्भारे सम्भरित्वा पुब्बयोगपुब्बचरियधम्मक्खानजातत्थचरियादयो उक्कंसापेत्वा, बुद्धिचरियं परमकोटिं पापेत्वा अनुत्तरं सम्मासम्बोधिं अभिसम्बुज्झि; तस्मा तस्सेव सा महापटिज्जा तथा अवितथा अनज्जथा, न तस्स वालगमत्तम्पि वितथं अत्थि । तथा हि दीपङ्करो दसबलो कोण्डज्जो, मङ्गलो... पे०... कस्सपो भगवाति इमे चतुवीसति सम्मासम्बुद्धा पटिपाटिया उप्पन्ना “बुद्धो भविस्सती”ति नं ब्याकरिंसु । एवं चतुवीसतिया बुद्धानं सन्तिके लद्धब्याकरणो ये ते कताभिनीहारेहि बोधिसत्तेहि लद्धब्बा आनिसंसा, ते लभित्वाव आगतोति ताय यथावुत्ताय महापटिज्जाय तथाय अभिसम्बुद्धभावं आगतो अधिगतोति तथागतो । एवं तथाय आगतोति तथागतो ।

कथं तथाय गतोति तथागतो? यायं महाकरुणा लोकनाथस्स, याय महादुक्खसम्बाधप्पटिपन्नं सत्तनिकायं दिस्वा “तस्स नत्थज्जो कोचि पटिसरणं, अहमेव नं इतो संसारदुक्खतो मुत्तो मोचेस्सामी”ति समुस्साहितमानसो महाभिनीहारं अकासि । कत्वा च यथापणिधानं सकललोकहितसम्पादनाय उस्सुक्कमापन्नो अत्तनो कायजीवितनिरपेक्खो परेसं सोतपथगमनमत्तेनपि चित्तुत्राससमुप्पादिका अतिदुक्करा दुक्करचरिया समाचरन्तो यथा महाबोधिसत्तानं पटिपत्ति हानभागिया संकिलेसभागिया ठितिभागिया वा न होति, अथ खो उत्तरि विसेसभागियाव होति, तथा पटिपज्जमानो अनुपुब्बेन निरवसेसे बोधिसम्भारे समानेत्वा अभिसम्बोधिं पापुणि । ततो परज्ज तायेव महाकरुणाय सज्जोदितमानसो पविवेकरतिं परमज्ज सन्तं विमोक्खसुखं पहाय बालजनबहुले लोके तेहि समुप्पादितं सम्मानावमानविप्पकारं अगणेतवा वेनेय्यजनविनयनेन निरवसेसं बुद्धकिच्चं निट्ठपेसि । तत्र यो भगवतो सत्तेसु महाकरुणाय समोक्कमनाकारो, सो परतो आवि भविस्सति । यथा बुद्धभूतस्स लोकनाथस्स सत्तेसु महाकरुणा, एवं बोधिसत्तभूतस्सपि महाभिनीहारकालादीसूति सब्बत्थ सब्बदा च एकसदिसताय तथाव सा अवितथा अनज्जथा । तस्मा तीसुपि अवत्थासु सब्बसत्तेसु समानरसाय तथाय महाकरुणाय सकललोकहिताय गतो पटिपन्नोति तथागतो । एवं तथाय गतोति तथागतो ।

कथं तथानि आगतोति तथागतो? तथानि नाम चत्तारि अरियमग्गजाणानि । तानि हि “इदं दुक्खं, अयं दुक्खसमुदयो, अयं दुक्खनिरोधो, अयं दुक्खनिरोधगामिनी पटिपदा”ति एवं सब्बज्येय्यसङ्गाहकानं पवत्तिनिवत्तिदुभयहेतुभूतानं चतुन्नं अरियसच्चानं, दुक्खस्स पीळनट्ठो सङ्खत्तट्ठो सन्तापट्ठो विपरिणामट्ठो, समुदयस्स आयूहनट्ठो निदानट्ठो संयोगट्ठो पलिबोधट्ठो, निरोधस्स निस्सरणट्ठो विवेकट्ठो असङ्खत्तट्ठो अमतट्ठो, मग्गस्स निय्यानट्ठो हेत्वट्ठो दस्सनट्ठो अधिपतेय्यट्ठोतिआदीनं तब्बिभागानज्ज यथाभूतसभावावबोधविवबन्धकस्स संकिलेसपक्खस्स समुच्छिन्दनेन पटिलद्धाय तत्थ असम्मोहाभिसमयसङ्घाताय अविपरीताकारप्पवत्तिया धम्मानं सभावसरसलक्खणस्स अविशंवादनतो तथानि अवितथानि अनज्जथानि, तानि भगवा अनज्जनेय्यो सयमेव आगतो अधिगतो, तस्मा तथानि आगतोति तथागतो ।

यथा च मग्गजाणानि, एवं भगवतो तीसु कालेषु अप्पटिहतजाणानि चतुपटिसम्भिदाजाणानि चतुवेसारज्जजाणानि पञ्चगतिपरिच्छेदजाणानि छअसाधारणजाणानि सत्तबोज्झङ्गविभावनजाणानि अट्टमग्गङ्गविभावनजाणानि नवानुपुब्बविहारसमापत्तिजाणानि दसबलजाणानि च विभावेतब्बानि ।

तत्रायं विभावना — यज्झि किञ्चि अपरिमाणासु लोकधातूसु अपरिमाणानं सत्तानं हीनादिभेदभिन्नानं हीनादिभेदभिन्नासु अतीतासु खन्धायतनधातूसु सभावकिच्चादि अवत्थाविसेसादि खन्धपटिबद्धनामगोत्तादि च जानितब्बं । अनिन्द्रियबद्धेषु च अतिसुखुमतिरोहितविदूरदेसेसु रूपधम्मेषु यो तंतंपच्चयविसेसेहि सद्धिं पच्चयुप्पन्नानं वण्णसण्ठानगन्धरसफस्सादिविसेसो, तत्थ सब्बत्थेव हत्थतले ठपितआमलको विय पच्चक्खतो असङ्गमपटिहतं भगवतो जाणं पवत्तति, तथा अनागतासु पच्चुप्पन्नासु चाति इमानि तीसु कालेषु अप्पटिहतजाणानि नाम । यथाह —

“अतीतंसे बुद्धस्स भगवतो अप्पटिहतं जाणं, अनागतंसे बुद्धस्स भगवतो अप्पटिहतं जाणं, पच्चुप्पन्नंसे बुद्धस्स भगवतो अप्पटिहतं जाणं”न्ति (पटि० म० ३.५) ।

तानि पनेतानि तत्थ तत्थ धम्मानं सभावसरसलक्खणस्स अविसेवादनतो तथानि अवितथानि अनज्जथानि, तानि भगवा सयम्भुजाणेन अधिगज्झि । एवं तथानि आगतोति तथागतो ।

तथा अत्थपटिसम्भिदा, धम्मपटिसम्भिदा, निरुत्तिपटिसम्भिदा, पटिभानपटिसम्भिदाति चतस्सो पटिसम्भिदा । तत्थ अत्थपभेदस्स सल्लक्खणविभावनववत्थानकरणसमत्थं अत्थे पभेदगतं जाणं अत्थपटिसम्भिदा । धम्मपभेदस्स सल्लक्खणविभावनववत्थानकरणसमत्थं धम्मे पभेदगतं जाणं धम्मपटिसम्भिदा । निरुत्तिपभेदस्स सल्लक्खणविभावनववत्थानकरणसमत्थं निरुत्ताभिलापे पभेदगतं जाणं निरुत्तिपटिसम्भिदा । पटिभानपभेदस्स सल्लक्खणविभावनववत्थानकरणसमत्थं पटिभाने पभेदगतं जाणं पटिभानपटिसम्भिदा । वुत्तज्जेतं —

“अत्थे जाणं अत्थपटिसम्भिदा, धम्मे जाणं धम्मपटिसम्भिदा, तत्र धम्मनिरुत्ताभिलापे जाणं निरुत्तिपटिसम्भिदा, जाणेषु जाणं पटिभानपटिसम्भिदा”ति (विभ० ७१८) ।

एत्थ च हेतुअनुसारेण अरणीयतो अधिगन्तब्बतो च सङ्खेपतो हेतुफलं अत्थो नाम । पभेदतो पन यंकिञ्चि पच्चयुप्पन्नं, निब्बानं, भासितत्थो, विपाको, किरियाति इमे पञ्च धम्मा अत्थो । तं अत्थं पच्चवेक्खन्तस्स तस्मिं अत्थे पभेदगतं जाणं अत्थपटिसम्भिदा । धम्मोति सङ्खेपतो पच्चयो । सो हि यस्मा तं तं अत्थं विदहति पवत्तेति चेव पापेति च, तस्मा धम्मोति वुच्चति । पभेदतो पन यो कोचि फलनिब्बत्तको हेतु, अरियमग्गो, भासितं, कुसलं, अकुसलन्ति इमे पञ्च धम्मा धम्मो, तं धम्मं पच्चवेक्खन्तस्स तस्मिं धम्मे पभेदगतं जाणं धम्मपटिसम्भिदा । वुत्तम्पि चेतं —

“दुक्खे जाणं अत्थपटिसम्भिदा, दुक्खसमुदये जाणं धम्मपटिसम्भिदा, दुक्खनिरोधे जाणं अत्थपटिसम्भिदा, दुक्खनिरोधगामिनिया पटिपदाय जाणं धम्मपटिसम्भिदा”ति (विभ० ७१९) ।

अथ वा हेतुम्हि जाणं धम्मपटिसम्भिदा, हेतुफले जाणं अत्थपटिसम्भिदा । ये धम्मा जाता भूता सज्जाता निब्बत्ता अभिनिब्बत्ता पातुभूता, इमेसु धम्मेसु जाणं अत्थपटिसम्भिदा । यम्हा धम्मा ते धम्मा जाता भूता सज्जाता निब्बत्ता अभिनिब्बत्ता पातुभूता, तेसु धम्मेसु जाणं धम्मपटिसम्भिदा । जरामरणे जाणं अत्थपटिसम्भिदा, जरामरणसमुदये जाणं

धम्मपटिसम्भिदा । जरामरणनिरोधे जाणं अत्थपटिसम्भिदा, जरामरणनिरोधगामिनिया पटिपदाय जाणं धम्मपटिसम्भिदा । जातिया, भवे, उपादाने, तण्हाय, वेदनाय, फस्से, सळायतने, नामरूपे, विज्जाणे, सङ्खारेसु जाणं अत्थपटिसम्भिदा, सङ्खारसमुदये जाणं धम्मपटिसम्भिदा । सङ्खारनिरोधे जाणं अत्थपटिसम्भिदा, सङ्खारनिरोधगामिनिया पटिपदाय जाणं धम्मपटिसम्भिदा ।

“इध भिक्खु धम्मं जानाति — सुत्तं, गेय्यं...पे०... वेदल्लं । अयं वुच्चति धम्मपटिसम्भिदा । सो तस्स तस्सेव भासितस्स अत्थं जानाति — ‘अयं इमस्स भासितस्स अत्थो, अयं इमस्स भासितस्स अत्थो’ति, अयं वुच्चति अत्थपटिसम्भिदा (विभ० ७२४) ।

“कतमे धम्मा कुसला? यस्मिं समये कामावचरं कुसलं चित्तं उप्पन्नं होति सोमनस्ससहगतं जाणसम्पयुत्तं रूपारम्मणं वा...पे०... धम्मारम्मणं वा यं यं वा पनारब्भ, तस्मिं समये फस्सो होति...पे०... अविक्खेपो होति । इमे धम्मा कुसला । इमेसु धम्मेसु जाणं धम्मपटिसम्भिदा, तेसं विपाके जाणं अत्थपटिसम्भिदा”ति आदि वित्थारो (विभ० ७२५) ।

तस्मिं अत्थे च धम्मे च सभावनिरुत्ति अब्यभिचारवोहारो अभिलापो, तस्मिं सभावनिरुत्ताभिलापे मागधिकाय सब्बसत्तानं मूलभासाय “अयं सभावनिरुत्ति, अयं न सभावनिरुत्ती”ति पभेदगतं जाणं निरुत्तिपटिसम्भिदा । यथावुत्तेसु तेसु जाणेसु गोचरकिच्चादिवसेन वित्थारतो पवत्तं सब्बम्पि जाणमारम्मणं कत्वा पच्चवेक्खन्तस्स तस्मिं जाणे पभेदगतं जाणं पटिभानपटिसम्भिदा । इति इमानि चत्तारि पटिसम्भिदाजाणानि सयमेव भगवता अधिगतानि अत्थधम्मादिके तस्मिं तस्मिं अत्तनो विसये अविसंवादनवसेन अविपरीताकारप्पवत्तिया तथानि अवितथानि अनज्जथानि । एवम्पि भगवा तथानि आगतोति तथागतो ।

तथा यं किञ्चि जेय्यं नाम, सब्बं तं भगवता सब्बाकारेण जातं दिट्ठं अधिगतं अभिसम्बुद्धं । तथा हिस्स अभिज्जेय्या धम्मा अभिज्जेय्यतो बुद्धा, परिज्जेय्या धम्मा परिज्जेय्यतो बुद्धा, पहातब्बा धम्मा पहातब्बतो बुद्धा, सच्छिकातब्बा धम्मा सच्छिकातब्बतो बुद्धा, भावेतब्बा धम्मा भावेतब्बतो बुद्धा, यतो नं कोचि समणो वा ब्राह्मणो वा देवो वा मारो वा ब्रह्मा वा “इमे नाम ते धम्मा अनभिसम्बुद्धा”ति सह धम्मेन अनुयुज्जितुं समत्थो नत्थि ।

यं किञ्चि पहातब्बं नाम, सब्बं तं भगवता अनवसेसतो बोधिमूलेयेव पहीनं अनुप्पत्तिधम्मं, न तस्स पहानाय उत्तरि करणीयं अत्थि । तथा हिस्स लोभदोसमोहविपरीतमनसिकारअहिरिकानोत्तप्पथिनमिद्ध-
कोधूपनाहमक्खपलासइस्सामच्छरिय- मायासाठेय्यथम्भसारम्भमानातिमानमदपमादतिविधाकुसलमूलदुच्चरित-
विसमसज्जामलवितक्कपपज्जएसनातण्हाचतुब्धिधविपरियेसआसव-
गन्थओघयोगागतिपणुपादानपज्जाभिनन्दननीवरण- चेतोखिलचेतसोविनिबन्धविवादमूलसत्तानुसय-
अट्टमिच्छत्तनवआघातवत्थुतण्हामूलकदसअकुसल-
कम्मपथएकवीसतिअनेसनद्वासट्ठिदिट्ठिगतअट्टसततण्हाविचरितादिप्पभेदं दियट्ठिकिलेससहस्सं सह वासनाय पहीनं समुच्छिन्नं समूहतं, यतो नं कोचि समणो वा...पे०... ब्रह्मा वा “इमे नाम ते किलेसा अप्पहीना”ति सह धम्मेन अनुयुज्जितुं समत्थो नत्थि ।

ये चिमे भगवता कम्मविपाककिलेसूपवादआणावीतिककम्मपभेदा अन्तरायिका धम्मा वुत्ता, अलमेव ते एकन्तेन

अन्तरायाय, यतो नं कोचि समणो वा...पे... ब्रह्मा वा “नालं ते पटिसेवतो अन्तरायाया”ति सह धम्मेन अनुयुञ्जितुं समत्थो नत्थि ।

यो च भगवता निरवसेसवट्टदुक्खनिस्सरणाय सीलसमाधिपञ्चासङ्गहो सत्तकोट्टासिको सत्ततिसप्पभेदो अरियमग्गपुब्बङ्गमो अनुत्तरो नित्यानधम्मो देसितो, सो एकन्तेनेव नित्याति पटिपन्नस्स वट्टदुक्खतो, यतो नं कोचि समणो वा...पे... ब्रह्मा वा “नित्यानधम्मो तथा देसितो न नित्याती”ति सह धम्मेन अनुयुञ्जितुं समत्थो नत्थि । वुत्तज्हेतं — “सम्मासम्बुद्धस्स ते पटिजानतो इमे धम्मा अनभिसम्बुद्धा”ति (म० नि० १.१५०) वित्थारो । एवमेतानि अत्तनो जाणप्पहानदेसनाविसेसानं अवितथभावावबोधनतो अविपरीताकारप्पवत्तानि भगवतो चतुवेसारज्जजाणानि तथानि अवितथानि अनज्जथानि । एवम्पि भगवा तथानि आगतोति तथागतो ।

तथा निरयगति, तिरच्छानगति, पेतगति, मनुस्सगति, देवगतीति पञ्च गतियो । तासु सज्जीवादयो अट्ठ महानिरया, कुक्कुळादयो सोळस उस्सदनिरया, लोकन्तरिकनिरयो चाति सब्बेपिमे एकन्तदुक्खताय निरस्सादट्ठेन निरया च, सककम्मुना गन्तब्बतो गति चाति **निरयगति** । तिब्बन्धकारसीतनरकापि एतेस्वेव अन्तोगथा किमिकीटपटङ्गसरीसपपक्खिसोणसिङ्गालादयो तिरियं अञ्छितभावेन तिरच्छाना नाम । ते एव गतीति **तिरच्छानगति** । खुप्पिपासितपरदत्तूपजीविनिज्झामतण्हिकादयो दुक्खबहुलताय पकट्टसुखतो इता विगताति पेटा, ते एव गतीति **पेतगति** । कालकञ्चिकादिअसुरापि एतेस्वेव अन्तोगथा । परित्तदीपवासीहि सद्धिं जम्बुदीपादिचतुमहादीपवासिनो मनसो उस्सन्नताय मनुस्सा, ते एव गतीति **मनुस्सगति** । चातुमहाराजिकतो पट्टाय याव नेवसज्जानासज्जायतनूपगाति इमे छब्बीसति देवनिकाया दिब्बन्ति अत्तनो इद्धानुभावेन कीळन्ति जोतेन्ति चाति देवा, ते एव गतीति **देवगति** ।

ता पनेता गतियो यस्मा तंतंकम्मनिब्बत्तो उपपत्तिभवविसेसो, तस्मा अत्थतो विपाकक्खन्धा कटत्ता च रूपं । तत्थ “अयं नाम गति नाम इमिना कम्मुना जायति, तस्स कम्मस्स पच्चयविसेसेहि एवं विभागभिन्नत्ता विसुं एते सत्तनिकाया एवं विभागभिन्ना”ति यथासकंहेतुफलविभागपरिच्छिन्दनवसेन ठानसो हेतुसो भगवतो जाणं पवत्तति । तेनाह भगवा —

“पञ्च खो इमा, सारिपुत्त, गतियो । कतमा पञ्च? निरयो, तिरच्छानयोनि, पत्तिविसयो, मनुस्सा, देवा । निरयज्चाहं, सारिपुत्त, पजानामि, निरयगामिञ्च मग्गं, निरयगामिनिञ्च पटिपदं; यथा पटिपन्नो च कायस्स भेदा परं मरणा अपायं दुग्गतिं विनिपातं निरयं उपपज्जति, तज्च पजानामी”तिआदि (म० नि० १.१५३) ।

तानि पनेतानि भगवतो जाणानि तस्मिं तस्मिं विसये अविपरीताकारप्पवत्तिया अविसंवादनतो तथानि अवितथानि अनज्जथानि । एवम्पि भगवा तथानि आगतोति तथागतो ।

तथा यं सत्तानं सद्धादियोगविकलभावावबोधेन अप्परजक्खमहारजक्खतादिविसेसविभावनं पञ्चासाय आकारेहि पवत्तं भगवतो इन्द्रियपरोपरियत्तजाणं । वुत्तज्हेतं — “सद्धो पुग्गलो अप्परजक्खो, अस्सद्धो पुग्गलो महारजक्खो”ति (पटि० म० १.१११) वित्थारो ।

यज्च “अयं पुग्गलो अप्परजक्खो, अयं सस्सतदिट्ठिको, अयं उच्छेददिट्ठिको, अयं अनुलोमिकायं खन्तियं ठितो, अयं यथाभूतजाणे ठितो, अयं कामासयो, न नेक्खम्मादिआसयो, अयं नेक्खम्मासयो, न कामादिआसयो”तिआदिना “इमस्स कामरागो अतिविय थामगतो, न पटिघादिको, इमस्स पटिघो अतिविय थामगतो, न कामरागादिको”तिआदिना “इमस्स

पुञ्जाभिसङ्खारो अधिको, न अपुञ्जाभिसङ्खारो न आनेज्जाभिसङ्खारो, इमस्स अपुञ्जाभिसङ्खारो अधिको, न पुञ्जाभिसङ्खारो न आनेज्जाभिसङ्खारो, इमस्स आनेज्जाभिसङ्खारो अधिको, न पुञ्जाभिसङ्खारो न अपुञ्जाभिसङ्खारो । इमस्स कायसुचरितं अधिकं, इमस्स वचीसुचरितं, इमस्स मनोसुचरितं । अयं हीनाधिमुत्तिको, अयं पणीताधिमुत्तिको, अयं कम्मावरणेन समन्नागतो, अयं किलेसावरणेन समन्नागतो, अयं विपाकावरणेन समन्नागतो, अयं न कम्मावरणेन समन्नागतो, न किलेसावरणेन, न विपाकावरणेन समन्नागतो”ति आदिना च सत्तानं आसयादीनं यथाभूतं विभावनाकारप्पवत्तं भगवतो आसयानुसयजाणं । यं सन्धाय वुत्तं —

“इध तथागतो सत्तानं आसयं जानाति, अनुसयं जानाति, चरितं जानाति, अधिमुत्तिं जानाति, भब्बाभब्बे सत्ते जानाती”ति आदि (पटि० म० १.११३) ।

यच्च उपरिमहेट्ठिमपुरत्थिमपच्छिमकायेहि दक्खिणवामअक्खिक्खणसोतनासिकासोतअंसकूटपस्सहत्थपादेहि अङ्गुलङ्गुलन्तरेहि लोमलोमकूपेहि च अग्गिक्खन्धूदकधारापवत्तनं अनज्जसाधारणं विविधविकुब्बनिद्धिनिम्मापनकं भगवतो यमकपाटिहारियजाणं । यं सन्धाय वुत्तं —

“इध तथागतो यमकपाटिहारियं करोति असाधारणं सावकेहि । उपरिमकायतो अग्गिक्खन्धो पवत्तति, हेट्ठिमकायतो उदकधारा पवत्तति । हेट्ठिमकायतो अग्गिक्खन्धो पवत्तति, उपरिमकायतो उदकधारा पवत्तती”ति आदि (पटि० म० १.११६) ।

यच्च रागादीहि जातिआदीहि च अनेकेहि दुक्खधम्महेहि उपदुत्तं सत्तनिकायं ततो नीहरितुकामतावसेन नानानयेहि पवत्तस्स भगवतो महाकरुणोक्कमनस्स पच्चयभूतं महाकरुणासमापत्तिजाणं । यथाह —

“कतमं तथागतस्स महाकरुणासमापत्तिजाणं? बहुकेहि आकारेहि पस्सन्तानं बुद्धानं भगवन्तानं सत्तेसु महाकरुणा ओक्कमति, आदित्तो लोकसन्निवासोति पस्सन्तानं बुद्धानं भगवन्तानं सत्तेसु महाकरुणा ओक्कमती”ति । —

आदिना (पटि० म० १.११७) एकूननवुत्तिया आकारेहि विभजनं कतं ।

यं पन यावता धम्मधातु, यत्तकं जातब्बं सङ्खत्तासङ्खत्तादि, तस्स सब्बस्स परोपदेसेन विना सब्बाकारतो पटिजाननसमत्थं आकङ्खामत्तप्पटिबद्धवुत्ति अनज्जसाधारणं भगवतो जाणं सब्बथा अनवसेससङ्खत्तासङ्खत्तसम्मृतिसच्चावबोधतो सब्बज्जुतज्जाणं, तत्थावरणाभावतोव निस्सङ्गप्पवत्तिं उपादाय अनावरणजाणन्ति च वुच्चति । अयमेत्थ सङ्खेपो, वित्थारो पन परतो आवि भविस्सति ।

एवमेतानि भगवतो छ असाधारणजाणानि अविपरीताकारप्पवत्तिया यथासकं विसयस्स अविसंवादनतो तथानि अवितथानि अनज्जथानि । एवम्पि भगवा तथानि आगतोति तथागतो ।

तथा “सत्तिमे, भिक्खवे, बोज्झङ्गा — सत्तिसम्बोज्झङ्गो, धम्मविचयसम्बोज्झङ्गो, वीरियसम्बोज्झङ्गो, पीतिसम्बोज्झङ्गो, पस्सद्विसम्बोज्झङ्गो, समाधिसम्बोज्झङ्गो, उपेक्खासम्बोज्झङ्गो”ति (पटि० म० २.१७; सं० नि० ५.१८५) एवं सरूपतो यायं लोकुत्तरमगगक्खणे उपपज्जमाना

लीनुद्धच्चपटिद्वानायूहनकामसुखत्तकिलमथानुयोगउच्छेदसस्सताभिनिवेसादीनं अनेकेसं उपद्वानं पटिपक्खभूता सतिआदिभेदा धम्मसामग्गी, याय अरियसावको बुज्झति, किलेसनिद्वाय उट्ठति, चत्तारि वा सच्चानि पटिविज्झति, निब्बानमेव वा सच्छिकरोति, सा धम्मसामग्गी “बोधी”ति वुच्चति, तस्सा बोधिया अङ्गाति बोज्झङ्गा । अरियसावको वा यथावुत्ताय धम्मसामगिया बुज्झतीति कत्वा “बोधी”ति वुच्चति । तस्स बोधिस्स अङ्गाति बोज्झङ्गाति एवं **सामञ्जलक्खणतो**, उपट्टानलक्खणो सतिसम्बोज्झङ्गो, पविचयलक्खणो धम्मविचयसम्बोज्झङ्गो, पग्गहलक्खणो वीरियसम्बोज्झङ्गो, फरणलक्खणो पीतिसम्बोज्झङ्गो, उपसमलक्खणो पस्सद्विसम्बोज्झङ्गो, अविकखेपलक्खणो समाधिसम्बोज्झङ्गो पटिसङ्खानलक्खणो उपेक्खासम्बोज्झङ्गोति एवं **विसेसलक्खणतो** ।

“तत्थ कतमो सतिसम्बोज्झङ्गो? इध भिक्खु सतिमा होति परमेन सतिनेपक्केन समन्नागतो, चिरकतम्पि चिरभासितम्पि सरिता होति अनुस्सरिता”तिआदिना (विभ० ४६७) सत्तन्नं बोज्झङ्गानं अञ्जमञ्जूपकारवसेन **एकक्खणे पवत्तिदस्सनतो** । “तत्थ कतमो सतिसम्बोज्झङ्गो? अत्थि अज्झत्तं धम्मेसु सति, अत्थि बहिद्धा धम्मेसु सती”तिआदिना (विभ० ४६९) तेसं **विसयविभावनापवत्तिदस्सनतो** । “तत्थ कतमो सतिसम्बोज्झङ्गो? इध, भिक्खवे, भिक्खु सतिसम्बोज्झङ्गं भावेति विवेकनिस्सितं, विरागनिस्सितं, निरोधनिस्सितं, वोसग्गपरिणामि”न्तिआदिना (विभ० ४७१) **भावनाविधिदस्सनतो** । “तत्थ कतमे सत्त बोज्झङ्गा? इध भिक्खु यस्मिं समये लोकुत्तरं ज्ञानं भावेति...पे०... तस्मिं समये सत्त बोज्झङ्गा होन्ति, सतिसम्बोज्झङ्गो...पे०... उपेक्खासम्बोज्झङ्गो । तत्थ कतमो सतिसम्बोज्झङ्गो? या सति अनुस्सती”तिआदिना (विभ० ४७८) **छनवुतिया नयसहस्सविभागेहीति** एवं नानाकारतो पवत्तानि भगवतो बोज्झङ्गविभावनजाणानि तस्स तस्स अत्थस्स अविसंवादनतो तथानि अवितथानि अनञ्जथानि । एवम्पि भगवा तथानि आगतोति तथागतो ।

तथा “तत्थ कतमं दुक्खनिरोधगामिनी पटिपदा अरियसच्चं? अयमेव अरियो अट्ठङ्गिको मग्गो, सेय्यथिदं — सम्मादिट्ठि...पे०... सम्मासमाधी”ति (विभ० २०५) एवं **सरूपतो** । सब्बकिलेसेहि आरकत्ता अरियभावकरत्ता अरियफलपटिलाभकरत्ता च अरियो । अरियानं अट्ठविधत्ता निब्बानाधिगमाय एकन्तकारणत्ता च अट्ठङ्गिको । किलेसे मारेन्तो गच्छति, अत्थिकेहि मग्गीयति, सयं वा निब्बानं मग्गयतीति मग्गोति एवं **सामञ्जलक्खणतो** । “सम्मादस्सनलक्खणा सम्मादिट्ठि, सम्माअभिनिरोपनलक्खणो सम्मासङ्कप्पो, सम्मापरिग्गहणलक्खणा सम्मावाचा, सम्मासमुट्ठापनलक्खणो सम्माकम्मन्तो, सम्मावोदानलक्खणो सम्माआजीवो, सम्मापग्गहलक्खणो सम्मावायामो, सम्माउपट्टानलक्खणा सम्मासति, सम्माअविकखेपलक्खणो सम्मासमाधी”ति एवं **विसेसलक्खणतो** । सम्मादिट्ठि ताव अज्जेहिपि अत्तनो पच्चनीककिलेसेहि सद्धिं मिच्छादिट्ठिं पजहति, निब्बानं आरम्मणं करोति, तप्पटिच्छादकमोहविधमनेन असम्मोहतो सम्पयुत्तधम्मे च पस्सति, तथा सम्मासङ्कप्पादयोपि मिच्छासङ्कप्पादीनि पजहन्ति, निरोधञ्च आरम्मणं करोन्ति, सहजातधम्मानं सम्माअभिनिरोपनपरिग्गहणसमुट्ठापनवोदानपग्गहउपट्टानसमादहनानि च करोन्तीति एवं **किच्चविभागतो** । सम्मादिट्ठि पुब्बभागे नानक्खणा विसुं दुक्खादिआरम्मणा हुत्वा मग्गकाले एकक्खणा निब्बानमेव आरम्मणं कत्वा किच्चतो “दुक्खे जाण”न्तिआदीनि चत्तारि नामानि लभति । सम्मासङ्कप्पादयोपि पुब्बभागे नानक्खणा नानारम्मणा, मग्गकाले एकक्खणा एकारम्मणा, तेसु सम्मासङ्कप्पो किच्चतो “नेक्खम्मसङ्कप्पो”तिआदीनि तीणि नामानि लभति । सम्मावाचादयो तयो पुब्बभागे “मुसावादा वेरमणी”तिआदिविभागा विरतियोपि चेतनायोपि हुत्वा मग्गक्खणे विरतियोव, सम्मावायामसतियो किच्चतो सम्मप्पधानसतिपट्टानवसेन चत्तारि नामानि लभन्ति । सम्मासमाधि पन मग्गक्खणेपि पठमज्झानादिवसेन नाना एवाति एवं पुब्बभागापरभागेसु **पवत्तिविभागतो** । “इध, भिक्खवे, भिक्खु सम्मादिट्ठिं भावेति विवेकनिस्सित”न्तिआदिना (विभ० ४८९) **भावनाविधितो** । “तत्थ कतमो अट्ठङ्गिको मग्गो? इध,

भिक्षु, यस्मिं समये लोकोत्तरं ज्ञानं भावेति...पे०... दुःखपटिपदं दन्धाभिञ्जं, तस्मिं समये अट्टङ्गिको मग्गो होति — सम्मादिट्ठि सम्मासङ्कप्पो’तिआदिना (विभ० ४९९) चतुरासीतिया नयसहस्सविभागेहीति एवं अनेकाकारतो पवत्तानि भगवतो अरियमग्गविभावनजाणानि अत्थस्स अविसंवादनतो सब्बानिपि तथानि अवितथानि अनञ्जथानि एवम्पि भगवा तथानि आगतोति तथागतो ।

तथा पठमज्झानसमापत्तिया च निरोधसमापत्तीति एतासु अनुपटिपाटिया विहरितब्बट्टेन समापज्जितब्बट्टेन च अनुपुब्बविहारसमापत्तीसु सम्पादनपच्चवेक्खणादिवसेन यथारहं सम्पयोगवसेन च पवत्तानि भगवतो जाणानि तदत्थसिद्धिया तथानि अवितथानि अनञ्जथानि । एवम्पि भगवा तथानि आगतोति तथागतो । तथा “इदं इमस्स ठानं, इदं अट्टान”न्ति अविपरीतं तस्स तस्स फलस्स कारणाकारणजाननं, तेसं तेसं सत्तानं अतीतादिभेदभिन्नस्स कम्मसमादानस्स अनवसेसतो यथाभूतं विपाकन्तरजाननं, आयूहनक्खणेयेव तस्स तस्स सत्तस्स “अयं निरयगामिनी पटिपदा...पे०... अयं निब्बानगामिनी पटिपदा”ति याथावतो सासवानासवकम्मविभागजाननं, खन्धायतनानं उपादिन्नानुपादिन्नादिअनेकसभावं नानासभावञ्च तस्स लोकस्स “इमाय नाम धातुया उस्सन्नत्ता इमस्मिं धम्मप्पबन्धे अयं विसेसो जायती”तिआदिना नयेन यथाभूतं धातुनानत्तजाननं, सद्भादिइन्द्रियानं तिक्खमुदुताजाननं संकिलेसादीहि सद्धिं ज्ञानविमोक्खादिजाननं, सत्तानं अपरिमाणासु जातीसु तप्पटिबन्धेन सद्धिं अनवसेसतो पुब्बेनिवुत्थक्खन्धसन्ततिजाननं हीनादिविभागेहि सद्धिं चुत्तिपटिसन्धिजाननं, “इदं दुःख”न्तिआदिना हेट्ठा वुत्तनयेनेव चतुसच्चजाननन्ति इमानि भगवतो दसबलजाणानि अविरज्झित्वा यथासकं विसयावगाहनतो यथाधिप्पेतत्थसाधनतो च यथाभूतवुत्तिया तथानि अवितथानि अनञ्जथानि । वुत्तहेतं —

“इध तथागतो ठानञ्च ठानतो अट्टानञ्च अट्टानतो यथाभूतं पजानाती”तिआदि (विभ० ८०९; अ० नि० १०.२१) ।

एवम्पि भगवा तथानि आगतोति तथागतो ।

यथा चेतेसम्पि जाणानं वसेन, एवं यथावुत्तानं सतिपट्टानसम्मप्पधानादिविभावनजाणादिअनन्तापरिमेय्यभेदानं अनञ्जसाधारणानं पज्जाविसेसानं वसेन भगवा तथानि जाणानि आगतो अधिगतोति तथागतो, एवम्पि तथानि आगतोति तथागतो ।

कथं तथा गतोति तथागतो? या ता भगवतो

अभिजातिअभिसम्बोधिधम्मविनयपज्जापनअनुपादिसेसनिब्बानधातुयो, ता तथा । किं वुत्तं होति? यदत्थं ता लोकनाथेन अभिपत्थिता पवत्तिता च, तदत्थस्स एकन्तसिद्धिया अविसंवादनतो अविपरीतत्थवुत्तिया तथा अवितथा अनञ्जथा । तथा हि अयं भगवा बोधिसत्तभूतो समतिंसपारमिपरिपूरणादिकं वुत्तप्पकारं सब्बबुद्धत्तहेतुं सम्पादेत्वा तुसितपुरे ठितो बुद्धकोलाहलं सुत्वा दससहस्सचक्कवाळदेवताहि एकतो सन्निपतिताहि उपसङ्कमित्वा —

“कालो खो ते महावीर, उप्पज्ज मातुकुच्छियं ।

सदेवकं तारयन्तो, बुद्धस्सु अमतं पद”न्ति ॥ (बु० वं० १.६७) —

आयाचितो उप्पन्नपुब्बनिमित्तो पञ्च महाविलोकनानि विलोकेत्वा “इदानि अहं मनुस्सयोनियं उप्पज्जित्वा

अभिसम्बुद्धिस्सामी'ति आसाळ्हपुण्णमायं सक्कराजकुले महामायाय देविया कुच्छियं पटिसन्धिं गहेत्वा दस मासे देवमनुस्सेहि महता परिहारेन परिहरियमानो विसाखपुण्णमायं पच्चूससमये अभिजातिं पापुणि ।

अभिजातिक्खणे पनस्स पटिसन्धिग्गहणक्खणे विय द्वत्तिस पुब्बनिमित्तानि पातुरहेसुं, अयं दससहस्सिलोकधातु संकम्पि सम्पकम्पि सम्पवेधि, दससु चक्कवाळसहस्सेसु अपरिमाणो ओभासो फरि, तस्स, तं सिरिं दट्टुकामा विय अन्धा चक्खूनि पटिलभिसु, बधिरा सद्धं सुणिंसु, मूगा समालपिंसु, खुज्जा उजुगत्ता अहेसुं, पङ्गुला पदसा गमनं पटिलभिसु, बन्धनगता सब्बसत्ता अन्दुबन्धनादीहि मुच्चिंसु, सब्बनरकेसु अग्गि निब्बायि, पेत्तिविसये खुप्पिपासा वूपसमि, तिरच्छानानं भयं नाहोसि, सब्बसत्तानं रोगो वूपसमि, सब्बसत्ता पियंवदा अहेसुं, मधुरेनाकारेन अस्सा हसिंसु, वारणा गज्जिंसु, सब्बतूरियानि सकसकनिन्नादं मुच्चिंसु, अघट्टितानि एव मनुस्सानं हत्थूपगादीनि आभरणानि मधुरेनाकारेन सद्धं मुच्चिंसु, सब्बदिसा विप्पसन्ना अहेसुं, सत्तानं सुखं उप्पादयमानो मुदुसीतलवातो वायि, अकालमेघो वस्सि, पथवितोपि उदकं उब्भिज्जित्वा विस्सन्दि, पक्खिनो आकासगमनं विजहिंसु, नदियो असन्दमाना अट्ठंसु, महासमुद्धे मधुरं उदकं अहोसि, उपक्किलेसविनिमुत्ते सूरिये दिप्पमाने एव आकासगता सब्बा जोतियो जोतिंसु, ठपेत्वा अरूपावचरे देवे अवसेसा सब्बे देवा सब्बे च नेरयिका दिस्समानरूपा अहेसुं, तरुकुट्टकवाटसेलादयो अनावरणभूता अहेसुं, सत्तानं चुतूपपाता नाहेसुं, सब्बं अनिट्ठगन्धं अभिभवित्वा दिब्बगन्धो पवायि, सब्बे फलूपगा रुक्खा फलधरा सम्पज्जिंसु, महासमुद्धो सब्बत्थकमेव पच्चवण्णेहि पदुमेहि सज्जन्नतलो अहोसि, थलजजलजादीनि सब्बपुष्फानि पुष्फिंसु, रुक्खानं खन्धेसु खन्धपदुमानि, साखासु साखापदुमानि, लतासु लतापदुमानि, पुष्फिंसु, महीतलसिलातलानि भिन्दित्वा उपरूपरि सत्त सत्त हुत्वा दण्डपदुमानि नाम निक्खमिंसु, आकासे ओलम्बकपदुमानि निब्बत्तिंसु, समन्ततो पुष्फवस्सं वस्सि आकासे दिब्बतूरियानि वज्जिंसु, सकलदससहस्सिलोकधातु वट्टेत्वा विस्सट्ठमालागुळं विय, उप्पीळेत्वा पवत्तमालाकलापो विय, अलङ्कतपटियत्तं मालासनं विय च एकमालामालिनी विप्फुरन्तवाळबीजनी पुष्फधूपगन्धपरिवासिता परमसोभग्गप्पत्ता अहोसि, तानि च पुब्बनिमित्तानि उपरि अधिगतानं अनेकेसं विसेसाधिगमानं निमित्तभूतानि एव अहेसुं । एवं अनेकच्छरियपातुभावा अयं अभिजाति यदत्थं तेन अभिपत्थिता, तस्सा अभिसम्बोधिया एकन्तसिद्धिया तथाव अहोसि अवितथा अनज्जथा ।

तथा ये बुद्धवेनेय्या बोधनेय्यबन्धवा, ते सब्बेपि अनवसेसतो सयमेव भगवता विनीता । ये च सावकवेनेय्या धम्मवेनेय्या च, तेपि सावकादीहि विनीता विनयं गच्छन्ति गमिस्सन्ति चाति यदत्थं भगवता अभिसम्बोधि अभिपत्थिता, तदत्थस्स एकन्तसिद्धिया अभिसम्बोधि तथा अवितथा अनज्जथा ।

अपिच यस्स यस्स जेय्यधम्मस्स यो यो सभावो बुज्झितब्बो, सो सो हत्थतले ठपितआमलकं विय आवज्जनमत्तपटिबद्धेन अत्तनो जाणेन अविपरीतं अनवसेसतो भगवता अभिसम्बुद्धोति एवम्पि अभिसम्बोधि तथा अवितथा अनज्जथा ।

तथा तेसं तेसं धम्मनं तथा तथा देसेतब्बप्पकारं, तेसं तेसज्ज सत्तानं आसयानुसयचरियाधिमुत्तिं सम्मदेव ओलोकेत्वा धम्मतं अविजहन्तेनेव पज्जत्तिनयं वोहारमत्तं अनतिधावन्तेनेव च धम्मतं विभावेन्तेन यथापराधं यथाज्झासयं यथाधम्मज्ज अनुसासन्तेन भगवता वेनेय्या विनीता अरियभूमिं सम्पापिताति धम्मविनयपज्जापनापिस्स तदत्थसिद्धिया यथाभूतवृत्तिया च तथा अवितथा अनज्जथा ।

तथा या सा भगवता अनुप्पत्ता पथवियादिफस्सवेदनादिरूपारूपसभावनिमुत्ता लुज्जनपलुज्जनभावाभावतो लोकसभावातीता तमसा विसंसट्ठत्ता केनचि अनोभासनीया लोकसभावाभावतो एव गतिआदिभावरहिता अप्पतिट्ठा

अनारम्भणा अमतमहानिब्बानधातु खन्धसङ्घातानं उपादीनं लेसमत्तस्सापि अभावतो “अनुपादिसेसा”तिपि वुच्चति ।
यं सन्धाय वृत्तं —

“अत्थि, भिक्खवे, तदायतनं, यत्थ नेव पथवी न आपो न तेजो न वायो न आकासानञ्चायतनं न
विज्जाणञ्चायतनं न आकिञ्चञ्चायतनं न नेवसञ्जानासञ्चायतनं नायं लोको न परो लोको न च उभो
चन्दिमसूरिया । तमहं, भिक्खवे, नेव आगतिं वदामि न गतिं न ठितिं न चुतिं न उपपत्तिं; अप्पतिट्ठं अप्पवत्तं
अनारम्भणमेवेतं एसेवन्तो दुक्खस्सा”ति (उदा० ७१) ।

सा सब्बेसम्पि उपादानक्खन्धानं अत्थङ्गमो सब्बसङ्खारानं समथो, सब्बूपधीनं पटिनिस्सग्गो, सब्बदुक्खानं वूपसमो,
सब्बालयानं समुग्घातो, सब्बवट्ठानं उपच्छेदो, अच्चन्तसन्तिलक्खणाति यथावुत्तसभावस्स कदाचिपि अविस्संवादनतो तथा
अवितथा अनञ्जथा । एवमेता अभिजातिआदिका तथा गतो उपगतो अधिगतो पटिपन्नो पत्तोति तथागतो । एवं भगवा तथा
गतोति तथागतो ।

कथं तथाविधोति तथागतो? यथाविधा पुरिमका सम्मासम्बुद्धा, अयम्पि भगवा तथाविधो । किं वृत्तं होति?
यथाविधा ते भगवन्तो मग्गसीलेन, फलसीलेन, सब्बेनपि लोकियलोकुत्तरसीलेन, मग्गसमाधिना, फलसमाधिना, सब्बेनपि
लोकियलोकुत्तरसमाधिना, मग्गपञ्चाय, फलपञ्चाय, सब्बायपि लोकियलोकुत्तरपञ्चाय, देवसिकं वळ्ळितब्बेहि
चतुवीसतिकोटिसतसहस्ससमापत्तिविहारेहि, तदङ्गविमुत्तिया विक्खम्भनविमुत्तिया समुच्छेदविमुत्तिया
पटिप्पस्सद्धिविमुत्तिया निस्सरणविमुत्तियाति सङ्खेपतो, वित्थारतो पन अनन्तापरिमाणभेदेहि अचिन्तेय्यानुभावेहि
सकलसब्बज्जुगुणेहि, अयम्पि अम्हाकं भगवा तथाविधो । सब्बेसज्झि सम्मासम्बुद्धानं आयुवेमत्तं, सरीरप्पमाणवेमत्तं,
कुलवेमत्तं, दुक्करचरियावेमत्तं, रस्मिवेमत्तन्ति इमेहि पञ्चहि वेमत्तेहि सिया वेमत्तं, न पन सीलविसुद्धिआदीसु विसुद्धीसु
समथविपस्सनापटिपत्तियं अत्तना पटिविद्भगुणेषु च किञ्चि नानाकरणं अत्थि, अथ खो मज्झे भिन्नसुवण्णं विय
अज्जमज्जं निब्बिसेसा ते बुद्धा भगवन्तो । तस्मा यथाविधा पुरिमका सम्मासम्बुद्धा, अयम्पि भगवा तथाविधो । एवं
तथाविधोति तथागतो । विधत्थो चेत्थ गतसद्दो । तथा हि लोकिया विधयुत्तगतसद्दे पकारत्थे वदन्ति ।

कथं तथापवत्तिकोति तथागतो? अनञ्जसाधारणेन इद्धानुभावेन समन्नागतत्ता अत्थपटिसम्भिदादीनं
उक्कंसपारमिप्पत्तिया अनावरणजाणपटिलाभेन च भगवतो कायप्पवत्तियादीनं कत्थचि पटिघाताभावतो यथारुचि तथा गतं
गति गमनं कायवचीचित्तप्पवत्ति एतस्साति तथागतो । एवं तथापवत्तिकोति तथागतो ।

कथं तथेहि अगतोति तथागतो? बोधिसम्भारसम्भरणे तप्पटिपक्खप्पवत्तिसङ्घातं नत्थि एतस्स गतन्ति अगतो । सो
पनस्स अगतभावो मच्छेरदानपारमिआदीसु अविपरीतं आदीनवानिसंसपच्चवेक्खणादिनयप्पवत्तेहि जाणेहीति तथेहि
जाणेहि अगतोति तथागतो ।

अथ वा किलेसाभिसङ्खारप्पवत्तिसङ्घातं खन्धप्पवत्तिसङ्घातमेव वा पञ्चसुपि गतीसु गतं गमनं एतस्स नत्थीति
अगतो । सउपादिसेसअनुपादिसेसनिब्बानप्पत्तिया स्वायमस्स अगतभावो तथेहि अरियमग्गजाणेहीति एवम्पि भगवा तथेहि
आगतोति तथागतो ।

कथं तथागतभावेन तथागतो? तथागतभावेनाति च तथागतस्स सब्भावेन, अत्थितायाति अत्थो । को पनेस

तथागतो, यस्स अत्थिताय भगवा तथागतोति वुच्चतीति? सद्धम्मो । सद्धम्मो हि अरियमग्गो ताव यथा युगनद्धसमथविपस्सनाबलेन अनवसेसकिलेसपक्खं समूहनन्तेन समुच्छेदप्पहानवसेन गन्तब्बं, तथा गतो । फलधम्मो यथा अत्तनो मग्गानुरूपं पटिप्पस्सद्धिप्पहानवसेन गन्तब्बं, तथा गतो पवत्तो । निब्बानधम्मो पन यथा गतो पञ्जाय पटिविद्धो सकलवट्टदुक्खवूपसमाय सम्पज्जति, बुद्धादीहि तथा गतो सच्छिकतोति तथागतो । परियत्तिधम्मोपि यथा पुरिमबुद्धेहि सुत्तगेय्यादिवसेन पवत्तिआदिप्पकासनवसेन च वेनेय्यानं आसयादिअनुरूपं पवत्तितो, अम्हाकम्पि भगवता तथा गतो गदितो पवत्तितोति वा तथागतो । यथा भगवता देसितो, तथा भगवतो सावकेहि गतो अवगतोति तथागतो । एवं सब्बोपि सद्धम्मो तथागतो । तेनाह सक्को देवानमिन्दो “तथागतं देवमनुस्सपूजितं, धम्मं नमस्साम सुवत्थि होतू”ति (खु० पा० ६.१७; सु० नि० २४०) । स्वास्स अत्थीति भगवा तथागतो ।

यथा च धम्मो, एवं अरियसङ्घोपि, यथा अत्तहिताय परहिताय च पटिपन्नेहि सुविसुद्धं पुब्बभागसमथविपस्सनापटिपदं पुरक्खत्वा तेन तेन मग्गेन गन्तब्बं, तं तं तथा गतोति तथागतो । यथा वा भगवता सच्चपटिच्चसमुप्पादादिनयो देसितो, तथा च बुद्धत्ता तथा गदनतो च तथागतो । तेनाह सक्को देवराजा — “तथागतं देवमनुस्सपूजितं, सङ्गं नमस्साम सुवत्थि होतू”ति (खु० पा० ६.१८; सु० नि० २४१), स्वास्स सावकभूतो अत्थीति भगवा तथागतो । एवं तथागतभावेन तथागतो ।

इदम्पि तथागतस्स तथागतभावदीपने मुखमत्तकमेव, सब्बाकारेण पन तथागतोव तथागतस्स तथागतभावं वण्णेत्य । इदञ्चि तथागतपदं महत्थं, महागतिकं, महाविसयं, तस्स अप्पमादपदस्स विय तेषिटकम्पि बुद्धवचनं युत्तितो अत्थभावेन आहरन्तो “अतित्थेन धम्मकथिको पक्खन्दो”ति न वत्तब्बोति ।

तत्थेतं वुच्चति —

“यथेव लोके पुरिमा महेसिनो,
सब्बज्जुभावं मुनयो इधागता ।
तथा अयं सक्कमुनीपि आगतो,
तथागतो वुच्चति तेन चक्खुमा ॥

“पहाय कामादिमले असेसतो,
समाधिजाणेहि यथा गता जिना ।
पुरातना सक्कमुनी जुतिन्धरो,
तथा गतो तेन तथागतो मतो ॥

“तथज्ज धातायतनादिलक्खणं,
सभावसामज्जविभागभेदतो ।
सयम्भुजाणेन जिनोयमागतो,
तथागतो वुच्चति सक्कपुङ्गवो ॥

“तथानि सच्चानि समन्तचक्खुना,
तथा इदप्पच्चयता च सब्बसो ।

अनञ्जनेय्या नयतो विभाविता,
तथा गतो तेन जिनो तथागतो ॥

“अनेकभेदासुपि लोकधातुसु,
जिनस्स रूपायतनादिगोचरे ।
विचित्तभेदे तथमेव दस्सनं,
तथागतो तेन समन्तलोचनो ॥

“यतो च धम्मं तथमेव भासति,
करोति वाचायनुरूपमत्तनो ।
गुणेहि लोकं अभिभुयिरीयति,
तथागतो तेनपि लोकनायको ॥

“तथा परिज्जाय तथाय सब्बसो,
अवेदि लोकं पभवं अतिक्कमि ।
गतो च पच्चक्खकिरियाय निब्बुतिं,
अरियमग्गञ्च गतो तथागतो ॥

“तथा पटिज्जाय तथाय सब्बसो,
हिताय लोकस्स यतोयमागतो ।
तथाय नाथो करुणाय सब्बदा,
गतो च तेनापि जिनो तथागतो ॥

“तथानि जाणानि यतोयमागतो,
यथासभावं विसयावबोधतो ।
तथाभिजातिप्पभुती तथागतो,
तदत्थसम्पादनतो तथागतो ॥

“यथाविधा ते पुरिमा महेसिनो,
तथाविधोयम्पि तथा यथारुचि ।
पवत्तवाचा तनुचित्तभावतो,
तथागतो वुच्चति अग्गपुग्गलो ॥

“सम्बोधिसम्भारविपक्खतो पुरे,
गतं न संसारगतम्पि तस्स वा ।
न चत्थि नाथस्स भवन्तदस्सिनो,
तथेहि तस्मा अगतो तथागतो ॥

“तथागतो धम्मवरो महेसिना,
यथा पहातब्बमलं पहीयति ।
तथागतो अरियगणो विनायको,
तथागतो तेन समङ्गिभावतो”ति ॥

अरहन्तं सम्मासम्बुद्धन्ति एत्थ अरहाति पदस्स अत्थो हेट्ठा वुत्तोयेव । सम्मा सामञ्च सब्बधम्मानं बुद्धत्ता सम्मासम्बुद्धं । यंकिञ्चि जेय्यं नाम, तस्स सब्बस्सपि सब्बाकारतो अविपरीततो सयमेव अभिसम्बुद्धत्ताति वुत्तं होति । इमिनास्स परोपदेसरहितस्स सब्बाकारेण सब्बधम्मावबोधनसमत्थस्स आकङ्खापटिबद्धवुत्तिनो अनावरणजाणसङ्घातस्स सब्बञ्जुतञ्जाणस्स अधिगमो दस्सितो ।

ननु च सब्बञ्जुतञ्जाणतो अञ्जं अनावरणं, अञ्जथा छ असाधारणानि जाणानि बुद्धजाणानीति वचनं विरुद्धेय्याति? न विरुद्धति, विसयप्पवत्तिभेदवसेन अञ्जेहि असाधारणभावदस्सनत्थं एकस्सेव जाणस्स द्विधा वुत्तता । एकमेव हि तं जाणं अनवसेससङ्घातासङ्घातसम्मुतिधम्मविसयताय सब्बञ्जुतञ्जाणं, तत्थ च आवरणाभावतो निस्सङ्गचारमुपादाय अनावरणजाणन्ति वुत्तं । यथाह पटिसम्भिदायं —

“सब्बं सङ्घातासङ्घातं अनवसेसं जानातीति सब्बञ्जुतञ्जाणं । तत्थ आवरणं नत्थीति
अनावरणजाण”न्तिआदि (पटि० म० १.११९) ।

तस्मा नत्थि नेसं अत्थतो भेदो, एकन्तेनेवेतं एवमिच्छितब्बं । अञ्जथा सब्बञ्जुतानावरणजाणानं साधारणता असब्बधम्मरम्मणता च आपज्जेय्य । न हि भगवतो जाणस्स अणुमत्तमि आवरणं अत्थि, अनावरणजाणस्स च असब्बधम्मरम्मणभावे यत्थ तं न पवत्तति तत्थावरणसम्भावतो अनावरणभावोयेव न सिया । अथ वा पन होतु अञ्जमेव अनावरणं सब्बञ्जुतञ्जाणतो, इध पन सब्बत्थ अप्पटिहतवुत्तिताय अनावरणजाणन्ति सब्बञ्जुतञ्जाणमेव अधिप्पेतं, तस्सेवाधिगमेन भगवा सब्बञ्जू सब्बविदू सम्मासम्बुद्धोति वुच्चति, न सकिंयेव सब्बधम्मावबोधतो । तथा च वुत्तं पटिसम्भिदायं —

“विमोक्खन्तिकमेतं बुद्धानं भगवन्तानं बोधिया मूले सह सब्बञ्जुतञ्जाणस्स पटिलाभा सच्छिका पज्जति
यदिदं बुद्धो”ति ।

सब्बधम्मावबोधनसमत्थजाणसमधिगमेन हि भगवतो सन्ताने अनवसेसधम्मे पटिविज्झितुं समत्थता अहोसीति ।

एत्थाह — किं पनिदं जाणं पवत्तमानं सकिंयेव सब्बस्मिं विसये पवत्तति, उदाहु कमेनाति? किञ्चेत्थ — यदि ताव सकिंयेव सब्बस्मिं विसये पवत्तति, अतीतानागतप्पच्चुपन्नअज्झत्तबहिद्वादिभेदभिन्नानं सङ्घातधम्मानं असङ्घातसम्मुतिधम्मानञ्च एकज्झं उपट्ठाने दूरतो चित्तपटं पेक्खन्तस्स विय विसयविभागेनावबोधो न सिया, तथा च सति “सब्बे धम्मा अनत्ता”ति विपस्सन्तानं अनत्ताकारेण विय सब्बधम्मा अनिरूपितरूपेण भगवतो जाणस्स विसया होन्तीति आपज्जति । येपि “सब्बजेय्यधम्मानं ठितलक्खणविसयं विकप्परहितं सब्बकालं बुद्धानं जाणं पवत्तति, तेन ते सब्बविदूति वुच्चन्ति । एवञ्च कत्वा —

“चरं समाहितो नागो, तिष्ठन्तोपि समाहितो”ति ॥ —

“इदम्पि वचनं सुवुत्तं होती”ति वदन्ति, तेसम्पि वुत्तदोसानातिवत्ति, ठितलक्खणारम्मणताय च अतीतानागतसम्मुतिधम्मानं तदभावतो, एकदेसविसयमेव भगवतो जाणं सिया। तस्मा सकिंयेव जाणं पवत्ततीति न युज्जति।

अथ कमेन सब्बस्मिं विसये जाणं पवत्ततीति? एवम्पि न युज्जति। न हि जातिभूमिसभावादिवसेन दिसादेसकालादिवसेन च अनेकभेदभिन्ने जेय्ये कमेन गय्हमाने तस्स अनवसेसपटिवेधो सम्भवति अपरियन्तभावतो जेय्यस्स। ये पन “अत्थस्स अविशंवादनतो जेय्यस्स एकदेसं पच्चक्खं कत्वा सेसेपि एवन्ति अधिमुच्चित्वा ववत्थापनेन सब्बञ्जू भगवा, तच्च जाणं न अनुमानिकं संसयाभावतो। संसयानुबद्धज्झि लोके अनुमानजाण”न्ति वदन्ति, तेसम्पि न युत्तं। सब्बस्स हि अपच्चक्खभावे अत्थस्स अविशंवादानेन जेय्यस्स एकदेसं पच्चक्खं कत्वा सेसेपि एवन्ति अधिमुच्चित्वा ववत्थापनस्स असम्भवतो। यज्झि तं सेसं, तं अपच्चक्खन्ति। अथ तम्पि पच्चक्खं, तस्स सेसभावो पन न सियाति सब्बमेतं अकारणं। कस्मा? अविसयविचारभावतो। वुत्तज्जेतं भगवता —

“बुद्धविसयो, भिक्खवे, अचिन्तेय्यो, न चिन्तेतब्बो; यो चिन्तेय्य, उम्मादस्स विघातस्स भागी अस्सा”ति (अ० नि० ४.७७)।

इदं पनेत्थ सन्निट्ठानं — यंकिज्चि भगवता जातुं इच्छितं सकलमेकदेसो वा, तत्थ अप्पटिहतवुत्तिताय पच्चक्खतो जाणं पवत्तति, निच्चसमाधानच्च विक्खेपाभावतो, जातुं इच्छितस्स सकलस्स अविसयभावतो तस्स आकङ्खापटिबद्धवुत्तिता न सिया, एकन्तेनेव सा इच्छितब्बा “सब्बे धम्मा बुद्धस्स भगवतो आवज्जनपटिबद्धा, आकङ्खापटिबद्धा, मनसिकारपटिबद्धा, चित्तुप्पादपटिबद्धा”ति (महानि० ६९; चूळनि० मोघराजमाणवपुच्छानिदेस ८५) वचनतो। अतीतानागतविसयम्पि भगवतो जाणं अनुमानागमनतक्कग्गहणविरहितत्ता पच्चक्खमेव।

ननु च एतस्मिम्पि पक्खे यदा सकलं जातुं इच्छितं, तदा सकिमेव सकलविसयताय अनिरूपितरूपेण भगवतो जाणं पवत्तेय्याति वुत्तदोसानातिवत्तियेवाति? न, तस्स विसोधिहत्ता। विसोधितो हि सो बुद्धविसयो अचिन्तेय्योति। अज्जथा पचुरजनजाणसमवुत्तिताय बुद्धानं भगवन्तानं जाणस्स अचिन्तेय्यता न सिया, तस्मा सकलधम्मरम्मणम्पि तं एकधम्मरम्मणं विय सुववत्थापितेयेव ते धम्मे कत्वा पवत्ततीति इदमेत्थ अचिन्तेय्यं। यावतकं जेय्यं, तावतकं जाणं, यावतकं जाणं, तावतकं जेय्यं, जेय्यपरियन्तिकं जाणं, जाणपरियन्तिकं जेय्यन्ति एवमेकज्झं विसुं विसुं सकिं कमेन च इच्छानुरूपं सम्मा सामञ्च सब्बधम्मानं बुद्धत्ता सम्मासम्बुद्धो भगवा। तं सम्मासम्बुद्धं।

द्वे वितक्काति द्वे सम्मा वितक्का। तत्थ वितक्केन्ति एतेन, सयं वा वितक्केति, वितक्कनमत्तमेव वाति वितक्को। स्वायं आरम्मणाभिनिरोपनलक्खणो, आहननपरियाहननरसो, आरम्मणे चित्तस्स आनयनपच्चुपट्ठानो। विसयभेदेन पन तं द्विधा कत्वा वुत्तं “द्वे वितक्का”ति। समुदाचरन्तीति समं सम्मा च उद्धमुद्धं मरियादाय चरन्ति। मरियादत्थो हि अयमाकारो, तेन च योगेन “तथागतं अरहन्तं सम्मासम्बुद्धं”न्ति इदं सामिअत्थे उपयोगवचनं। इदं वुत्तं होती — तथागतस्स अरहतो सम्मासम्बुद्धस्स अत्तनो विसये समं सम्मा च अज्जमज्जं मरियादं अनतिक्कमन्ता उद्धमुद्धं बहुलं अभिण्हं चरन्ति पवत्तन्तीति।

को पन नेसं विसयो, का वा मरियादा, कथञ्च तं अनतिक्कमित्वा ते उद्धमुद्धं बहुलं अभिण्हं निच्चं पवत्तन्तीति?

वुच्चते — खेमवितक्को, पविवेकवितक्कोति इमे द्वे वितक्कायेव । तेसु **खेमवितक्को** ताव भगवतो विसेसेन करुणासम्पयुत्तो, मेत्तामुदितासम्पयुत्तोपि लब्धतेव, तस्मा सो महाकरुणासमापत्तिया मेत्तादिसमापत्तिया च पुब्बङ्गमो सम्पयुत्तो च वेदितव्वो । **पविवेकवितक्को** पन फलसमापत्तिया पुब्बङ्गमो सम्पयुत्तो च, दिब्बविहारादिवसेनापि लब्धतेव । इति नेसं वितक्को विसयो, तस्मा एकस्मिं सन्ताने बहुलं पवत्तमानानमि कालेन कालं सविसयस्मियेव चरणतो नत्थि मरियादा, न सङ्करेन वुत्ति ।

तत्थ खेमवितक्को भगवतो करुणोक्कमनादिना विभावेतव्वो, पविवेकवितक्को समापत्तीहि । तत्रायं विभावना — “अयं लोको सन्तापजातो दुक्खपरेतो”तिआदिना रागगिआदीहि लोकसन्निवासस्स आदित्तादिआकारदस्सनेहि महाकरुणासमापत्तिया पुब्बभागे, समापत्तियमि पठमज्झानवसेन वत्तव्वो । वुत्तज्जेतं (पटि० म० १.११७-११८) —

“बहूहि आकारेहि पस्सन्तानं बुद्धानं भगवन्तानं सत्तेसु महाकरुणा ओक्कमति, आदित्तो लोकसन्निवासोति पस्सन्तानं बुद्धानं भगवन्तानं सत्तेसु महाकरुणा ओक्कमति । उय्युत्तो, पयातो, कुम्मगपटिपन्नो, उपनीयति लोको अद्भुवो, अताणो लोको अनभिस्सरो, अस्सको लोको, सब्बं पहाय गमनीयं, ऊनो लोको अतित्तो तण्हादासो ।

“अतायनो लोकसन्निवासो, अलेणो, असरणो, असरणीभूतो, उद्धतो लोको अवूपसन्तो, ससल्लो लोकसन्निवासो विद्धो पुथुसल्लेहि, अविज्जन्धकारावरणो किलेसपज्जरपरिक्खित्तो, अविज्जागतो लोकसन्निवासो अण्डभूतो परियोनद्धो तन्ताकुलकजातो कुलागुण्ठिकजातो मुज्जपब्बजभूतो अपायं दुग्गतिं विनिपातं संसारं नातिवत्ततीति पस्सन्तानं, अविज्जाविसदोससंलित्तो किलेसकललीभूतो, रागदोसमोहजटाजटितो ।

“तण्हासङ्घाटपटिमुक्को, तण्हाजालेन ओत्थटो, तण्हासोतेन वुहति, तण्हासंयोजनेन संयुत्तो, तण्हानुसयेन अनुसटो, तण्हासन्तापेन सन्तप्पति, तण्हापरिळाहेन परिडहति ।

“दिट्ठिसङ्घाटपटिमुक्को, दिट्ठिजालेन ओत्थटो, दिट्ठिसोतेन वुहति, दिट्ठिसंयोजनेन संयुत्तो, दिट्ठानुसयेन अनुसटो, दिट्ठिसन्तापेन सन्तप्पति, दिट्ठिपरिळाहेन परिडहति ।

“जातिया अनुगतो, जराय अनुसटो, ब्याधिना अभिभूतो, मरणेन अब्भाहतो, दुक्खे पतिट्ठितो ।

“तण्हाय ओड्डितो, जरापाकारपरिक्खित्तो, मच्चुपासपरिक्खित्तो, महाबन्धनबद्धो, लोकसन्निवासो, रागबन्धनेन, दोसमोहबन्धनेन, मानदिट्ठिकिलेसदुच्चरितबन्धनेन बद्धो, महासम्बाधपटिपन्नो, महापलिबोधेन पलिबुद्धो, महापपाते पतितो, महाकन्तारपटिपन्नो, महासंसारपटिपन्नो, महाविदुग्गे सम्परिवत्तति, महापलिपे पलिपन्नो ।

“अब्भाहतो लोकसन्निवासो, आदित्तो लोकसन्निवासो रागगिना, दोसगिना, मोहगिना जातिया...पे०... उपायासेहि, उन्नीतको लोकसन्निवासो हज्जति निच्चमताणो पत्तदण्डो तक्करो, वज्जबन्धनबद्धो आघातनपच्चुपट्ठितो, अनाथो लोकसन्निवासो परमकारुज्जतं पत्तो, दुक्खाभितुन्नो चिररत्तपीळितो, निच्चगधितो निच्चपिपासितो ।

“अन्धो, अचक्खुको, हतनेत्तो, अपरिणायको, विपथपक्खन्दो, अज्जसापरद्धो, महोघपक्खन्दो ।

“द्वीहि दिट्ठिगतेहि परियुट्ठितो, तीहि दुच्चरितेहि विप्पटिपन्नो, चतूहि योगेहि योजितो, चतूहि गन्थेहि गन्थितो, चतूहि उपादानेहि उपादीयति, पञ्चगतिसमारुहो, पञ्चहि कामगुणेहि रज्जति, पञ्चहि नीवरणेहि ओत्थटो, छहि विवादमूलेहि विवदति, छहि तण्हाकायेहि रज्जति, छहि दिट्ठिगतेहि परियुट्ठितो, सत्तहि अनुसयेहि अनुसटो, सत्तहि संयोजनेहि संयुत्तो, सत्तहि मानेहि उन्नतो, अट्ठहि लोकधम्मोहि सम्परिवत्तति, अट्ठहि मिच्छत्तेहि नियतो, अट्ठहि पुरिसदोसेहि दुस्सति, नवहि आघातवत्थूहि आघातितो, नवहि मानेहि उन्नतो, नवहि तण्हामूलकेहि धम्मोहि रज्जति, दसहि किलेसवत्थूहि किलिस्सति, दसहि आघातवत्थूहि आघातितो, दसहि अकुसलकम्मपथेहि समन्नागतो, दसहि संयोजनेहि संयुत्तो, दसहि मिच्छत्तेहि नियतो, दसवत्थुकाय दिट्ठिया समन्नागतो, दसवत्थुकाय अन्तग्गाहिकाय दिट्ठिया समन्नागतो, अट्ठसततण्हापपञ्चेहि पपञ्चितो, द्वासट्ठिया दिट्ठिगतेहि परियुट्ठितो लोकसन्निवासोति सम्पस्सन्तानं बुद्धानं भगवन्तानं सत्तेसु महाकरुणा ओक्कमति ।

“अहञ्चमि तिण्णो, लोको च अतिण्णो । अहञ्चमि मुत्तो, लोको च अमुत्तो । अहञ्चमि दन्तो, लोको च अदन्तो । अहञ्चमि सन्तो, लोको च असन्तो । अहञ्चमि अस्सत्थो, लोको च अनस्सत्थो । अहञ्चमि परिनिब्बुतो, लोको च अपरिनिब्बुतो । प्होमि ख्वाहं तिण्णो तारेतुं, मुत्तो मोचेतुं, दन्तो दमेतुं, सन्तो समेतुं, अस्सत्थो अस्सासेतुं, परिनिब्बुतो परे च परिनिब्बापेतुन्ति पस्सन्तानं बुद्धानं भगवन्तानं सत्तेसु महाकरुणा ओक्कमती”ति (पटि० म० १.११७-११८) ।

इमिनाव नयेन भगवतो सत्तेसु मेत्ताओक्कमनञ्च विभावेतब्बं । करुणाविसयस्स हि दुक्खस्स पटिपक्खभूतं सुखं सत्तेसु उपसंहरन्ती मेत्तापि पवत्ततीति इध अब्यापादअविहिंसावितक्का खेमवितक्को । पविवेकवितक्को पन नेक्खम्मवितक्कोयेव, तस्स दिब्बविहारअरियविहारेसु पुब्बभागस्स पठमज्झानस्स पच्चवेक्खणाय च वसेन पवत्ति वेदितब्बा । तत्थ ये ते भगवतो देवसिकं वळज्जनकवसेन चतुवीसतिकोटिसतसहस्ससङ्ख्वा समापत्तिविहारा, येसं पुरेचरणभावेन पवत्तं समाधिचरियानुगतं जाणचरियानुगतं जाणं चतुवीसतिकोटिसतसहस्ससमापत्तिसञ्चारिमहावजिराणन्ति वुच्चति, तेसं वसेन भगवतो पविवेकवितक्कस्स बहुलं पवत्ति वेदितब्बा । अयञ्च अत्थो महासच्चकसुत्तेनपि वेदितब्बो । वुत्तज्झि तत्थ भगवता —

“सो खो अहं, अग्गिवेस्सन, तस्मिंयेव पुरिमस्मिं समाधिनिमित्ते अज्झत्तमेव चित्तं सण्ठपेमि, सन्निसादेमि, येन सुदं निच्चकप्पं विहरामी”ति (म० नि० १.३८७) ।

इदज्झि भगवा “समणो गोतमो अभिरूपो पासादिको सुफुसितं दन्तावरणं, जिक्का तनुका, मधुरं वचनं, तेन परिसं रज्जेन्तो मज्जे विचरति, चित्ते पनस्स एकगता नत्थि, यो एवं सज्जत्तिबहुलो चरती”ति सच्चकेन निगण्ठपुत्तेन वितक्किते अवस्सं सहोढं चोरं गणहन्तो विय “न अग्गिवेस्सन तथागतो परिसं रज्जेन्तो सज्जत्तिबहुलो विचरति, चक्कवाळपरियन्तायपि परिसाय धम्मं देसेति, असल्लीनो अनुपलित्तो एकत्तं एकविहारिसुज्जाताफलसमापत्तिफलं अनुयुत्तो”ति दस्सेतुं आहरि ।

भगवा हि यस्मिं खणे परिसा साधुकारं देति, धम्मं वा पच्चवेक्खति, तस्मिं खणे पुब्बभागेन कालं परिच्छिन्दित्वा फलसमापत्तिं अस्सासवारे पस्सासवारे समापज्जति, साधुकारसद्दिग्घोसे अविच्छिन्नेयेव धम्मपच्चवेक्खणाय च

परियोसाने समापत्तितो वुट्ठाय ठितट्ठानतो पट्ठाय धम्मं देसेति । बुद्धानज्झि भवङ्गपरिवासो लहुको, अस्सासवारे पस्सासवारे समापत्तियो समापज्जन्ति । एवं यथावुत्तसमापत्तीनं सपुब्बभागानं वसेन भगवतो खेमवितक्कस्स पविवेकवितक्कस्स च बहुलप्पवत्ति वेदितब्बा ।

तत्थ यस्स ब्यापादविहिंसावितक्कादिसंकिलेसप्पहानस्स अब्यापादवितक्कस्स अविहिंसावितक्कस्स च आनुभावेन कुतोचिपि भयाभावतो तंसमङ्गी खेमप्पत्तो च विहरति, ततो च सब्बस्सपि सब्बदापि खेममेव होति अभयमेव । तस्मा दुविधोपि उभयेसं खेमङ्करोति **खेमवितक्को** । यस्स पन कामवितक्कादिसंकिलेसपहानस्स नेक्खम्मवितक्कस्स आनुभावेन कायविवेको, चित्तविवेको, उपधिविवेकोति तिविधो; तदङ्गविवेको, विक्खम्भनविवेको, समुच्छेदविवेको, पटिप्पस्सद्धिविवेको, निस्सरणविवेकोति पञ्चविधो च विवेको पारिपूरिं गच्छति । सो यथारहं आरम्मणतो सम्पयोगतो च पविवेकसहगतो वितक्कोति **पविवेकवितक्को** । एते च द्वे वितक्का एवं विभत्तविसयापि समाना आदिकम्मिकानं अज्जमज्जूपकाराय सम्भवन्ति । यथा हि खेमवितक्कस्स पविवेकवितक्को अनुप्पन्नस्स उप्पादाय उप्पन्नस्स भिय्योभावाय वेपुल्लाय होति, एवं पविवेकवितक्कस्सपि खेमवितक्को । न हि वूपकट्टकायचित्तानमन्तरेण मेत्ताविहारादयो सम्भवन्ति ब्यापादादिप्पहानेन च विना चित्तविवेकादीनं असम्भवोयेवाति अज्जमज्जस्स बहूपकारा एते धम्मा दट्ठब्बा । भगवतो पन सब्बसो पहीनसंकिलेसस्स लोकहितत्थाय एवं खेमवितक्को च पविवेकवितक्को च अस्सासवारमत्तेपि हितसुखमावहन्तियेवाति । खेमो च वितक्को पविवेको च वितक्कोति सम्बन्धितब्बं ।

एवं उद्दिट्ठे द्वे वितक्के निदिसितुं “**अब्यापज्झारामो**”तिआदिमाह । तत्थ अब्यापज्झनं कस्सचि अदुक्खनं अब्यापज्झो, सो आरमितब्बतो आरामो एतस्साति अब्यापज्झारामो । अब्यापज्झे रतो सेवनवसेन निरतोति **अब्यापज्झरतो** । **एसेवाति** एसो एव । **इरियायाति** किरियाय, कायवचीपयोगेनाति अत्थो । **न कज्जि ब्याबाधेमीति** हीनादीसु कज्जिपि सत्तं तण्हातसादियोगतो तसं वा तदभावतो पहीनसब्बकिलेसविप्फन्दितत्ता थावरं वा न बाधेमि न दुक्खापेमि । करुणज्झासयो भगवा महाकरुणासमापत्तिबहुलो अत्तनो परमरुचितकरुणज्झासयानुरूपमेवमाह । तेन अविहिंसावितक्कं अब्यापादवितक्कज्ज दस्सेति । इदं वुत्तं होति — ‘अहं इमाय इरियाय इमाय पटिपत्तिया एवं सम्मा पटिपज्जन्तो एवं समापत्तिविहारेहि विहरन्तो एवं पुज्जत्थिकेहि कतानि सक्कारगरुकारमाननवन्दनपूजनानि अधिवासेन्तो सत्तेसु न कज्जि ब्याबाधेमि, अपिच खो दिट्ठधम्मिकसम्परायिकपरमत्थप्पभेदं हितसुखमेव नेसं परिब्रूहेमी’ति ।

यं अकुसलं, तं पहीनन्ति यं दियड्ढकिलेससहस्सभेदं अज्जज्ज तंसम्पयुत्तं अनन्तप्पभेदं अकुसलं, तं सब्बं बोधिमूलेयेव मय्हं पहीनं समूहतन्ति । इमिना पविवेकेसु मुद्दभूतेन सद्धिं निस्सरणविवेकेन समुच्छेदपटिप्पस्सद्धिविवेके दस्सेति । केचि पनेत्थ तदङ्गविक्खम्भनविवेकेपि उद्धरन्ति । आगमनीयपटिपदाय हि सद्धिं भगवता अत्तनो किलेसक्खयो इध वुत्तोति ।

इति भगवा अपरिमितकप्पपरिचित्तं अत्तनो पविवेकज्झासयं सद्धिं निस्सरणज्झासयेन इदानि मत्थकं पापेत्वा ठितो तमज्झासयं फलसमापत्तिं समापज्जित्वा अत्तनो किलेसप्पहानपच्चवेक्खणमुखेन विभावेति । यदत्थं पनेत्थ सत्था इमे द्वे वितक्के उद्धरि, इदानि तमत्थं दस्सेन्तो “**तस्मातिह, भिक्खवे**”तिआदिमाह । भगवा हि इमस्स वितक्कद्वयस्स अत्तनो बहुलसमुदाचारदस्सनमुखेनेव तत्थ भिक्खू निवेसेतुं इमं देसनं आरभि ।

तत्थ **तस्माति** यस्मा अब्यापज्झपविवेकाभिरतस्स मे खेमपविवेकवितक्कायेव बहुलं पवत्तन्ति, तस्मा । **तिहाति** निपातमत्तं । **अब्यापज्झारामा विहरथाति** सब्बसत्तेसु मेत्ताविहारेण करुणाविहारे न च अभिरमन्ता विहरथ । तेन ब्यापादस्स

तदेकद्वकिलेसानञ्च दूरीकरणमाह । तेसं वोति एत्थ वोति निपातमत्तं । पविवेकारामा विहरथाति कायादिविवेकञ्चेव तदङ्गादिविवेकञ्चाति सब्बविवेके आरमितब्बट्ठानं कत्वा विहरथ । इमाय मयन्तिआदि यथा नेसं खेमवितक्कस्स पवत्तनाकारदस्सनं, एवं किं अकुसलन्तिआदि पविवेकवितक्कस्स पवत्तनाकारदस्सनं । तत्थ यथा अनवज्जधम्मं परिपूरेतुकामेन किंकुसलगवेसिना हुत्वा कुसलधम्मपरियेसना कातब्बाव, सावज्जधम्मं पजहितुकामेनापि अकुसलपरियेसना कातब्बाति आह “किं अकुसल”न्तिआदि । अभिज्जापुब्बिका हि परिज्जापहानसच्छिकिरियाभावना । तत्थ किं अकुसलन्ति अकुसलं नाम किं, सभावतो किमस्स लक्खणं, कानि वा रसपच्चुपट्टानपदट्टानानीति अकुसलस्स सभावकिच्चादितो पच्चवेक्खणविधिं दस्सेति । आदिकम्मिकवसेन चेस वितक्को आगतो, किं अप्पहीनं किं पजहामाति इदं पदद्वयं सेक्खवसेन । तस्मा किं अप्पहीनन्ति कामरागसंयोजनादीसु अकुसलेसु किं अकुसलं अम्हाकं मग्गेन असमुच्छिन्नं? किं पजहामाति किं अकुसलं समुघातेम? अथ वा किं पजहामाति वीतिक्कमपरियुट्टानानुसयेसु किं विभागं अकुसलं इदानि मयं पजहामाति अत्थो । केचि पन “किं अप्पहीन”न्ति पठन्ति । तेसं दिट्ठिसंयोजनादिवसेन अनेकभेदेसु अकुसलेसु किं कतमं अकुसलं, केन कतमेन पकारेन, कतमेन वा मग्गेन अम्हाकं अप्पहीनन्ति वुत्तं होति । सेसं वुत्तनयमेव ।

गाथासु बुद्धन्ति चतुन्नं अरियसच्चानं अविपरीतं सयम्भुजाणेन बुद्धत्ता पटिविद्धत्ता बुद्धं सच्चविनिमुत्तस्स जेय्यस्स अभावतो । तथा हि वुत्तं —

“अभिज्जेय्यं अभिज्जातं, भावेतब्बञ्च भावितं ।

पहातब्बं पहीनं मे, तस्मा बुद्धोस्मि ब्राह्मणा”ति ॥ (सु० नि० ५६३; म० नि० २.३९९) ।

उपेत्वा महाबोधिसत्तं अज्जेहि सहितुं वहितुं असक्कुण्येयत्ता असहस्स सकलस्स बोधिसम्भारस्स महाकरुणाधिकारस्स च सहनतो वहनतो, तथा अज्जेहि सहितुं अभिभवितुं दुक्करत्ता असहानं पञ्चन्नं मारानं सहनतो अभिभवनतो, आसयानुसयचरियाधिमुत्तिआदिविभागावबोधेन यथारहं वेनेय्यानं दिट्ठधम्मिकसम्परायिकपरमत्थेहि अनुसासनसङ्घातस्स अज्जेहि असहस्स बुद्धकिच्चस्स सहनतो वहनतो, तत्थ वा साधुकारिभावतो असहसाहिनं । समुदाचरन्ति नन्ति एत्थ नन्ति निपातमत्तं, नं तथागतन्ति वा अत्थो ।

सकपरसन्तानेसु तमसङ्घातं मोहन्धकारं नुदि खिपीति तमोनुदो । पारं निब्बानं गतोति पारगतो । अथ वा “मुत्तो मोचेय्य”न्तिआदिना नयेन पवत्तितस्स महाभिनीहारस्स सकलस्स वा संसारदुक्खस्स सब्बज्जुगुणानं पारं परियन्तं गतोति पारगतो, तं तमोनुदं पारगतं । ततो एव पत्तिपत्तं बुद्धं, सीलादिं दसबलजाणादिञ्च सम्मासम्बुद्धेहि पत्तब्बं सब्बं पत्तन्ति अत्थो । वसिमन्ति ज्ञानादीसु आकङ्क्षापटिबद्धो परमो आवज्जनादिवसिभावो, अरियिद्धिसङ्घातो अनज्जसाधारणो चित्तवसिभावो च अस्स अत्थीति वसिमा, तं वसिमं, वसिनन्ति अत्थो । सब्बेसं कामासवादीनं अभावेन अनासवं । कायविसमादिकस्स विसमस्स वन्तत्ता वा विससङ्घातं सब्बं किलेसमलं तरित्वा वा विसं सकलवट्टदुक्खं सयं तरित्वा तारणतो विसन्तरो तं विसन्तरं । तण्हक्खये अरहत्तफले निब्बाने वा विमुत्तं, उभयमिह गमनतो मोनसङ्घातेन जाणेन कायमोनेय्यादीहि वा सातिसयं समन्नागतत्ता मुनिं । मुनीति हि अगारियमुनि, अनगारियमुनि, सेक्खमुनि, असेक्खमुनि, पच्चेकमुनि, मुनिमुनीति अनेकविधा मुनयो । तत्थ गिही आगतफलो विज्जातसासनो अगारियमुनि, तथारूपो पब्बजितो अनगारियमुनि, सत्त सेक्खा सेक्खमुनि, खीणासवो असेक्खमुनि, पच्चेकबुद्धो पच्चेकमुनि, सम्मासम्बुद्धो मुनिमुनीति । अयमेव इधाधिप्पेतो । आयतिं पुनब्भवाभावतो अन्तिमं, पच्छिमं देहं कायं धारेतीति अन्तिमदेहधारी, तं अन्तिमदेहधारिं ।

किलेसमारादीनं सम्मदेव परिच्चत्तता **मारज्जहं** । ततो एव जराहेतुसमुच्छेदतो अनुपादिसेसनिब्बानप्पत्तिवसेन पाकटजरादिसब्बजराय **पारगुं** । जरासीसेन चेत्य जातिमरणसोकादीनं पारगमनं वुत्तन्ति दट्ठब्बं । तं एवंभूतं तथागतं दुवे वितक्का समुदाचरन्तीति ब्रूमीति सम्बन्धो ।

इति भगवा पठमगाथाय वितक्कद्वयं उद्दिशित्वा ततो दुतियगाथाय पविवेकवितक्कं दस्सेत्वा इदानीं खेमवितक्कं दस्सेतुं “**सेले यथा**”ति ततियगाथमाह । तत्थ **सेले यथा पब्बतमुद्धनिट्ठितो**ति सेले सिलामये एकग्घनपब्बतमुद्धनि यथा ठितो । न हि तत्थ ठितस्स उद्धं गीवुक्खिपनपसारणादिकिच्चं अत्थि । **तथूपमन्ति** तप्पटिभागं सेलपब्बतूपमं । अयं पनेत्थ सङ्खेपत्थो — यथा सेलपब्बतमुद्धनि ठितो चक्खुमा पुरिसो समन्ततो जनतं पस्सेय्य, एवमेव सुमेधो, सुन्दरपज्जो सब्बज्जुतज्जाणेन समन्तचक्खु भगवा धम्ममयं पज्जामयं पासादमारुह सयं अपेतसोको सोकावतिण्णं जातिजराभिभूतज्ज जनतं सत्तकायं अवेक्खति उपधारयति उपपरिक्खति । अयं पनेत्थ अधिप्पायो — यथा हि पब्बतपादे समन्ता महन्तं खेत्तं कत्वा तत्थ केदारपाळीसु कुटियो कत्वा रत्तिं अग्गिं जालेय्य, चतुरङ्गसमन्नागतज्ज अन्धकारं भवेय्य, अथस्स पब्बतस्स मत्थके ठत्वा चक्खुमतो पुरिसस्स भूमिप्पदेसं ओलोकयतो नेव खेत्तं, न केदारपाळियो, न कुटियो, न तत्थ सयितमनुस्सा पज्जायेय्युं, कुटीसु पन अग्गिजालमत्तमेव पज्जायेय्य, एवं धम्ममयं पासादमारुह सत्तकायं ओलोकयतो तथागतस्स ये ते अकतकल्याणा सत्ता, ते एकविहारे दक्खिणपस्से निसिन्नापि बुद्धजाणस्स आपाथं नागच्छन्ति, रत्तिं खित्तसरा विय होन्ति । ये पन कतकल्याणा वेनेय्यपुग्गला, ते एवस्स दूरेपि ठिता आपाथं आगच्छन्ति, सो अग्गि विय हिमवन्तपब्बतो विय च वुत्तम्पि चेतं —

“दूरे सन्तो पकासेन्ति, हिमवन्तोव पब्बतो ।

असन्तेत्थ न दिस्सन्ति, रत्तिं खित्ता यथा सरा”ति ॥ (ध० प० ३०४; नेत्ति० ११) ।

एवमेतस्मिं सुत्ते गाथासु च भगवा अत्तानं परं विय कत्वा दस्सेसि ।

पठमसुत्तवण्णना निट्ठिता ।

२. देसनासुत्तवण्णना

३९. दुतिये **परियायेना**ति एत्थ **परियाय-**सद्दो “मधुपिण्डिकपरियायोत्वेव नं धारेही”ति आदीसु (म० नि० १.२०५) देसनायं आगतो । “अत्थि ख्वेस, ब्राह्मण, परियायो, येन मं परियायेन सम्मा वदमानो वदेय्य — अकिरियवादो समणो गोतमो”ति आदीसु (पारा० ५; अ० नि० ८.११) कारणे । “कस्स नु खो, आनन्द, अज्ज परियायो भिक्खुनियो ओवदितु”न्ति आदीसु (म० नि० ३.३९८) वारे । इध पन वारेपि कारणेपि वट्ठति, तस्मा, भिक्खवे, तथागतस्स द्वे धम्मदेसना यथारहं कारणेन भवन्ति, वारेन वाति अयमेत्थ अत्थो । भगवा हि वेनेय्यज्झासयानुरूपं कदाचि “इमे धम्मा कुसला, इमे, धम्मा अकुसला । इमे धम्मा सावज्जा, इमे धम्मा अनवज्जा । इमे सेवितब्बा, इमे न सेवितब्बा”ति आदिना कुसलाकुसलधम्मे विभजन्तो कुसलधम्मेहि अकुसलधम्मे असङ्करतो पज्जापेन्तो “**पापं पापकतो पस्सथा**”ति धम्मं देसेति । कदाचि “पाणातिपातो, भिक्खवे, आसेवितो भावितो बहुलीकतो निरयसंवत्तनिको तिरच्छानयोनिं संवत्तनिको पेत्तिविसयसंवत्तनिको, यो सब्बलहुको पाणातिपातो, सो अप्पायुकसंवत्तनिको”ति आदिना (अ० नि० ८.४०) आदीनवं पकासेन्तो पापतो निब्बिदादीहि नियोजेन्तो “**निब्बिन्दथ विरज्जथा**”ति धम्मं देसेति ।

भवन्तीति होन्ति पवत्तन्ति । पापं पापकतो पस्सथाति सब्बं पापधम्मं दिट्ठेव धम्मे आयतिज्ज अहितदुक्खावहतो लामकतो पस्सथ । तत्थ निब्बिन्दथाति तस्मिं पापधम्मे “अच्चन्तहीनभावतो लामकट्ठेन पापं, अकोसल्लसम्भूतट्ठेन अकुसलं, पकतिपभस्सरस्स पसन्नस्स च चित्तस्स पभस्सरादिभावविनासनतो संकिलेसिकं, पुनप्पुनं भवदुक्खनिब्बत्तनतो पो नोब्भविकं, सहेव दरथेहि परिळाहेहि वत्तनतो सदरथं, दुक्खस्सेव विपच्चनतो दुक्खविपाकं, अपरिमाणम्पि कालं अनागते जातिजरामरणनिब्बत्तनतो आयतिं जातिजरामरणियं, सब्बहितसुखविद्धंसनसमत्थ”न्ति आदिना नयेन नानाविधे आदीनवे, तस्स च पहाने आनिसंसे सम्मपज्जाय पस्सन्ता निब्बिन्दथ निब्बेदं आपज्जथ । निब्बिन्दन्ता च विपस्सनं वट्ठेत्वा अरियमग्गाधिगमेन पापतो विरज्जथ चेव विमुच्चथ च । मग्गेन वा समुच्छेदविरागवसेन विरज्जथ, ततो फलेन पटिप्पस्सद्धिविमुत्तिवसेन विमुच्चथ । अथ वा पापन्ति लामकतो पापं । किं वुत्तं होति? यं अनिच्चदुक्खादिभावेन कुच्छितं अरियेहि जिगुच्छनीयं वट्ठदुक्खं पापेतीति पापं । किं पन तं? तेभूमकधम्मजातं । यथावुत्तेन अत्थेन पापकतो दिस्वा तत्थ अनिच्चतो, दुक्खतो, रोगतो, गण्डतो, सल्लतो, अघतो, आबाधतोति आदिना विपस्सनं वट्ठेन्ता निब्बिन्दथ । अयं दुतियाति याथावतो अहितानत्थविभावनं पठमं उपादाय ततो विवेचनं अयं दुतिया धम्मदेसना ।

गाथासु बुद्धस्साति सब्बज्जुबुद्धस्स । सब्बभूतानुकम्पिनोति सब्बेपि सत्ते महाकरुणाय अनुकम्पनसभावस्स । परियायवचनन्ति परियायेन कथनं देसनं । पस्साति परिसं आलपति, परिसजेट्ठकं वा सन्धाय वुत्तं । केचि पनाहु “अत्तानमेव सन्धाय भगवा ‘पस्सा’ति अवोचा”ति । तत्थाति तस्मिं पापके विरज्जथ रागं पजहथाति अत्थो । सेसं वुत्तनयमेव ।

दुतियसुत्तवण्णना निट्ठिता ।

३. विज्जासुत्तवण्णना

४०. ततिये पुब्बङ्गमाति सहजातवसेन, उपनिस्सयवसेन चाति द्वीहि आकारेहि पुब्बङ्गमा पुरस्सरा पधानकारणं । न हि अविज्जाय विना अकुसलुप्पत्ति अत्थि । समापत्तियाति समापज्जनाय सभावपटिलाभाय, पवत्तियाति अत्थो । तत्थ अकुसलपवत्तिया आदीनवप्पटिच्छादनेन अयोनि सोमनसिकारस्स पच्चयभावेन अप्पहीनभावेन च अकुसलधम्मानं उपनिस्सयभावो दिस्सति ।

एवं ब्याधिमरणादिदुक्खस्स अधिद्धानभावतो सब्बापि गतियो इध दुग्गतियो । अथ वा रागादिकिलेसेहि दूसिता गतियो कायवचीचित्तानं पवत्तियोति दुग्गतियो, कायवचीमनोदुच्चरितानि । अस्मिं लोकेति इध लोके मनुस्सगतियं वा । परमिह चाति ततो अज्जासु गतीसु । अविज्जामूलिका सब्बाति ता सब्बापि दुच्चरितस्स विपत्तियो वुत्तनयेन अविज्जापुब्बङ्गमत्ता अविज्जामूलिका एव । इच्छालोभसमुस्सयाति असम्पत्तविसयपरियेसनलक्खणाय इच्छाय, सम्पत्तविसयलुब्धनलक्खणेन लोभेन च समुस्सिता उपचिताति इच्छालोभसमुस्सया ।

यतोति यस्मा अविज्जाहेतु अविज्जाय निवुतो हुत्वा । पापिच्छोति अविज्जाय पटिच्छादितत्ता पापिच्छताय आदीनवे अपस्सन्तो असन्तगुणसम्भावनवसेन कोहज्जादीनि करोन्तो पापिच्छो, लोभेनेव अत्रिच्छतापि गहिताति दट्ठब्बा । अनादरोति लोकाधिपतिनो ओत्तप्पस्स अभावेन सब्रह्मचारीसु आदररहितो । ततोति तस्मा अविज्जापापिच्छता अहिरिकानोत्तप्पहेतु । पसवतीति कायदुच्चरितादिभेदं पापं उपचिनति । अपायं तेन गच्छतीति तेन तथा पसुतेन पापेन निरयादिभेदं अपायं गच्छति उपपज्जति ।

तस्माति यस्मा एते एवं सब्बदुच्चरितमूलभूता सब्बदुग्गतिपरिक्किलेसहेतुभूता च अविज्जादयो, तस्मा इच्छञ्च, लोभञ्च, अविज्जञ्च, चसदेन अहिरिकानोत्तप्पञ्च **विराजयं** समुच्छेदवसेन पजहं । कथं विराजेतीति आह? **विज्जं उप्पादयन्ति**, विपस्सनापटिपाटिया च, मग्गपटिपाटिया च, उस्सक्कित्वा अरहत्तमग्गविज्जं अत्तनो सन्ताने उप्पादयन्तो । **सब्बा दुग्गतियो**ति सब्बापि दुच्चरितसङ्घाता दुग्गतियो, वट्टदुक्खस्स वा अधिट्ठानभावतो दुक्खा, सब्बा पञ्चपि गतियो **जहे** पजहेय्य समतिक्कमेय्य । किलेसवट्टप्पहानेनेव हि कम्मवट्टं विपाकवट्टञ्च पहीनं होतीति ।

ततियसुत्तवण्णना निट्ठिता ।

पठमभाणवारवण्णना निट्ठिता ।

४. पज्जापरिहीनसुत्तवण्णना

४१. चतुत्थे **सुपरिहीना**ति सुट्ठु परिहीना । **ये अरियाय पज्जाय परिहीना**ति ये सत्ता पञ्चन्नं खन्धानं उदयब्बयपटिविज्जनेन चतुसच्चपटिविज्जनेन च किलेसेहि आरका ठितत्ता अरियाय परिसुद्धाय विपस्सनापज्जाय च मग्गपज्जाय च परिहीना, ते लोकियलोकुत्तराहि सम्पत्तीहि अतिविय परिहीना महाजानिका । के पन तेति? ये कम्मावरणेन समन्नागता । ते हि मिच्छत्तनियतभावतो एकन्तेन परिहीना अपरिपुण्णा महाजानिका । तेनाह “**दुग्गति पाटिकङ्का**”ति । विपाकावरणसमङ्गिनोपि परिहीना । अथ वा सुक्कपक्खे अपरिहीना नाम तिविधावरणविरहिता सम्मादिट्ठिका कम्मस्सकतजाणेन च समन्नागता । सेसं वुत्तनयानुसारेण वेदितव्वं ।

गाथासु **पज्जाया**ति निस्सक्कवचनं, विपस्सनाजाणतो मग्गजाणतो च परिहानेनाति । सामिवचनं वा एतं, यथावुत्तजाणस्स परिहानेनाति, उप्पादेतव्वस्स अनुप्पादनमेव चेत्य परिहानं । **निविट्ठं नामरूपस्मिन्ति** नामरूपे उपादानक्खन्धपञ्चके “एतं ममा”तिआदिना तण्हादिट्ठिवसेन अभिनिविट्ठं अज्झोसितं, ततो एव **इदं सच्चन्ति मज्जतीति** “इदमेव सच्चं मोघमज्ज”न्ति मज्जति । “सदेवके लोके”ति विभत्ति परिणामेतव्वा ।

एवं पठमगाथाय संकिलेसपक्खं दस्सेत्वा इदानीं यस्सा अनुप्पत्तिया नामरूपस्मिं मज्जनाभिनिवेसेहि किलेसवट्ठं वत्तति, तस्सा उप्पत्तिया वट्टस्स उपच्छेदोति पज्जाय आनुभावं पकासेन्तो “**पज्जा हि सेट्ठा लोकस्मि**”न्ति गाथमाह ।

तत्थ **लोकस्मिन्ति** सङ्घारलोकस्मिं । सम्मासम्बुद्धो विय सत्तेसु, सङ्घारेसु पज्जासदिसो धम्मो नत्थि । पज्जुत्तरा हि कुसला धम्मा, पज्जाय च सिद्धाय सब्बे अनवज्जधम्मा सिद्धा एव होन्ति । तथा हि वुत्तं “सम्मादिट्ठिस्स सम्मासङ्कप्पो पहीती”तिआदि (म० नि० ३.१४१; सं० नि० ५.१) । या पनेत्थ पज्जा अधिप्पेता, सा सेट्ठाति थोमिता । यथा च सा पवत्तति, तं दस्सेतुं “**यायं निब्बेधगामिनी**”तिआदि वुत्तं । तस्सत्थो — या अयं पज्जा अनिब्बिद्धपुब्बं अपदालितपुब्बं लोभक्खन्धादिं निब्बिज्जन्ती पदालेन्ती गच्छति पवत्ततीति निब्बेधगामिनी, याय च तस्मिं तस्मिं भवयोनिगतिविज्जाणट्ठितिसत्तावासेसु सत्तनिकायेसु खन्धानं पठमाभिनिव्वत्तिसङ्घाताय जातिया तंनिमित्तस्स च कम्मभवस्स परिक्खयं परियोसानं निब्बानं अरहत्तञ्च सम्मा अविपरीतं जानाति सच्छिकरोति, अयं सहविपस्सना मग्गपज्जा सेट्ठा लोकस्मिन्ति ।

इदानीं यथावुत्तपज्जानुभावसम्पन्ने खीणासवे अभित्थवन्तो “**तेसं देवा मनुस्सा चा**”ति ओसानगाथमाह । तस्सत्थो — तेसं चतूसु अरियसच्चेसु परिज्जादीनं सोळसन्नं किच्चानं निट्ठितत्ता चतुसच्चसम्बोधेन **सम्बुद्धानं**, सतिवेपुल्लप्पत्तिया

सतिमतं, वृत्तनयेन समुग्धातितसम्मोहत्ता पञ्जावेपुल्लप्पत्तिया **हासपञ्जानं**, पुब्बभागे वा सीलादिपारिपूरितो पट्टाय याव निब्बानसच्छिकिरियाय हासवेदतुट्ठिपामोज्जबहुलताय **हासपञ्जानं**, सब्बसो परिकखीणभवसंयोजनत्ता **अन्तिमसरीरधारीनं** खीणासवानं देवा मनुस्सा च **पिहयन्ति** पिया होन्ति, तब्भावं अधिगन्तुं इच्छन्ति “अहो पञ्जानुभावो, अहो वत मयम्पि एदिसा एवं नित्तिण्णसब्बदुक्खा भवेय्यामा”ति ।

चतुत्थसुत्तवण्णना निट्ठिता ।

५. सुक्कधम्मसुत्तवण्णना

४२. पञ्चमे **सुक्का**ति न वण्णसुक्कताय सुक्का, सुक्कभावाय पन परमवोदानाय संवत्तन्तीति निष्फत्तिसुक्कताय सुक्का । सरसेनपि सब्बे कुसला धम्मा सुक्का एव कण्हभावपटिपक्खतो । तेसज्झि उप्पत्तिया चित्तं पभस्सरं होति परिसुद्धं । **धम्मा**ति कुसला धम्मा । **लोकन्ति** सत्तलोकं । **पालेन्ती**ति आधारसन्धारणेन मरियादं ठपेन्ता रक्खन्ति । **हिरी च ओत्तप्पञ्चा**ति एत्थ हिरियति हिरियितब्बेन, हिरियन्ति एतेनाति वा हिरी । वृत्तम्पि चेत्तं “यं हिरियति हिरियितब्बेन, हिरियति पापकानं अकुसलानं धम्मानं समापत्तिया, अयं वुच्चति हिरी”ति (ध० स० ३०) । ओत्तप्पति ओत्तप्पितब्बेन, ओत्तप्पन्ति एतेनाति वा ओत्तप्पं । वृत्तम्पिचेत्तं “यं ओत्तप्पति ओत्तप्पितब्बेन, ओत्तप्पति पापकानं अकुसलानं धम्मानं समापत्तिया, इदं वुच्चति ओत्तप्प”न्ति (ध० स० ३१) ।

तत्थ अज्झत्तसमुट्ठाना हिरी, बहिद्धासमुट्ठानं ओत्तप्पं । अत्ताधिपतेय्या हिरी, लोकाधिपतेय्यं ओत्तप्पं । लज्जासभावसण्ठिता हिरी, भयसभावसण्ठितं ओत्तप्पं । सप्पतिस्सवलक्खणा हिरी, वज्जभीरुकभयदस्साविलक्खणं ओत्तप्पं ।

तत्थ अज्झत्तसमुट्ठानं हिरिं चतूहि कारणेहि समुट्ठापेति — जातिं पच्चवेक्खित्वा, वयं पच्चवेक्खित्वा, सूरभावं पच्चवेक्खित्वा, बाहुसच्चं पच्चवेक्खित्वा । कथं? “पापकरणं नामेतं न जातिसम्पन्नानं कम्मं, हीनजच्चानं केवट्टादीनं कम्मं, मादिसस्स जातिसम्पन्नस्स इदं कम्मं कातुं न युत्त”न्ति एवं ताव जातिं पच्चवेक्खित्वा पाणातिपातादिपापकम्मं अकरोन्तो हिरिं समुट्ठापेति । तथा “पापकरणं नामेतं दहरेहि कत्तब्बकम्मं, मादिसस्स वये ठितस्स इदं कम्मं कातुं न युत्त”न्ति एवं वयं पच्चवेक्खित्वा पाणातिपातादिपापकम्मं अकरोन्तो हिरिं समुट्ठापेति । तथा “पापकरणं नामेतं दुब्बलजातिकानं कम्मं, मादिसस्स सूरभावसम्पन्नस्स इदं कम्मं कातुं न युत्त”न्ति एवं सूरभावं पच्चवेक्खित्वा पाणातिपातादिपापकम्मं अकरोन्तो हिरिं समुट्ठापेति । तथा “पापकरणं नामेतं अन्धबालानं कम्मं, न पण्डितानं, मादिसस्स पण्डितस्स बहुस्सुतस्स इदं कम्मं कातुं न युत्त”न्ति एवं बाहुसच्चं पच्चवेक्खित्वा पाणातिपातादिपापकम्मं अकरोन्तो हिरिं समुट्ठापेति । एवं अज्झत्तसमुट्ठानं हिरिं चतूहि कारणेहि समुट्ठापेति । समुट्ठापेत्वा च पन अत्तनो चित्ते हिरिं पवेसेत्वा पापकम्मं न करोति । एवं हिरी अज्झत्तसमुट्ठाना नाम होति ।

कथं ओत्तप्पं बहिद्धासमुट्ठानं नाम? “सचे त्वं पापकम्मं करिस्ससि, चतूसु परिसासु गरहप्पत्तो भविस्ससि ।

“गरहिस्सन्ति तं विज्जू, असुचिं नागरिको यथा ।

वज्जितो सीलवन्तेहि, कथं भिक्खु करिस्ससी”ति ॥ —

पच्चवेक्खन्तो हि बहिद्धासमुट्ठितेन ओत्तप्पेन पापकम्मं न करोति । एवं ओत्तप्पं बहिद्धासमुट्ठानं नाम होति ।

कथं हिरी अत्ताधिपतेय्या नाम? इधेकच्चो कुलपुत्तो अत्तानं अधिपतिं जेट्ठकं कत्वा “मादिसस्स सद्भापब्बजितस्स बहुस्सुतस्स धुतवादिस्स न युत्तं पापकम्मं कातु”न्ति पापकम्मं न करोति । एवं हिरी अत्ताधिपतेय्या नाम होति । तेनाह भगवा —

“सो अत्तानंयेव अधिपतिं करित्वा अकुसलं पजहति, कुसलं भावेति, सावज्जं पजहति, अनवज्जं भावेति, सुद्धमत्तानं परिहरती”ति (अ० नि० ३.४०) ।

कथं ओत्तप्पं लोकाधिपतेय्यं नाम? इधेकच्चो कुलपुत्तो लोकं अधिपतिं जेट्ठकं कत्वा पापकम्मं न करोति । यथाह —

“महा खो पनायं लोकसन्निवासो । महन्तस्मिं खो पन लोकसन्निवासे सन्ति समणब्राह्मणा इद्धिमन्तो दिब्बचक्खुका परचित्तविदुनो, ते दूरतोपि पस्सन्ति, आसन्नापि न दिस्सन्ति, चेतसापि चित्तं पजानन्ति, तेपि मं एवं जानिस्सन्ति ‘पस्सथ भो इमं कुलपुत्तं, सद्भा अगारस्मा अनगारियं पब्बजितो समानो वोकिण्णो विहरति पापकेहि अकुसलेहि धम्महेही’ति । सन्ति देवता इद्धिमन्तिनियो दिब्बचक्खुका परचित्तविदुनियो, ता दूरतोपि पस्सन्ति, आसन्नापि न दिस्सन्ति, चेतसापि चित्तं पजानन्ति, तापि मं एवं जानिस्सन्ति ‘पस्सथ भो इमं, कुलपुत्तं, सद्भा अगारस्मा अनगारियं पब्बजितो समानो वोकिण्णो विहरति पापकेहि अकुसलेहि धम्महेही’ति । सो लोकंयेव अधिपतिं कत्वा अकुसलं पजहती”ति (अ० नि० ३.४०) ।

एवं लोकाधिपतेय्यं ओत्तप्पं ।

लज्जासभावसण्ठिताति एत्थ लज्जाति लज्जनाकारो, तेन सभावेन सण्ठिता हिरी । भयन्ति अपायभयं, तेन सभावेन सण्ठितं ओत्तप्पं । तदुभयं पापपरिवज्जने पाकटं होति । तत्थ यथा द्वीसु अयोगुळेसु एको सीतलो भवेय्य गूथमक्खितो, एको उण्हो आदित्तो । तेसु यथा सीतलं गूथमक्खितत्ता जिगुच्छन्तो विज्जुजातिको न गण्हाति, इतरं दाहभयेन, एवं पण्डितो लज्जाय जिगुच्छन्तो पापं न करोति, ओत्तप्पेन अपायभीतो पापं न करोति । एवं लज्जासभावसण्ठिता हिरी, भयसभावसण्ठितं ओत्तप्पं ।

कथं सप्पतिस्सवलक्खणा हिरी, वज्जभीरुकभयदस्साविलक्खणं ओत्तप्पं? एकच्चो हि जातिमहत्तपच्चवेक्खणा, सत्थुमहत्तपच्चवेक्खणा, दायज्जमहत्तपच्चवेक्खणा, सब्रह्मचारिमहत्तपच्चवेक्खणाति चतूहि कारणेहि तत्थ गारवेन सप्पतिस्सवलक्खणं हिरिं समुट्ठापेत्वा पापं न करोति, एकच्चो अत्तानुवादभयं, परानुवादभयं, दण्डभयं, दुग्गतिभयन्ति चतूहि कारणेहि वज्जतो भायन्तो वज्जभीरुकभयदस्साविलक्खणं ओत्तप्पं समुट्ठापेत्वा पापं न करोति । एत्थ च अज्झत्तसमुट्ठानादिता हिरोत्तप्पानं तत्थ तत्थ पाकटभावेन वुत्ता, न पन नेसं कदाचि अज्जमज्जविप्पयोगो । न हि लज्जनं निब्भयं, पापभयं वा अलज्जनं अत्थीति ।

इमे चे, भिक्खवे, द्वे सुक्का धम्मा लोकं न पालेय्युन्ति भिक्खवे, इमे द्वे अनवज्जधम्मा यदि लोकं न रक्खेय्युं, लोकपालका यदि न भवेय्युं । नयिथ पज्जायेथ माताति इध इमस्मिं लोके जनिका माता “अयं मे माता”ति गरुचिक्कीकारवसेन न पज्जायेथ, “अयं माता”ति न लब्धेय्य । सेसपदेसुपि एसेव नयो । मातुच्छाति मातुभगिनी । मातुलानीति मातुलभरिया । गरून्ति महापितुचूळपितुजेट्ठभातुआदीनं गरुडानियानं । सम्भेदन्ति सङ्करं, मरियादभेदं वा । यथा अजेळकातिआदीहि उपमं दस्सेति । एते हि सत्ता “अयं मे माता”ति वा “मातुच्छा”ति वा गरुचिक्कीकारवसेन न

जानन्ति, यं वत्थुं निस्साय उप्पन्ना, तत्थपि विप्पटिपज्जन्ति । तस्मा उपमं आहरन्तो अजेळकादयो आहरि । अयज्हेत्थ सङ्खेपत्थो — यथा अजेळकादयो तिरच्छाना हिरोत्तप्परहिता मातादिसज्जं अकत्वा भिन्नमरियादा सब्बत्थ सम्भेदेन वत्तन्ति, एवमयं मनुस्सलोको यदि लोकपालकधम्मा न भवेय्युं, सब्बत्थ सम्भेदेन वत्तेय्य । यस्मा पनिमे लोकपालकधम्मा लोकं पालेन्ति, तस्मा नत्थि सम्भेदोति ।

गाथासु **येसं चे हिरिओत्तप्पन्ति चेति** निपातमत्तं । **येसं** सत्तानं हिरि च ओत्तप्पज्ज सब्बदाव सब्बकालमेव न विज्जति न उपलब्धति । **वोक्कन्ता सुक्कमूला** तेति ते सत्ता कुसलमूलपच्छेदावहस्सापि कम्मस्स करणतो कुसलकम्मानं पतिट्ठानभूतानं हिरोत्तप्पानमेव वा अभावतो कुसलतो वोक्कमित्वा, अपसक्कित्वा, ठितत्ता वोक्कन्ता सुक्कमूला, पुनप्पुनं जायनमीयनसभावत्ता जातिमरणगामिनो संसारं नातिवत्तन्तीति अत्थो ।

येसज्ज हिरिओत्तप्पन्ति **येसं** पन परिसुद्धमतीनं सत्तानं हिरि च ओत्तप्पज्जाति इमे धम्मा सदा सब्बकालं रत्तिन्दिवं नवमज्झिमत्थेरकालेसु सम्मा उपगम्म ठिता पापा जिगुच्छन्ता भायन्ता तदङ्गादिवसेन पापं पजहन्ता । **विरूळहब्रह्मचरियाति** सासनब्रह्मचरिये मग्गब्रह्मचरिये च विरूळहं आपन्ना, अग्गमग्गाधिगमेन सब्बसो सन्तकिलेसताय सन्तगुणताय वा **सन्तो**, पुनब्भवस्स खेपितत्ता **खीणपुनब्भवा** होन्तीति ।

पञ्चमसुत्तवण्णना निट्ठिता ।

६. अजातसुत्तवण्णना

४३. छट्ठे अत्थि, भिक्खवेति का उप्पत्ति? एकदिवसं किर भगवता अनेकपरियायेन संसारे आदीनवं पकासेत्वा तदुपसमनादिवसेन निब्बानपटिसंयुत्ताय धम्मदेसनाय कताय भिक्खूनं एतदहोसि “अयं संसारो भगवता अविज्जादीहि कारणेहि सहेतुको वुत्तो, निब्बानस्स पन तदुपसमस्स न किञ्चि कारणं वुत्तं, तयिदं अहेतुकं कथं सच्चिकट्टपरमत्थेन उपलब्धती”ति । अथ भगवा तेसं भिक्खूनं विमतिविधमनत्थज्जेव, “इध समणब्राह्मणानं ‘निब्बानं निब्बानं’न्ति वाचावत्थुमत्तमेव, नत्थि हि परमत्थतो निब्बानं नाम अनुपलब्धमानसभावत्ता”ति लोकायतिकादयो विय विप्पटिपन्नानं बहिद्वा च पृथुदिट्ठिगतिकानं मिच्छावादभज्जनत्थज्ज, अमतमहानिब्बानस्स परमत्थतो अत्थिभावदीपनत्थं तस्स च निस्सरणभावादिआनुभाववन्ततादीपनत्थं पीतिवेगेन उदानवसेन इदं सुत्तं अभासि । तथा हि इदं सुत्तं उदानेपि (उदा० ७२-७४) सङ्गीतं ।

तत्थ **अत्थीति** विज्जति परमत्थतो उपलब्धति । **अजातं अभूतं अकतं असङ्खतन्ति** सब्बानिपि पदानि अज्जमज्जवेवचनानि । अथ वा वेदनादयो विय हेतुपच्चयसमवायसङ्खाताय कारणसामगिया न जातं न निब्बत्तन्ति **अजातं** । कारणेन विना सयमेव न भूतं न पातुभूतं न उप्पन्नन्ति **अभूतं** । एवं अजातत्ता अभूतत्ता च येन केनचि कारणेन न कतन्ति **अकतं** । जातभूतकतसभावो च नामरूपादीनं सङ्खतधम्मानं होति, न असङ्खतसभावस्स निब्बानस्साति दस्सनत्थं **असङ्खतन्ति** वुत्तं । पटिलोमतो वा समेच्च सम्भुय्य पच्चयेहि कतन्ति सङ्खतं, तथा न सङ्खतं, सङ्खतलक्खणरहितन्ति च **असङ्खतन्ति** एवं अनेकेहि कारणेहि निब्बत्तितभावे पटिसिद्धे “सिया नु खो एकेनेव कारणेन कत”न्ति आसङ्कायं “न केनचि कत”न्ति दस्सनत्थं “**अकतं**”न्ति वुत्तं । एवं अप्पच्चयम्पि समानं “सयमेव नु खो इदं भूतं पातुभूत”न्ति आसङ्कायं तन्निवत्तनत्थं “**अभूतं**”न्ति वुत्तं । अयज्ज एतस्स असङ्खताकताभूतभावो सब्बेन सब्बं अजातिधम्मत्ताति दस्सेतुं “**अजातं**”न्ति वुत्तन्ति । एवमेतेसं चतुन्मि पदानं सात्थकभावो वेदितब्बो ।

इति भगवा “अत्थि, भिक्खवे, अजातं अभूतं अकतं असङ्खतं”न्ति परमत्थतो निब्बानस्स अत्थिभावं वत्त्वा तत्थ हेतुं दस्सेन्तो “नो चेत्तं, भिक्खवे”तिआदिमाह। तस्सायं सङ्खेपो — भिक्खवे, यदि अजातादिसभावा असङ्खता धातु न अभविस्स न सिया, इध लोके जातादिसभावस्स रूपादिक्खन्धपञ्चकसङ्खातस्स सङ्खारगतस्स निस्सरणं अनवसेसवट्ठपसमो न पज्जायेय्य न उपलब्धेय्य न सम्भवेय्य। निब्बानज्झि आरम्मणं कत्वा पवत्तमाना सम्मादिट्ठिआदयो अरियमग्गधम्मा अनवसेसतो किलेसे समुच्छिन्दन्ति, तेनेत्थ सब्बस्सपि वट्ठदुक्खस्स अप्पवत्ति अपगमो निस्सरणं पज्जायति।

एवं व्यतिरेकवसेन निब्बानस्स अत्थिभावं दस्सेत्वा इदानीं अन्वयवसेनपि तं दस्सेतुं “यस्मा च खो”तिआदि वुत्तं, तं वुत्तत्थमेव। एत्थ च यस्मा “अपच्चया धम्मा, असङ्खता धम्मा (ध० स० दुक्कमातिका ७, ८)। अत्थि, भिक्खवे, तदायतनं, यत्थ नेव पथवी (उदा० ७१)। इदम्पि खो ठानं दुद्दसं यदिदं सब्बसङ्खारसमथो सब्बूपधिपटिनिस्सग्गो (महाव० ७; म० नि० १.२८१)। असङ्खतञ्च वो, भिक्खवे, धम्मं देसेस्सामि असङ्खतगामिनिञ्च पटिपद”न्तिआदीहि (सं० नि० ४.३६६) अनेकेहि सुत्तपदेहि “अत्थि, भिक्खवे, अजातं”न्ति इमिनापि सुत्तेन निब्बानधातुया परमत्थतो सत्त्वावो सब्बलोकं अनुकम्पमानेन सम्मासम्बुद्धेन देसितो, तस्मा न पटिक्खिपितब्बं। तत्थ अप्पच्चक्खकारीनम्पि विञ्जूनं कङ्खा वा विमति वा नत्थि एव। ये पन अबुद्धिपुग्गला, तेसं विमतिविनोदनत्थं अयमेत्थ अधिप्पायनिद्वारणमुखेन युत्तिविचारणा — यथा परिञ्जेय्यताय सउत्तरानं कामानं रूपानञ्च पटिपक्खभूतं तब्बिधुरसभावं निस्सरणं पज्जायति, एवं तंसभावानं सब्बेसं सङ्खतधम्मानं पटिपक्खभूतेन तब्बिधुरसभावेन निस्सरणेन भवितब्बं। यञ्चेत्तं निस्सरणं, सा असङ्खता धातु। किञ्च भिय्यो, सङ्खतधम्मारम्मणं विपस्सनाजाणं अपि अनुलोमजाणं किलेसे समुच्छेदवसेन पजहितुं न सक्कोति, तथा सम्मुतिसच्चारम्मणं पठमज्झानादीसु जाणं विक्खम्भनवसेनेव किलेसे पजहति, न समुच्छेदवसेन। इति सङ्खतधम्मारम्मणस्स सम्मुतिसच्चारम्मणस्स च जाणस्स किलेसानं समुच्छेदप्पहाने असमत्थभावतो तेसं समुच्छेदप्पहानकरस्स अरियमग्गजाणस्स तदुभयविपरीतसभावेन आरम्मणेन भवितब्बं, सा असङ्खता धातु। तथा “अत्थि, भिक्खवे, अजातं अभूतं अकतं असङ्खतं”न्ति इदं निब्बानस्स परमत्थतो अत्थिभावजोतकवचनं अविपरीतत्थं भगवता भासितत्ता। यज्झि भगवता भासितं, तं अविपरीतत्थं परमत्थन्ति यथा तं “सब्बे सङ्खारा अनिच्चा, सब्बे सङ्खारा दुक्खा, सब्बे धम्मा अनत्ता”ति (ध० प० २७७-२७९; चूळनि० हेमकमाणवपुच्छानिदेस ५६)। तथा निब्बानसद्दो कत्थचि विसये यथाभूतपरमत्थविसयो उपचारवुत्तिसत्त्वाभावतो सेय्यथापि सीहसद्दो। अथ वा अत्थेव परमत्थतो असङ्खताधातु इतरतब्बिपरीतविनिमुत्तसभावत्ता सेय्यथापि पथवीधातु वेदनाति। एवमादीहि नयेहि युत्तितोपि असङ्खताय धातुया परमत्थतो अत्थिभावो वेदितब्बो।

गाथासु जातन्ति जायनट्ठेन जातं, जातिलक्खणप्पत्तन्ति अत्थो। भूतन्ति भवनट्ठेन भूतं, अहुत्वा सम्भूतन्ति अत्थो। समुप्पन्नन्ति सहितभावेन उप्पन्नं, सहितेहि धम्मेहि च उप्पन्नन्ति अत्थो। कतन्ति कारणभूतेहि पच्चयेहि निब्बत्तितं। सङ्खतन्ति तेहियेव समेच्च सम्भुय्य कतन्ति सङ्खतं, सब्बमेतं पच्चयनिब्बत्तस्स अधिवचनं। निच्चसारादिविरहिततो अद्भुवं। जराय मरणेन च एकन्तेनेव सङ्खटितं संसट्ठन्ति जरामरणसङ्खातं। “जरामरणसङ्खट्ट”न्तिपि पठन्ति, जराय मरणेन च उपदुत्तं पीळितन्ति अत्थो। अक्खिरोगादीनं अनेकेसं रोगानं नीळं कुलावकन्ति रोगनीळं। सरसतो उपक्कमतो च पभङ्गुपरमसीलताय पभङ्गुरं।

चतुब्बिधो आहारो च तण्हासङ्खाता नेत्ति च पभवो समुट्ठानं एतस्साति आहारनेत्तिप्पभवं। सब्बोपि वा पच्चयो आहारो। इध पन तण्हाय नेत्तिग्गहणेन गहितत्ता तण्हावज्जा वेदितब्बा। तस्मा आहारो च नेत्ति च पभवो एतस्साति

आहारनेत्तिप्पभवं । आहारो एव वा नयनद्वेन पवत्तनद्वेन नेत्तीति एवम्पि आहारनेत्तिप्पभवं । **नालं तदभिनन्दितुं** तं उपादानक्खन्धपञ्चकं एवं पच्चयाधीनवृत्तिकं, ततो एव अनिच्चं, दुक्खञ्च तण्हादिद्वीहि अभिनन्दितुं अस्सादेतुं न युत्तं ।

तस्स निस्सरणन्ति “जातं भूतं”न्तिआदिना वुत्तस्स तस्स सक्कायस्स निस्सरणं निक्कमो अनुपसन्तसभावस्स रागादिकिलेसस्स सब्बसङ्खारस्स च अभावेन तदुपसमभावेन पसत्थभावेन च **सन्तं**, तक्कजाणस्स अगोचरभावतो **अतक्कावचरं**, निच्चद्वेन ध्रुवं, ततो एव **अजातं असमुप्पन्नं**, सोकहेतूनं अभावतो **असोकं**, विगतरागादिरजत्ता **विरजं**, संसारदुक्खद्वितेहि पटिपज्जितब्बत्ता **पदं**, जातिआदिदुक्खधम्मनं निरोधहेतुताय **निरोधो दुक्खधम्मनं**, सब्बसङ्खारानं उपसमहेतुताय **सङ्खारूपसमो**, ततो एव अच्चन्तसुखताय **सुखो**ति सब्बपदेहि अमतमहानिब्बानमेव थोमेति । एवं भगवा पठमगाथाय ब्यतिरेकवसेन, दुतियगाथाय अन्वयवसेन च निब्बानं विभावेसि ।

छट्टसुत्तवण्णना निड्डिता ।

७. निब्बानधातुसुत्तवण्णना

४४. सत्तमे **द्वेमा**ति द्वे इमा । **वानं** वुच्चति तण्हा, निक्खन्तं वानतो, नत्थि वा एत्थ वानं, इमस्मिं वा अधिगते वानस्स अभावोति निब्बानं, तदेव निस्सत्तनिज्जीवद्वेन सभावधारणद्वेन च धातूति **निब्बानधातु** । यदिपि तस्सा परमत्थतो भेदो नत्थि, परियायेन पन पज्जायतीति तं परियायभेदं सन्धाय “द्वेमा, भिक्खवे, निब्बानधातुयो”ति वत्त्वा यथाधिप्पेतप्पभेदं दस्सेतुं “**सउपादिसेसा**”तिआदि वुत्तं । तत्थ तण्हादीहि फलभावेन उपादीयतीति उपादि, खन्धपञ्चकं । उपादियेव सेसोति उपादिसेसो, सह उपादिसेसेनाति **सउपादिसेसा**, तदभावतो **अनुपादिसेसा** ।

अरहन्ति आरककिलेसो, दूरकिलेसोति अत्थो । वुत्तञ्हेतं भगवता —

“कथञ्च, भिक्खवे, भिक्खु अरहं होति, आरकास्स होन्ति पापका अकुसला धम्मा, संकिलेसिका पोन्नोब्भविका, सदरा दुक्खविपाका, आयतिं जातिजरामरणिाया । एवं खो, भिक्खवे, भिक्खु अरहं होती”ति (म० नि० १.४३४) ।

खीणासवोति कामासवादयो चत्तारोपि आसवा अरहतो खीणा समुच्छिन्ना पहीना पटिप्पस्सद्धा अभब्बुप्पत्तिका जाणग्गिना दड्ढाति खीणासवो । **वुसितवा**ति गरुसंवासेपि अरियमग्गेपि दससु अरियवासेसुपि वसि परिवसि परिवुट्ठो वुट्ठवासो चिण्णचरणोति वुसितवा । **कतकरणीयो**ति पुथुज्जनकल्याणकं उपादाय सत्त सेखा चतूहि मग्गेहि करणीयं करोन्ति नाम, खीणासवस्स सब्बकरणीयानि कतानि परियोसितानि, नत्थि उत्तरिं करणीयं दुक्खक्खयाधिगमायाति **कतकरणीयो** । वुत्तम्पि चेत्तं —

“तस्स सम्मा विमुत्तस्स, सन्तचित्तस्स भिक्खुनो ।

कतस्स पटिचयो नत्थि, करणीयं न विज्जती”ति ॥ (अ० नि० ६.५५; महाव० २४४) ।

ओहितभारोति तयो भारा — खन्धभारो, किलेसभारो, अभिसङ्खारभारोति । तस्सिमे तयोपि भारा ओहिता ओरोपिता निक्खित्ता पातित्ताति ओहितभारो । **अनुप्पत्तसदत्थो**ति अनुप्पत्तो सदत्थं, सकत्थन्ति वुत्तं होति, ककारस्स दकारो कतो । अनुप्पत्तो सदत्थो एतेनाति अनुप्पत्तसदत्थो, सदत्थोति च अरहत्तं वेदितब्बं । तज्झि अत्तुपनिबन्धद्वेन अत्तनो अविजहनद्वेन

अत्तनो परमत्थेन च अत्तनो अत्थत्ता सकत्थो होति । **परिक्खीणभवसंयोजनो**ति कामरागसंयोजनं, पटिघसंयोजनं, मानदिट्ठिविचिकिच्छासीलब्धतपरामासभवरारागइस्सामच्छरियअविज्जासंयोजनन्ति इमानि सत्ते भवेसु । भवं वा भवेन संयोजेन्ति उपनिबन्धन्तीति भवसंयोजनानि नाम । तानि अरहतो परिक्खीणानि, पहीनानि, जाणग्गिना, दङ्गानीति परिक्खीणभवसंयोजनो । **सम्मदञ्जा विमुत्तो**ति एत्थ **सम्मदञ्जा**ति सम्मा अञ्जाय, इदं वुत्तं होति — खन्धानं खन्धद्वं, आयतनानं आयतनद्वं, धातूनं सुञ्जद्वं, दुक्खस्स पीळनद्वं, समुदयस्स पभवद्वं, निरोधस्स सन्तद्वं, मग्गस्स दस्सनद्वं “सब्बे सङ्खारा अनिच्चा”ति एवमादिभेदं वा सम्मा यथाभूतं अञ्जाय जानित्वा तीरयित्वा तुलयित्वा विभावेत्वा विभूतं कत्वा । **विमुत्तो**ति द्वे विमुत्तियो चित्तस्स च विमुत्ति निब्बानञ्च । अरहा हि सब्बकिलेसेहि विमुत्तत्ता चित्तविमुत्तियापि विमुत्तो, निब्बानेपि विमुत्तोति । तेन वुत्तं “सम्मदञ्जा विमुत्तो”ति ।

तस्स तिदुत्तेव पञ्चिन्द्रियानीति तस्स अरहतो चरिमभवहेतुभूतं कम्मं याव न खीयति, ताव तिदुत्तियेव चक्खादीनि पञ्चिन्द्रियानि । **अविघातत्ताति** अनुप्पादनरोधवसेन अनिरुद्धत्ता । **मनापामनापन्ति** इट्ठानिद्वं रूपादिगोचरं । **पच्चनुभोतीति** विन्दति पटिलभति । **सुखदुक्खं पटिसंवेदेतीति** विपाकभूतं सुखञ्च दुक्खञ्च पटिसंवेदेति तेहि द्वारेहि पटिलभति ।

एत्तावता उपादिसेसं दस्सेत्वा इदानि सउपादिसेसं निब्बानधातुं दस्सेतुं “**तस्स यो**”तिआदि वुत्तं । तत्थ **तस्साति** तस्स सउपादिसेसस्स सतो अरहतो । **यो रागक्खयो**ति रागस्स खयो खीणाकारो अभावो अच्चन्तमनुप्पादो । एस नयो सेसेसुपि । एत्तावता रागादिक्खयो सउपादिसेसा निब्बानधातुं दस्सितं होति ।

इधेवाति इमस्मियेव अत्तभावे । **सब्बवेदयितानीति** सुखादयो सब्बा अब्याकतवेदना, कुसलाकुसलवेदना पन पुब्बेयेव पहीनाति । **अनभिनन्दितानीति** तण्हादीहि न अभिनन्दितानि । **सीतिभविस्सन्तीति** अच्चन्तवूपसमेन सङ्खारदरथपटिप्पस्सद्धिया सीतली भविस्सन्ति, अप्पटिसन्धिकनिरोधेन निरुज्झिस्सन्तीति अत्थो । न केवलं वेदयितानियेव, सब्बेपि पन खीणासवसन्ताने पञ्चक्खन्धा निरुज्झिस्सन्ति, वेदयितसीसेन देसना कता ।

गाथासु **चक्खुमताति** बुद्धचक्खु, धम्मचक्खु, दिब्बचक्खु, पञ्जाचक्खु, समन्तचक्खूति पञ्चहि चक्खूहि चक्खुमता । **अनिस्सितेनाति** तण्हादिट्ठिनिस्सयवसेन कञ्चि धम्मं अनिस्सितेन, रागबन्धनादीहि वा अबन्धेन । **तादिनाति** छळङ्गुपेक्खावसेन सब्बत्थ इट्ठादीसु एकसभावतासङ्गातेन तादिलक्खणेन तादिना । **दिदुधम्मिकाति** इमस्मिं अत्तभावे भवा वत्तमाना । **भवनेत्तिसङ्ख्याति** भवनेत्तिया तण्हाय परिक्खया । **सम्परायिकाति** सम्पराये खन्धभेदतो परभागे भवा । **यम्हीति** यस्मिं अनुपादिसेसनिब्बाने । **भवानीति** लिङ्गविपल्लासेन वुत्तं, उपपत्तिभवा सब्बसो अनवसेसा निरुज्झन्ति, न पवत्तन्ति ।

तेति ते एवं विमुत्तचित्ता । **धम्मसाराधिगमाति** विमुत्तिसारत्ता इमस्स धम्मविनयस्स, धम्मेसु सारभूतस्स अरहत्तस्स अधिगमनतो । **खयेति** रागादिक्खयभूते निब्बाने **रता** अभिरता । अथ वा निच्चभावतो सेट्ठभावतो च धम्मेसु सारन्ति धम्मसारं, निब्बानं । वुत्तज्हेतं “विरागो सेट्ठो धम्मानं (ध० प० २७३), विरागो तेसं अग्गमक्खायती”ति (इतिवु० ९०; अ० नि० ४.३४) च । तस्स धम्मसारस्स अधिगमहेतु खये सब्बसङ्खारपरिक्खये अनुपादिसेसनिब्बाने रता । **पहंसूति** पजहिंसु । तेति निपातमत्तं । सेसं वुत्तनयमेव ।

सत्तमसुत्तवण्णना निट्ठिता ।

८. पटिसल्लानसुत्तवण्णना

४५. अट्टमे पटिसल्लानरामाति तेहि तेहि सत्तसङ्खारेहि पटिनिवत्तित्वा सल्लानं पटिसल्लानं, एकविहारो एकमन्तसेविता, कायविवेकोति अत्थो । तं पटिसल्लानं रमन्ति रोचन्तीति पटिसल्लानरामा । “पटिसल्लानारामा”तिपि पाठो । यथा वुत्तं पटिसल्लानं आरमितब्बतो आरामो एतेसन्ति पटिसल्लानारामा । विहरथाति एवंभूता हुत्वा विहरथाति अत्थो । पटिसल्लाने रता निरता सम्मुदिताति पटिसल्लानरता । एत्तावता जागरियानुयोगो, तस्स निमित्तभूता वूपकट्टकायता च दस्सिता । जागरियानुयोगो, सीलसंवरो, इन्द्रियेसु, गुत्तद्वारता, भोजने मत्तञ्जुता, सतिसम्पजञ्जन्ति इमेहि धम्मोहि विना न वत्ततीति तेषि इध अत्थतो वुत्ता एवाति वेदितब्बा ।

अज्झत्तं चेतोसमथमनुयुत्ताति अत्तनो चित्तसमथे अनुयुत्ता । अज्झत्तं अत्तनोति च एतं एकत्थं, ब्यञ्जनमेव नानं । भुम्मत्थे चेतं समथन्ति अनुसद्दयोगेन उपयोगवचनं । अनिराकतज्झानाति बहि अनीहतज्झाना अविनासितज्झाना वा । नीहरणं विनासो वाति इदं निराकतं नाम “थम्भं निरंकत्वा निवातवुत्ती”ति आदीसु (सु० नि० ३२८) विय । विपस्सनाय समन्नागताति सत्तविधाय अनुपस्सनाय युत्ता । सत्तविधा अनुपस्सना नाम अनिच्चानुपस्सना, दुक्खानुपस्सना, अनत्तानुपस्सना, निब्बिदानुपस्सना, विरागानुपस्सना, निरोधानुपस्सना, पटिनिस्सगगानुपस्सना च, ता विसुद्धिमग्गे वित्थारिताव ।

ब्रूहेतारो सुज्जागारानन्ति वड्ढेतारो सुज्जागारानं । एत्थ च “सुज्जागारान”न्ति यंकिञ्चि विवित्तं भावनानुयोगस्स अनुच्छविकट्टानं । समथविपस्सनावसेन कम्मट्ठानं गहेत्वा रत्तिन्दिवं सुज्जागारं पविसित्वा भावनानुयोगवसेन निसीदमाना भिक्खू “ब्रूहेतारो सुज्जागारान”न्ति वेदितब्बा । एकभूमिकादिपासादेपि पन वासं कुरुमाना ज्ञायिनो सुज्जागारानं ब्रूहेतारोत्वेव वेदितब्बा ।

एत्थ च या “पटिसल्लानरामा, भिक्खवे, विहरथ पटिसल्लानरता”ति वूपकट्टकायता विहिता, सा परिसुद्धसीलस्स, न असीलस्स अविमुद्धसीलस्स वा तस्स रूपारम्मणादितो चित्तविनिवत्तनस्सेव अभावतोति अत्थतो सीलविसुद्धि दस्सिताति वुत्तोवायमत्थो । “अज्झत्तं चेतोसमथमनुयुत्ता अनिराकतज्झाना”ति पदद्वयेन समाधिभावना, “विपस्सनाय समन्नागता”ति इमिना पज्जाभावना विहिताति लोकिया तस्सो सिक्खा दस्सिता ।

इदानी तासु पतिट्ठितस्स अवस्संभाविफलं दस्सेतुं “पटिसल्लानरामान”न्ति आदि वुत्तं । तत्थ ब्रूहेतानन्ति वड्ढेतानं । द्विन्नं फलानन्ति ततियचतुत्थफलानं । पाटिकङ्कन्ति इच्छितब्बं अवस्संभावी । अज्जाति अरहत्तं । तज्हि हेट्ठिममग्गजाणेहि जातमरियादं अनतिक्कमित्वा जाननतो परिपुण्णजाननत्ता उपरि जाननकिच्चाभावतो च “अज्जा”ति वुच्चति । सति वा उपादिसेसेति सति वा किलेसूपादिसेसे, पहातुं असक्कुण्ये सति । जाणे हि अपरिपक्वे ये तेन परिपक्वेन पहातब्बकिलेसा, ते न पहीयन्ति । तं सन्धायाह “सति वा उपादिसेसे”ति । सति च किलेसे खन्धाभिसङ्खारा तिट्ठन्ति एव । इति इमस्मिं सुत्ते अनागामिफलं अरहत्तन्ति द्वे धम्मा दस्सिता । यथा चेत्थ, एवं इतो परेसु द्वीसु सुत्तेसु ।

गाथासु ये सन्तचित्ताति ये योगावचरा तदङ्गवसेन विक्खम्भनवसेव च समितकिलेसताय सन्तचित्ता । नेपक्कं वुच्चति पज्जा, ताय समन्नागतत्ता निपका । इमिना तेसं कम्मट्ठानपरिहरणजाणं दस्सेति । सतिमन्तो च ज्ञायिनोति ठाननिसज्जादीसु कम्मट्ठानाविजहनहेतुभूताय सतिया सतिमन्तो, आरम्मणूपनिज्झानलक्खणेन ज्ञानेन ज्ञायिनो । सम्मा धम्मं विपस्सन्ति, कामेसु अनपेक्खिनोति पुब्बेयेव “अट्ठिकङ्कलूपमा कामा”ति आदिना (म० नि० १.२३४; पाचि०

४१७) वत्थुकामेसु किलेसकामेसु च आदीनवपच्चवेक्खणेन अनपेक्खिनो अनत्थिका ते पहाय अधिगतं उपचारसमाधिं अप्पनासमाधिं वा पादकं कत्वा नामरूपं तस्स पच्चये च परिग्गहेत्वा कलापसम्मसनादिककमेन सम्मा अविपरीतं पच्चक्खन्धधम्मं अनिच्चादितो विपस्सन्ति ।

अप्पमादरताति वुत्तप्पकाराय समथविपस्सनाभावनाय अप्पमज्जने रता अभिरता तत्थ अप्पमादेनेव रत्तिन्दिवं वीतिनामेन्ता । **सन्ताति** समाना । “सत्ता”तिपि पाठो, पुग्गलाति अत्थो । **पमादे भयदस्सिनोति** निरयूपपत्तिआदिकं पमादे भयं पस्सन्ता । **अभब्बा परिहानायाति** ते एवरूपा समथविपस्सनाधम्मोहि मग्गफलेहि वा परिहानाय अभब्बा । समथविपस्सनातो हि सम्पत्ततो न परिहायन्ति, इतरानि च अप्पत्तानि पापुणन्ति । **निब्बानस्सेव सन्तिकेति** निब्बानस्स च अनुपादापरिनिब्बानस्स च सन्तिके एव, न चिरस्सेव नं अधिगमिस्सन्तीति ।

अट्टमसुत्तवण्णना निट्ठिता ।

९. सिक्खानिसंससुत्तवण्णना

४६. नवमे **सिक्खानिसंसाति** एत्थ सिक्खितब्बाति सिक्खा, सा तिविधा अधिसीलसिक्खा, अधिचित्तसिक्खा, अधिपञ्चासिक्खाति । तिविधापि चेसा सिक्खा आनिसंसा एतेसं, न लाभसक्कारसिलोकाति सिक्खानिसंसा । **विहरथाति** सिक्खानिसंसा हुत्वा विहरथ, तीसु सिक्खासु आनिसंसदस्साविनो हुत्वा ताहि सिक्खाहि लब्धब्बं आनिसंसमेव सम्पस्सन्ता विहरथाति अत्थो । **पञ्जुत्तराति** तासु सिक्खासु या अधिपञ्चासिक्खासङ्घाता पञ्जा, सा उत्तरा पधाना विसिद्धा एतेसन्ति पञ्जुत्तरा । ये हि सिक्खानिसंसा विहरन्ति, ते पञ्जुत्तरा भवन्तीति । **विमुत्तिसाराति** अरहत्तफलसङ्घाता विमुत्ति सारं एतेसन्ति विमुत्तिसारा, यथावुत्तं विमुत्तियेव सारतो गहेत्वा ठिताति अत्थो । ये हि सिक्खानिसंसा पञ्जुत्तरा च, न ते भवविसेसं पत्थेन्ति, अपिच खो विभवं आकङ्खन्ता विमुत्तियेव सारतो पच्चेन्ति । **सताधिपतेय्याति** जेड्ढककरणट्टेन सति अधिपतेय्यं एतेसन्ति सताधिपतेय्या अधिपति एव अधिपतेय्यन्ति कत्वा, चतूसु सतिपट्टानेसु सुप्पतिट्ठितचित्ता कायानुपस्सनादिमुखेन समथविपस्सनाभावनानुयुत्ताति अत्थो ।

अथ वा **सिक्खानिसंसाति** भिक्खवे, एवरूपे दुल्लभक्खणपटिलाभे तिविधसिक्खासिक्खनमेव आनिसंसं कत्वा विहरथ, एवं विहरन्ता च **पञ्जुत्तरा** पञ्जाय उत्तरा लोकुत्तरपञ्जाय समन्नागता हुत्वा विहरथ, एवंभूता च **विमुत्तिसारा** निब्बानसारा अनज्जसारा विहरथ । तथाभावस्स चायं उपायो, यं **सताधिपतेय्या** विहरथ, सतिपट्टानभावनाय युत्तप्पयुत्ता होथ, सब्बत्थ वा सतारक्खेन चेतसा विहरथाति एवमेत्थ अत्थो वेदितब्बो । इति भगवा तीसु सिक्खासु भिक्खू नियोजेन्तो यथा ता सिक्खितब्बा, येन च पारिपूरिं गच्छन्ति, तं सङ्खेपेनेव दस्सेत्वा इदानि यथानुसिद्धं पटिपज्जमानानं फलविसेसदस्सनेन तस्सा पटिपत्तिया अमोघभावं पकासेन्तो “**सिक्खानिसंसान**”न्तिआदिमाह । तं वुत्तथमेव ।

गाथासु **परिपुण्णसिक्खन्ति** अग्गफलप्पत्तिया परिसुद्धसिक्खं, असेक्खन्ति अत्थो । **अपहानधम्मन्ति** एत्थ पहानधम्मा वुच्चन्ति कुप्पा विमुत्तियो । पहानधम्मोति हि हानधम्मो कुप्पधम्मो । न पहानधम्मोति अपहानधम्मो, अकुप्पधम्मो । “अप्पहानधम्मो”तिपि पाळि, सो एव अत्थो । खयो एव अन्तोति खयन्तो, जातिया खयन्तो जातिखयन्तो, निब्बानं । खयो वा मरणं, जातिखयन्तो निब्बानमेव, तस्स दिट्ठत्ता **जातिखयन्तदस्सी** ।

तस्माति यस्मा सिक्खापारिपूरिया अयं जरापारङ्गमनपरियोसानो आनिसंसो, तस्मा । **सदाति** सब्बकालं । **ज्ञानरताति**

लक्खणूपनिज्झाने, आरम्मणूपनिज्झानेति दुविधेपि ज्ञाने रता, ततो एव समाहिता। मारं ससेनं अभिभुय्याति किलेससेनाय अनट्ठसेनाय च ससेनं अनवसिट्ठं चतुब्बिधम्मि मारं अभिभवित्वा। देवपुत्तमारस्सपि हि गुणमारणे सहायभावूपगमनतो किलेसा “सेना”ति वुच्चन्ति। तथा रोगादयो अनट्ठा मच्चुमारस्स। यथाह —

“कामा ते पठमा सेना, दुतिया अरति वुच्चति।
ततिया खुप्पिपासा ते, चतुत्थी तण्हा पवुच्चति॥

“पञ्चमी थिनमिद्धं ते, छट्ठा भीरू पवुच्चति।
सत्तमी विचिकिच्छा ते, मक्खो थम्भो च अट्ठमो॥

“लाभो सिलोको सक्कारो, मिच्छालब्धो च यो यसो।
यो चत्तानं समुक्कंसे, परे च अवजानति॥

“एसा नमुचि ते सेना, कण्हस्साभिप्पहारिनी।
न नं असूरो जिनाति, जेत्वा च लभते सुखं”न्ति॥ (सु० नि० ४३८-४४१; महानि० २८)।

यथा चाह —

“अज्जेव किच्चमातप्पं, को जज्जा मरणं सुवे।
न हि नो सङ्गरं तेन, महासेनेन मच्चुना”ति॥ (म० नि० ३.२८०; जा० २.२२.१२१)।

भवथ जातिमरणस्स पारगाति जातिया मरणस्स च पारगामिनो निब्बानगामिनो भवथाति।

नवमसुत्तवण्णना निट्ठिता।

१०. जागरियसुत्तवण्णना

४७. दसमे जागरोति जागरको विगतनिदो जागरियं अनुयुत्तो, रत्तिन्दिवं कम्मट्ठानमनसिकारे युत्तप्पयुत्तोति अत्थो। वुत्तज्हेतं —

“कथञ्च, भिक्खवे, भिक्खु पुब्बरत्तापररत्तं जागरियानुयोगमनुयुत्तो होति? इध भिक्खु दिवसं चङ्कमेन निसज्जाय आवरणीयेहि धम्मोहि चित्तं परिसोधेति, रत्तिया पठमं यामं चङ्कमेन निसज्जाय आवरणीयेहि धम्मोहि चित्तं परिसोधेति, रत्तिया मज्झिमं यामं दक्खिणेन पस्सेन सीहसेय्यं कप्पेति पादे पादं अच्छाधाय सतो सम्पजानो उट्ठानसज्जं मनसि करित्वा, रत्तिया पच्छिमं यामं पच्चुट्ठाय चङ्कमेन निसज्जाय आवरणीयेहि धम्मोहि चित्तं परिसोधेति। एवं भिक्खु पुब्बरत्तापररत्तं जागरियानुयोगमनुयुत्तो होती”ति (विभ० ५१९)।

चसदो सम्पिण्डनत्थो, तेन वक्खमाने सतादिभावे सम्पिण्डेति। अस्साति सिया, भवेय्याति अत्थो। “जागरो च भिक्खु विहरेय्या”ति च पठन्ति। सब्बत्थ सब्बदा च कम्मट्ठानाविजहनवसेन सतिअविप्पवासेन सतो सम्पजानोति सत्तट्ठानियस्स चतुब्बिधस्सपि सम्पजज्जस्स वसेन सम्पजानो। समाहितोति उपचारसमाधिना अप्पनासमाधिना च समाहितो

एकगचितो । पमुदितोति पटिपत्तिया आनिसंसदस्सनेन उत्तरुत्तरि विसेसाधिगमेन वीरियारम्भस्स च अमोघभावदस्सनेन पमुदितो पामोज्जबहुलो । विप्पसन्नोति ततो एव पटिपत्तिभूतासु तीसु सिक्खासु पटिपत्तिदेसके च सत्थरि सद्भाबहुलताय सुट्ठु पसन्नो । सब्बत्थ अस्साति सम्बन्धो विहरेय्याति वा ।

तत्थ कालविपस्सी च कुसलेसु धम्मेषूति तस्मिं काले विपस्सको, तत्थ वा कम्मट्ठानानुयोगे कालविपस्सी कालानुरूपं विपस्सको । किं वुत्तं होति? विपस्सनं पट्टपेत्वा कलापसम्मसनादिवसेन सम्मसन्तो आवासादिके सत्त असप्पाये वज्जेत्वा सप्पाये सेवन्तो अन्तरा वोसानं अनापज्जित्वा पहितत्तो चित्तस्स समाहिताकारं सल्लक्खन्तो सक्कच्चं निरन्तरं अनिच्चानुपस्सनादिं पवत्तेन्तो यस्मिं काले विपस्सनाचित्तं लीनं होति, तस्मिं धम्मविचयवीरियपीतिसङ्घातेसु, यस्मिं पन काले चित्तं उद्धतं होति, तस्मिं पस्सद्विसमाधिउपेक्खासङ्घातेसु कुसलेसु अनवज्जेसु बोज्झङ्गधम्मेषूति एवं तत्थ तस्मिं तस्मिं काले, तस्मिं वा कम्मट्ठानानुयोगे कालानुरूपं विपस्सको अस्साति । सतिसम्बोज्झङ्गो पन सब्बत्थेव इच्छितब्बो । वुत्तहेतं “सतिञ्च ख्वाहं, भिक्खवे, सब्बत्थिकं वदामी”ति (सं० नि० ५.२३४; मि० प० २.१.१३) । एत्तावता पुग्गलाधिट्ठानाय देसनाय जागरियं दस्सेत्वा येहि धम्महि जागरियानुयोगो सम्पज्जति, ते पकासेति ।

एवं भगवा आरद्धविपस्सकस्स भिक्खुनो सङ्खेपेनेव सद्धि उपकारकधम्महि सम्मसनचारं दस्सेत्वा इदानीं तथा पटिपज्जन्तस्स पटिपत्तिया अवज्झभावं दस्सेन्तो “जागरस्स, भिक्खवे, भिक्खुनो”तिआदिमाह । तत्थ जागरियानुयोगे सतिसम्पज्जसमादानानि सब्बत्थकानि सम्मोदपसादावहानि, तत्थ कालविपस्सना नाम विपस्सनाय गम्भग्गहणं परिपाकगतं । उपक्किलेसविमुत्ते हि वीथिपटिपन्ने विपस्सनाजाणे तिक्खे सूरे वहन्ते योगिनो उळारं पामोज्जं पसादो च होति, तेहि च विसेसाधिगमस्स सन्तिकेयेव । वुत्तहेतं —

“यतो यतो सम्मसति, खन्धानं उदयब्बयं ।
लभती पीतिपामोज्जं, अमतं तं विजानतं ॥

“पामोज्जबहुलो भिक्खु, पसन्नो बुद्धसासने ।
अधिगच्छे पदं सन्तं, सङ्खारूपसमं सुखं”न्ति ॥ (ध० प० ३७४, ३८१) ।

गाथासु जागरन्ता सुणाथेतन्ति एतं मम वचनं एकन्तेनेव पमादिनिहाय अविज्जानिहाय पबोधनत्थं जागरन्ता सतिसम्पज्जज्जादिधम्मसमायोगेन जागरियं अनुयुत्ता सुणाथ । ये सुत्ता ते पबुज्झथाति ये यथावुत्तनिहाय सुत्ता सुपनं उपगता, ते तुम्हे जागरियानुयोगवसेन इन्द्रियबलबोज्झङ्गे सङ्कट्टित्वा विपस्सनं उस्सुक्कापेन्ता अप्पमादपटिपत्तिया ततो पबुज्झथ अथ वा जागरन्ताति जागरनिमित्ता । “सुणाथेत”न्ति एत्थ “एत”न्ति वुत्तं, किं तं वचनन्ति आह “ये सुत्ता ते पबुज्झथा”तिआदि । तत्थ ये सुत्ताति ये किलेसनिहाय सुत्ता, ते तुम्हे अरियमग्गपटिबोधेन पबुज्झथ । सुत्ता जागरितं सेय्योति इदं पबोधस्स कारणवचनं । यस्मा यथावुत्तसुपतो वुत्तप्पकारं जागरितं जागरणं अत्थकामस्स कुलपुत्तस्स सेय्यो पासंसतरो हितसुखावहो, तस्मा पबुज्झथ । नत्थि जागरतो भयन्ति इदं तत्थ आनिसंसदस्सनं । यो हि सद्भादीहि जागरणधम्महि समन्नागमेन जागरो जग्गति, पमादिनिदं न उपगच्छति, तस्स अत्तानुवादभयं परानुवादभयं दण्डभयं दुग्गतिभयं जातिआदिनिमित्तं सब्बम्पि वट्ठभयं नत्थि ।

कालेनाति आवाससप्पायादीनं लद्धकालेन । सोति निपातमतं । सम्मा धम्मं परिवीमंसमानोति विपस्सनाय आरम्भणभूतं तेभूमकधम्मं सम्मा जायेन यथा निब्बिन्दनविरज्जनादयो सम्भवन्ति, एवं परितो वीमंसन्तो, सब्बाकारेन

विपस्सन्तोति अत्थो । **एकोदिभूतो**ति एको सेट्ठो हुत्वा उदेतीति एकोदि, समाधि । सो एकोदि भूतो जातो उप्पन्नो एतस्साति एकोदिभूतो । अग्गिआहितादिसद्धानं विय एत्थ भूतसदस्स परवचनं दट्ठब्बं । एकोदिं वा भूतो पत्तोति एकोदिभूतो । एत्थ च एकोदीति मग्गसमाधि अधिप्पेतो, “समाहितो”ति एत्थ पन पादकज्झानसमाधिना सद्धिं विपस्सनासमाधि । अथ वा **कालेना**ति मग्गपटिवेधकालेन । **सम्मा धम्मं परिवीमंसमानो**ति सम्मदेव चतुसच्चधम्मं परिज्जाभिसमयादिवसेन वीमंसन्तो, एकाभिसमयेन अभिसमेन्तो । **एकोदिभूतो**ति एको सेट्ठो असहायो वा हुत्वा उदेतीति एकोदि, चतुकिच्चसाधको सम्मप्पधानो । सो एकोदि भूतो जातोति सब्बं पुरिमसदिसमेव । **विहने तमं सो**ति सो एवंभूतो अरियसावको अरहत्तमग्गेन अविज्जातमं अनवसेसतो विहनेय्य समुच्छिन्देय्य ।

इति भगवा पटिपत्तिया अमोघभावं दस्सेत्वा इदानीं तत्थ दळ्हं नियोजेन्तो “**तस्मा हवे**”ति ओसानगाथमाह । तत्थ **तस्मा**ति यस्मा जागरतो सतिअविप्पवासादिना समथविपस्सनाभावना पारिपूरिं गच्छति, अनुक्कमेन अरियमग्गो पातुभवति, ततो चस्स सब्बं वट्ठभयं नत्थि, तस्मा । **हवे**ति एकंसेन दळ्हं वा । **भजेथा**ति भजेय्य । एवं जागरियं भजन्तो च आतापिभावादигुणयुतो भिक्खु संयोजनानि भिन्दित्वा अग्गफलजाणसङ्घातं **अनुत्तरं** उत्तररहितं **सम्बोधिं** **फुसे** पापुणेय्य । सेसं वुत्तनयमेव ।

दसमसुत्तवण्णना निट्ठिता ।

११. आपायिकसुत्तवण्णना

४८. एकादसमे **आपायिका**ति अपाये निब्बत्तिस्सन्तीति आपायिका । तत्थापि निरये निब्बत्तिस्सन्तीति **नेरयिका** । **इदमप्पहाया**ति इदं इदानीं वक्खमानं दुविधं पापसमाचारं अप्पजहित्वा, तथापटिपत्तितथापग्गहणवसेन पवत्तं वाचं चित्तं दिट्ठिच्च अप्पटिनिस्सज्जित्वाति अत्थो । **अब्रह्मचारी**ति ब्रह्मसेट्ठं चरतीति ब्रह्मचारी, ब्रह्मा वा सेट्ठो आचारो एतस्स अत्थीति ब्रह्मचारी, न ब्रह्मचारीति अब्रह्मचारी, ब्रह्मचारिपटिरूपको दुस्सीलोति अत्थो । **ब्रह्मचारिपटिज्जो**ति “ब्रह्मचारी अह”न्ति एवंपटिज्जो । **परिपुण्णन्ति** अखण्डादिभावेन अविकलं । **परिसुद्धन्ति** उपक्किलेसाभावेन परिसुद्धं । **अमूलकेना**ति दिट्ठादिमूलविरहितेन, दिट्ठं सुतं परिसङ्कितन्ति इमेहि चोदनामूलेहि वज्जितेन । **अब्रह्मचरियेन** असेट्ठचरियेन । **अनुद्धंसेतीति** “परिसुद्धो अय”न्ति जानन्तोव पाराजिकवत्थुना धंसेति पधंसेति, चोदेति अक्कोसति वा ।

गाथासु **अभूतवादी**ति परस्स दोसं अदिस्वाव अभूतेन तुच्छेन मुसावादं कत्वा परं अब्भाचिक्खन्तो । **कत्वा**ति यो वा पन पापकम्मं कत्वा “नाहं एतं करोमी”ति आह । **उभोपि ते पेच्च समा भवन्तीति** ते उभोपि जना इतो परलोकं गन्त्वा निरयं उपगमनतो गतिया समाना भवन्ति । तत्थ गतियेव नेसं परिच्छिन्ना, न पन आयु । बहुज्झि पापं कत्वा चिरं निरये पच्चति, परित्तं कत्वा अप्पमत्तकमेव कालं । यस्मा पन तेसं उभिन्नम्पि कम्मं लामकमेव । तेन वुत्तं “**निहीनकम्मा मनुजा परत्था**”ति । “परत्था”ति पन पदस्स पुरतो “पेच्चा”ति पदेन सम्बन्धो — परत्थ पेच्च इतो गन्त्वा ते निहीनकम्मा समा भवन्तीति ।

एवं भगवा अभूतब्भक्खानवसेन भूतदोसपटिच्छादनवसेन च पवत्तस्स मुसावादस्स विपाकं दस्सेत्वा इदानीं तस्मिं ठाने निसिन्नानं बहूनं पापभिक्खूनं दुच्चरितकम्मस्स विपाकदस्सनेन संवेजनत्थं द्वे गाथा अभासि । तत्थ **कासावकण्ठा**ति कसावरसपीतत्ता कासावेन वत्थेन पलिवेठितकण्ठा । **पापधम्मा**ति लामकधम्मा । **असज्जता**ति कायादीहि सज्जमरहिता । **पापा**ति तथारूपा पापपुग्गला, पापेहि कम्मेहि उपपज्जित्वा “तस्स कायोपि आदित्तो सम्पज्जलितो सजोतिभूतो, सङ्घाटिपि

आदिता'तिआदिना (सं० नि० २.२१८-२१९; पारा० २३०) लक्खणसंयुत्ते वुत्तनयेन महादुक्खं अनुभवन्ति येव ।

ततियगाथाय अयं सङ्खेपत्थो — **यज्जे भुज्जेय्य दुस्सीलो** निस्सीलपुग्गलो कायादीहि असज्जतो रट्ठवासीहि सद्भाय दिन्नं यं रट्ठपिण्डं “समणोम्ही”ति पटिजानन्तो गहेत्वा भुज्जेय्य, ततो आदिता अग्गिवण्णो अयोगुळोव भुत्तो सेय्यो सुन्दरतरो । किंकारणा? तप्पच्चया हिस्स एकोव अत्तभावो ज्ञायेय्य, दुस्सीलो पन हुत्वा सद्भादेय्यं भुज्जित्वा अनेकानिपि जातिसतानि निरये उप्पज्जेय्याति ।

एकादसमसुत्तवण्णना निट्ठिता ।

१२. दिट्ठिगतसुत्तवण्णना

४९. द्वादसमे द्वीहि दिट्ठिगतेहीति एत्थ दिट्ठियोव दिट्ठिगतानि “गूथगतं मुत्तगत”न्तिआदीसु (अ० नि० ९.११) विय । गहिताकारसुज्जताय वा दिट्ठिनं गतमत्तानीति दिट्ठिगतानि, तेहि दिट्ठिगतेहि । **परियुट्ठिताति** अभिभूता पलिबुद्धा वा । पलिबोधत्थो वापि हि परियुट्ठानसद्वो “चोरा मग्गे परियुट्ठिसू”तिआदीसु (चूळव० ४३०) विय । **देवाति** उपपत्तिदेवा । ते हि दिब्बन्ति उळारतमेहि कामगुणेहि ज्ञानादीहि च कीळन्ति, इद्धानुभावेन वा यथिच्छित्तमत्थं गच्छन्ति अधिगच्छन्तीति च देवाति वुच्चन्ति । मनस्स उस्सन्नत्ता मनुस्सा, उक्कट्टनिद्वेसवसेन चेतं वुत्तं यथा “सत्था देवमनुस्सान”न्ति । **ओलीयन्ति एकेति** “सस्सतो अत्ता च लोको चा”ति भवेसु ओलीयनाभिनिवेसभूतेन सस्सतभावेन एकच्चे देवा मनुस्सा च अवलीयन्ति अल्लीयन्ति सङ्कोचं आपज्जन्ति, न ततो निस्सरन्ति । **अतिधावन्तीति** परमत्थतो भिन्नसभावानम्पि सभावधम्मानं ख्यायं हेतुफलभावेन सम्बन्धो, तं अगगहेत्वा नानत्तनयस्सपि गहणेन तत्थ तत्थेव धावन्ति, तस्मा “उच्छिज्जति अत्ता च लोको च, न होति परं मरणा”ति उच्छेदे वा भवनिरोधपटिपत्तिया पटिक्खेपधम्मत्तं अतिधावन्ति अतिक्कमन्ति । **चक्खुमन्तो च पस्सन्तीति** चसद्वो ब्यतिरेके । पुब्बयोगसम्पत्तिया जाणपरिपाकेन पज्जाचक्खुमन्तो पन देवमनुस्सा तेनेव पज्जाचक्खुना सस्सतं उच्छेदज्ज अन्तद्वयं अनुपगम्म मज्झिमपटिपत्तिदस्सनेन पच्चक्खं करोन्ति । ते हि “नामरूपमत्तमिदं पटिच्चसमुप्पन्नं, तस्मा न सस्सतं, नापि उच्छिज्जती”ति अविपरीततो पस्सन्ति ।

एवं ओलीयनादिके पुग्गलाधिद्वानेन उद्दिसितुं “**कथज्ज, भिक्खवे**”तिआदि वुत्तं । तत्थ **भवाति** कामभवो, रूपभवो, अरूपभवो । अपरेपि तयो भवा सज्जीभवो, असज्जीभवो, नेवसज्जीनासज्जीभवो । अपरेपि तयो भवा एकवोकारभवो, चतुवोकारभवो, पच्चवोकारभवोति । एतेहि भवेहि आरमन्ति अभिनन्दन्तीति **भवारागा** । भवेसु रता अभिरताति **भवरता** । भवेसु सुट्ठु मुदिताति **भवसम्मुदिता** । **भवनिरोधायाति** तेसं भवानं अच्चन्तनिरोधाय अनुप्पादनत्थाय । **धम्मे देसियमानेति** तथागतप्पवेदिते नित्यानिकधम्मे वुच्चमाने । **न पक्खन्दतीति** सस्सताभिनिविट्ठत्ता संखित्तधम्मत्ता न पविसति न ओगाहति । **न पसीदतीति** पसादं नापज्जति न तं सद्वहति । **न सन्तिट्ठतीति** तस्सं देसनायं न तिट्ठति नाधिमुच्चति । एवं सस्सततो अभिनिविसनेन भवेसु ओलीयन्ति ।

अट्ठीयमानाति भवे जरारोगमरणादीनि वधबन्धनच्छेदनादीनि च दिस्वा संविज्जनेन तेहि समङ्गिभावेन भवेन पीळियमाना दुक्खापियमाना । **हरायमानाति** लज्जमाना **जिगुच्छमानाति** पटिकूलतो दहन्ता । **विभवन्ति उच्छेदं** । **अभिनन्दन्तीति** तण्हादिट्ठाभिनन्दनाहि अज्झोसाय नन्दन्ति । **यतो किर भोति**आदि तेसं अभिनन्दनाकारदस्सनं । तत्थ **यतोति** यदा । **भोति** आलपनं । **अयं अत्ताति** कारकादिभावेन अत्तना परिकप्पितं सन्धाय वदति । **उच्छिज्जतीति** उपच्छिज्जति । **विनस्सतीति** न दिस्सति, विनासं अभावं गच्छति । **न होति परं मरणाति** मरणेन उद्धं न भवति । **एतं**

सन्तन्ति यदेतं अत्तनो उच्छेदादि, एतं सब्भववूपसमतो सब्बसन्तापवूपसमतो च सन्तं, सन्तत्ता एव पणीतं, तच्छाविपरीतभावतो याथावं । तत्थ “सन्तं पणीत”न्ति इदं द्वयं तण्हाभिनन्दनाय वदन्ति, “याथावं”न्ति दिट्ठाभिनन्दनाय । एवन्ति एवं यथावुत्तउच्छेदाभिनिवेसनेन ।

भूतन्ति खन्धपञ्चकं । तज्झि पच्चयसम्भूतत्ता परमत्थतो विज्जमानत्ता च भूतन्ति वुच्चति । तेनाह “भूतमिदं, भिक्खवे, समनुपस्सथा”ति (म० नि० १.४०१) । भूततो अविपरीतसभावतो सलक्खणतो सामञ्जलक्खणतो च पस्सति । इदज्झि खन्धपञ्चकं नामरूपमत्तं । तत्थ “इमे पथवीआदयो धम्मा रूपं, इमे फस्सादयो धम्मा नामं, इमानि नेसं लक्खणादीनि, इमे नेसं अविज्जादयो पच्चया”ति एवं सपच्चयनामरूपदस्सनवसेन चेव, “सब्बेपिमे धम्मा अहुत्वा सम्भोन्ति, हुत्वा पटिवेन्ति, तस्मा अनिच्चा, अनिच्चत्ता दुक्खा, दुक्खत्ता अनत्ता”ति एवं अनिच्चानुपस्सनादिवसेन च पस्सतीति अत्थो । एत्तावता तरुणविपस्सनापरियोसाना विपस्सनाभूमि दस्सिता । निब्बिदायाति भूतसङ्घातस्स तेभूमकधम्मजातस्स निब्बिन्दनत्थाय, एतेन बलवविपस्सनं दस्सेति । विरागायाति विरागत्यं विरज्जनत्थं, इमिना मग्गं दस्सेति । निरोधायाति निरुज्जनत्थं, इमिनापि मग्गमेव दस्सेति । निरोधायाति वा पटिप्पस्सद्धिनिरोधेन सद्धिं अनुपादिसेसनिब्बानं दस्सेति । एवं खो, भिक्खवे, चक्खुमन्तो पस्सन्तीति एवं पज्जाचक्खुमन्तो सपुब्बभागेन मग्गपज्जाचक्खुना चतुसच्चधम्मं पस्सन्ति ।

गाथासु ये भूतं भूततो दिस्वाति ये अरियसावका भूतं खन्धपञ्चकं भूततो अविपरीतसभावतो विपस्सनापज्जासहिताय मग्गपज्जाय दिस्वा । एतेन परिज्जाभिसमयं दस्सेति । भूतस्स च अतिक्कमन्ति भावनाभिसमयं । अरियमग्गो हि भूतं अतिक्कमति एतेनाति “भूतस्स अतिक्कमो”ति वुत्तो । यथाभूतेति अविपरीतसच्चसभावे निब्बाने । विमुच्चन्ति अधिमुच्चन्ति, एतेन सच्छिकिरियाभिसमयं दस्सेति । भवतण्हापरिक्खयाति भवतण्हाय सब्बसो खेपना समुच्छिन्दनतो, एतेन समुदयप्पहानं दस्सेति ।

सवे भूतपरिज्जो सोति एत्थ पन सवेति निपातमत्तं । सो भूतपरिज्जो भूतस्स अतिक्कमनूपायेन मग्गेन भवतण्हापरिक्खया परिज्जातक्खन्धो ततो एव यथाभूते निब्बाने अधिमुत्तो । भवाभवेति खुद्दके चेव महन्ते च, उच्छेदादिदस्सने वा वीततण्हो भिन्नकिलेसो । भिक्खु भूतस्स उपादानक्खन्धसङ्घातस्स अत्तभावस्स विभवा, आयतिं अनुप्पादा पुनब्भवं नागच्छति, अपज्जत्तिकभावमेव गच्छतीति अनुपादिसेसाय निब्बानधातुया देसनं निट्ठापेसि ।

इति इमस्मिं वग्गे एकादसमे वट्ठं कथितं, ततियचतुत्थपञ्चमेसु परियोसानसुत्ते च वट्ठिविवट्ठं कथितं, सेसेसु विवट्ठमेवाति वेदितब्बं ।

द्वादसमसुत्तवण्णना निट्ठिता ।

परमत्थदीपनिया खुद्दकनिकाय-अट्ठकथाय

इतिवुत्तकस्स दुक्कनिपातवण्णना निट्ठिता ।

३. तिकनिपातो

१. पठमवग्गो

१. मूलसुत्तवण्णना

५०. तिकनिपातस्स पठमे तीणीति गणनपरिच्छेदो । इमानीति अभिमुखीकरणं । अकुसलमूलानीति परिच्छिन्नधम्मनिदस्सनं । तत्थ अकुसलानि च तानि मूलानि चाति अकुसलमूलानि । अथ वा अकुसलानं हेतुपच्चयपभवजनकसमुद्वापकनिब्बत्तकट्टेन मूलानि चाति अकुसलमूलानि, अकुसलधम्मनं कारणानीति अत्थो । कारणज्झि यथा हिनोति एतस्मा फलं पवत्ततीति हेतु, पटिच्च एतस्मा एतीति पच्चयो, पभवति एतस्माति पभवो, अत्तनो फलं जनेतीति जनकं, समुद्वापेतीति समुद्वापकं, निब्बत्तेतीति निब्बत्तकन्ति च वुच्चति । एवं पतिट्ठेन मूलन्ति, तस्मा अकुसलमूलानीति अकुसलानं सुप्पतिट्ठितभावसाधनानि, कारणानीति वुत्तं होति ।

केचि पन “सालिआदीनं सालिबीजादीनि विय मणिप्पभादीनं मणिवण्णादयो विय च अकुसलानं अकुसलभावसाधको लोभादीनं मूलट्ठो”ति वदन्ति । एवं सन्ते अकुसलचित्तसमुद्धानरूपेसु तेसं हेतुपच्चयभावो न सिया । न हि तानि तेसं अकुसलभावं साधेन्ति, न च पच्चया न होन्ति । वुत्तज्जेतं —

“हेतू हेतुसम्पयुत्तकानं धम्मनं तंसमुद्धानानञ्च रूपानं हेतुपच्चयेन पच्चयो”ति (पट्ठा० १.पच्चयनिद्देस.१) ।

अहेतुकस्स च मोहस्स अकुसलभावो न सिया अकुसलभावसाधकस्स मूलन्तरस्स अभावतो । अथापि सिया लोभादीनं सभावसिद्धो अकुसलादिभावो, तंसम्पयुत्तानं पन लोभादिपटिबद्धोति । एवम्पि यथा लोभादीनं, एवं अलोभादीनम्पि सभावसिद्धो कुसलादिभावोति अलोभादयो कुसला एव सियुं, न अब्याकता, न च होन्ति । तस्मा यथा सम्पयुत्तेसु, एवं मूलेसुपि कुसलादिभावो परियेसितब्बो । योनिमोमनसिकारादिको विय हि कुसलभावस्स, अयोनिमोमनसिकारादिको अकुसलभावस्स कारणन्ति गहेतब्बं । एवं अकुसलभावसाधनवसेन लोभादीनं मूलट्ठं अगगहेत्वा सुप्पतिट्ठितभावसाधनवसेन गय्हमाने न कोचि दोसो । लद्धहेतुपच्चया हि धम्मा विरूळ्हमूला विय पादपा थिरा होन्ति सुप्पतिट्ठिता, हेतुरहिता पन तिलबीजकादिसेवाला विय न सुप्पतिट्ठिताति हेतुआदिअत्थेन अकुसलानं उपकारकत्ता मूलानीति अकुसलमूलानि । यस्मा पन मूलेन मुत्तो अकुसलचित्तुप्पादो नत्थि, तस्मा तीहि मूलेहि सब्बो अकुसलरासि परियादियित्वा दस्सितोति दट्ठब्बं ।

तानि अकुसलमूलानि सरूपतो दस्सेतुं “लोभो अकुसलमूल”न्तिआदि वुत्तं । तत्थ लोभादीसु यं वत्तब्बं, तं हेट्ठा वुत्तमेव । तत्थ पन ततियमग्गवज्झा लोभादयो आगता, इध पन अनवसेसाति अयमेव विसेसो ।

गाथायं पापचेतसन्ति अकुसलधम्मसमायोगतो लामकचित्तं । हिंसन्तीति अत्तनो पवत्तिक्खणे आयतिं विपाकक्खणे च विबाधेन्ति । अत्तसम्भूताति अत्तनि जाता । तचसारन्ति गण्ठितं, वेळुन्ति अत्थो । सम्फलन्ति अत्तनो फलं । इदं वुत्तं होति — खदिरसीसपादयो विय अन्तोसारो अहुत्वा बहिसारताय तचसारन्ति लद्धनामं वेळुआदिं यथा अत्तसम्भूतमेव फलं हिंसति विनासेति, एवमेव अन्तो सीलादिसाररहितं लामकचित्तं पुग्गलं अत्तसम्भूतायेव लोभादयो विनासेन्तीति ।

पठमसुत्तवण्णना निट्ठिता ।

२. धातुसुत्तवण्णना

५१. दुतिये धातुयोति अत्तनो फलस्स सभावस्स च धारणट्ठेन धातुयो। यञ्चेत्थ फलनिब्बत्तकं, तं अत्तनो फलस्स सभावस्स च, इतरं सभावस्सेव धारणट्ठेन धातु। **रूपधातूति** रूपभवो। धातुया आगतट्ठाने भवेन परिच्छिन्दितब्बं, भवस्स आगतट्ठाने धातुया परिच्छिन्दितब्बन्ति इध भवेन परिच्छेदो कथितो। तस्मा —

“कतमे धम्मा रूपावचरा? हेट्ठतो ब्रह्मलोकं परियन्तं करित्वा उपरितो अकनिट्ठे देवे अन्तो करित्वा एत्थावचरा एत्थ परियापन्ना खन्धधातुआयतना, इमे धम्मा रूपावचरा”ति (ध० स० १२८९) —

एवं वुत्ता रूपावचरधम्मा रूपधातु। **अरूपधातूति** अरूपभवो। इधापि भवेन परिच्छेदो कथितोति —

“कतमे धम्मा अरूपावचरा? हेट्ठतो आकासानञ्चायतनूपगे देवे अन्तो करित्वा, उपरितो नेवसञ्जानासञ्जायतनूपगे देवे अन्तो करित्वा, एत्थावचरा एत्थ परियापन्ना खन्धधातुआयतना, इमे धम्मा अरूपावचरा”ति (ध० स० १२९१) —

एवं वुत्ता अरूपावचरधम्मा अरूपधातु। **निरोधधातूति** निब्बानं वेदितब्बं।

अपरो नयो — रूपसहिता, रूपपटिबद्धा, धम्मप्पवत्ति **रूपधातु**, पञ्चवोकारभवो, एकवोकारभवो च, तेन सकलो कामभवो रूपभवो च सङ्गहितो। रूपरहिता धम्मप्पवत्ति **अरूपधातु**, चतुवोकारभवो, तेन अरूपभवो सङ्गहितो। इति द्वीहि पदेहि तयो भवा सब्बा संसारप्पवत्ति दस्सिता। ततियपदेन पन असङ्खत्तधातुयेव सङ्गहिताति मग्गफलानि इध तिकविनिमुत्तधम्मा नाम जाता। केचि पन “रूपधातूति रूपसभावा धम्मा, अरूपधातूति अरूपसभावा धम्माति पदद्वयेन अनवसेसतो पञ्चक्खन्धा गहिता”ति। “रूपतण्हाय विसयभूता धम्मा रूपधातु, अरूपतण्हाय विसयभूता अरूपधातू”ति च वदन्ति, तं सब्बं इध नाधिप्पेतं। तस्मा वुत्तनयेनेव अत्थो वेदितब्बो।

गाथासु **रूपधातुं परिज्जायाति** रूपपटिबद्धधम्मपवत्तिं जातपरिज्जादीहि तीहि परिज्जाहि परिजानित्वा। **आरूप्येसु असण्ठिताति** अरूपावचरधम्मसे भवरागवसेन भवदिट्ठिवसेन च न पतिट्ठिता अनल्लीना। “अरूपेसु असण्ठिता”ति च पठन्ति, सो एव अत्थो। एत्तावता तेभूमकधम्मानं परिज्जा वुत्ता। **निरोधे ये विमुच्चन्तीति** ये निब्बाने आरम्मणभूते अगमग्गफलवसेन समुच्छेदपटिप्पस्सद्वीहि अनवसेसकिलेसतो विमुच्चन्ति। **ते जना मच्चुहायिनोति** ते खीणासवज्जना मरणं समतीता।

एवं धातुत्तयसमतिक्रमेन अमताधिगमं दस्सेत्वा “अयञ्च पटिपदा मया गतमग्गो च तुम्हाकं दस्सितो”ति तत्थ नेसं उस्साहं जनेन्तो दुतियं गाथमाह। तत्थ **कायेनाति** नामकायेन मग्गफलेहि। **फुसयित्वाति** पत्वा। **निरूपधिन्ति** खन्धादिसब्बूपधिरहितं। **उपधिप्पटिनिस्सग्गन्ति** तेसंयेव च उपधीनं पटिनिस्सज्जनकारणं। निब्बानस्स हि मग्गजाणेन सच्छिकिरियाय सब्बे उपधयो पटिनिस्सट्ठा होन्तीति तं तेसं पटिनिस्सज्जनकारणं। **सच्छिकत्वाति** कालेन कालं फलसमापत्तिसमापज्जनेन अत्तपच्चक्खं कत्वा **अनासवो सम्मासम्बुद्धो** तमेव **असोकं विरजं** निब्बानपदं देसेति। तस्मा तदधिगमाय उस्सुक्कं कातब्बन्ति।

दुतियसुत्तवण्णना निट्ठिता।

३. पठमवेदनासुत्तवण्णना

५२. ततिये वेदनाति आरम्मणरसं वेदियन्ति अनुभवन्तीति वेदना । ता विभागतो दस्सेतुं “सुखा वेदना”तिआदि वुत्तं । तत्थ सुख-सद्दो अत्थुद्धारवसेन हेट्ठा वुत्तोयेव । दुक्ख-सद्दो पन “जातिपि दुक्खा”तिआदीसु (दी० नि० २.३८७; विभ० १९०) दुक्खवत्थुस्मिं आगतो । “यस्मा च खो, महालि, रूपं दुक्खं दुक्खानुपतितं दुक्खावक्कन्त”न्तिआदीसु (सं० नि० ३.६०) दुक्खारम्मणे । “दुक्खो पापस्स उच्चयो”तिआदीसु (ध० प० ११७) दुक्खपच्चये । “यावज्जिदं, भिक्खवे, न सुकरा अक्खानेन पापुणितुं, याव दुक्खा निरया”तिआदीसु (म० नि० ३.२५०) दुक्खपच्चयट्ठाने । “सुखस्स च पहाना दुक्खस्स च पहाना”तिआदीसु (दी० नि० १.२३२; ध० सं० १६५) दुक्खवेदनायं । इधापि दुक्खवेदनायमेव ।

वचनत्थतो पन सुखयतीति सुखा । दुक्खयतीति दुक्खा । न दुक्खा न सुखाति अदुक्खमसुखा, मकारो पदसन्धिवसेन वुत्तो । तासु इट्ठानुभवनलक्खणा सुखा, अनिट्ठानुभवनलक्खणा दुक्खा, उभयविपरीतानुभवनलक्खणा अदुक्खमसुखा । तस्मा सुखदुक्खवेदनानं उप्पत्ति पाकटा, न अदुक्खमसुखाय । यदा हि सुखं उप्पज्जति, सकलसरीरं भेन्तं मद्दन्तं फरमानं सतधोतसप्पिं खादापेन्तं विय, सतपाकतेलं मक्खेन्तं विय, घटसहस्सेन परिळाहं निब्बापयमानं विय च “अहो सुखं, अहो सुख”न्ति वाचं निच्छारयमानमेव उप्पज्जति । यदा दुक्खं उप्पज्जति, सकलसरीरं खोभेन्तं मद्दन्तं फरमानं तत्तफालं पवेसेन्तं विय विलीनतम्बलोहं आसिज्चन्तं विय च “अहो दुक्खं, अहो दुक्ख”न्ति विप्पलापेन्तमेव उप्पज्जति । इति सुखदुक्खवेदनानं उप्पत्ति पाकटा ।

अदुक्खमसुखा पन दुब्बिजाना दुद्दीपना अन्धकारा अविभूता । सा सुखदुक्खानं अपगमे सातासातपटिपक्खवसेन मज्झत्ताकारभूता नयतो गणहन्तस्सेव पाकटा होति । यथा किं? यथा पुब्बापरं संपंसुके पदेसे उपचरितमग्गवसेन पिट्ठिपासाणे मिगेन गतमग्गो, एवं इट्ठानिट्ठारम्मणेसु सुखदुक्खानुभवनेनपि मज्झत्तारम्मणानुभवनभावेन विज्जायति । मज्झत्तारम्मणग्गहणं पिट्ठिपासाणगमनं विय इट्ठानिट्ठारम्मणग्गहणाभावतो । यच्च तत्रानुभवनं, सा अदुक्खमसुखाति ।

एवमेत्थ सुखदुक्खअदुक्खमसुखभावेन तिधा वुत्तापि कत्थचि सुखदुक्खभावेन द्विधा वुत्ता । यथाह — “द्वेपि मया, आनन्द, वेदना वुत्ता, परियायेन सुखा वेदना, दुक्खा वेदना”ति (म० नि० २.८९) । कत्थचि तिस्सोपि विसुं विसुं सुखदुक्खअदुक्खमसुखभावेन “सुखा वेदना ठितिसुखा विपरिणामदुक्खा, दुक्खा वेदना ठितिदुक्खा विपरिणामसुखा, अदुक्खमसुखा वेदना जाणसुखा अज्जाणदुक्खा”ति (म० नि० १.४६५) । कत्थचि सब्बापि दुक्खभावेन । वुत्तज्जेतं “यं किञ्चि वेदयितं, सब्बं तं दुक्खस्मिन्ति वदामी”ति (सं० नि० ४.२५९) ।

तत्थ सिया — यदि तिस्सो वेदना यथा इध वुत्ता, अज्जेसु च एदिसेसु सुत्तेसु अभिधम्मे च एवं अवत्त्वा कस्मा एवं वुत्तं “यं किञ्चि वेदयितं, सब्बं तं दुक्खस्मिन्ति वदामी”ति, “द्वेपि मया, आनन्द, वेदना वुत्ता”ति च? सन्धायभासितमेतं, तस्मा सा परियायदेसना । वुत्तज्जेतं भगवता —

“सङ्खारानिच्चतं, आनन्द, मया सन्धाय भासितं सङ्खारविपरिणामतं, ‘यं किञ्चि वेदयितं, सब्बं तं दुक्खस्मि’”न्ति (सं० नि० ४.२५९) ।

“द्वेपि मया, आनन्द, वेदना वुत्ता परियायेना”ति च (सं० नि० ४.२५९) ।

एत्थ हि सुखा अदुक्खमसुखाति इमासं द्विन्नं वेदनानं निप्परियायेन दुक्खभावो नत्थि, वेनेय्यज्झासयेन पन तत्थ निच्छन्ददस्सनत्थं परियायेन दुक्खभावो वुत्तोति सा तादिसी परियायदेसना । अयं पन वेदनत्तयदेसना सभावकथाति कत्वा

निष्परियायदेसनाति अयमेत्थ आचरियानं समानकथा ।

वितण्डवादी पनाह “दुक्खताद्वयवचनतो परियायदेसनाव वेदनत्तयदेसना”ति । सो “मा हेव”न्तिस्स वचनीयो, यस्मा भगवता सब्बासं वेदनानं दुक्खभावो अधिप्पायवसेन वुत्तो “सङ्खारानिच्चतं, आनन्द, मया सन्धाय भासितं सङ्खारविपरिणामतं ‘यं किञ्चि वेदयितं, सब्बं तं दुक्खस्मि”न्ति । यदि पनेत्थ वेदनत्तयदेसना परियायदेसना सिया, “इदं मया सन्धाय भासितं तिस्सो वेदना”ति वत्तब्बं सिया, न पनेतं वुत्तं ।

अपिचायमेव वत्तब्बो “को, पनावुसो, वेदनत्तयदेसनाय अधिप्पायो”ति? सचे वदेय्य “मुदुका दुक्खा वेदना सुखा, अधिमत्ता दुक्खा, मज्झिमा अदुक्खमसुखाति वेनेय्यज्झासयेन वुत्ता । तासु हि न सत्तानं सुखादिवट्ठी”ति । सो वत्तब्बो — को पनावुसो दुक्खवेदनाय सभावो, येन “सब्बा वेदना दुक्खा”ति वुच्चेय्युं? यदि याय उप्पन्नाय सत्ता वियोगमेव इच्छन्ति, सो दुक्खवेदनाय सभावो । याय च पन उप्पन्नाय सत्ता अवियोगमेव इच्छन्ति, याय न उभयं इच्छन्ति, सा कथं दुक्खवेदना सिया? अथ या अत्तनो निस्सयस्स उपघातकारी, सा दुक्खा । या अनुगहकारी, सा कथं दुक्खा सिया । अथ पन यदरिया दुक्खतो पस्सन्ति, सो दुक्खवेदनाय सभावो, सङ्खारदुक्खताय वेदनं अरिया दुक्खतो पस्सन्ति, सा च अभिण्हसभावाति कथं तासं वेदनानं मुदुमज्झिमाधिमत्तदुक्खभावो सिया? यदि च सङ्खारदुक्खताय एव वेदनानं दुक्खभावो सिया, “तिस्सो इमा, भिक्खवे, दुक्खतायो दुक्खदुक्खता, विपरिणामदुक्खता, सङ्खारदुक्खता”ति (दी० नि० ३.३०५) अयं दुक्खतानं विभागदेसना निष्पयोजना सिया । तथा च सति सुत्तमेव पटिबाहितं सिया, पुरिमेसु च तीसु रूपावचरज्झानेसु मुदुका दुक्खा वेदनाति आपज्जति सुखवेदनावचनतो । चतुत्थज्झाने अरूपज्झानेसु च मज्झिमा, अदुक्खमसुखवेदनावचनतो । एवं सन्ते पुरिमा तिस्सो रूपावचरसमापत्तियो चतुत्थज्झानसमापत्तिया अरूपसमापत्तीहि च सन्ततराति आपज्जति । कथं वा सन्ततरप्पणीततरासु समापत्तीसु दुक्खवेदनाय अधिकभावो युज्जति? तस्मा वेदनत्तयदेसनाय परियायदेसनाभावो न युत्तोति ।

यं पन वुत्तं “दुक्खे सुखन्ति सज्जाविपल्लासो”ति (अ० नि० ४.४९; पटि० म० १.२३६), तं कथन्ति? विपरिणामदुक्खताय सङ्खारदुक्खताय च यथाभूतानवबोधेन या एकन्ततो सुखसज्जा, या च दुक्खनिमित्ते सुखनिमित्तसज्जा, तं सन्धाय वुत्तं । एवम्पि “सुखा, भिक्खवे, वेदना दुक्खतो दट्ठब्बा”ति (इतिवु० ५३) इदं पन कथन्ति? इदं पन विपरिणामदस्सने सन्नियोजनत्थं वुत्तं तस्स तत्थ विरागुप्पत्तिया उपायभावतो सुखवेदनाय बहुदुक्खानुगतभावतो च । तथा हि दुक्खस्स हेतुभावतो अनेकेहि दुक्खधम्मोहि अनुबद्धत्ता च पण्डिता सुखम्पि दुक्खमिच्चेव पटिपन्ना ।

एवम्पि नत्थेव सुखा वेदना, सुखहेतूनं नियमाभावतो । ये हि सुखवेदनाय हेतुसम्मता घासच्छादनादयो, ते एव अधिमत्तं अकाले च पटिसेवियमाना दुक्खवेदनाय हेतुभावमापज्जन्ति । न च येनेव हेतुना सुखं, तेनेव दुक्खन्ति युत्तं वत्तुं । तस्मा न ते सुखहेतू, दुक्खन्तरापगमे पन अविज्जूनं सुखसज्जा यथा चिरतरं ठानादिइरियापथसमङ्गी हुत्वा तदज्जइरियापथसमायोगे महन्तज्च भारं वहतो भारनिकखेपे चेव वूपसमे च, तस्मा नत्थेव सुखन्ति? तयिदं सम्मदेव सुखहेतुं अपरिज्जाय तस्स नियमाभावपरिकप्पनं । आरम्मणमत्तमेव हि केवलं सुखहेतुं मनसिकत्वा एवं वुत्तं, अज्झत्तिकसरीरस्स अवत्थाविसेसं समुदितं पन एकज्झं तदुभयं सुखादिहेतूति वेदितब्बं । यादिसज्ज तदुभयं सुखवेदनाय हेतु, तादिसं न कदाचिपि दुक्खवेदनाय हेतु होतीति ववत्थिता एव सुखादिहेतु । यथा नाम तेजोधातु सालियवडाकसस्सादीनं यादिसमवत्थन्तरं पत्वा सातमधुरभावहेतु होति, न तादिसमेव पत्वा कदाचिपि असातमधुरभावहेतु होति, एवंसम्पदमिदं दट्ठब्बं ।

दुःखापगमेव कदाचि सुखवेदनन्तरं उपलब्धति । तत्थ सुखेयेव सुखसज्जा, न दुःखापगममत्ते यथा अद्धानगमनपरिस्समकिलन्तस्स सम्बाहने इरियापथपरिवत्तने च, अज्जथा कालन्तरेपि परिस्समापगमे तादिसी सुखसज्जा सिया । दुःखापगममत्ते पन सुखन्ति परिकप्पना वेदनाविसेसस्स अनुपलब्धमानत्ता । एकन्तेनेव चेतं एवं सम्पटिच्छित्तब्बं, यतो पणीतप्पणीतानियेव आरम्मणानि महता आयासेन सत्ता अभिपत्थयन्ति, न च नेसं येन केनचि यथालब्धमत्तेन पच्चयेन पतिकारं कातुं सक्का तण्हप्पादेनाति । वेदनापच्चया हि तण्हाउपादि, तथाभावे च सुगन्धमधुरसुखसम्फस्सादिवत्थूनं इतरीतरभावेन सुखविसेससज्जा जायमाना कतमस्स दुःखविसेसस्स अपगमने घानजिक्काकायद्वारेसु, सोतद्वारे च दिब्बसङ्गीतसदिसपञ्चङ्गिकतूरियसद्दावधारणे । तस्मा न दुःखवेदनायमेव दुःखन्तरापगमे सुखसज्जा, नापि केवले दुःखापगममत्तेति आगमतो युत्तितोपि ववत्थिता तिस्सो वेदनाति भगवतो वेदनत्तयदेसना नीतत्थायेव, न नेय्यत्थाति सज्जापेतब्बं । एवज्जेतं उपेति, इच्चेतं कुसलं, नो चे, कम्मं कत्वा उय्योजेतब्बो “गच्छ यथासुख”न्ति ।

एवमेता अज्जमज्जपटिपक्खसभावववत्थितलक्खणा एव तिस्सो वेदना भगवता देसिता । तज्ज खो विपस्सनाकम्मिकानं योगावचरानं वेदनामुखेन अरूपकम्मट्ठानदस्सनत्थं । दुविधज्झि कम्मट्ठानं रूपकम्मट्ठानं, अरूपकम्मट्ठानन्ति । तत्थ भगवा रूपकम्मट्ठानं कथेन्तो सङ्खेपमनसिकारवसेन वा वित्थारमनसिकारवसेन वा चतुधातुववत्थानादिवसेन वा कथेति । अरूपकम्मट्ठानं पन कथेन्तो फस्सवसेन वा वेदनावसेन वा चित्तवसेन वा कथेति । एकच्चस्स हि आपाथगते आरम्मणे आवज्जतो तत्थ चित्तचेतसिकानं पठमाभिनिपातो फस्सो तं आरम्मणं फुसन्तो उप्पज्जमानो पाकटो होति, एकच्चस्स तं आरम्मणं अनुभवन्ती उप्पज्जमाना वेदना पाकटा होति, एकच्चस्स तं आरम्मणं विजानन्तं उप्पज्जमानं विज्जाणं पाकटं होति । इति तेसं तेसं पुग्गलानं अज्झासयेन यथापाकटं फस्सादिमुखेन तिधा अरूपकम्मट्ठानं कथेति ।

तत्थ यस्स फस्सो पाकटो होति, सोपि “न केवलं फस्सोव उप्पज्जति, तेन सद्धिं तदेव आरम्मणं अनुभवमाना वेदनापि उप्पज्जति, सज्जानमाना सज्जापि, चेतयमाना चेतनापि, विजानमानं विज्जाणम्पि उप्पज्जती”ति फस्सपञ्चमकेयेव परिगगणाति । यस्स वेदना पाकटा होति, सोपि “न केवलं वेदनाव उप्पज्जति, तां सद्धिं फुसमानो फस्सोपि उप्पज्जति, सज्जानमाना सज्जापि, चेतयमाना चेतनापि, विजानमानं विज्जाणम्पि उप्पज्जती”ति फस्सपञ्चमकेयेव परिगगणाति । यस्स विज्जाणं पाकटं होति, सोपि “न केवलं विज्जाणमेव उप्पज्जति, तेन सद्धिं तदेवारम्मणं फुसमानो फस्सोपि उप्पज्जति, अनुभवमाना वेदनापि, सज्जानमाना सज्जापि, चेतयमाना चेतनापि उप्पज्जती”ति फस्सपञ्चमकेयेव परिगगणाति ।

सो “इमे फस्सपञ्चमका धम्मा किंनिस्सिता”ति उपधारेन्तो “वत्थुनिस्सिता”ति पजानाति । वत्थु नाम करजकायो । यं सन्धाय वुत्तं “इदज्ज पन मे विज्जाणं एत्थसितं एत्थपटिबद्ध”न्ति (दी० नि० १.२३५; म० नि० २.२५२) । सो अत्थतो भूता चेव उपादारूपानि च, एवमेत्थ वत्थु रूपं, फस्सपञ्चमका नामन्ति नामरूपमत्तमेव पस्सति । रूपज्जेत्थ रूपक्खन्धो, नामं चत्तारो अरूपिनो खन्धाति पञ्चक्खन्धमत्तं होति । नामरूपविनिमुत्ता हि पञ्चक्खन्धा, पञ्चक्खन्धविनिमुत्तं वा नामरूपं नत्थि । सो “इमे पञ्चक्खन्धा किंहेतुका”ति उपपरिक्खन्तो “अविज्जादिहेतुका”ति, ततो “पच्चयो चेव पच्चयुप्पन्नज्ज इदं, अज्जो सत्तो वा पुग्गलो वा नत्थि, सुद्धसङ्खारपुज्जमत्तमेवा”ति सप्पच्चयनामरूपवसेन तिलक्खणं आरोपेत्वा विपस्सनापटिपाटिया “अनिच्चं दुक्खमनत्ता”ति सम्मसन्तो विचरति । सो “अज्ज अज्जा”ति पटिवेधं आकङ्खमानो तथारूपे समये उत्तुसप्पायं, पुग्गलसप्पायं, भोजनसप्पायं, धम्मस्सवनसप्पायं वा लभित्वा एकपल्लङ्केन

निसिन्नोव विपस्सनं मत्थकं पापेत्वा अरहत्ते पतिट्ठाति । एवं इमेसं तिण्णं जनानं याव अरहत्ता कम्मट्ठानं वेदितब्बं । इध पन भगवा वेदनावसेन बुज्झनकानं अज्झासयेन अरूपकम्मट्ठानं कथेन्तो वेदनावसेन कथेसि । तत्थ —

“लक्खणञ्च अधिट्ठानं, उप्पत्ति अनुसयो तथा ।
ठानं पवत्तिकालो च, इन्द्रियञ्च द्विधादिता”ति ॥ —

इदं पकिण्णकं वेदितब्बं — तत्थ **लक्खणं** हेट्ठा वुत्तमेव । **अधिट्ठानन्ति** फस्सो । “फस्सपच्चया वेदना”ति हि वचनतो फस्सो वेदनाय अधिट्ठानं । तथा हि सो वेदनाधिट्ठानभावतो निच्चम्मगावीउपमाय उपमितो । तत्थ सुखवेदनीयो फस्सो सुखाय वेदनाय अधिट्ठानं, दुक्खवेदनीयो फस्सो दुक्खाय वेदनाय, अदुक्खमसुखवेदनीयो फस्सो अदुक्खमसुखाय वेदनाय अधिट्ठानं, आसन्नकारणन्ति अत्थो । वेदना कस्स पदट्ठानं? “वेदनापच्चया तण्हा”ति वचनतो तण्हाय पदट्ठानं अभिपत्थनीयभावतो । सुखा वेदना ताव तण्हाय पदट्ठानं होतु, इतरा पन कथन्ति? वुच्चते सुखसमङ्गीपि ताव तंसदिसं ततो वा उत्तरितरं सुखं अभिपत्थेति, किमङ्ग पन दुक्खसमङ्गीभूतो । अदुक्खमसुखा च सन्तभावेन सुखमिच्चेव वुच्चतीति तिस्सोपि वेदना तण्हाय पदट्ठानं ।

उप्पत्तीति उप्पत्तिकारणं । इट्ठारम्मणभूता हि सत्तसङ्खारा सुखवेदनाय उप्पत्तिकारणं, ते एव अनिट्ठारम्मणभूता दुक्खवेदनाय, मज्झत्तारम्मणभूता अदुक्खमसुखाय । विपाकतो तदाकारगगणतो चेत्थ इट्ठानिट्ठता वेदितब्बा ।

अनुसयोति इमासु तीसु वेदनासु सुखाय वेदनाय रागानुसयो अनुसेति, दुक्खाय वेदनाय पटिघानुसयो, अदुक्खमसुखाय वेदनाय अविज्जानुसयो अनुसेति । वुत्तज्हेतं —

“सुखाय खो, आवुसो विसाख, वेदनाय रागानुसयो अनुसेती”ति आदि (म० नि० १.४६५) ।

दिट्ठिमानानुसया चेत्थ रागपक्खिया कातब्बा । सुखाभिनन्दनेन हि दिट्ठिगतिका “सस्सत”न्ति आदिना सक्काये अभिनिविसन्ति, मानजातिका च मानं जप्पेन्ति “सेय्योहमस्मी”ति आदिना । विचिकिच्छानुसयो पन अविज्जापक्खिको कातब्बो । तथा हि वुत्तं पटिच्चसमुप्पादविभङ्गे (विभ० २८८-२८९) “वेदनापच्चया विचिकिच्छा”ति । अनुसयानञ्च तत्थ तत्थ सन्ताने अप्पहीनभावेन थामगमनं । तस्मा “सुखाय वेदनाय रागानुसयो अनुसेती”ति मग्गेन अप्पहीनत्ता अनुरूपकारणलाभे उप्पज्जनारहो रागो, तत्थ सयितो विय होतीति अत्थो । एस नयो सेसेसुपि ।

ठानन्ति कायो चित्तञ्च वेदनाय ठानं । वुत्तज्हेतं — “यं तस्मिं समये कायिकं सुखं कायसम्पस्सजं सातं सुखं वेदयितं (ध० स० ४४९) । यं तस्मिं समये चेतसिकं सुखं चेतोसम्पस्सजं सातं सुखं वेदयितं”न्ति (ध० स० ४७१) च ।

पवत्तिकालोति पवत्तिकखणो, पवत्तनाकलनञ्च । पवत्तिकखणेन हि सुखदुक्खवेदनानं सुखदुक्खभावो ववत्थितो । यथाह —

“सुखा खो, आवुसो विसाख, वेदना ठितिसुखा विपरिणामदुक्खा, दुक्खा खो, आवुसो विसाख, वेदना ठितिदुक्खा विपरिणामसुखा”ति (म० नि० १.४६५) ।

सुखाय वेदनाय अत्थिभावो सुखं, नत्थिभावो दुक्खं । दुक्खाय वेदनाय अत्थिभावो दुक्खं, नत्थिभावो सुखन्ति अत्थो ।

अदुक्खमसुखाय वेदनाय पवत्तनाकलनं पवत्तिया आकलनं अनाकलनञ्च जाननं अजाननञ्च सुखदुक्खभावववत्थानं । वुत्तम्पि चेतं —

“अदुक्खमसुखा खो, आवुसो विसाख, वेदना जाणसुखा अज्जाणदुक्खा”ति ।

इन्द्रियन्ति एता हि सुखादयो तिस्सो वेदना सुखिन्द्रियं, दुक्खिन्द्रियं, सोमनस्सिन्द्रियं, दोमनस्सिन्द्रियं, उपेक्खिन्द्रियन्ति अधिपतेय्यट्ठेन इन्द्रियतो पञ्चधा विभत्ता । कायिकञ्हि सातं सुखिन्द्रियन्ति वुत्तं, असातं दुक्खिन्द्रियन्ति । मानसं पन सातं सोमनस्सिन्द्रियन्ति वुत्तं, असातं दोमनस्सिन्द्रियन्ति । दुविधम्पि नेव सातं नासातं उपेक्खिन्द्रियन्ति । किं पनेत्थ कारणं — यथा कायिकचेतसिका सुखदुक्खवेदना “सुखिन्द्रियं सोमनस्सिन्द्रियं, दुक्खिन्द्रियं दोमनस्सिन्द्रियं”न्ति विभजित्वा वुत्ता, न एवं अदुक्खमसुखाति? भेदाभावतो । यथेव हि अनुगहसभावा बाधकसभावा च सुखदुक्खवेदना अज्जथा कायस्स अनुगहं बाधकञ्च करोन्ति, चित्तस्स च अज्जथा, न एवं अदुक्खमसुखा, तस्मा भेदाभावतो विभजित्वा न वुत्ता ।

द्विधादिताति सब्बापि हि वेदना वेदयितट्ठेन एकविधापि निस्सयभेदेन दुविधा — कायिका चेतसिकाति, सुखा, दुक्खा, अदुक्खमसुखाति ति विधा, चतुयोनिवसेन चतुब्बिधा, इन्द्रियवसेन, गतिवसेन च पञ्चविधा, द्वारवसेन च आरम्मणवसेन च छब्बिधा, सत्तविज्जाणधातुयोगेन सत्तविधा, अट्ठलोकधम्मपच्चयताय अट्ठविधा, सुखादीनं पच्चेकं अतीतादिविभागेन नवविधा, ता एव अज्झत्तबहिद्भाभेदेन अट्ठारसविधा, तथा रूपादीसु छसु आरम्मणेसु एकेकस्मिं सुखादिवसेन तिस्सो तिस्सो कत्वा । रूपाारम्मणस्मिञ्हि सुखापि उपपज्जति, दुक्खापि, अदुक्खमसुखापि, एवं इतरेसुपि । अथ वा अट्ठारसमनोपविचारवसेन अट्ठारस । वुत्तञ्हि —

“चक्खुना रूपं दिस्वा सोमनस्सट्ठानियं रूपं उपविचरति, दोमनस्सट्ठानियं, उपेक्खाट्ठानियं रूपं उपविचरति, सोतेन सट्ठं... पे०... मनसा धम्मं विज्जाय सोमनस्सट्ठानियं धम्मं उपविचरति, दोमनस्सट्ठानियं, उपेक्खाट्ठानियं धम्मं उपविचरती”ति (अ० नि० ३.६२) ।

एवं अट्ठारसविधा होन्ति । तथा छ गेहस्सितानि सोमनस्सानि, छ गेहस्सितानि दोमनस्सानि, छ गेहस्सिता उपेक्खा, तथा नेक्खम्मस्सिता सोमनस्सादयोति एवं छत्तिंसविधा । अतीते छत्तिंस, अनागते छत्तिंस, पच्चुप्पन्ने छत्तिंसाति अट्ठत्तरसतम्पि भवन्ति । एवमेत्थ द्विधादिता वेदितब्बाति ।

पकिण्णककथा निट्ठिता ।

गाथासु समाहितोति उपचारप्पनाभेदेन समाधिना समाहितो । तेन समथभावनानुयोगं दस्सेति । सम्पजानोति सात्थकसम्पजज्जादिना चतुब्बिधेन सम्पजज्जेन सम्पजानो । तेन विपस्सनानुयोगं दस्सेति । सतोति सतोकारी । तेन समथविपस्सनानयेन धम्मा भावनापारिपूरिं गच्छन्ति । तेन समन्नागतत्तं दस्सेति । वेदना च पजानातीति “इमा वेदना, एत्तका वेदना”ति सभावतो विभागतो “अनिच्चा दुक्खा विपरिणामधम्मा”ति अनिच्चादिलक्खणतो च पुब्बभागे तीहि परिज्जाहि परिजानन्तो विपस्सनं वट्ठेत्वा अरियमग्गेन परिज्जापटिवेधेन पजानाति । वेदनानञ्च सम्भवन्ति समुदयसच्चं । यत्थ चेता निरुज्झन्तीति एतावता वेदना यत्थ निरुज्झन्ति, तं निरोधसच्चं । खयगामिनन्ति वेदनानं खयगामिनं अरियमग्गञ्च पजानातीति सम्बन्धो । वेदनानं खयाति एवं चत्तारि सच्चानि पटिविज्झन्तेन अरियमग्गेन वेदनानं अनुप्पादनरोधा । निच्छातो परिनिब्बुतोति नित्तण्हो, पहीनतण्हो, किलेसपरिनिब्बानेन, खन्धपरिनिब्बानेन च परिनिब्बुतो

होति ।

ततियसुत्तवण्णना निट्ठिता ।

४. दुतियवेदनासुत्तवण्णना

५३. चतुत्थे दुक्खतो दट्ठब्बाति सुखवेदना विपरिणामदुक्खवसेन दुक्खाति जाणचक्खुना पस्सितब्बा । सल्लतो दट्ठब्बाति दुन्नीहरणट्ठेन अन्तोतुदनट्ठेन पीळनट्ठेन दुक्खदुक्खभावेन दुक्खवेदना सल्लन्ति पस्सितब्बा । अनिच्चतोति हुत्वा अभावतो उदयब्बयवन्ततो तावकालिकतो निच्चपटिपक्खतो च अदुक्खमसुखा वेदना अनिच्चाति पस्सितब्बा । कामञ्चेत्थ सब्बापि वेदना अनिच्चतो पस्सितब्बा, अनिच्चदस्सनतो पन सातिसयं विरागनिमित्तं दुक्खदस्सनन्ति इममत्थं दस्सेन्तो सत्था “सुखा, भिक्खवे, वेदना दुक्खतो दट्ठब्बा, दुक्खा वेदना सल्लतो दट्ठब्बा”ति आह । अथ वा यत्थ पुथुज्जना सुखाभिनिवेसिनो, तत्थ निब्बेदजननत्थं तथा वुत्तं । तेनस्सा सङ्खारदुक्खताय दुक्खभावो दस्सितो । यदनिच्चं, तं दुक्खन्ति विपरिणामदुक्खताय “सुखा, भिक्खवे, वेदना दुक्खतो दट्ठब्बा”ति वत्वा “सुखापि ताव एदिसी, दुक्खा नु खो कीदिसी”ति चिन्तेन्तानं दुक्खदुक्खताय “दुक्खा वेदना सल्लतो दट्ठब्बा”ति आह, इतरा पन सङ्खारदुक्खताय एव दुक्खाति दस्सेन्तो “अदुक्खमसुखा वेदना अनिच्चतो दट्ठब्बा”ति अवोच ।

एत्थ च “सुखा वेदना दुक्खतो दट्ठब्बा”ति एतेन रागस्स समुघातनूपायो दस्सितो । सुखवेदनाय हि रागानुसयो अनुसेति । “दुक्खा वेदना सल्लतो दट्ठब्बा”ति एतेन दोसस्स समुघातनूपायो दस्सितो । दुक्खवेदनाय हि पटिधानुसयो अनुसेति । “अदुक्खमसुखा वेदना अनिच्चतो दट्ठब्बा”ति एतेन मोहस्स समुघातनूपायो दस्सितो । अदुक्खमसुखवेदनाय हि अविज्जानुसयो अनुसेति ।

तथा पठमेन तण्हासंकिलेसस्स पहानं दस्सितं तस्स सुखस्सादहेतुकत्ता, दुतियेन दुच्चरितसंकिलेसस्स पहानं । यथाभूतज्झि दुक्खं अपरिजानन्ता तस्स परिहरणत्थं दुच्चरितं चरन्ति । ततियेन दिट्ठिसंकिलेसस्स पहानं अनिच्चतो पस्सन्तस्स दिट्ठिसंकिलेसाभावतो अविज्जानिमित्तत्ता दिट्ठिसंकिलेसस्स, अविज्जानिमित्तञ्च अदुक्खमसुखा वेदना । पठमेन वा विपरिणामदुक्खपरिज्जा, दुतियेन दुक्खदुक्खपरिज्जा, ततियेन सङ्खारदुक्खपरिज्जा । पठमेन वा इट्ठारम्मणपरिज्जा, दुतियेन अनिट्ठारम्मणपरिज्जा, ततियेन मज्झत्तारम्मणपरिज्जा । विरत्तेसु हि तदारम्मणधम्मेषु आरम्मणानिपि विरत्तानेव होन्तीति । पठमेन वा रागप्पहानपरिकित्तनेन दुक्खानुपस्सनाय अप्पणिहितविमोक्खो दीपितो होति, दुतियेन दोसप्पहानपरिकित्तनेन अनिच्चानुपस्सनाय अनिमित्तविमोक्खो, ततियेन मोहप्पहानपरिकित्तनेन अनत्तानुपस्सनाय सुज्जतविमोक्खो दीपितो होतीति वेदितब्बं ।

यतोति यदा, यस्मा वा । अरियोति किलेसेहि आरका ठितो परिसुद्धो । सम्मदसोति सब्बासं वेदनानं चतुन्नम्पि वा सच्चानं अविपरीतदस्सावी । अच्छेच्छि तण्हन्ति वेदनामूलकं तण्हं अगमग्गेन छिन्दि, अनवसेसतो समुच्छिन्दि । विवत्तयि संयोजनन्ति दसविधं संयोजनं परिवत्तयि, निम्मूलमकासि । सम्माति हेतुना कारणेन । मानाभिसमयाति मानस्स दस्सनाभिसमया, पहानाभिसमया वा । अरहत्तमग्गे हि किच्चवसेन मानं पस्सति, अयमस्स दस्सनाभिसमयो । तेन दिट्ठो पन सो तावदेव पहीयति दिट्ठविसेन दिट्ठसत्तानं जीवितं विय, अयमस्स पहानाभिसमयो । अन्तमकासि दुक्खस्साति एवं अरहत्तमग्गेन मानस्स दिट्ठत्ता पहीनत्ता च सब्बस्सेव वट्ठदुक्खस्स कोटिसङ्खातं अन्तं परिच्छेदं परिवट्ठमं अकासि, अन्तिमसमुस्सयमत्तावसेसं दुक्खमकासीति वुत्तं होति ।

गाथासु योति यो अरियसावको । अद्वाति अद्दस, सुखवेदनं दुक्खतो पस्सीति अत्थो । सुखवेदना हि विसमिस्सं विय भोजनं परिभोगकाले अस्सादं ददमाना विपरिणामकाले दुक्खायेवाति । **दुक्खमद्दक्खि सल्लतो**ति यथा सल्लं सरीरं अनुपविसन्तम्पि पविट्ठम्पि उद्धरियमानम्पि पीळमेव जनेति, एवं दुक्खवेदना उप्पज्जमानापि ठितिप्पत्तापि भिज्जमानापि विबाधतियेवाति तं सल्लतो विपस्सीति वुत्तं । **अद्दक्खि नं अनिच्चतो**ति सुखदुक्खतो सन्तसभावताय सन्ततरजातिकम्पि नं अदुक्खमसुखं अनिच्चन्तिकताय अनिच्चतो पस्सि ।

स वे सम्मद्दसोति सो एवं तिस्सन्नं वेदनानं सम्मदेव दुक्खादितो दस्सावी । **यतो**ति यस्मा । **तत्था**ति वेदनायं । **विमुच्चती**ति समुच्छेदविमुत्तिवसेन विमुच्चति । इदं वुत्तं होति — यस्मा सुखादीनि दुक्खादितो अद्दस, तस्मा तत्थ वेदनाय तप्पटिबद्धछन्दरागप्पहानेन समुच्छेदवसेन विमुच्चति । यंसद्दे हि वुत्ते तंसद्दो आहरित्वा वत्तब्बो । अथ वा **यतो**ति कायवाचाचित्तेहि संयतो यतत्तो, यतति पदहतीति वा यतो, आयततीति अत्थो । **अभिज्जावोसितो**ति वेदनामुखेन चतुसच्चकम्मट्ठानं भावेत्वा छट्ठाभिज्जाय परियोसितो कतकिच्चो । **सन्तो**ति रागादिकिलेसवूपसमेन सन्तो । **योगातिगो**ति कामयोगादिं चतुब्बिधम्पि योगं अतिक्कन्तो । उभयहितमुननतो **मुनी**ति ।

चतुत्थसुत्तवण्णना निट्ठिता ।

५. पठमएसनासुत्तवण्णना

५४. पञ्चमे **एसना**ति गवेसना परियेसना मग्गना । ता विभागतो दस्सेतुं “**कामेसना**”तिआदि वुत्तं । तत्थ **कामेसना**ति कामानं एसना, कामसङ्घाता वा एसना कामेसना । वुत्तज्हेतं —

“तत्थ कतमा कामेसना? यो कामेसु कामच्छन्दो, कामरागो, कामनन्दी, कामस्नेहो, कामपिपासा, काममुच्छा, कामज्झोसानं, अयं वुच्चति कामेसना”ति (विभ० ९१९) ।

तस्मा कामरागो कामेसनाति वेदितब्बो । **भवेसनायपि** एसेव नयो । वुत्तम्पि चेतं —

“तत्थ कतमा भवेसना? यो भवेसु भवच्छन्दो...पे०... भवज्झोसानं, अयं वुच्चति भवेसना”ति (विभ० ९१९)

।

तस्मा भवेसनरागो रूपारूपभवपत्थना भवेसनाति वेदितब्बा । ब्रह्मचरियस्स एसना **ब्रह्मचरियेसना** । यथाह —

“तत्थ कतमा ब्रह्मचरियेसना? सस्सतो लोकोति वा, असस्सतो लोकोति वा, अन्तवा लोकोति वा, अनन्तवा लोकोति वा, तं जीवं तं सरीरन्ति वा, अज्जं जीवं अज्जं सरीरन्ति वा, होति तथागतो परं मरणाति वा, न होति तथागतो परं मरणाति वा, होति च न च होति तथागतो परं मरणाति वा, नेव होति न न होति तथागतो परं मरणाति वा, या एवरूपा दिट्ठि दिट्ठिगतं दिट्ठिगहनं दिट्ठिकन्तारो दिट्ठिविसूकायिकं दिट्ठिविप्फन्दितं दिट्ठिसज्जोजनं गाहो पतिट्ठाहो अभिनिवेसो परामासो कुम्मग्गो मिच्छापथो मिच्छत्तं तित्थायतनं विपरियेसग्गाहो, अयं वुच्चति ब्रह्मचरियेसना”ति (विभ० ९१९) ।

तस्मा दिट्ठिगतसम्मत्तस्स ब्रह्मचरियस्स एसना दिट्ठिब्रह्मचरियेसनाति वेदितब्बाति । एत्तावता रागदिट्ठियो एसनाति

दस्सिता होन्ति । न केवलञ्च रागदिट्ठियोव एसना, तदेकट्ठं कम्मम्पि । वुत्तम्पि चेतं —

“तत्थ कतमा कामेसना? कामरागो तदेकट्ठं अकुसलं कायकम्मं वचीकम्मं मनोकम्मं, अयं वुच्चति कामेसना । तत्थ कतमा भवेसना? भवरागो तदेकट्ठं अकुसलं कायकम्मं वचीकम्मं मनोकम्मं, अयं वुच्चति भवेसना । तत्थ कतमा ब्रह्मचरियेसना? अन्तग्गाहिका दिट्ठि तदेकट्ठं अकुसलं कायकम्मं, वचीकम्मं, मनोकम्मं, अयं वुच्चति ब्रह्मचरियेसना”ति (विभ० ९१९) —

एवमेता तिस्सो एसना वेदितब्बा ।

गाथासु सम्भवन्ति एत्थ एसनानं उप्पत्तिहेतुभूता अविज्जादयो तण्हा चाति **सम्भवो**, समुदयोति अत्थो । **यत्थ चेता निरुज्झन्तीति** ब्रह्मचरियेसना पठममग्गेन निरुज्झति, कामेसना अनागामिमग्गेन, भवेसना अरहत्तमग्गेन निरुज्झतीति वेदितब्बं । सेसं वुत्तनयमेव ।

पञ्चमसुत्तवण्णना निट्ठिता ।

६. दुतियएसनासुत्तवण्णना

५५. छट्ठे **ब्रह्मचरियेसना** सहाति ब्रह्मचरियेसनाय सद्धिं । विभत्तिलोपेन हि अयं निद्वेसो, करणत्थे वा एतं पच्चत्तवचनं । इदं वुत्तं होति “ब्रह्मचरियेसनाय सद्धिं कामेसना, भवेसनाति तिस्सो एसना”ति । तासु ब्रह्मचरियेसनं सरूपतो दस्सेतुं “**इतिसच्चपरामासो, दिट्ठिद्वाना समुस्सया**”ति वुत्तं । तस्सत्थो — इति एवं सच्चन्ति परामासो **इतिसच्चपरामासो** । इदमेव सच्चं, मोघमज्जन्ति दिट्ठिया पवत्तिआकारं दस्सेति । दिट्ठियो एव सब्बानत्थहेतुभावतो **दिट्ठिद्वाना** । वुत्तज्हेतं — “मिच्छादिट्ठिपरमाहं, भिक्खवे, वज्जं वदामी”ति (अ० नि० १.३१०) । ता एव च उपरूपपरि वड्डमाना लोभादिकिलेससमुस्सयेन च **समुस्सया**, “इदमेव सच्चं, मोघमज्जन्ति मिच्छाभिनिविसमाना सब्बानत्थहेतुभूता किलेसदुक्खूपचयहेतुभूता च दिट्ठियो ब्रह्मचरियेसनाति वुत्तं होति । एतेन पवत्तिआकारतो निब्बत्तितो च ब्रह्मचरियेसना दस्सिताति वेदितब्बा ।

सब्बरागविरत्तस्साति सब्बेहि कामरागभवरागेहि विरत्तस्स । ततो एव तण्हक्खयसङ्घाते निब्बाने विमुत्तत्ता **तण्हक्खयविमुत्तिनो** अरहतो । **एसना पटिनिस्सट्ठाति** कामेसना, भवेसना च सब्बसो निस्सट्ठा पहीना । **दिट्ठिद्वाना समूहताति** ब्रह्मचरियेसनासङ्घाता दिट्ठिद्वाना च पठममग्गेनेव समुग्घातिता । **एसनानं खयाति** एवमेतासं तिस्सन्नं एसनानं खया अनुप्पादनरोधा भिन्नकिलेसत्ता । **भिक्खूति** च सब्बसो आसाभा वा । **निरासोति** च दिट्ठेकट्ठस्स विचिकिच्छाकथं कथासल्लस्स पहीनत्ता **अकथं कथीति** च वुच्चतीति ।

छट्ठसुत्तवण्णना निट्ठिता ।

७-८. आसवसुत्तद्वयवण्णना

५६-५७. सत्तमे **कामासवोति** कामेसु आसवो, कामसङ्घातो वा आसवो कामासवो, अत्थतो पन कामरागो रूपादिअभिरति च कामासवो । रूपारूपभवेसु छन्दरागो ज्ञाननिकन्ति सस्सतदिट्ठिसहगतो रागो भवपत्थना च **भवासवो** ।

अविज्जाव अविज्जासवो ।

आसवानञ्च सम्भवन्ति एत्थ अयोनिमनसिकारो अविज्जादयो च किलेसा आसवानं सम्भवो । वुत्तञ्हेतं —

“अयोनिमो, भिक्खवे, मनसिकरोतो अनुप्पन्ना चेव आसवा उप्पज्जन्ति, उप्पन्ना च आसवा पवड्ढन्ती”ति (म० नि० १.१५) ।

“अविज्जा, भिक्खवे, पुब्बङ्गमा अकुसलानं धम्मानं समापत्तिया अन्वदेव अहिरिकं अनोत्तप्प”न्ति (इतिवु० ४०) च ।

मग्गञ्च खयगामिनन्ति आसवानं खयगामिनं अरियमग्गञ्च । तत्थ कामासवो अनागामिमग्गेन पहीयति, भवासवो अविज्जासवो च अरहत्तमग्गेन । कामुपादानं विय कामासवोपि अग्गमग्गवज्झोति च वदन्ति । सेसं वुत्तनयमेव । अट्टमे अपुब्बं नत्थि ।

सत्तमअट्टमसुत्तवण्णना निट्ठिता ।

९. तण्हासुत्तवण्णना

५८. नवमे तण्हायनट्ठेन तण्हा, रूपादिविसयं तसतीति वा तण्हा । इदानि तं विभजित्वा दस्सेतुं “कामतण्हा”तिआदि वुत्तं । तत्थ पञ्चकामगुणिको रागो कामतण्हा । रूपारूपभवेसु छन्दरागो ज्ञाननिकन्ति सस्सतदिट्ठिसहगतो रागो भववसेन पत्थना च भवतण्हा । उच्छेददिट्ठिसहगतो रागो विभवतण्हा । अपिच पच्छिमतण्हाद्वयं ठपेत्वा सेसा सब्बापि तण्हा कामतण्हा एव । यथाह —

“तत्थ कतमा भवतण्हा? सस्सतदिट्ठिसहगतो रागो सारागो चित्तस्स सारागो — अयं वुच्चति भवतण्हा । तत्थ कतमा विभवतण्हा? उच्छेददिट्ठिसहगतो रागो सारागो चित्तस्स सारागो, अयं वुच्चति विभवतण्हा । अवसेसा तण्हा कामतण्हा”ति (विभ० ९१६) ।

इमा च तिस्सो तण्हा रूपतण्हा...पे०... धम्मतण्हाति विसयभेदतो पच्चेकं छब्बिधाति कत्वा अट्ठारस होन्ति । ता अज्झत्तरूपादीसु अट्ठारस, बहिद्धारूपादीसु अट्ठारसाति छत्तिंस, इति अतीता छत्तिंस, अनागता छत्तिंस, पच्चुप्पन्ना छत्तिंसाति विभागतो अट्ठसतं होन्ति । पुन सङ्गहे करियमाने कालभेदं अनामसित्वा गय्हमाना छत्तिंसेव होन्ति, रूपादीनं अज्झत्तिकबाहिरविभागे अकरियमाने अट्ठारसेव, रूपादिआरम्मणविभागमत्ते गय्हमाने छळेव, आरम्मणविभागमि अकत्वा गय्हमाना तिस्सोयेव होन्तीति ।

गाथासु तण्हायोगेनाति तण्हासङ्घातेन योगेन, कामयोगेन, भवयोगेन च । संयुत्ताति सम्बन्धा, भवादीसु संयोजिता वा । तेनेवाह “रत्तचित्ता भवाभवे”ति । खुहुके चेव महन्ते च भवे लग्गचित्ताति अत्थो । अथ वा भवोति सस्सतदिट्ठि, अभवोति उच्छेददिट्ठि । तस्मा भवाभवे सस्सतुच्छेददिट्ठीसु सत्तविसत्तचित्ताति । एतेन भवतण्हा, विभवतण्हा च दस्सिता । इमस्मिं पक्खे “तण्हायोगेना”ति इमिना कामतण्हाव दस्सिताति वेदितब्बा । ते योगयुत्ता मारस्साति ते एवंभूता पुगला मारस्स पाससङ्घातेन योगेन युत्ता बद्धा । रागो हि मारयोगो मारपासोति वुच्चति । यथाह —

“अन्तलिक्खचरो पासो, व्यायं चरति मानसो ।

तेन तं बाधयिस्सामि, न मे समण मोक्खसी”ति ॥ (सं० नि० १.१५१; महाव० ३३) ।

चतूहि योगेहि अनुपद्दुत्ता योगक्खेमं, निब्बानं अरहत्तञ्च, तस्स अनधिगमेन **अयोगक्खेमिनो** । उपरूपरि किलेसाभिसङ्खारानं जननतो **जना**, पाणिनो । रूपादीसु सत्ता विसत्ताति **सत्ता** ।

“खन्धानञ्च पटिपाटि, धातुआयतनान च ।

अब्बोच्छिन्नं वत्तमाना, संसारोति पवुच्चती”ति ॥ —

एवं वुत्तं खन्धादीनं अपरापरुप्पत्तिसङ्घातं **संसारं गच्छन्ति**, ततो न मुच्चन्ति । कस्मा? तण्हायोगयुत्तत्ता ।

जातिमरणगामिनो पुनप्पुनं जननमरणस्सेव उपगमनसीलाति । एत्तावता वट्टं दस्सेत्वा इदानीं विवट्टं दस्सेतुं “**ये च तण्हं पहन्त्वाना**”ति गाथमाह । सा हेट्ठा वुत्तनयत्ता सुविज्जेय्याव ।

नवमसुत्तवण्णना निट्ठिता ।

१०. मारधेय्यसुत्तवण्णना

५९. दसमस्स का उप्पत्ति? एकदिवसं किर सत्था सेक्खबहुलाय परिसाय परिवुतो निसिन्नो तेसं अज्झासयं ओलोकेत्वा उपरि विसेसाधिगमाय उस्साहं जनेतुं असेक्खभूमिं थोमेन्तो इदं सुत्तं अभासि । तत्थ **अतिक्कम्मा**तिआदीसु अयं सङ्खेपत्थो — **अतिक्कम्म** अतिक्कमित्वा अभिभवित्वा । **मारधेय्यं** मारस्स विसयं इस्सरियट्ठानं । **आदिच्चोव** यथा आदिच्चो अब्भादिउपक्किलेसविमुत्तो अत्तनो इद्धिया आनुभावेन तेजसाति तीहि गुणेहि समन्नागतो नभं अब्भुस्सक्कमानो सब्बं आकासगतं तमं अतिक्कम्म अतिक्कमित्वा अभिभवित्वा विधमित्वा **विरोचति**, ओभासति, तपति; एवमेव खीणासवो भिक्खु तीहि धम्मेहि समन्नागतो सब्बुपक्किलेसविमुत्तो मारधेय्यसङ्घातं तेभूमकधम्मप्पवत्तं अभिभवित्वा विरोचतीति ।

असेक्खेनाति एत्थ सिक्खासु जाताति सेक्खा, सत्तन्नं सेक्खानं एतेति वा सेक्खा, अपरियोसितसिक्खत्ता सयमेव सिक्खन्तीति वा सेक्खा मग्गधम्मा हेट्ठिमफलत्तयधम्मा च । अग्गफलधम्मा पन उपरि सिक्खितब्बाभावेन न सेक्खाति **असेक्खा** । यत्थ हि सेक्खभावासङ्का अत्थि, तत्थायं पटिसेधोति लोकियधम्मेसु निब्बाने च असेक्खभावानापत्ति दट्ठब्बा । सीलसमाधिपज्जासङ्घाता हि सिक्खा अत्तनो पटिपक्खकिलेसेहि विप्पयुत्ता परिसुद्धा उपक्किलेसानं आरम्मणभावम्पि अनुपगमनतो सातिसयं सिक्खाति वत्तुं युत्ता, अट्ठसुपि मग्गफलेसु विज्जन्ति; तस्मा चतुमग्गहेट्ठिमफलत्तयधम्मा विय अरहत्तफलधम्मापि “तासु सिक्खासु जाता”ति च, तंसिक्खासमङ्गिनो अरहतो इतरेसं विय सेक्खत्ते सति “सेक्खस्स एते”ति च “सिक्खा सीलं एतेसं”न्ति च सेक्खाति आसङ्का सियुन्ति तदासङ्कानिवत्तनत्थं असेक्खाति यथावुत्तसेक्खभावप्पटिसेधं कत्वा वुत्तं । अरहत्तफले पवत्तमाना हि सिक्खा परिनिट्ठितकिच्चत्ता न सिक्खाकिच्चं करोन्ति, केवलं सिक्खाफलभावेन पवत्तन्ति । तस्मा ता न सिक्खावचनं अरहन्ति, नापि तंसमङ्गिनो सेक्खवचनं, न च तंसम्पयुत्तधम्मा सिक्खनसीला । “सिक्खासु जाता”ति एवमादिअत्थेहि अग्गफलधम्मा सेक्खा न होन्ति । हेट्ठिमफलेसु पन सिक्खा सकदागामिमग्गविपस्सनादीनं उपनिस्सयभावतो सिक्खाकिच्चं करोन्तीति सिक्खावचनं अरहन्ति, तंसमङ्गिनो च सेक्खवचनं, तंसम्पयुत्ता धम्मा च सिक्खनसीला । सेक्खधम्मा यथावुत्तेहि अत्थेहि सेक्खा होन्तियेव ।

अथ वा सेक्खाति अपरियोसितसिक्खानं वचनन्ति, असेक्खाति पदं परियोसितसिक्खानं दस्सनन्ति न लोकियधम्मनिब्बानानं असेक्खभावापत्ति। वुट्ठिप्पत्ता सेक्खा असेक्खा च सेक्खधम्मेसु एव केसञ्चि वुट्ठिप्पत्तानं असेक्खता आपज्जतीति अरहत्तमगगधम्मा वुट्ठिप्पत्ता। यथावुत्तेहि च अत्थेहि सेक्खाति कत्वा असेक्खा आपन्नाति चे? तं न, सदिसेसु तब्बोहारतो। अरहत्तमगतो हि निन्नानाकरणं अरहत्तफलं ठपेत्वा परिज्जादिकिच्चकरणं विपाकभावञ्च, तस्मा ते एव सेक्खा धम्मा अरहत्तफलभावं आपन्नाति सक्का वत्तुं। कुसलसुखतो च विपाकसुखं सन्ततरताय पणीततरन्ति वुट्ठिप्पत्ताव ते धम्मा होन्तीति “असेक्खा”ति वुच्चन्ति।

ते पन असेक्खधम्मे खन्धवसेन इध तिधा विभजित्वा तेहि समन्नागमेन खीणासवस्स आनुभावं विभावेन्तो भगवा “असेक्खेन सीलक्खन्धेना”तिआदिमाह। तत्थ सीलसदस्स अत्थो हेट्ठा वुत्तो। खन्धसद्वो पन रासिम्हि पज्जत्तियं रुळ्हियं गुणेति बहूसु अत्थेसु दिट्ठप्पयोगो। तथा हि “असङ्खेय्यो अप्पमेय्यो महाउदकक्खन्धोत्वेव सङ्ख्यं गच्छती”तिआदीसु (अ० नि० ४.५१; ६.३७) रासिम्हि आगतो। “अद्वसा खो भगवा महन्तं दारुक्खन्धं गङ्गाय नदिया सोतेन वुद्धमान”न्तिआदीसु (सं० नि० ४.२४१) पज्जत्तियं। “चित्तं मनो मानसं हृदयं पण्डरं मनो मनायतनं विज्जाणं विज्जाणक्खन्धो”तिआदीसु (ध० स० ६३, ६५) रुळ्हियं। “न खो, आवुसो विसाख, अरियेन अट्ठङ्गिकेन मग्गेन तयो खन्धा सङ्गहिता, तीहि च खो, आवुसो विसाख, खन्धेहि अरियो अट्ठङ्गिको मग्गो सङ्गहितो”तिआदीसु (म० नि० १.४६२) गुणे। इधापि गुणेयेव दट्ठब्बो। तस्मा असेक्खेन सीलसङ्घातेन गुणेनाति अत्थो। समन्नागतोति सम्पयुत्तो समङ्गीभूतो। समादहति एतेन, सयं वा समादहति, समाधानमेव वाति समाधि। पकारेहि जानाति यथासभावं पटिविज्झतीति पज्जा। सीलमेव खन्धो सीलक्खन्धो। सेसेसुपि एसेव नयो।

तत्थ अगगफलभूता सम्मावाचा, सम्माकम्मन्तो, सम्माआजीवो च सभावेनेव असेक्खो सीलक्खन्धो नाम, तथा सम्मासमाधि असेक्खो समाधिक्खन्धो। तदुपकारकतो पन सम्मावायामसम्मासतियो समाधिक्खन्धे सङ्गहं गच्छन्ति। तथा सम्मादिट्ठि असेक्खो पज्जाक्खन्धो। तदुपकारकतो सम्मासङ्कप्पो पज्जाक्खन्धे सङ्गहं गच्छतीति एवमेत्थ अट्ठपि अरहत्तफलधम्मा तीहि खन्धेहि सङ्गहेत्वा दस्सिताति वेदितब्बं।

यस्स एते सुभाविताति येन अरहता एते सीलादयो असेक्खधम्मक्खन्धा सुभाविता सुट्ठु वड्ढिता, सो आदिच्चोव विरोचतीति सम्बन्धो। “यस्स चेते”तिपि पठन्ति। तेसञ्च सद्वो निपातमत्तं। एवमेतस्मिं वग्गे पठमसुत्ते वट्ठं, परियोसानसुत्ते विवट्ठं, इतरेसु वट्ठविवट्ठं कथितं।

दसमसुत्तवण्णना निट्ठिता।

पठमवग्गवण्णना निट्ठिता।

२. दुतियवग्गो

१. पुज्जकिरियवत्थुसुत्तवण्णना

६०. दुतियवग्गस्स पठमे पुज्जकिरियवत्थूनीति पुज्जभवफलं निब्बत्तेन्ति, अत्तनो सन्तानं पुनन्तीति वा पुज्जानि, पुज्जानि च तानि हेतुपच्चयेहि कत्तब्बतो किरिया चाति पुज्जकिरिया। ता एव च तेसं तेसं आनिसंसानं वत्थुभावतो पुज्जकिरियवत्थूनि। दानमयन्ति अनुपच्छिन्नभवमूलस्स अनुगहवसेन पूजावसेन वा अत्तनो देय्यधम्मस्स परेसं

परिच्चागचेतना दीयति एतायाति दानं, दानमेव दानमयं । चीवरादीसु हि चतूसु पच्चयेसु अन्नादीसु वा दससु दानवत्थूसु रूपादीसु वा छसु आरम्मणेसु तं तं देन्तस्स तेसं उप्पादनतो पट्टाय पुब्बभागे परिच्चागकाले पच्छा सोमनस्सचित्तेन अनुस्सरणे चाति तीसु कालेसु वुत्तनयेन पवत्तचेतना दानमयं पुञ्जकिरियवत्थु नाम ।

सीलमयन्ति निच्चसीलउपोसथनियमादिवसेन पञ्च, अट्ठ, दस वा सीलानि समादियन्तस्स सीलपूरणत्थं पब्बजिस्सामीति विहारं गच्छन्तस्स पब्बजन्तस्स मनोरथं मत्थकं पापेत्वा “पब्बजितो वतम्हि साधु सुट्ठु”ति आवज्जेन्तस्स सद्भाय पातिमोक्खं परिपूरेन्तस्स पञ्जाय चीवरादिके पच्चवेक्खन्तस्स सतिया आपाथगतेसु रूपादीसु चक्खुद्वारादीनि संवरन्तस्स वीरियेन आजीवं सोधेन्तस्स च पवत्ता चेतना सीलतीति सीलमयं पुञ्जकिरियवत्थु नाम ।

तथा पटिसम्भिदायं (पटि० म० १.४८) वुत्तेन विपस्सनामग्गेन चक्खुं अनिच्चतो दुक्खतो अनत्ततो विपस्सन्तस्स सोतं, धानं, जिह्वं, कायं, मनं । रूपे...पे०... धम्मे, चक्खुविज्जाणं...पे०... मनोविज्जाणं । चक्खुसम्फस्सं...पे०... मनोसम्फस्सं, चक्खुसम्फस्सजं वेदनं...पे०... मनोसम्फस्सजं वेदनं । रूपसज्जं...पे०... धम्मसज्जं । जरामरणं अनिच्चतो दुक्खतो अनत्ततो विपस्सन्तस्स या चेतना, या च पथवीकसिणादीसु अट्ठतिसाय आरम्मणेसु पवत्ता ज्ञानचेतना, या च अनवज्जेसु कम्मायतनसिप्पायतनविज्जाट्टानेसु परिचयमनसिकारादिवसेन पवत्ता चेतना, सब्बा भावेति एतायाति **भावनामयं** वुत्तनयेन पुञ्जकिरियवत्थु चाति ।

एकमेकज्चेत्थ यथारहं पुब्बभागतो पट्टाय कायेन करोन्तस्स कायकम्मं होति, तदत्थं वाचं निच्छारेन्तस्स वचीकम्मं, कायङ्गं वाचङ्गञ्च अचोपेत्वा मनसा चिन्तेन्तस्स मनोकम्मं । अन्नादीनि देन्तस्स चापि “अन्नदानादीनि देमी”ति वा दानपारमिं आवज्जेत्वा वा दानकाले दानमयं पुञ्जकिरियवत्थु होति । वत्तसीसे ठत्वा ददतो सीलमयं, खयतो वयतो कम्मतो सम्मसनं पट्टपेत्वा ददतो भावनामयं पुञ्जकिरियवत्थु होति ।

अपरानिपि सत्त पुञ्जकिरियवत्थूनि — अपचितिसहगतं पुञ्जकिरियवत्थु वेय्यावच्चसहगतं पत्तिअनुप्पदानं अब्भनुमोदनं देसनामयं सवनमयं दिट्ठिजुगतं पुञ्जकिरियवत्थूति । सरणगमनम्पि हि दिट्ठिजुगतेनेव सङ्गहति । यं पनेत्थ वत्तब्बं, तं परतो आवि भविस्सति ।

तत्थ वुट्ठतरं दिस्वा पच्चुगमनपत्तचीवरपटिग्गहणाभिवादनमगसम्पदानादिवसेन **अपचायनसहगतं** वेदितब्बं । वुट्ठतरानं वत्तपटिपत्तिकरणवसेन, गामं पिण्डाय पविट्ठं भिक्खुं दिस्वा पत्तं गहेत्वा गामे भिक्खं सम्पादेत्वा उपसंहरणवसेन “गच्छ भिक्खून् पत्तं आहरा”ति सुत्वा वेगेन गन्त्वा पत्ताहरणादिवसेन च **वेय्यावच्चसहगतं** वेदितब्बं । चत्तारो पच्चये दत्त्वा पुप्फगन्धादीहि रतनत्तयस्स पूजं कत्वा अज्जं वा तादिसं पुज्जं कत्वा “सब्बसत्तानं पत्ति होतू”ति परिणामवसेन **पत्तिअनुप्पदानं** वेदितब्बं । तथा परेहि दिन्नाय पत्तिया केवलं वा परेहि कत्तं पुज्जं “साधु, सुट्ठु”ति अनुमोदनवसेन **अब्भनुमोदनं** वेदितब्बं । अत्तनो पगुणधम्मं अपच्चासीसन्तो हितज्झासयेन परेसं देसेति — इदं **देसनामयं** पुञ्जकिरियवत्थु नाम । यं पन एको “एवं मं धम्मकथिकोति जानिस्सन्ती”ति इच्छाय ठत्वा लाभसक्कारसिलोकसन्निस्सितो धम्मं देसेति, तं न महप्फलं होति । “अट्ठा अयं अत्तहितपरहितानं पटिपज्जनूपायो”ति योनिमोमनसिकारपुरेचारिकहितफरणेन मुदुचित्तेन धम्मं सुणाति, इदं **सवनमयं** पुञ्जकिरियवत्थु होति । यं पनेको “इति मं सद्भाति जानिस्सन्ती”ति सुणाति, तं न महप्फलं होति । दिट्ठिया उजुगमनं **दिट्ठिजुगतं**, “अत्थि दिन्न”न्ति आदिनयपवत्तस्स सम्मादस्सनस्स एतं अधिवचनं । इदञ्चि पुब्बभागे वा पच्छाभागे वा जाणविप्पयुत्तम्पि उजुकरणकाले जाणसम्पयुत्तमेव होति । अपरे पनाहु “विजाननपजाननवसेन दस्सनं दिट्ठि कुसलज्जं विज्जाणं कम्मस्सकताजाणादि च सम्मादस्सन”न्ति । तत्थ कुसलेन विज्जाणेन जाणस्स

अनुष्णादेपि अत्तना कतपुञ्जानुस्सरणवण्णारहवण्णनादीनं सङ्गहो, कम्मस्सकताजाणेन कम्मपथसम्मादिट्ठिया । इतरं पन दिट्ठिजुगतं सब्बेसं नियमलक्खणं । यच्चि किञ्चि पुञ्जं करोन्तस्स दिट्ठिया उजुभावेनेव तं महप्फलं होति ।

इमेसं पन सत्तन्नं पुञ्जकिरियवत्थूनं पुरिमेहि तीहि दानमयादीहि पुञ्जकिरियवत्थूहि सङ्गहो । तत्थ हि अपचायनवेय्यावच्चानि सीलमये, पत्तिअनुप्पदानअब्भनुमोदनानि दानमये, धम्मदेसनासवनानि भावनामये, दिट्ठिजुगतं तीसुपि । तेनाह भगवा —

“तीणिमानि, भिक्खवे, पुञ्जकिरियवत्थूनि । कतमानि तीणि? दानमयं... पे०... भावनामयं पुञ्जकिरियवत्थू”ति (अ० नि० ८.३६) ।

एत्थ च अट्ठन्नं कामावचरकुसलचेतनानं वसेन तिण्णम्पि पुञ्जकिरियवत्थूनं पवत्ति होति । यथा हि पगुणं धम्मं परिवत्तेन्तस्स एकच्चे अनुसन्धिं असल्लक्खेन्तस्सेव गच्छन्ति, एवं पगुणं समथविपस्सनाभावनं अनुयुज्जन्तस्स अन्तरन्तरा जाणविप्पयुत्तचित्तेनापि मनसिकारो पवत्ति । सब्बं तं पन महग्गतकुसलचेतनानं वसेन भावनामयमेव पुञ्जकिरियवत्थु होति, न इतरानि । गाथाय अत्थो हेट्ठा वुत्तोयेव ।

पठमसुत्तवण्णना निट्ठिता ।

२. चक्खुसुत्तवण्णना

६१. दुतिये चक्खूनीति चक्खन्तीति चक्खूनि, समविसमं आचिक्खन्तानि विय पवत्तन्तीति अत्थो । अथ वा चक्खनट्ठेन चक्खूनि । किमिदं चक्खनं नाम? अस्सादनं, तथा हि वदन्ति “मधुं चक्खति ब्यञ्जनं चक्खती”ति इमानि च आरम्भणरसं अनुभवन्तानि अस्सादेन्तानि विय होन्तीति चक्खनट्ठेन चक्खूनि । तानि पन सङ्खेपतो द्वे चक्खूनि — जाणचक्खु, मंसचक्खु चाति । तेसु मंसचक्खु हेट्ठा वुत्तमेव । जाणचक्खु दिब्बचक्खु, पञ्जाचक्खूति इध द्विधा कत्वा वुत्तं ।

तत्थ दिब्बचक्खूति दिब्बसदिसत्ता दिब्बं । देवतानञ्चि सुचरितकम्मनिब्बत्तं पित्तसेम्हरुहिरादीहि अपलिबुद्धं उपक्विलेसविमुत्तताय दूरेपि आरम्भणगगहणसमत्थं दिब्बं पसादचक्खु होति । इदञ्चापि वीरियभावनाबलनिब्बत्तं जाणचक्खु तादिसमेवाति दिब्बसदिसत्ता दिब्बं, दिब्बविहारवसेन पटिलद्धत्ता अत्तनो च दिब्बविहारसन्निस्सितत्ता आलोकपरिग्गहेन महाजुतिकत्ता । तिरोकुट्टादिगतरूपदस्सनेन महागतिकत्तापि दिब्बं । तं सब्बं सदसत्थानुसारेण वेदितब्बं । दस्सनट्ठेन चक्खुकिच्चकरणेन चक्खुमिवातिपि चक्खु, दिब्बञ्च तं चक्खु चाति दिब्बचक्खु ।

पजानातीति पञ्जा । किं पजानाति? चत्तारि अरियसच्चानि “इदं दुक्ख”न्तिआदिना । वुत्तज्हेतं —

“पजानातीति खो, आवुसो, तस्मा पञ्जाति वुच्चति । किञ्च पजानाति? इदं दुक्ख”न्तिआदि (म० नि० १.४४९) ।

अट्ठकथायं पन “पञ्जापनवसेन पञ्जा । किन्ति पञ्जापेति? अनिच्चन्ति पञ्जापेति, दुक्खन्ति पञ्जापेति, अनत्ताति पञ्जापेती”ति वुत्तं । सा पनायं लक्खणादितो यथासभावपटिवेधलक्खणा, अक्खलितपटिवेधलक्खणा वा कुसलिस्सासखित्तउसुपटिवेधो विय, विसयोभासनरसा पदीपो विय, असम्मोहपच्चुपट्टाना अरञ्जगतसुदेसको विय ।

विसेसतो पनेत्थ आसवक्खयजाणसङ्घाता पज्जा चतुसच्चदस्सनट्ठेन **पज्जाचक्खू**ति अधिप्पेता । यं सन्धाय वुत्तं “चक्खुं उदपादि, जाणं उदपादि, पज्जा उदपादि, विज्जा उदपादि, आलोको उदपादी”ति (सं० नि० ५.१०८१; महाव० १५) ।

एतेसु च मंसचक्खु परित्तं, दिब्बचक्खु महग्गतं, इतरं अप्पमाणं । मंसचक्खु रूपं, इतरानि अरूपानि । मंसचक्खु दिब्बचक्खु च लोकियानि सासवानि रूपविसयानि, इतरं लोकुत्तरं अनासवं चतुसच्चविसयं । मंसचक्खु अब्याकतं, दिब्बचक्खु सिया कुसलं सिया अब्याकतं, तथा पज्जाचक्खु । मंसचक्खु कामावचरं, दिब्बचक्खु रूपावचरं, इतरं लोकुत्तरन्ति एवमादि विभागा वेदितव्वा ।

गाथासु **अनुत्तरन्ति** पज्जाचक्खुं सन्धाय वुत्तं । तज्झि आसवक्खयजाणभावतो अनुत्तरं । **अक्खासि पुरिसुत्तमो**ति पुरिसानं उत्तमो अगो सम्मासम्बुद्धो देसेसि । **उप्पादो**ति मंसचक्खुस्स पवत्ति । **मग्गो**ति उपायो, दिब्बचक्खुस्स कारणं । पकतिचक्खुमतो एव हि दिब्बचक्खु उपपज्जति, यस्मा कसिणालोकं वट्ठेत्वा दिब्बचक्खुजाणस्स उप्पादनं, सो च कसिणमण्डले उगहनिमित्तेन विना नत्थीति । **यतो**ति यदा । **जाणन्ति** आसवक्खयजाणं । तेनेवाह “**पज्जाचक्खु अनुत्तरं**”न्ति । **यस्स चक्खुस्स पटिलाभा**ति यस्स अरियस्स पज्जाचक्खुस्स उप्पत्तिया भावनाय सब्बस्मा वट्ठदुक्खतो पमुच्चति परिमुच्चतीति ।

दुतियसुत्तवण्णना निड्ढिता ।

३. इन्द्रियसुत्तवण्णना

६२. ततिये **इन्द्रियानी**ति अधिपतेय्यट्ठेन इन्द्रियानि । यानि हि सहजातधम्मसेसु इस्सरा विय हुत्वा तेहि अनुवत्तितव्वानि, तानि इन्द्रियानि नाम । अपिच इन्दो भगवा धम्मिस्सरो परमेन चित्तिस्सरियेन समन्नागतो । तेन इन्देन सब्बपठमं दिट्ठत्ता अधिगतत्ता परेसञ्च दिट्ठत्ता देसितत्ता विहितत्ता गोचरभावनासेवनाहि दिट्ठत्ता च इन्द्रियानि । इन्दं वा मग्गाधिगमस्स उपनिस्सयभूतं पुज्जकम्मं, तस्स लिङ्गानीतिपि इन्द्रियानि । **अनज्जातज्जस्सामीतिन्द्रियन्ति** “अनमतग्गे संसारे अनज्जातं अनधिगतं अमतपदं चतुसच्चधम्ममेव वा जानिस्सामी”ति पटिपन्नस्स इमिना पुब्बभागेन उप्पन्नं इन्द्रियं, सोतापत्तिमग्गपज्जायेतं अधिवचनं । **अज्जिन्द्रियन्ति** आजाननइन्द्रियं । तत्रायं वचनत्थो — आजानाति पठममग्गजाणेन दिट्ठमरियादं अनतिककमित्वाव जानातीति अज्जा । यथेव हि पठममग्गपज्जा दुक्खादीसु परिज्जाभिसमयादिवसेन पवत्तति, तथेव अयम्पि पवत्ततीति अज्जा च सा यथावुत्तेनट्ठेन इन्द्रियं चाति अज्जिन्द्रियं । आजाननट्ठेनेव अज्जस्स वा अरियपुग्गलस्स इन्द्रियन्ति अज्जिन्द्रियं, सोतापत्तिफलतो पट्टाय छसु ठानेसु जाणस्सेतं अधिवचनं । **अज्जाताविन्द्रियन्ति** अज्जाताविनो चतूसु सच्चेसु निड्ढितजाणकिच्चस्स खीणासवस्स उप्पज्जनतो इन्द्रियट्ठसम्भवतो च अज्जाताविन्द्रियं । एत्थ च पठमपच्छिमानि पठममग्गचतुत्थफलवसेन एकट्ठानिकानि, इतरं इतरमग्गफलवसेन छट्ठानिकन्ति वेदितव्वं ।

गाथासु **सिक्खमानस्सा**ति अधिसीलसिक्खादयो सिक्खमानस्स भावेन्तस्स । **उजुमग्गानुसारिनो**ति उजुमग्गो वुच्चति अरियमग्गो, अन्तद्वयविवज्जितत्ता तस्स अनुस्सरणतो उजुमग्गानुसारिनो, पटिपाटिया मग्गे उप्पादेन्तस्साति अत्थो । **खयस्मिन्ति** अनवसेसकिलेसानं खेपनतो खयसङ्घाते अग्गमग्गे जाणं पठमं पुरेयेव उप्पज्जति । **ततो अज्जा अनन्तरा**ति ततो मग्गजाणतो अनन्तरा अरहत्तं उप्पज्जति । अथ वा **उजुमग्गानुसारिनो**ति लीनुद्धच्चपटिद्वानायूहनादिके वज्जेत्वा समथविपस्सनं युगनद्धं कत्वा भावनावसेन पवत्तं पुब्बभागमग्गं अनुस्सरन्तस्स अनुगच्छन्तस्स पटिपज्जन्तस्स गोत्रभुजाणानन्तरं दिट्ठेकट्ठानं किलेसानं खेपनतो खयस्मिं सोतापत्तिमग्गे पठमं जाणं अनज्जातज्जस्सामीतिन्द्रियं

उपपज्जति । ततो अज्जा अनन्तराति ततो पठमजाणतो अनन्तरा अनन्तरतो पट्ठाया याव अगमग्गा अज्जा अज्जिन्द्रियं उपपज्जति ।

ततो अज्जा विमुत्तस्साति ततो अज्जा अज्जिन्द्रियतो पच्छा अरहत्तमग्गाजाणानन्तरा अरहत्तफलेन पज्जाविमुत्तिया अज्जाताविन्द्रियेन विमुत्तस्स । जाणं वे होति तादिनोति अरहत्तफलुप्पत्तितो उत्तरकाले इट्ठानिट्ठादीसु तादिलक्खणप्पत्तस्स खीणासवस्स पच्चवेक्खणजाणं उपपज्जति । कथं उपपज्जतीति आह “अकुप्पा मे विमुत्ती”ति । तस्स अकुप्पभावस्स कारणं दस्सेति “भवसंयोजनक्खया”ति ।

इदानीं तादिसं खीणासवं थोमेन्तो “स वे इन्द्रियसम्पन्नो”ति ततियं गाथमाह । तत्थ इन्द्रियसम्पन्नोति यथावुत्तेहि तीहि लोकुत्तरिन्द्रियेहि समन्नागतो, सुद्धेहिपि वा पटिप्पस्सद्धिलद्धेहि सद्धादीहि इन्द्रियेहि समन्नागतो परिपुण्णो, ततो एव चक्खादीहि सुद्धु वूपसन्तेहि निब्बिसेवनेहि इन्द्रियेहि समन्नागतो । तेनाह “सन्तो”ति, सब्बकिलेसपरिच्छाहवूपसमेन उपसन्तोति अत्थो । सन्तिपदे रतोति निब्बाने अभिरतो अधिमुत्तो । एत्थ च “इन्द्रियसम्पन्नो”ति एतेन भावितमग्गता, परिज्जातक्खन्धता चस्स दस्सिता । “सन्तो”ति एतेन पहीनकिलेसता, “सन्तिपदे रतो”ति एतेन सच्छिकतनिरोधताति । सेसं वुत्तनयमेव ।

ततियसुत्तवण्णना निट्ठिता ।

४. अद्धासुत्तवण्णना

६३. चतुत्थे अद्धाति काला । अतीतो अद्धातिआदीसु द्वे परियाया — सुत्तन्तपरियायो, अभिधम्मपरियायो च । तत्थ सुत्तन्तपरियायेन पटिसन्धितो पुब्बे अतीतो अद्धा नाम, चुतितो पच्छा अनागतो अद्धा नाम, सह चुतिपटिसन्धीहि तदनन्तरं पच्चुप्पन्नो अद्धा नाम । अभिधम्मपरियायेन उप्पादो, ठिति, भङ्गोति इमे तयो खणे पत्वा निरुद्धधम्मा अतीतो अद्धा नाम, तयोपि खणे असम्पत्ता अनागतो अद्धा नाम, खणत्तयसमङ्गिनो पच्चुप्पन्नो अद्धा नाम ।

अपरो नयो — अयज्झि अतीतादिविभागो अद्धासन्ततिसमयखणवसेन चतुधा वेदितब्बो । तेसु अद्धाविभागो वुत्तो । सन्ततिवसेन सभागा एकउतुसमुट्ठाना, एकाहारसमुट्ठाना च पुब्बापरियवसेन वत्तमानापि पच्चुप्पन्ना । ततो पुब्बे विसभागउतुआहारसमुट्ठाना अतीता पच्छा अनागता । चित्तजा एकवीथि एकजवन एकसमापत्तिसमुट्ठाना पच्चुप्पन्ना नाम, ततो पुब्बे अतीता, पच्छा अनागता । कम्मसमुट्ठानानं पाटियेक्कं सन्ततिवसेन अतीतादिभेदो नत्थि, तेसंयेव पन उतुआहारचित्तसमुट्ठानानं उपत्थम्भकवसेन तस्स अतीतादिभावो वेदितब्बो । समयवसेन एकमुहुत्तपुब्बण्हसायन्हरत्तिदिवादीसु समयेसु सन्तानवसेन पवत्तमाना तंतंसमये पच्चुप्पन्ना नाम, ततो पुब्बे अतीता, पच्छा अनागता । अयं ताव रूपधम्मेसु नयो । अरूपधम्मेसु पन खणवसेन उप्पादादिकखणत्तयपरियापन्ना पच्चुप्पन्ना, ततो पुब्बे अतीता, पच्छा अनागता । अपिच अतिक्कन्तहेतुपच्चयकिच्चा अतीता, निट्ठितहेतुकिच्चा अनिट्ठितपच्चयकिच्चा पच्चुप्पन्ना, उभयकिच्चं असम्पत्ता अनागता । अत्तनो वा किच्चक्खणे पच्चुप्पन्ना, ततो पुब्बे अतीता, पच्छा अनागता । एत्थ च खणादिकथाव निप्परियाया, सेसा परियाया । अयज्झि अतीतादिभेदो नाम धम्मानं होति, न कालस्स । अतीतादिभेदे पन धम्मे उपादाय परमत्थतो अविज्जमानोपि कालो इध तेनेव वोहारेन अतीतोतिआदिना वुत्तोति वेदितब्बो ।

गाथासु अक्खेय्यसज्जिनोति एत्थ अक्खायति, कथीयति, पज्जापीयतीति अक्खेय्यं, कथावत्थु, अत्थतो रूपादयो

पञ्चक्खन्धा । वुत्तञ्हेतं —

“अतीतं वा अद्धानं आरब्भ कथं कथेय्य, अनागतं वा...पे०... पच्चुप्पन्नं वा अद्धानं आरब्भ कथं कथेय्या”ति (दी० नि० ३.३०५) ।

तथा —

“यं, भिक्खवे, रूपं अतीतं निरुद्धं विपरिणतं, ‘अहोसी’ति तस्स सङ्खा, ‘अहोसी’ति तस्स समञ्जा, ‘अहोसी’ति तस्स पञ्जत्ति; न तस्स सङ्खा अत्थीति, न तस्स सङ्खा भविस्सती”ति (सं० नि० ३.६२) —

एवं वुत्तेन निरुत्तिपथसुत्तेनपि एत्थ अत्थो दीपेतब्बो । एवं कथावत्थुभावेन अक्खेय्यसङ्घाते खन्धपञ्चके अहन्ति च ममन्ति च देवोति च मनुस्सोति च इत्थीति च पुरिसोति च आदिना पवत्तसञ्जावसेन अक्खेय्यसञ्जिनो, पञ्चसु उपादानक्खन्धेसु सत्तपुग्गलादिसञ्जिनोति अत्थो । **अक्खेय्यस्मिं** तण्हादिट्ठिगाहवसेन **पतिट्ठिता**, रागादिवसेन वा अट्ठहाकारेहि पतिट्ठिता । रत्तो हि रागवसेन पतिट्ठितो होति, दुट्ठो दोसवसेन, मूळ्हो मोहवसेन, परामट्ठो दिट्ठिवसेन, थामगतो अनुसयवसेन, विनिबद्धो मानवसेन, अनिट्ठङ्गतो विचिकिच्छावसेन, विक्खेपगतो उद्धच्चवसेन पतिट्ठितो होतीति ।

अक्खेय्यं अपरिञ्जायाति तं अक्खेय्यं तेभूमकधम्मे तीहि परिञ्जाहि अपरिजानित्वा तस्स अपरिजाननहेतु । **योगमायन्ति मच्चुनोति** मरणस्स योगं तेन संयोगं उपगच्छन्ति, न विसंयोगन्ति अत्थो ।

अथ वा **योगन्ति** उपायं, तेन योजितं पसारितं मारसेनट्ठानियं अनत्थजालं किलेसजालञ्च उपगच्छन्तीति वुत्तं होति ।
तथा हि वुत्तं —

“न हि नो सङ्गरं तेन, महासेनेन मच्चुना”ति ॥ (म० नि० ३.२७२; जा० २.२२.१२१; नेत्ति० १०३) ।

एत्तावता वट्ठं दस्सेत्वा इदानीं विवट्ठं दस्सेतुं “**अक्खेय्यञ्च परिञ्जाया**”तिआदि वुत्तं । तत्थ च-सट्ठो ब्यतिरेके, तेन अक्खेय्यपरिजाननेन लद्धब्बं वक्खमानमेव विसेसं जोतेति । **परिञ्जायाति** विपस्सनासहिताय मग्गपञ्जाय दुक्खन्ति परिच्छिज्ज जानित्वा, तप्पटिबद्धकिलेसप्पहानेन वा तं समतिक्कमित्वा तिस्सन्नम्पि परिञ्जानं किच्चं मत्थकं पापेत्वा । **अक्खातारं न मज्जतीति** सब्बसो मज्जनानं पहीनत्ता खीणासवो अक्खातारं न मज्जति, कारकादिसभावं किञ्चि अत्तानं न पच्चेतीति अत्थो । **फुट्ठो विमोक्खो मनसा, सन्तिपदमनुत्तरन्ति** यस्मा सब्बसङ्खतविमुत्तत्ता “विमोक्खो”ति सब्बकिलेससन्तापवूपसमनट्ठानताय “सन्तिपद”न्ति लद्धनामो निब्बानधम्मो फुट्ठो फुसितो पत्तो, तस्मा अक्खातारं न मज्जतीति । अथ वा “परिञ्जाया”ति पदेन दुक्खसच्चस्स परिञ्जाभिसमयं समुदयसच्चस्स पहानाभिसमयञ्च वत्वा इदानीं “फुट्ठो विमोक्खो मनसा, सन्तिपदमनुत्तर”न्ति इमिना मग्गनिरोधानं भावनासच्छिकिरियाभिसमयं वदति । तस्सत्थो — समुच्छेदवसेन सब्बकिलेसेहि विमुच्चतीति **विमोक्खो**, अरियमग्गो । सो पनस्स मग्गचित्तेन फुट्ठो फुसितो भावितो, तेनेव अनुत्तरं सन्तिपदं निब्बानं फुट्ठं फुसितं सच्छिकतन्ति ।

अक्खेय्यसम्पन्नोति अक्खेय्यनिमित्तं विविधाहि विपत्तीहि उपट्ठते लोके पहीनविपल्लासताय ततो सुपरिमुत्तो अक्खेय्यपरिञ्जाभिनिब्बत्ताहि सम्पत्तीहि सम्पन्नो समन्नागतो । **सङ्खाय सेवीति** पञ्जावेपुल्लप्पत्तिया चीवरादिपच्चये सङ्खाय परितुलेत्वाव सेवनसीलो, सङ्घातधम्मत्ता च आपाथगतं सब्बम्पि विसयं छळङ्गुपेक्खावसेन सङ्खाय सेवनसीलो ।

धम्मद्वोति असेक्खधम्मोसु निब्बानधम्मो एव वा ठितो । वेदगूति वेदितब्बस्स चतुसच्चस्स पारङ्गतत्ता वेदगू । एवंगुणो अरहा भवादीसु कत्थचि आयतिं पुनब्भवाभावतो मनुस्सदेवाति सङ्ख्यं न उपेति, अपज्जत्तिकभावमेव गच्छतीति अनुपादापरिनिब्बानेन देसनं निट्ठापेसि ।

चतुत्थसुत्तवण्णना निट्ठिता ।

५. दुच्चरितसुत्तवण्णना

६४. पज्जमे दुट्ठ चरितानि, दुट्ठानि वा चरितानि **दुच्चरितानि** । कायेन दुच्चरितं, कायतो वा पवत्तं दुच्चरितं **कायदुच्चरितं** । सेसेसुपि एसेव नयो । इमानि च दुच्चरितानि पज्जत्तिया वा कथेतब्बानि कम्मपथेहि वा । तत्थ पज्जत्तिया ताव कायद्वारे पज्जत्तसिक्खापदस्स वीतिक्कमो कायदुच्चरितं, वचीद्वारे पज्जत्तसिक्खापदस्स वीतिक्कमो वचीदुच्चरितं, उभयत्थ पज्जत्तस्स वीतिक्कमो मनोदुच्चरितन्ति अयं पज्जत्तिकथा । पाणातिपातादयो पन तिस्सो चेतना कायद्वारेपि, वचीद्वारेपि, उप्पन्ना कायदुच्चरितं, तथा चतस्सो मुसावादादिचेतना वचीदुच्चरितं, अभिज्झा, ब्यापादो, मिच्छादिट्ठीति तयो चेतनासम्पयुत्तधम्मा मनोदुच्चरितन्ति अयं कम्मपथकथा ।

गाथायं कम्मपथप्पत्तोयेव पापधम्मो कायदुच्चरितादिभावेन वुत्तोति तदज्जं पापधम्मं सङ्गहिहंतुं “**यज्जज्जं दोससज्जितं**”न्ति वुत्तं । तत्थ **दोससज्जितन्ति** रागादिकिलेससंहितं । सेसं सुविज्जेय्यमेव ।

पज्जमसुत्तवण्णना निट्ठिता ।

६. सुचरितसुत्तवण्णना

६५. छट्ठे सुट्ठ चरितानि, सुन्दरानि वा चरितानि **सुचरितानि** । कायेन सुचरितं, कायतो वा पवत्तं सुचरितं **कायसुचरितं** । सेसेसुपि एसेव नयो । इधापि पन पज्जत्तिवसेन, कम्मपथवसेन चाति दुविधा कथा । तत्थ कायद्वारे पज्जत्तसिक्खापदस्स अवीतिक्कमो कायसुचरितं, वचीद्वारे पज्जत्तसिक्खापदस्स अवीतिक्कमो वचीसुचरितं, उभयत्थ पज्जत्तस्स अवीतिक्कमो मनोसुचरितन्ति अयं पज्जत्तिकथा । पाणातिपातादीहि पन विरमन्तस्स उप्पन्ना तिस्सो चेतनापि विरतियोपि कायसुचरितं, मुसावादादीहि विरमन्तस्स चतस्सो चेतनापि विरतियोपि वचीसुचरितं, अनभिज्झा, अब्यापादो, सम्मादिट्ठीति तयो चेतनासम्पयुत्तधम्मा मनोसुचरितन्ति अयं कम्मपथकथा । सेसं वुत्तनयमेव ।

छट्ठसुत्तवण्णना निट्ठिता ।

७. सोचेय्यसुत्तवण्णना

६६. सत्तमे **सोचेय्यानीति** सुचिभावा । **कायसोचेय्यन्ति** कायसुचरितं, वचीमनोसोचेय्यानिपि वचीमनोसुचरितानेव । तथा हि वुत्तं “तत्थ कतमं कायसोचेय्यं? पाणातिपाता वेरमणी”तिआदि (अ० नि० ३.१२१-१२२) ।

गाथायं समुच्छेदवसेन पहीनसब्बकायदुच्चरितत्ता कायेन सुचीति **कायसुचि** । **सोचेय्यसम्पन्नन्ति** पटिप्पस्सद्भिकिलेसत्ता सुपरिसुद्धाय सोचेय्यसम्पत्तिया उपेतं । सेसं वुत्तनयमेव ।

सत्तमसुत्तवण्णना निड्ढिता ।

८. मोनेय्यसुत्तवण्णना

६७. अट्टमे मोनेय्यानीति एत्थ इधलोकपरलोकं अत्तहितपरहितञ्च मुनातीति मुनि, कल्याणपुथुज्जनेन सद्धिं सत्त सेक्खा अरहा च । इध पन अरहाव अधिप्पेतो । मुनिनो भावाति मोनेय्यानि, अरहतो कायवचीमनोसमाचारा ।

अथ वा मुनिभावकरा मोनेय्यपटिपदाधम्मा मोनेय्यानि । तेसमयं वित्थारो —

“तत्थ कतमं कायमोनेय्यं? तिविधकायदुच्चरितस्स पहानं कायमोनेय्यं, तिविधं कायसुचरितं कायमोनेय्यं, कायारम्मणे जाणं कायमोनेय्यं, कायपरिज्जा कायमोनेय्यं, परिज्जासहगतो मग्गो कायमोनेय्यं, कायस्मिं छन्दरागप्पहानं कायमोनेय्यं, कायसङ्खारनिरोधा चतुत्थज्झानसमापत्ति कायमोनेय्यं ।

“तत्थ कतमं वचीमोनेय्यं? चतुब्बिधवचीदुच्चरितस्स पहानं वचीमोनेय्यं, चतुब्बिधं वचीसुचरितं, वाचारम्मणे जाणं, वाचापरिज्जा, परिज्जासहगतो मग्गो, वाचाय छन्दरागप्पहानं, वचीसङ्खारनिरोधा दुतियज्झानसमापत्ति वचीमोनेय्यं ।

“तत्थ कतमं मनोमोनेय्यं? तिविधमनोदुच्चरितस्स पहानं मनोमोनेय्यं, तिविधं मनोसुचरितं, मनारम्मणे जाणं, मनोपरिज्जा, परिज्जासहगतो मग्गो, मनस्मिं छन्दरागप्पहानं, चित्तसङ्खारनिरोधा सज्जावेदयितनिरोधसमापत्ति मनोमोनेय्य”न्ति (महानि० १४; चूळनि० मेत्तगूमाणवपुच्छानिद्देस २१) ।

निन्हातपापकन्ति अगमग्गजलेन सुट्ठु विक्खालितपापमलं ।

अट्टमसुत्तवण्णना निड्ढिता ।

९. पठमरागसुत्तवण्णना

६८. नवमे यस्स कस्सचीति अनियमितवचनं, तस्मा यस्स कस्सचि पुग्गलस्स गहट्टस्स वा पब्बजितस्स वा । रागो अप्पहीनोति रज्जनट्ठेन रागो समुच्छेदवसेन न पहीनो, मग्गेन अनुप्पत्तिधम्मतं न आपादितो । दोसमोहेसुपि एसेव नयो । तत्थ अपायगमनीया रागदोसमोहा पठममग्गेन, ओळारिका कामरागदोसा दुतियमग्गेन, तेयेव अनवसेसा ततियमग्गेन, भवरागो अवसिट्ठमोहो च चतुत्थमग्गेन पहीयन्ति । एवमेतेसु पहीयन्तेसु तदेकट्ठतो सब्बेपि किलेसा पहीयन्तेव । एवमेते रागादयो यस्स कस्सचि भिक्खुस्स वा भिक्खुनिया वा उपासकस्स वा उपासिकाय वा मग्गेन अप्पहीना । बद्धो मारस्साति किलेसमारेन बद्धोति वुच्चति । यदग्गेन च किलेसमारेन बद्धो, तदग्गेन अभिसङ्खारमारादीहिपि बद्धोयेव होति । पटिमुक्कस्स मारपासोति पटिमुक्को अस्स अनेन अप्पहीनकिलेसेन पुग्गलेन तायेव अप्पहीनकिलेसताय मारपाससङ्गातो किलेसो अत्तनो चित्तसन्ताने पटिमुक्को पवेसितो, तेन सयं बन्धापितोति अत्थो । अथ वा पटिमुक्को अस्स भवेय्य मारपासो । सुक्कपक्खे ओमुक्कस्साति अवमुक्को मोचितो अपनीतो अस्स । सेसं वुत्तविपरियायेन वेदितब्बं ।

इध गाथा सुक्कपक्खवसेनेव आगता । तत्रायं सद्धेपत्थो — यस्स अरियपुग्गलस्स रागदोसाविज्जा विराजिता

अगमगणेन निरोधिता, तं भावितकायसीलचित्तपञ्जताय भावितत्तेसु अरहन्तेसु अञ्जतरं अब्भन्तरं एकं ब्रह्मभूतं ब्रह्मं वा सेट्ठं अरहत्तफलं पत्तं । यथा अञ्जे खीणासवा पुब्बूपनिस्सयसम्पत्तिसमन्नागता हुत्वा आगता, यथा च ते अन्तद्वयरहिताय सीलसमाधिपञ्जाक्खन्धसहगताय मज्झिमाय पटिपदाय निब्बानं गता अधिगता । यथा वा ते खन्धादीनं तथलक्खणं याथावतो पटिविज्झंसु, यथा च ते तथधम्मे दुक्खादयो अविपरीततो अब्भज्झंसु, रूपादिके च विसये यथा ते दिट्ठमत्तादिवसेनेव पस्सिंसु, यथा वा पन ते अट्ठ अनरियवोहारे वज्जेत्वा अरियवोहारवसेनेव पवत्तवाचा, वाचानुरूपञ्च पवत्तकाया, कायानुरूपञ्च पवत्तवाचा, तथा अयम्पि अरियपुग्गलोति **तथागतं**, चतुसच्चबुद्धताय **बुद्धं**, पुग्गलवेरं किलेसवेरं अत्तानुवादादिभयञ्च अतिक्कन्तन्ति **वेरभयातीतं** । सब्बेसं किलेसाभिसङ्खारादीनं पहीनत्ता **सब्बप्पहायिनं** बुद्धादयो अरिया **आहु** कथेन्ति कित्तेन्तीति ।

नवमसुत्तवण्णना निट्ठिता ।

१०. दुतियरागसुत्तवण्णना

६९. दसमे अतरीतीति तिण्णो, न तिण्णो **अतिण्णो** । **समुद्दन्ति** संसारसमुद्दं, चक्खायतनादिसमुद्दं वा । तदुभयम्पि दुप्पूरणट्ठेन समुद्दो वियाति समुद्दं । अथ वा समुद्दहट्ठेन समुद्दं, किलेसवस्सनेन सत्तसन्तानस्स किलेससदनतोति अत्थो । **सवीचिन्ति** कोधूपायासवीचीहि सवीचिं । वुत्तज्हेतं “वीचिभयन्ति खो, भिक्खु, कोधूपायासस्सेतं अधिवचन”न्ति (इतिवु० १०९; म० नि० २.१६२) । **सावट्ठन्ति** पञ्चकामगुणावट्ठेहि सह आवट्ठं । वुत्तम्पि चेत्तं “आवट्ठभयन्ति खो, भिक्खु, पञ्चन्नेत्तं कामगुणानं अधिवचन”न्ति (इतिवु० १०९; म० नि० २.१६४; अ० नि० ४.१२२) । **सगहं सरक्खसन्ति** अत्तनो गोचरगतानं अनत्थजननतो चण्डमकरमच्छकच्छपरक्खससदिसेहि विसभागपुग्गलेहि सहितं । तथा चाह “सगहं सरक्खसन्ति खो, भिक्खु, मातुगामस्सेत्तं अधिवचन”न्ति (इतिवु० १०९) । **अतरीतीति** मग्गपञ्जानावाय यथावुत्तं समुद्दं उत्तरि । **तिण्णोति** नित्तिण्णो । **पारङ्गतोति** तस्स समुद्दस्स पारं परतीरं निरोधं उपगतो । **थले तिट्ठतीति** ततो एव संसारमहोद्यं कामादिमहोद्यञ्च अतिक्कमित्वा थले परतीरे निब्बाने बाहितपापब्राह्मणो तिट्ठतीति वुच्चति ।

इधापि गाथा सुक्कपक्खवसेनेव आगता । तत्थ **ऊमिभयन्ति** यथावुत्तऊमिभयं, भायितब्बं एतस्माति तं ऊमि भयं । **दुत्तरन्ति** दुरतिक्कमं । **अच्चतारीति** अतिक्कमि ।

सङ्गातिगोति रागादीनं पञ्चन्नं सङ्गानं अतिक्कन्तत्ता पहीनत्ता सङ्गातिगो । **अत्थङ्गतो सो न पमाणमेतीति** सो एवंभूतो अरहा रागादीनं पमाणकरधम्मनं अच्चन्तमेव अत्थं गतत्ता अत्थङ्गतो, ततो एव सीलादिधम्मक्खन्धपारिपूरिया च “एदिसो सीलेन समाधिना पञ्जाया”ति केनचि पमिणितुं असक्कुण्यो पमाणं न एति, अथ वा अनुपादिसेसनिब्बानसङ्गातं अत्थं गतो सो अरहा “इमाय नाम गतिया ठितो, एदिसो च नामगोत्तेना”ति पमिणितुं असक्कुण्यताय पमाणं न एति न उपगच्छति । ततो एव **अमोहयि मच्चुराजं**, तेन अनुबन्धितुं असक्कुण्योति वदामीति अनुपादिसेसनिब्बानधातुयाव देसनं निट्ठोपेसि । इति इमस्मिं वग्गे पठमपञ्चमछट्ठेसु वट्ठं कथितं, दुतियसत्तमअट्ठमेसु विवट्ठं, सेसेसु वट्ठविवट्ठं कथितन्ति वेदितब्बं ।

दसमसुत्तवण्णना निट्ठिता ।

दुतियवग्गवण्णना निट्ठिता ।

३. ततियवग्गो

१. मिच्छादिट्ठिकसुत्तवण्णना

७०. ततियवग्गस्स पठमे दिट्ठा मयाति मया दिट्ठा, मम समन्तचक्खुना दिब्बचक्खुना चाति द्वीहिपि चक्खूहि दिट्ठा पच्चक्खतो विदिता । तेन अनुस्सवादिं पटिक्खिपति, अयञ्च अत्थो इदनेव पाळियं आगमिस्सति । कायदुच्चरितेन समन्नागताति कायदुच्चरितेन समङ्गीभूता । अरियानं उपवादकाति बुद्धादीनं अरियानं अन्तमसो गिहिसोतापन्नानम्पि गुणपरिधंसनेन अभूतब्भक्खानेन उपवादका अक्कोसका गरहका । मिच्छादिट्ठिकाति विपरीतदस्सना । मिच्छादिट्ठिकम्मसमादानाति मिच्छादस्सनहेतु समादिन्ननानाविधकम्मा ये च, मिच्छादिट्ठिमूलकेसु कायकम्मादीसु अञ्जेपि समादपेन्ति । एत्थ च वचीमनोदुच्चरितगहणेनेव अरियूपवादमिच्छादिट्ठीसु गहितासु पुनवचनं महासावज्जभावदस्सनत्थं नेसं । महासावज्जो हि अरियूपवादो आनन्तरियसदिसो । यथाह —

“सेय्यथापि, सारिपुत्त, भिक्खु सीलसम्पन्नो, समाधिसम्पन्नो, पज्जासम्पन्नो, दिट्ठेव धम्मे अञ्जं आराधेय्य; एवंसम्पदमिदं, सारिपुत्त, वदामि तं वाचं अप्पहाय, तं चित्तं अप्पहाय, तं दिट्ठिं अप्पटिनिस्सज्जित्वा यथाभतं निक्खित्तो एवं निरये”ति (म० नि० १.१४९) ।

मिच्छादिट्ठितो च महासावज्जतरं नाम अञ्जं नत्थि । यथाह —

“नाहं, भिक्खवे, अञ्जं एकधम्मम्पि समनुपस्सामि, यं एवं महासावज्जतरं यथयिदं, भिक्खवे, मिच्छादिट्ठि । मिच्छादिट्ठिपरमानि, भिक्खवे, वज्जानी”ति (अ० नि० १.३१०) ।

तं खो पनातिआदि यथावुत्तस्स अत्थस्स अत्तपच्चक्खभावं दळ्हतरं कत्वा दस्सेतुं आरद्धं । तम्पि सुविज्जेय्यमेव ।

गाथासु मिच्छा मनं पणिधायाति अभिज्झादीनं वसेन चित्तं अयोनिस्सो ठपेत्वा । मिच्छा वाचञ्च भासियाति मिच्छा मुसावादादिवसेन वाचं भासित्वा । मिच्छा कम्मनि कत्त्वानाति पाणातिपातादिवसेन कायकम्मनि कत्वा । अथ वा मिच्छा मनं पणिधायाति मिच्छादिट्ठिवसेन चित्तं विपरीतं ठपेत्वा । सेसपदद्वयेपि एसेव नयो । इदानिस्स तथा दुच्चरितचरणे कारणं दस्सेति अप्पस्सुतोति, अत्तनो परेसञ्च हितावहेन सुतेन विरहितोति अत्थो । अपुञ्जकरोति ततो एव अरियधम्मस्स अकोविदताय किब्बिसकारी पापधम्मो । अप्पस्मिं इध जीवितेति इध मनुस्सलोके जीविते अतिपरित्ते । तथा चाह “यो चिरं जीवति, सो वस्ससतं अप्पं वा भिय्यो”ति (दी० नि० २.९३; सं० नि० १.१४५), “अप्पमायु मनुस्सान”न्ति (सं० नि० १.१४५; महानि० १०) च । तस्मा बहुस्सुतो सप्पज्जो सीघं पुज्जानि कत्वा सग्गूपगो निब्बानपतिट्ठो वा होति । यो पन अप्पस्सुतो अपुञ्जकरो, कायस्स भेदा दुप्पज्जो निरयं सो उपपज्जतीति ।

पठमसुत्तवण्णना निट्ठिता ।

२. सम्मादिट्ठिकसुत्तवण्णना

७१. दुतिये पठमसुत्ते वुत्तविपरियायेन अत्थो वेदितब्बो ।

दुतियसुत्तवण्णना निड्ढिता ।

३. निस्सरणियसुत्तवण्णना

७२. ततिये निस्सरणियाति निस्सरणपटिसंयुत्ता । धातुयोति सत्तसुज्जसभावा । कामानन्ति किलेसकामानञ्चेव वत्थुकामानञ्च । अथ वा कामानन्ति किलेसकामानं । किलेसकामतो हि निस्सरणा वत्थुकामेहिपि निस्सरणंयेव होति, न अज्जथा । वुत्तज्हेतं —

“न ते कामा यानि चित्रानि लोके,
सङ्कप्परागो पुरिसस्स कामो ।
तिट्ठन्ति चित्रानि तथेव लोके,
अथेत्थ धीरा विनयन्ति छन्द”न्ति ॥ (अ० नि० ६.६३) ।

निस्सरणन्ति अपगमो । नेक्खम्मन्ति पठमज्झानं, विसेसतो तं असुभारम्मणं दट्ठब्बं । यो पन तं ज्ञानं पादकं कत्वा सङ्खारे सम्मसित्वा ततियमगं पत्वा अनागामिमग्गेन निब्बानं सच्छिकरोति, तस्स चित्तं अच्चन्तमेव कामेहि निस्सटन्ति इदं उक्कट्टतो कामानं निस्सरणं वेदितब्बं । रूपानन्ति रूपधम्मानं, विसेसेन सद्धिं आरम्मणेहि कुसलविपाककिरियाभेदतो सब्बेसं रूपावचरधम्मानं । आरुप्पन्ति अरूपावचरज्झानं । केचि पन “कामान”न्ति पदस्स “सब्बेसं कामावचरधम्मान”न्ति अत्थं वदन्ति । “नेक्खम्म”न्ति च “पज्ज रूपावचरज्झानानी”ति । तं अट्ठकथासु नत्थि, न युज्जति च । भूतन्ति जातं । सङ्गत्तन्ति समेच्च सम्भुय्य पच्चयेहि कतं । पटिच्चसमुप्पन्नन्ति कारणतो निब्बत्तं । तीहिपि पदेहि तेभूमके धम्मे अनवसेसतो परियादियति । निरोधोति निब्बानं । एत्थ च पठमाय धातुया कामपरिज्जा वुत्ता, दुतियाय रूपपरिज्जा, ततियाय सब्बसङ्गत्तपरिज्जा सब्बभवसमतिक्कमो वुत्तो ।

गाथासु कामनिस्सरणं जत्वाति “इदं कामनिस्सरणं — एवञ्च कामतो निस्सरण”न्ति जानित्वा । अतिक्कमति एतेनाति अतिक्कमो, अतिक्कमनूपायो, तं अतिक्कमं आरुप्पं जत्वा । सब्बे सङ्खारा समन्ति वूपसमन्ति एत्थाति सब्बसङ्खारसमथो, निब्बानं, तं फुसं फुसन्तो । सेसं हेट्ठा वुत्तनयमेव ।

ततियसुत्तवण्णना निड्ढिता ।

४. सन्ततरसुत्तवण्णना

७३. चतुत्थे रूपेहीति रूपावचरधम्मेहि । सन्ततराति अतिसयेन सन्ता । रूपावचरधम्मा हि किलेसविक्खम्भनतो वितक्कादिओळारिकङ्गप्पहानतो समाधिभूमिभावतो च सन्ता नाम, आरुप्पा पन तेहिपि अङ्गसन्तताय चेव आरम्मणसन्तताय च अतिसयेन सन्तवुत्तिका, तेन सन्ततराति वुत्ता । निरोधोति निब्बानं । सङ्खारावसेससुखुमभावप्पत्तितोपि हि चतुत्थारुप्पतो फलसमापत्तियोव सन्ततरा किलेसदरथपटिपस्सद्धितो निब्बानारम्मणतो च, किमङ्गं पन सब्बसङ्खारसमथो निब्बानं । तेन वुत्तं “आरुप्पेहि निरोधो सन्ततरो”ति ।

गाथासु रूपूपगाति रूपभवूपगा । रूपभवो हि इध रूपन्ति वुत्तो, “रूपूपपत्तिया मगं भावेती”ति आदीसु विय । अरूपट्ठायिनोति अरूपावचरा । निरोधं अप्पजानन्ता, आगन्तारो पुनब्भवन्ति एतेन रूपारूपावचरधम्मेहि निरोधस्स

सन्तभावमेव दस्सेति । अरूपेसु असंनिष्ठताति अरूपरागेन अरूपभवेसु अप्पतिट्ठहन्ता, तेपि परिजानन्ताति अत्थो । निरोधे ये विमुच्चन्तीति एत्थ येति निपातमत्तं । सेसं हेट्ठा वुत्तनयमेव ।

चतुत्थसुत्तवण्णना निट्ठिता ।

५. पुत्तसुत्तवण्णना

७४. पञ्चमे पुत्ताति अत्रजा ओरसपुत्ता, दिन्नकादयोपि वा । सन्तोति भवन्ता संविज्जमाना लोकस्मिन्ति इमस्मिं लोके उपलब्धमाना । अत्थिभावेन सन्तो, पाकटभावेन विज्जमाना । अतिजातोति अत्तनो गुणेहि मातापितरो अतिक्कमित्वा जातो, तेहि अधिकगुणोति अत्थो । अनुजातोति गुणेहि मातापितूनं अनुरूपो हुत्वा जातो, तेहि समानगुणोति अत्थो । अवजातोति गुणेहि मातापितूनं अधमो हुत्वा जातो, तेहि हीनगुणोति अत्थो । येहि पन गुणेहि युत्तो मातापितूनं अधिको समो हीनोति च अधिप्पेतो, ते विभजित्वा दस्सेतुं “कथञ्च, भिक्खवे, पुत्तो अतिजातो होती”ति कथेतुकम्यताय पुच्छं कत्वा “इध, भिक्खवे, पुत्तस्सा”तिआदिना निद्देसो आरब्धो ।

तत्थ न बुद्धं सरणं गतातिआदीसु बुद्धोति सब्बधम्मेषु अप्पटिहत्तजाणनिमित्तानुत्तरविमोक्खाधिगमपरिभावेन खन्धसन्तानं, सब्बज्जुतज्जाणपदट्ठानं वा सच्चाभिसम्बोधिं उपादाय पञ्जत्तिको सत्तातिसयो बुद्धो । यथाह —

“बुद्धोति यो सो भगवा सयम्भू अनाचरियको पुब्बे अननुस्सुतेसु धम्मेषु सामं सच्चानि अभिसम्बुज्झि, तत्थ च सब्बज्जुतं पत्तो, बलेसु च वसीभाव”न्ति (चूळनि० पारायनत्थुतिगाथानिद्देस ९७; पटि० म० १.१६१) —

अयं ताव अत्थतो बुद्धविभावना ।

ब्यञ्जनतो पन सवासनाय किलेसनिद्दाय अच्चन्तविगमेन बुद्धवा पटिबुद्धवाति बुद्धो, बुद्धिया वा विकसितभावेन बुद्धवा विबुद्धवाति बुद्धो, बुज्झिताति बुद्धो, बोधेताति बुद्धोति एवमादिना नयेन वेदितब्बो । यथाह —

“बुज्झिता सच्चानीति बुद्धो, बोधेता पजायाति बुद्धो, सब्बज्जुताय बुद्धो, सब्बदस्साविताय बुद्धो, अनञ्जनेय्यताय बुद्धो, विसविताय बुद्धो, खीणासवसङ्घातेन बुद्धो, निरुपक्विकलेससङ्घातेन बुद्धो, एकन्तवीतरागोति बुद्धो, एकन्तवीतदोसोति बुद्धो, एकन्तवीतमोहोति बुद्धो, एकन्तनिक्विकलेसोति बुद्धो, एकायनमग्गं गतोति बुद्धो, एको अनुत्तरं सम्मासम्बोधिं अभिसम्बुद्धोति बुद्धो, अबुद्धिविहतत्ता बुद्धिपटिलाभाति बुद्धो, बुद्धोति चेतं नामं न मातरा कतं, न पितरा कतं, न भातरा कतं, न भगिनिया कतं, न मित्तामच्चेहि कतं, न जातिसालोहितेहि कतं, न समणब्राह्मणेहि कतं, न देवताहि कतं, अथ खो विमोक्खन्तिकमेतं बुद्धानं भगवन्तानं बोधिया मूले सह सब्बज्जुतज्जाणस्स पटिलाभा सच्छिका पञ्जत्ति, यदिदं बुद्धो”ति (चूळनि० पारायनत्थुतिगाथानिद्देस ९७; पटि० म० १.१६२) ।

हिंसतीति सरणं, सब्बं अनत्थं अपायदुक्खं सब्बं संसारदुक्खं हिंसति विनासेति विद्धंसेतीति अत्थो । सरणं गताति “बुद्धो भगवा अम्हाकं सरणं गति परायणं पटिसरणं अघस्स हन्ता हितस्स विधाता”ति इमिना अधिप्पायेन बुद्धं भगवन्तं गच्छाम भजाम सेवाम पयिरुपासाम । एवं वा जानाम बुज्झामाति एवं गता उपगता बुद्धं सरणं गता । तप्पटिक्खेपेन न बुद्धं सरणं गता ।

धम्मं सरणं गताति अधिगतमगो सच्छिकतनिरोधे यथानुसिद्धं पटिपज्जमाने चतूसु अपायेसु अपतमाने कत्वा धारेतीति धम्मो । सो अत्थतो अरियमगो चेव निब्बानञ्च । वुत्तज्हेतं —

“यावता, भिक्खवे, धम्मा सङ्घता, अरियो अट्ठङ्गिको मग्गो तेसं अग्गमक्खायती”ति वित्थारो (अ० नि० ४.३४) ।

न केवलञ्च अरियमगनिब्बानानि एव, अपिच खो अरियफलेहि सद्धिं परियत्तिधम्मो च । वुत्तज्हेतं छत्तमाणवकविमाने —

“रागविरागमनेजमसोकं,
धम्ममसङ्घतमप्पटिकूलं ।
मधुरमिमं पगुणं सुविभत्तं,
धम्ममिमं सरणत्थमुपेही”ति ॥ (वि० व० ८८७) ।

तत्थ हि **रागविरागो**ति मग्गो कथितो, **अनेजमसोकन्ति** फलं, **धम्मसङ्घतन्ति** निब्बानं, **अप्पटिकूलं मधुरमिमं पगुणं सुविभत्तन्ति** पिटकत्तयेन विभत्ता सब्बधम्मक्खन्धा कथिता । तं धम्मं वुत्तनयेन सरणन्ति गता धम्मं सरणं गता । तप्पटिक्खेपेन न धम्मं सरणं गता ।

दिट्ठिसीलसङ्घातेन संहतोति सङ्घो । सो अत्थतो अट्ठअरियपुग्गलसमूहो । वुत्तज्हेतं तस्मिं एव विमाने —

“यत्थ च दिन्न महप्फलमाहु,
चतूसु सुचीसु पुरिसयुगेसु ।
अट्ठ च पुग्गल धम्मदसा ते,
सङ्घमिमं सरणत्थमुपेही”ति ॥ (वि० व० ८८८) ।

तं सङ्घं वुत्तनयेन सरणन्ति गता सङ्घं सरणं गता । तप्पटिक्खेपेन न सङ्घं सरणं गताति ।

एत्थ च सरणगमनकोसल्लत्थं सरणं सरणगमनं, यो च सरणं गच्छति सरणगमनप्पभेदो, फलं, संकिलेसो, भेदो, वोदानन्ति अयं विधि वेदितब्बो ।

तत्थ पदत्थतो ताव हिंसतीति **सरणं**, सरणगतानं तेनेव सरणगमनेन भयं सन्तासं दुक्खं दुग्गतिं परिकिलेसं हनति विनासेतीति अत्थो, रतनत्तयस्सेतं अधिवचनं । अथ वा हिते पवत्तनेन अहिता निवत्तनेन च सत्तानं भयं हिंसतीति बुद्धो सरणं, भवकन्तारतो उत्तारणेन अस्सासदानेन च धम्मो, अप्पकानम्मि कारानं विपुलफलपटिलाभकरणेन सङ्घो । तस्मा इमिनापि परियायेन रतनत्तयं सरणं । तप्पसादतग्गरुताहि विहतकिलेसो तप्परायणताकारप्पवत्तो चित्तुप्पादो **सरणगमनं** । तंसमङ्गिसत्तो **सरणं गच्छति**, वुत्तप्पकारेन चित्तुप्पादेन “एतानि मे तीणि रतनानि सरणं, एतानि परायणं”न्ति एवं उपेतीति अत्थो । एवं ताव सरणं सरणगमनं, यो च सरणं गच्छतीति इदं तयं वेदितब्बं ।

पभेदतो पन दुविधं सरणगमनं — लोकियं, लोकुत्तरञ्च । तत्थ लोकुत्तरं दिट्ठसच्चानं मग्गक्खणे

सरणगमनुपविकलेससमुच्छेदेन आरम्भणतो निब्बानारम्भणं हुत्वा किच्चतो सकलेपि रतनत्तये इज्झति, लोकियं पुथुज्जनानं सरणगमनुपविकलेसविक्रम्भनेन आरम्भणतो बुद्धादिगुणारम्भणं हुत्वा इज्झति । तं अत्थतो बुद्धादीसु वत्थूसु सद्धापटिलाभो, सद्धामूलिका च सम्मादिट्ठि दससु पुज्जकिरियवत्थूसु दिट्ठिजुकम्मन्ति वुच्चति ।

तयिदं चतुधा पवत्तति — अत्तसन्निय्यातनेन, तप्परायणताय, सिस्सभावूपगमनेन, पणिपातेनाति । तत्थ **अत्तसन्निय्यातनं** नाम “अज्ज आदिं कत्वा अहं अत्तानं बुद्धस्स निय्यातेमि, धम्मस्स, सङ्गस्सा”ति एवं बुद्धादीनं अत्तपरिच्चजनं । **तप्परायणं** नाम “अज्ज आदिं कत्वा अहं बुद्धपरायणो, धम्मपरायणो, सङ्गपरायणो इति मं धारेही”ति एवं तप्पटिसरणभावो तप्परायणता । **सिस्सभावूपगमनं** नाम “अज्ज आदिं कत्वा अहं बुद्धस्स अन्तेवासिको, धम्मस्स, सङ्गस्स इति मं धारेतू”ति एवं सिस्सभावस्स उपगमनं । **पणिपातो** नाम “अज्ज आदिं कत्वा अहं अभिवादनपच्चुट्ठानअज्जलिकम्मसामीचिकम्मं बुद्धादीनं एव तिण्णं वत्थूनं करोमि इति मं धारेतू”ति एवं बुद्धादीसु परमनिपच्चकारो । इमेसज्हि चतुन्नं आकारानं अज्जतरं करोन्तेन गहितं एव होति सरणगमनं ।

अपिच “भगवतो अत्तानं परिच्चजामि, धम्मस्स, सङ्गस्स अत्तानं परिच्चजामि, जीवितं परिच्चजामि, परिच्चत्तो एव मे अत्ता जीवितञ्च, जीवितपरियन्तिकं बुद्धं सरणं गच्छामि, बुद्धो मे सरणं ताणं लेण”न्ति एवम्पि अत्तसन्निय्यातनं वेदितब्बं । “सत्थारञ्च वताहं पस्सेय्यं, भगवन्तमेव पस्सेय्यं; सुगतञ्च वताहं पस्सेय्यं, भगवन्तमेव पस्सेय्यं; सम्मासम्बुद्धञ्च वताहं पस्सेय्यं; भगवन्तमेव पस्सेय्य”न्ति (सं० नि० २.१५४) एवं महाकस्सपत्थेरस्स सरणगमनं विय सिस्सभावूपगमनं दट्ठब्बं ।

“सो अहं विचरिस्सामि, गामा गामं पुरा पुरं ।

नमस्समानो सम्बुद्धं, धम्मस्स च सुधम्मत्”न्ति ॥ (सं० नि० १.२४६; सु० नि० १९४) —

एवं आळवकादीनं सरणगमनं विय तप्परायणता वेदितब्बा । “अथ खो, ब्रह्मायु, ब्राह्मणो उट्ठायासना एकंसं उत्तरासङ्गं करित्वा भगवतो पादेसु सिरसा निपतित्वा भगवतो पादानि मुखेन च परिचुम्बति, पाणीहि च परिसम्बाहति, नामञ्च सावेति ‘ब्रह्मायु अहं, भो गोतम, ब्राह्मणो, ब्रह्मायु अहं, भो गोतम, ब्राह्मणो’”ति (म० नि० २.३९४) एवं पणिपातो दट्ठब्बो ।

सो पनेस जातिभयाचरियदक्खिण्यवसेन चतुब्बिधो होति । तत्थ दक्खिण्यपणिपातेन सरणगमनं होति, न इतरेहि । सेट्ठवसेनेव हि सरणं गच्छति, सेट्ठवसेन भिज्जति । तस्मा यो “अयमेव लोके सब्बसत्तुत्तमो अग्गदक्खिण्यो”ति वन्दति, तेनेव सरणं गहितं होति, न जातिभयाचरियसञ्जाय वन्दन्तेन । एवं गहितसरणस्स उपासकस्स वा उपासिकाय वा अज्जतिथियेसु पब्बजितम्पि “आतको मे अय”न्ति वन्दतो सरणं न भिज्जति, पगेव अपब्बजितं । तथा राजानं भयेन वन्दतो । सो हि रट्ठपूजितत्ता अवन्दियमानो अनत्थम्पि करेय्याति । तथा यंकिञ्चि सिप्पं सिक्खापकं तिथियम्पि “आचरियो मे अय”न्ति वन्दतोपि न भिज्जति । एवं सरणगमनस्स पभेदो वेदितब्बो ।

एत्थ च लोकुत्तरस्स सरणगमनस्स चत्तारि सामञ्जफलानि विपाकफलं, सब्बदुक्खक्खयो आनिसंसफलं । वुत्तज्हेतं

“यो च बुद्धञ्च धम्मञ्च, सङ्गञ्च सरणं गतो ।

चत्तारि अरियसच्चानि, सम्मप्यञ्जाय पस्सति ॥

“दुखं दुखसमुप्पादं, दुखस्स च अतिक्कमं ।
अरियं चट्ठङ्गिकं मगं, दुखूपसमगामिनं ॥

“एतं खो सरणं खेमं, एतं सरणमुत्तमं ।
एतं सरणमागम्म, सब्बदुक्खा पमुच्चती”ति ॥ (ध० प० १९०-१९२) ।

अपिच निच्चतो अनुपगमनादीनिपि एतस्स आनिसंसफलं वेदितब्बं । वुत्तज्जेतं —

“अट्टानमेतं, भिक्खवे, अनवकासो, यं दिट्ठिसम्पन्नो पुग्गलो कज्जि सङ्खारं निच्चतो उपगच्छेय्य, सुखतो उपगच्छेय्य, कज्जि धम्मं अत्ततो उपगच्छेय्य, मातरं जीविता वोरोपेय्य, पितरं जीविता वोरोपेय्य, अरहन्तं जीविता वोरोपेय्य, दुट्ठचित्तो तथागतस्स लोहितं उप्पादेय्य, सङ्खं भिन्देय्य, अज्जं सत्थारं उद्दिसेय्य नेतं ठानं विज्जती”ति (म० नि० ३.१२७-१२८; अ० नि० १.२६८-२७६; विभ० ८०९) ।

लोकियस्स पन सरणगमनस्स भवसम्पदापि भोगसम्पदापि फलमेव । वुत्तज्जेतं —

“ये केचि बुद्धं सरणं गतासे,
न ते गमिस्सन्ति अपायभूमिं ।
पहाय मानुसं देहं,
देवकायं परिपूरेस्सन्ती”ति ॥ (सं० नि० १.३७) ।

अपरम्पि वुत्तं —

“अथ खो सक्को देवानमिन्दो असीतिया देवतासहस्सेहि सद्धिं येनायस्मा महामोग्गल्लानो तेनुपसङ्कमि... पे०... एकमन्तं ठितं खो सक्कं देवानमिन्दं आयस्मा महामोग्गल्लानो एतदवोच — ‘साधु खो, देवानमिन्द, बुद्धं सरणगमनं होति । बुद्धं सरणगमनहेतु खो, देवानमिन्द, एवमिधेकच्चे सत्ता कायस्स भेदा परं मरणा सुगतिं सगं लोकं उपपज्जन्ति । ते अज्जे देवे दसहि ठानेहि अधिगणहन्ति — दिब्बेन आयुना, दिब्बेन वण्णेन, दिब्बेन सुखेन, दिब्बेन यसेन, दिब्बेन आधिपतेय्येन, दिब्बेहि रूपेहि, दिब्बेहि सद्देहि, दिब्बेहि गन्धेहि, दिब्बेहि रसेहि, दिब्बेहि फोट्टब्बेहि... पे०... धम्मं, सङ्खं... पे०... फोट्टब्बेही”ति (सं० नि० ४.३४१) ।

वेलामसुत्तादिवसेनपि (अ० नि० ९.२०) सरणगमनस्स फलविसेसो वेदितब्बो । एवं सरणगमनस्स फलं वेदितब्बं ।

लोकियसरणगमनज्वेत्य तीसु वत्थूसु अज्जाणसंसयमिच्छाजाणादीहि संकिलिस्सति, न महाजुतिकं होति न महाविप्फारं । लोकुत्तरस्स पन संकिलेसो नत्थि । लोकियस्स च सरणगमनस्स दुविधो भेदो — सावज्जो, अनवज्जो च । तत्थ सावज्जो अज्जसत्थारादीसु अत्तसन्निय्यातनादीहि होति, सो अनिट्ठफलो । अनवज्जो कालकिरियाय, सो अविपाकत्ता अफलो । लोकुत्तरस्स पन नेवत्थि भेदो । भवन्तरेपि हि अरियसावको अज्जं सत्थारं न उद्दिस्सतीति एवं सरणगमनस्स संकिलेसो च भेदो च वेदितब्बो ।

वोदानम्पि च लोकियस्सेव यस्स हि संकिलेसो, तस्सेव ततो वोदानेन भवितब्बं । लोकुत्तरं पन निच्चवोदानमेवाति ।

पाणातिपाताति एत्थ पाणस्स सरसेनेव पतनसभावस्स अन्तरा एव अतिपातनं अतिपातो, सणिकं पतितुं अदत्त्वा सीधं पातनन्ति अत्थो । अतिक्कम्म वा सत्थादीहि अभिभवित्वा पातनं अतिपातो, पाणघातोति वुत्तं होति । **पाणोति** चेत्थ खन्धसन्तानो, यो सत्तोति वोहरीयति, परमत्थतो रूपारूपजीवितिन्द्रियं । रूपजीवितिन्द्रिये हि विकोपिते इतरम्पि तंसम्बन्धताय विनस्सतीति । तस्मिं पन पाणे पाणसज्जिनो जीवितिन्द्रियुपच्छेदकउपक्कमसमुद्घापिका कायवचीद्वारानं अज्जतरद्वारप्पवत्ता वधकचेतना **पाणातिपातो** । याय हि चेतनाय पवत्तमानस्स जीवितिन्द्रियस्स निस्सयभूतेसु उपक्कमकरणहेतुकमहाभूतपच्चया उप्पज्जनकमहाभूता पुरिमसदिसा न उप्पज्जन्ति, विसदिसा एव उप्पज्जन्ति, सा तादिसप्पयोगसमुद्घापिका चेतना पाणातिपातो । लद्धूपक्कमानि हि भूतानि पुरिमभूतानि विय न विसदानीति समानजातियानं कारणानि न होन्तीति । “कायवचीद्वारानं अज्जतरद्वारप्पवत्ता”ति इदं मनोद्वारे पवत्ताय वधकचेतनाय पाणातिपाततासम्भवदस्सनं । कुलुम्बसुत्तेपि हि “इधेक्कचो समणो वा ब्राह्मणो वा इद्धिमा चेतो वसिप्पत्तो अज्जिस्सा कुच्छिगतं गम्भं पापकेन मनसा अनुपेक्खिता होती”ति विज्जामयिद्धि अधिप्पेता । सा च वचीद्वारं मुञ्चित्वा न सक्का निब्बत्तेतुन्ति वचीद्वारवसेनेव निप्पज्जति । ये पन “भावनामयिद्धि तत्थ अधिप्पेता”ति वदन्ति, तेसं वादो कुसलत्तिकवेदनत्तिकवितक्कत्तिकभूमन्तरेहि विरुज्जति ।

स्वायं पाणातिपातो गुणरहितेसु तिरच्छानगतादीसु खुद्दके पाणे अप्पसावज्जो, महासरीरे महासावज्जो । कस्मा? पयोगमहन्तताय । पयोगसमत्तेपि वत्थुमहन्ततादीहि महासावज्जो, गुणवन्तेसु मनुस्सादीसु अप्पगुणे पाणे अप्पसावज्जो, महागुणे महासावज्जो । सरीरगुणानं पन समभावे सति किलेसानं उपक्कमानज्ज मुदुताय अप्पसावज्जो, तिब्बताय महासावज्जो ।

एत्थ च पयोगवत्थुमहन्ततादीहि महासावज्जता तेहि पच्चयेहि उप्पज्जमानाय चेतनाय बलवभावतो वेदितब्बा । यथाधिप्पेतस्स पयोगस्स सहसा निप्फादनवसेन सकिच्चसाधिकाय बहुक्खत्तुं पवत्तजवनेहि लद्धासेवनाय च सन्निद्धापकचेतनाय पयोगस्स महन्तभावो । सतिपि कदाचि खुद्दके चेव महन्ते च पाणे पयोगस्स समभावे महन्तं हनन्तस्स चेतना तिब्बतरा उप्पज्जतीति वत्थुमहन्ततापि चेतनाय बलवभावस्स कारणं । इति उभयम्पेतं चेतनाबलवभावेनेव महासावज्जताय हेतु होति । तथा हन्तब्बस्स महागुणभावे तत्थ पवत्तउपकारचेतना विय खेत्तविसेसनिप्फत्तिया अपकारचेतनापि बलवती तिब्बतरा उप्पज्जतीति तस्स महासावज्जता दट्ठब्बा । तस्मा पयोगवत्थुआदिपच्चयानं अमहत्तेपि गुणमहन्ततादिपच्चयेहि चेतनाय बलवभाववसेनेव महासावज्जता वेदितब्बा ।

तस्स पाणो, पाणसज्जिता, वधकचित्तं, उपक्कमो, तेन मरणन्ति पज्ज सम्भारा । पज्जसम्भारयुत्तो पाणातिपातोति पज्जसम्भाराविनिमुत्तो दट्ठब्बो । तेसु पाणसज्जितावधकचित्तानि पुब्बभागियानिपि होन्ति, उपक्कमो वधकचेतनासमुद्घापितो । तस्स छ पयोगा — साहत्थिको, आणत्तिको, निस्सगियो, थावरो, विज्जामयो, इद्धिमयोति । तेसु सहत्थेन निब्बत्तो साहत्थिको । परेसं आणापनवसेन पवत्तो आणत्तिको । उसुसत्तिआदीनं निस्सज्जनवसेन पवत्तो निस्सगियो । ओपातखणनादिवसेन पवत्तो थावरो । आथब्बणिकादीनं विय मन्तपरिजप्पनपयोगो विज्जामयो । दाठाकोट्टनादीनं विय कम्मविपाकजिद्धिमयो ।

एत्थाह — खणे खणे निरुज्जनसभावसेसु सङ्घारेसु, को हन्ता, को वा हज्जति? यदि चित्तचेतसिकसन्तानो, सो अरूपिताय न छेदनभेदनादिवसेन विकोपनसमत्थो, नापि विकोपनीयो, अथ रूपसन्तानो, सो अचेतनताय कट्ठकलिङ्गरूपमोति न तत्थ छेदनादिना पाणातिपातो लब्धति, यथा मतसरीरे । पयोगोपि पाणातिपातस्स यथावुत्तो

पहरणप्पहारादिको अतीतेसु सङ्खारेसु भवेय्य अनागतेसु पच्चुप्पन्नेसु वा । तत्थ न ताव अतीतेसु अनागतेसु च सम्भवति तेसं अविज्जमानसभावत्ता, पच्चुप्पन्नेसु च सङ्खारानं खणिकत्ता सरसेनेव निरुज्जनसभावताय विनासाभिमुखेसु निष्पयोजनो पयोगो सिया, विनासस्स च कारणरहितत्ता न पहरणप्पहारादिप्पयोगहेतुकं मरणं, निरीहत्ता च सङ्खारानं कस्स सो पयोगो, खणिकभावेन वधाधिप्पायसमकालमेव भिज्जनकस्स याव किरियापरियोसानकालमनवद्धानतो कस्स वा पाणातिपातो कम्मबन्धोति?

वुच्चते — यथावुत्तवधकचेतनासमङ्गी सङ्खारानं पुज्जो सत्तसङ्खातो हन्ता । तेन पवत्तितवधप्पयोगनिमित्तं अपगतुस्माविज्जाणजीवितिन्द्रियो मतोति वोहारस्स वत्थुभूतो यथावुत्तवधप्पयोगाकरणे पुब्बे विय उद्धं पवत्तनारहो रूपारूपधम्मपुज्जो हज्जति, चित्तचेतसिकसन्तानो एव वा । वधप्पयोगाविसयभावेपि तस्स पच्चवोकारभवे रूपसन्तानाधीनवृत्तिताय भूतरूपेसु कतप्पयोगवसेन जीवितिन्द्रियविच्छेदेन सोपि विच्छिज्जतीति न पाणातिपातस्स असम्भवो, नापि अहेतुको, न च पयोगो निष्पयोजनो । पच्चुप्पन्नेसु सङ्खारेसु कतप्पयोगवसेन तदनन्तरं उप्पज्जनारहस्स सङ्खारकलापस्स तथा अनुप्पत्तितो खणिकानञ्च सङ्खारानं खणिकमरणस्स इध मरणभावेन अनधिप्पेतत्ता सन्ततिमरणस्स च यथावुत्तनयेन सहेतुकभावतो न अहेतुकं मरणं, निरीहकेसुपि सङ्खारेसु यथापच्चयं उप्पज्जित्वा अत्थिभावमत्तेनेव अत्तनो अत्तनो अनुरूपफलुप्पादननियतानि कारणानियेव करोन्तीति वुच्चति, यथा पदीपो पकासेतीति, तथेव घातकवोहारो । न च केवलस्स वधाधिप्पायसहभुनो चित्तचेतसिककलापस्स पाणातिपातो इच्छितो, सन्तानवसेन वत्तमानस्सेव पन इच्छितोति अत्थेव पाणातिपातेन कम्मबन्धो । सन्तानवसेन वत्तमानानञ्च पदीपादीनं अत्थकिरियासिद्धि दिस्सतीति । अयञ्च विचारणा अदिन्नादानादीसुपि यथासम्भवं विभावेतब्बा । तस्मा **पाणातिपाता** । न पटिविरताति **अप्पटिविरता** ।

अदिन्नस्स आदानं **अदिन्नादानं**, परस्स हरणं थेय्यं चोरिकाति वुत्तं होति । तत्थ **अदिन्नन्ति** परपरिगगहितं, यत्थ परो यथाकामकारितं आपज्जन्तो अदण्डारहो अनुपवज्जो च होति । तस्मिं परपरिगगहिते परपरिगगहितसज्जिनो तदादायकउपक्कमसमुट्ठापिका थेय्यचेतना अदिन्नादानं । तं हीने परसन्तके अप्पसावज्जं, पणीते महासावज्जं । कस्मा? वत्थुपणीतताय । तथा खुद्दके परसन्तके अप्पसावज्जं, महन्ते महासावज्जं । कस्मा? वत्थुमहन्तताय पयोगमहन्तताय च । वत्थुसमत्ते पन सति गुणाधिकानं सन्तके वत्थुस्मिं महासावज्जं, तंतंगुणाधिकं उपादाय ततो ततो हीनगुणस्स सन्तके वत्थुस्मिं अप्पसावज्जं । वत्थुगुणानं पन समभावे सति किलेसानं पयोगस्स च मुदुभावे अप्पसावज्जं, तिब्बभावे महासावज्जं ।

तस्स पच्च सम्भारा — परपरिगगहितं, परपरिगगहितसज्जिता, थेय्यचित्तं, उपक्कमो, तेन हरणन्ति । छ पयोगा साहत्थिकादयोव । ते च खो यथानुरूपं थेय्यावहारो, पसय्हावहारो, परिकप्पावहारो, पटिच्छन्नावहारो, कुसावहारोति इमेसं अवहारानं वसेन पवत्ता । एत्थ च मन्तपरिजप्पनेन परसन्तकहरणं विज्जामयो पयोगो । विना मन्तेन तादिसेन इद्धानुभावसिद्धेन कायवचीपयोगेन परसन्तकस्स आकड्डनं इद्धिमयो पयोगोति वेदितब्बो ।

कामेसूति मेथुनसमाचारेसु । **मिच्छाचारो**ति एकन्तनिन्दितो लामकाचारो । लक्खणतो पन असद्धम्ममाधिप्पायेन कायद्वारप्पवत्ता अगमनीयद्धानवीतिक्कमचेतना **कामेसु मिच्छाचारो** । तत्थ अगमनीयद्धानं नाम पुरिसानं ताव मातुरक्खितादयो दस, धनक्कीतादयो दसाति वीसति इत्थियो, इत्थीसु पन द्विन्नं सारक्खसपरिदण्डानं, दसन्नञ्च धनक्कीतादीनन्ति द्वादसन्नं इत्थीनं अज्जपुरिसा । स्वायं मिच्छाचारो सीलादिगुणरहिते अगमनीयद्धाने अप्पसावज्जो, सीलादिगुणसम्पन्ने महासावज्जो । गुणरहितेपि च अभिभवित्वा मिच्छा चरन्तस्स महासावज्जो, उभिन्नं समानच्छन्दताय

अप्पसावज्जो । समानच्छन्दभावेपि किलेसानं उपक्कमानञ्च मुदुताय अप्पसावज्जो, तिब्बताय महासावज्जो । तस्स चत्तारो सम्भारा — अगमनीयवत्थु, तस्मिं सेवनचित्तं, सेवनपयोगो, मग्गेनमग्गप्पटिपत्तिअधिवासनन्ति । तत्थ अत्तनो रुचिया पवत्तितस्स तयो, बलक्कारेन पवत्तितस्स तयोति अनवसेसग्गहणेन चत्तारो दट्ठब्बा, अत्थसिद्धि पन तीहेव । एको पयोगो साहत्थिकोव ।

मुसाति विसंवादनपुरेक्खारस्स अत्थभज्जको कायवचीपयोगो, विसंवादनाधिप्पायेन पनस्स परविसंवादककायवचीपयोगसमुट्ठापिका चेतना **मुसावादो** । अपरो नयो **मुसाति** अभूतं वत्थु, **वादो**ति तस्स भूततो तच्छतो विज्जापनं । तस्मा अतथं वत्थुं तथतो परं विज्जापेतुकामस्स तथाविज्जापनपयोगसमुट्ठापिका चेतना **मुसावादो** ।

सो यमत्थं भज्जति, तस्स अप्पताय अप्पसावज्जो, महन्तताय महासावज्जो । अपिच गहट्ठानं अत्तनो सन्तकं अदातुकामताय नत्थीति आदिनयप्पवत्तो अप्पसावज्जो, सक्खिना हुत्वा अत्थभज्जनवसेन वुत्तो महासावज्जो । पब्बजितानं अप्पकम्मि तेलं वा सप्पिं वा लभित्वा हसाधिप्पायेन “अज्ज गामे तेलं नदी मज्जे सन्दती”ति पूरणकथानयेन पवत्तो अप्पसावज्जो, अदिट्ठंयेव पन “दिट्ठ”न्तिआदिना नयेन वदन्तानं महासावज्जो । तथा यस्स अत्थं भज्जति, तस्स अप्पगुणताय अप्पसावज्जो, महागुणताय महासावज्जो । किलेसानं मुदुतिब्बतावसेन च अप्पसावज्जमहासावज्जता लब्भतेव ।

तस्स चत्तारो सम्भारा — अतथं वत्थु, विसंवादनचित्तं, तज्जो वायामो, परस्स तदत्थविजाननन्ति । विसंवादनाधिप्पायेन हि पयोगे कतेपि परेन तस्मिं अत्थे अविज्जाते विसंवादनस्स असिज्जनतो परस्स तदत्थविजाननम्पि एको सम्भारो वेदितब्बो । केचि पन “अभूतवचनं, विसंवादनचित्तं, परस्स तदत्थविजाननन्ति तयो सम्भारा”ति वदन्ति । सचे पन परो दन्धताय विचारेत्वा तमत्थं जानाति, सन्निट्ठापकचेतनाय पवत्तत्ता किरियासमुट्ठापकचेतनाक्खण्येव मुसावादकम्मुना बज्झति ।

सुराति पिट्सुरा, पूवसुरा, ओदनसुरा, किण्णपक्खित्ता, सम्भारसंयुत्ताति पञ्च सुरा । **मेरयन्ति** पुप्फासवो, फलासवो, मध्वासवो, गुळासवो सम्भारसंयुत्तोति पञ्च आसवा । तदुभयम्पि मदनीयट्ठेन **मज्जं** । याय चेतनाय तं पिवति, सा पमादकारणत्ता **पमादट्ठानं** । लक्खणतो पन यथावुत्तस्स सुरामेरयसङ्घातस्स मज्जस्स बीजतो पट्ठाय मदवसेन कायद्वारप्पवत्ता पमादचेतना **सुरामेरयमज्जपमादट्ठानं** । तस्स मज्जभावो, पातुकम्यताचित्तं, तज्जो वायामो, अज्झोहरणन्ति चत्तारो सम्भारा । अकुसलचित्तेनेव चस्स पातब्बतो एकन्तेन सावज्जभावो । अरियसावकानं पन वत्थुं अजानन्तानम्पि मुखं न पविसति, पगेव जानन्तानं । अट्ठपसतमत्तस्स पानं अप्पसावज्जं, अट्ठाळ्हकमत्तस्स पानं ततो महन्तं महासावज्जं, कायसञ्चालनसमत्थं बहुं पिवित्वा गामघातकादिकम्मं करोन्तस्स महासावज्जमेव । पापकम्मज्झि पाणातिपातं पत्वा खीणासवे महासावज्जं, अदिन्नादानं पत्वा खीणासवस्स सन्तके महासावज्जं, मिच्छाचारं पत्वा खीणासवाय भिक्खुनिया वीतिक्कमे, मुसावादं पत्वा मुसावादेन सङ्गभेदे, सुरापानं पत्वा कायसञ्चालनसमत्थं बहुं पिवित्वा गामघातकादिकम्मं महासावज्जं । सब्बेहिपि चेतोहि मुसावादेन सङ्गभेदोव महासावज्जो । तज्हि कत्वा कप्पं निरये पच्चति ।

इदानि एतेसु सभावतो, आरम्मणतो, वेदनतो, मूलतो, कम्मतो, फलतोति छहि आकारेहि विनिच्छयो वेदितब्बो । तत्थ **सभावतो** पाणातिपातादयो सब्बेपि चेतनासभावाव । **आरम्मणतो** पाणातिपातो जीवितिन्द्रियारम्मणतो सङ्खारारम्मणो, अदिन्नादानं सत्तारम्मणं वा सङ्खारारम्मणं वा, मिच्छाचारो फोडुब्बवसेन सङ्खारारम्मणो, सत्तारम्मणोति एके । मुसावादो

सत्तारम्मणो वा सङ्खारारम्मणो वा, सुरापानं सङ्खारारम्मणं । **वेदनतो** पाणातिपातो दुक्खवेदनो, अदिन्नादानं तिवेदनं, मिच्छाचारो सुखमज्झत्तवसेन द्विवेदनो, तथा सुरापानं । सन्निट्ठापकचित्तेन पन उभयमि मज्झत्तवेदनं न होति । मुसावादो तिवेदनो । **मूलतो** पाणातिपातो दोसमोहवसेन द्विमूलको, अदिन्नादानं मुसावादो च दोसमोहवसेन वा लोभमोहवसेन वा, मिच्छाचारो सुरापानञ्च लोभमोहवसेन द्विमूलं । **कम्मतो** मुसावादोयेवेत्थ वचीकम्मं, सेसं चतुब्बिधमि कायकम्ममेव । **फलतो** सब्बेपि अपायूपपत्तिफला चेव सुगतियमि अप्पायुकतादिनानाविधअनिट्ठफला चाति एवमेत्थ सभावादितो विनिच्छयो वेदितब्बो ।

अप्पटिविरताति समादानविरतिया सम्पत्तविरतिया च अभावेन न पटिविरता । **दुस्सीलाति** ततो एव पञ्चसीलमत्तस्सापि अभावेन निस्सीला । **पापधम्माति** लामकधम्मा, हीनाचारा । **पाणातिपाता पटिविरतोति** सिक्खापदसमादानेन पाणातिपाततो विरतो, आरका ठितो । एस नयो सेसेसुपि ।

इधापि पाणातिपातावेरमणिआदीनं सभावतो आरम्मणतो, वेदनतो, मूलतो, कम्मतो, समादानतो, भेदतो, फलतो च विज्जातब्बो विनिच्छयो । तत्थ **सभावतो** पञ्चपि चेतनायोपि होन्ति विरतियोपि, विरतिवसेन पन देसना आगता । या पाणातिपाता विरमन्तस्स “या तस्मिं समये पाणातिपाता आरति विरती”ति एवं वुत्ता कुसलचित्तसम्पयुत्ता विरति । सा पभेदतो तिविधा — सम्पत्तविरति, समादानविरति, समुच्छेदविरतीति । तत्थ असमादिन्नसिक्खापदानं अत्तनो जातिवयबाहुसच्चादीनि पच्चवेक्खित्वा “अयुत्तमेतं अम्हाकं कातु”न्ति सम्पत्तवत्थुं अवीतिक्कमन्तानं उप्पज्जमाना विरति **सम्पत्तविरति** नाम । समादिन्नसिक्खापदानं सिक्खापदसमादाने तदुत्तरि च अत्तनो जीवितमि परिच्चजित्वा वत्थुं अवीतिक्कमन्तानं उप्पज्जमाना विरति **समादानविरति** नाम । अरियमग्गसम्पयुत्ता पन विरति **समुच्छेदविरति** नाम, यस्सा उप्पत्तितो पट्टाय अरियपुग्गलानं “पाणं घातेस्सामा”ति चित्तमि न उप्पज्जति । तासु समादानविरति इधाधिप्पेता ।

आरम्मणतो पाणातिपातादीनं आरम्मणानेव एतेसं आरम्मणानि । वीतिक्कमितब्बतोयेव हि विरति नाम होति । यथा पन निब्बानारम्मणो अरियमग्गो किलेसे पजहति, एवं जीवितिन्द्रियादिआरम्मणायेव एते कुसलधम्मा पाणातिपातादीनि दुस्सील्यानि पजहन्ति । **वेदनतो** सब्बापि सुखवेदनाव ।

मूलतो जाणसम्पयुत्तचित्तेन विरमन्तस्स अलोभअदोसअमोहवसेन तिमूला होन्ति, जाणविप्पयुत्तचित्तेन विरमन्तस्स अलोभअदोसवसेन द्विमूला । **कम्मतो** मुसावादा वेरमणि वचीकम्मं, सेसा कायकम्मं । **समादानतो** अज्जस्स गरुट्टानियस्स सन्तिके तं अलभन्तेन सयमेव वा पञ्च सीलानि एकज्झं पाटियेक्कं वा समादियन्तेन समादिन्नानि होन्ति । **भेदतो** गहट्टानं यं यं वीतिक्कन्तं, तं तदेव भिज्जति, इतरं न भिज्जति । कस्मा? गहट्टा हि अनिबद्धसीला होन्ति, यं यं सक्कोन्ति, तं तदेव रक्खन्ति । पब्बजितानं पन एकस्मिं वीतिक्कन्ते सब्बानि भिज्जन्तीति ।

फलतोति पाणातिपाता वेरमणिया चेत्थ अङ्गपच्चङ्गसम्पन्नता, आरोहपरिणाहसम्पत्ति, जवनसम्पत्ति, सुप्पतिट्ठितपादता, चारुता, मुदुता, सुचिता, सूरता, महब्बलता, विस्सट्ठवचनता, सत्तानं पियमनापता, अभिज्जपरिसता, अच्छम्भिता, दुप्पधंसियता, परूपक्कमेन अमरणता, महापरिवारता, सुवण्णता, सुसण्ठानता, अप्पाबाधता, असोकता, पियमनापेहि अविप्पयोगो, दीघायुकताति एवमादीनि फलानि ।

अदिन्नादाना वेरमणिया महाधनधज्जता, अनन्तभोगता, थिरभोगता, इच्छितानं भोगानं खिप्पं पटिलाभो, राजादीहि असाधारणभोगता, उळारभोगता, तत्थ तत्थ जेट्ठकभावो, नत्थिभावस्स अजाननता, सुखविहारिताति एवमादीनि ।

अब्रह्मचरिया वेरमणिया विगतपच्चत्थिकता, सब्बसत्तानं पियमनापता, अन्नपानवत्थच्छादनादीनं लाभिता, सुखसुपनता, सुखपटिबुज्जनता, अपायभयविमोक्खो, इत्थिभावनपुंसकभावानं अभब्बता, अक्कोधनता, सच्चकारिता, अमङ्कुता, आराधनसुखता, परिपुण्णिन्द्रियता, परिपुण्णलक्खणता, निरासङ्कता, अप्पोस्सुक्कता, सुखविहारिता, अकुतोभयता, पियविप्पयोगाभावोति एवमादीनि । यस्मा पन मिच्छाचारावेरमणिया फलानिपि एत्थेव अन्तोगधानि, तस्मा (अब्रह्मचरिया वेरमणिया) ।

मुसावादा वेरमणिया विप्पसन्निन्द्रियता, विस्सड्डमधुरभाणिता, समसितसुद्धदन्तता, नातिथूलता, नातिकिसता, नातिरस्सता, नातिदीघता, सुखसम्फस्सता, उप्पलगन्धमुखता, सुस्सूसकपरिसता, आदेय्यवचनता, कमलदलसदिसमुदलोहिततनुजिह्वाता, अलीनता, अनुद्धतताति एवमादीनि ।

सुरामेरयमज्जपमादड्डाना वेरमणिया अतीतानागतपच्चुप्पन्नेसु किच्चकरणीयेसु अप्पमादता, जाणवन्तता, सदा उपड्डितस्सतिता, उप्पन्नेसु किच्चकरणीयेसु ठानुप्पत्तिकपटिभानवन्तता, अनलसता, अजळता, अनुम्मत्तता, अच्छम्भिता, असारम्भिता, अनिस्सुकिता, अमच्छरिता, सच्चवादिता, अपिसुणअफरुसअसम्फप्पलापवादिता, कतञ्जुता, कतवेदिता, चागवन्तता, सीलवन्तता, उजुकता, अक्कोधनता, हिरोत्तप्पसम्पन्नता, उजुदिट्ठिता, महन्तता, पण्डितता, अत्थानत्थकुसलताति एवमादीनि फलानि । एवमेत्थ पाणातिपातावेरमणिआदीनम्पि सभावादितो विनिच्छयो वेदितब्बो ।

सीलवाति यथावुत्तपञ्चसीलवसेन सीलवा । **कल्याणधम्मो**ति सुन्दरधम्मो, सरणगमनपरिदीपिताय दिट्ठिसम्पत्तिया सम्पन्नपज्जोति अत्थो । यो पन पुत्तो मातापितूसु अस्सद्धेसु दुस्सीलेसु च सयम्पि तादिसो, सोपि अवजातोयेवाति वेदितब्बो । अस्सद्धियादयो हि इध अवजातभावस्स लक्खणं वुत्ता, ते च तस्मिं संविज्जन्ति । मातापितरो पन उपादाय पुत्तस्स अतिजातादिभावो वुच्चतीति ।

यो होति कुलगन्धनोति कुलच्छेदको कुलविनासको । छेदनत्थो हि इध गन्धसद्दो, “उप्पलगन्धपच्चत्थिका”तिआदीसु (पारा० ६५) विय । केचि पन “कुलधंसनो”ति पठन्ति, सो एवत्थो ।

एते खो पुत्ता लोकस्मिन्ति एते अतिजातादयो तयो पुत्ता एव इमस्मिं सत्तलोके पुत्ता नाम, न इतो विनिमुत्ता अत्थि । इमेसु पन **ये भवन्ति उपासका** ये सरणगमनसम्पत्तिया उपासका भवन्ति कम्मस्सकताजाणेन कम्मस्स कोविदा, ते च पण्डिता पज्जवन्तो, पञ्चसीलदससीलेन **सम्पन्ना** परिपुण्णा । याचकानं वचनं जानन्ति, तेसं मुखाकारदस्सनेनेव अधिप्पायपूरणतोति **वदञ्जू**, तेसं वा “देही”ति वचनं सुत्वा “इमे पुब्बे दानं अदत्त्वा एवंभूता, मया पन एवं न भवितब्ब”न्ति तेसं परिच्चागेन तदत्थं जानन्तीति वदञ्जू, पण्डितानं वा कम्मस्सकतादिदीपकं वचनं जानन्तीति वदञ्जू । “पदञ्जू”ति च पठन्ति, पदानिया परिच्चागसीलाति अत्थो । ततो एव विगतमच्छेरमलत्ता **वीतमच्छरा** । **अब्भघनाति** अब्भसङ्घाता घना, घनमेघपटला वा **मुत्तो चन्दो**विय, उपासकादिपरिसासु खत्तियादिपरिसासु च विरोचरे विरोचन्ति, सोभन्तीति अत्थो ।

पञ्चमसुत्तवण्णना निट्ठिता ।

६. अवुट्ठिकसुत्तवण्णना

७५. छट्ठे अवुट्ठिकसमोति अवुट्ठिकमेघसमो । एकच्चो हि मेघो सतपटलसहस्सपटलो हुत्वा उट्ठित्वा थनन्तो

गज्जन्तो विज्जोतन्तो एकं उदकबिन्दुमि अपातेत्वा विगच्छति, तथूपमो एकच्चो पुगगलोति दस्सेन्तो आह “अवुट्टिकसमो”ति । **पदेसवस्सी**ति एकदेसवस्सिमेघसमो । पदेसवस्सी वियाति हि पदेसवस्सी । एकच्चो एकस्मिंयेव ठाने ठितेसु मनुस्सेसु यथा एकच्चे तेमेन्ति, एकच्चे न तेमेन्ति, एवं मन्दं वस्सति, तथूपमं एकच्चं पुगगलं दस्सेति “पदेसवस्सी”ति । **सब्बत्थाभिवस्सी**ति सब्बस्मिं पथवीपब्बतसमुद्दादिके जगतिप्पदेसे अभिवस्सिमेघसमो । एकच्चो हि सकलचक्कवाळगब्भं पत्थरित्वा सब्बत्थकमेव अभिवस्सति, तं चातुद्दीपिकमहामेघं एकच्चस्स पुगगलस्स उपमं कत्वा वुत्तं “सब्बत्थाभिवस्सी”ति ।

सब्बेसानन्ति सब्बेसं, अयमेव वा पाठो । **न दाता होती**ति अदानसीलो होति, थद्धमच्छरिताय न कस्सचि किञ्चि देतीति अत्थो । इदानी दानस्स खेतं देय्यधम्मञ्च विभागेन दस्सेतुं “**समणब्राह्मणा**”तिआदिमाह । तत्थ समितपापसमणा चेव पब्बज्जमत्तसमणा च बाहितपापब्राह्मणा चेव जातिमत्तब्राह्मणा च इध “समणब्राह्मणा”ति अधिप्पेता । **कपणा** नाम दुग्गता दलिदमनुस्सा । **अद्धिका** नाम पथाविनो परिब्बयविहीना । **वनिब्बका** नाम ये “इट्ठं देथ कन्तं मनापं कालेन अनवज्जं उदग्गचित्ता पसन्नचित्ता, एवं देन्ता गच्छथ सुगतिं, गच्छथ ब्रह्मलोक”न्तिआदिना नयेन दाने नियोजेन्ता दानस्स वण्णं थोमेन्ता विचरन्ति । **याचका** नाम ये केवलं “मुट्ठिमत्तं देथ, पसतमत्तं देथ, सरावमत्तं देथा”ति अप्पकम्पि याचमाना विचरन्ति । तत्थ समणब्राह्मणगगहणेन गुणखेत्तं उपकारिखेत्तञ्च दस्सेति, कपणादिगगहणेन करुणाखेत्तं । **अन्नन्ति** यंकिञ्चि खादनीयं भोजनीयं । **पानन्ति** अम्बपानादिपानकं । **वत्थन्ति** निवासनपारुपनादिअच्छादनं । **यानन्ति** रथवद्वादि अन्तमसो उपाहनं उपादाय गमनसाधनं । **मालाति** गन्थितागन्थितभेदं सब्बं पुप्फं । **गन्थन्ति** यंकिञ्चि गन्धजातं पिसितं अपिसितं गन्धूपकरणञ्च । **विलेपनन्ति** छविरागकरणं । **सेय्याति** मज्जपीठादि चेव पावारकोजवादि च सयितब्ववत्थु । सेय्यगगहणेन चेत्थ आसनम्पि गहितन्ति दडुब्बं । **आवसथन्ति** वातातपादिपरिस्सयविनोदनं पतिस्सयं । **पदीपेय्यन्ति** दीपकपल्लिकादिपदीपूपकरणं ।

एवं खो, भिक्खवेति विज्जमानेपि देय्यधम्मे पटिग्गाहकानं एवं दातब्ववत्थुं सब्बेन सब्बं अदेन्तो पुगगलो अवस्सिकमेघसदिसो होति । इदं वुत्तं होति — भिक्खवे, यथा सो मेघो सतपटलसहस्सपटलो हुत्वा उट्ठित्वा न किञ्चि वस्सि विगच्छति, एवमेव यो उळारं विपुलञ्च भोगं संहरित्वा गेहं आवसन्तो कस्सचि कटच्छुमत्तं भिक्खं वा उळुङ्कमत्तं यागुं वा अदत्त्वा विगच्छति, विवसो मच्चुवसं गच्छति, सो अवुट्टिकसमो नाम होतीति । इमिना नयेन सेसेसुपि निगमनं वेदितब्बं । इमेसु च तीसु पुगगलेसु पठमो एकंसेनेव गरहितब्बो, दुतियो पसंसनीयो, ततियो, पसंसनीयतरो । पठमो वा एकन्तेनेव सब्बनिहीनो, दुतियो मज्झिमो, ततियो उत्तमोति वेदितब्बो ।

गाथासु **समणे**ति उपयोगवसेन बहुवचनं तथा सेसेसुपि । **लब्धानाति** लभित्वा, समणे दक्खिण्ये पवारेत्वा पुट्ठो न संविभजति । **अन्नं पानञ्च भोजनन्ति** अन्नं वा पानं वा अज्जं वा भुज्जितब्वयुत्तकं भोजनं, तं न संविभजति । अयज्हेत्थ सङ्खेपत्थो — यो अत्थिकभावेन उपगते सम्पटिग्गाहके लभित्वा अन्नादिना संविभागमत्तम्पि न करोति, किं सो अज्जं दानं दस्सति, तं एवरूपं थद्धमच्छरियं **पुरिसाधमं** निहीनपुगगलं पण्डिता **अवुट्टिकसमो**ति आहु कथयन्तीति ।

एकच्चानं न ददातीति विज्जमानेपि महति दातब्वधम्मे एकेसं सत्तानं तेसु कोधवसेन वा, देय्यधम्मे लोभवसेन वा न ददाति । **एकच्चानं पवेच्छती**ति एकेसंयेव पन ददाति । **मेधाविनो**ति पज्जवन्तो पण्डिता जना ।

सुभिक्खवाचोति यो उपगतानं याचकानं “अन्नं देथ, पानं देथा”तिआदिना तं तं दापेति, सो सुलभभिक्खताय सुभिक्खा वाचा एतस्साति सुभिक्खवाचो । “सुभिक्खवस्सी”तिपि पठन्ति । यथा लोको सुभिक्खो होति, एवं

सब्बत्थाभिवस्सितमहामेघो सुभिक्षवस्सी नाम होति । एवमयम्पि महादानेहि सब्बत्थाभिवस्सी सुभिक्षवस्सीति ।
आमोदमानो पकिरेतीति तुडुहट्टमानसो सहत्थेन दानं देन्तो पटिग्गाहकखेत्ते देय्यधम्मं पकिरेन्तो विय होति, वाचायपि
“देथ देथा”ति भासति ।

इदानीं नं सुभिक्षवस्सितभावं दस्सेतुं **“यथापि मेघो”**तिआदि वुत्तं । तत्रायं सङ्खेपत्थो — यथा महामेघो पठमं
मन्दनिग्घोसेन थनयित्वा पुन सकलनदीकन्दरानि एकनिन्नादं करोन्तो गज्जयित्वा पवस्सति, सब्बत्थकमेव वारिना उदकेन
थलं निन्नञ्च अभिसन्दन्तो पूरेति एकोघं करोति, **एवमेव** इध इमस्मिं सत्तलोके एकच्चो उळारपुग्गलो सब्बसमताय सो
महामेघो विय वस्सितब्बत्ता **तादिसो** यथा धनं **उट्टानाधिगतं** अत्तनो उट्टानवीरियाभिनिब्बत्तं होति, एवं अनलसो हुत्वा
तञ्च **धम्मेन** जायेन **संहरित्वा** तन्निब्बत्तेन अन्नेन पानेन अञ्जेन च देय्यधम्मेन **पत्ते** सम्पत्ते **वनिब्बके सम्मा** सम्मदेव
देसकालानुरूपञ्चेव इच्छानुरूपञ्च **तप्पेति** सम्पवारेतीति ।

छट्टसुत्तवण्णना निड्ढिता ।

७. सुखपत्थनासुत्तवण्णना

७६. सत्तमे **सुखानीति** सुखनिमित्तानि । **पत्थयमानोति** इच्छमानो आकङ्खमानो । **सीलन्ति** गहट्टसीलं
पब्बजितसीलञ्च । गहट्टो चे गहट्टसीलं, पब्बजितो चे चतुपारिसुद्धिरीलन्ति अधिप्पायो । **रक्खेय्याति** समादियित्वा
अवीतिक्कमन्तो सम्मदेव गोपेय्य । **पसंसा मे आगच्छतूति** “मम कल्याणो कित्तिसद्दो आगच्छतू”ति इच्छन्तो पण्डितो
सप्पञ्जो सीलं रक्खेय्य । सीलवतो हि गहट्टस्स ताव “असुको असुककुलस्स पुत्तो सीलवा कल्याणधम्मो सद्दो पसन्नो
दायको कारको”तिआदिना परिसमज्जे कल्याणो कित्तिसद्दो अब्भुग्गच्छति, पब्बजितस्स “असुको नाम भिक्खु सीलवा
वत्तसम्पन्नो सोरतो सुखसंवासो सगारवो सप्पतिस्सो”तिआदिना...पे... अब्भुग्गच्छतीति । वुत्तञ्हेतं —

“पुन चपरं, गहपतयो, सीलवतो सीलसम्पन्नस्स कल्याणो कित्तिसद्दो अब्भुग्गच्छती”ति (अ० नि० ५.२१३;
उदा० ७६; महाव० २८५) ।

तथा —

“आकङ्खेय्य चे, भिक्खवे, भिक्खु — ‘सब्रह्मचारीनं पियो चस्सं मनापो, गरु च भावनीयो चा’ति,
सीलेस्वेवस्स परिपूरकारी”तिआदि (म० नि० १.६५) ।

भोगा मे उप्पज्जन्तूति एत्थ गहट्टस्स ताव सीलवतो कल्याणधम्मस्स येन येन सिप्पट्टानेन जीविकं कप्पेति — यदि
कसिया, यदि वणिज्जाय, यदि राजपौरिसेन, तं तं यथाकालं यथाविधिञ्च अतिविय अप्पमत्तभावतो अथस्स अनुप्पन्ना
चेव भोगा उप्पज्जन्ति, उप्पन्ना च भोगा फातिं गमिस्सन्ति । पब्बजितस्स पन सीलाचारसम्पन्नस्स अप्पमादविहारिस्स सतो
सीलसम्पन्नस्स सीलसम्पदाय अप्पिच्छतादिगुणेषु च पसन्ना मनुस्सा उळारुळारे पच्चये अभिहरन्ति, एवमस्स अनुप्पन्ना
चेव भोगा उप्पज्जन्ति, उप्पन्ना च थिरा होन्ति । तथा हि वुत्तं —

“पुन चपरं, गहपतयो, सीलवा सीलसम्पन्नो अप्पमादाधिकरणं महन्तं भोगक्खन्धं अधिगच्छती”ति (अ०
नि० ५.२१३; उदा० ७६; महाव० २८५) ।

तथा —

“आकङ्क्षेय्य चे, भिक्खवे, भिक्खु — ‘लाभी अस्स
चीवरपिण्डपातसेनासनगिलानपच्चयभेसज्जपरिक्खारान’न्ति, सीलेस्वेवस्स परिपूरकारी’ति (म० नि० १.६५) च

—

सेसं वुत्तनयमेव ।

गाथासु पत्थयानोति पत्थयन्तो । तयो सुखेति तीणि सुखानि । वित्तलाभन्ति धनलाभं, भोगुप्पत्तिन्ति अत्थो ।
विसेसतो चेत्य पसंसाय चेतसिकसुखं, भोगेहि कायिकसुखं, इतरेन उपपत्तिसुखं; तथा पठमेन दिट्ठधम्मसुखं, ततियेन
सम्परायसुखं, दुतियेन उभयसुखं गहितन्ति वेदितब्बं ।

इदानीं पसंसादिकारणस्स सीलस्स विय पसंसादीनम्पि विसेसकारणं पापमित्तपरिवज्जनं कल्याणमित्तसेवनञ्च
आदीनवानिसंसेहि सद्धिं दस्सेन्तो “अकरोन्तो”ति आदिमाह । तत्थ सङ्कियोति पापस्मिं परिसङ्कितब्बो “अद्धा इमिना पापं
कतं वा करिस्सति वा, तथा हेस पापपुरिसेहि सद्धिं सञ्चरती”ति । अस्साति इमस्स पापजनसेविनो पुग्गलस्स उपरि, अस्स
वा पुग्गलस्स अवण्णो अभूतोपि पापजनसेविताय रुहति विरूळ्हि वेपुल्लं आपज्जति पत्थरति । अस्साति वा भुम्मत्थे
सामिवचनं, तस्मिं पुग्गलेति अत्थो । स वे तादिसको होतीति यो यादिसं पापमित्तं वा कल्याणमित्तं वा भजति उपसेवति
च, सो पुग्गलो भूमिभागवसेन उदकं विय तादिसोव होति, पापधम्मो कल्याणधम्मो वा होति । कस्मा? सहवासो हि
तादिसो; यस्मा सहवासो संसग्गो उपरागो विय फलिकमणीसु पुरिसउपनिस्सयभूतं पुग्गलाकारं गाहापेति, तस्मा
पापपुग्गलेन सह वासो न कातब्बोति अधिप्पायो ।

सेवमानो सेवमानन्ति परं पकतिसुद्धं पुग्गलं कालेन कालं अत्तानं सेवमानं सेवमानो भजमानो पापपुग्गलो, तेन वा
सेवियमानो । सम्फुट्ठो सम्फुसन्ति तेन पकतिसुद्धेन पुग्गलेन सहवासेन संसग्गेन सम्फुट्ठो पापपुग्गलो सयम्पि, तथा तं
फुसन्तो । सरो दिट्ठो कलापं वाति यथा नाम सरो विसेन दिट्ठो लित्तो सरकलापगतो सरसमूहसङ्घातं सरकलापं अत्तना
फुट्ठं अलित्तम्पि उपलिम्पति, एवं पापेन उपलेपभया धीरोति धितिसम्पन्नता धीरो पण्डितपुरिसो पापसहायो न भवेय्य ।

पूतिमच्छं कुसग्गेनाति यथा कुच्छितभावेन पूतिभूतं मच्छं कुसतिणग्गेन यो पुरिसो उपनय्हति पुटबन्धवसेन बन्धति,
तस्स ते कुसा अपूतिकापि पूतिमच्छसम्बन्धेन पूति दुग्गन्धमेव वायन्ति । एवं बालूपसेवनाति एवंसम्पदा बालजनूपसेवना
दट्ठब्बा । एवं धीरूपसेवनाति यथा असुरभिन्नोपि पत्ता तगरसम्बन्धेन सुरभिं वायन्ति, एवं पण्डितूपसेवना पकतिया
असीलवतो सीलसमादानादिवसेन सीलगन्धवायनस्स कारणं होति ।

तस्माति यस्मा अकल्याणमित्तसेवनाय कल्याणमित्तसेवनाय च अयं एदिसो आदीनवो आनिसंसो च, तस्मा
पत्तपुटस्सेव पलासपुटस्स विय दुग्गन्धसुगन्धवत्थुसंसग्गेन असाधुसाधुजनसन्निस्सयेन च । जत्वा सम्पाकमत्तनोति
अत्तनो दुक्खुद्रयं सुखुद्रयञ्च फलनिष्फत्तिं जत्वा जानित्वा असन्ते पापमित्ते न उपसेवेय्य, सन्ते उपसन्ते वन्तदोसे पसत्थे
वा पण्डिते सेवेय्य । तथा हि असन्तो निरयं नेन्ति, सन्तो पापेन्ति सुग्गतन्ति । इति भगवा पठमगाथाय यथावुत्तानि
तीणि सुखनिमित्तानि दस्सेत्वा ततो पराहि पञ्चहि गाथाहि पटिपक्खपरिवज्जनेन सद्धिं पसंसासुखस्स आगमनं दस्सेत्वा
ओसानगाथाय तिण्णम्पि सुखानं आगमनकारणेन सद्धिं ओसानसुखं दस्सेति ।

सत्तमसुत्तवण्णना निड्डिता ।

८. भिदुरसुत्तवण्णना

७७. अट्टमे भिदुरायन्ति भिदुरो अयं । कायोति रूपकायो । सो हि अङ्गपच्चङ्गानं केसादीनञ्च समूहट्ठेन, एवं कुच्छित्तानं जेगुच्छानं आयो उप्पत्तिदेसोतिपि कायो । तत्रायं वचनत्थो — आयन्ति एत्थाति आयो । के आयन्ति? कुच्छिता केसादयो । इति कुच्छित्तानं आयोतिपि कायो । अत्थतो पन चतुसन्ततिवसेन पवत्तमानानं भूतुपादायधम्मानं पुज्जो । इदं वुत्तं होति — भिक्खवे, अयं चतुमहाभूतमयो रूपकायो भिदुरो भेदनसीलो भेदनसभावो खणे खणे विद्धंसनसभावोति । “भिन्दराय”न्तिपि पाठो, सो एवत्थो । विज्जाणन्ति तेभूमकं कुसलादिचित्तं । वचनत्थो पन — तं तं आरम्मणं विजानातीति विज्जाणं । यज्झि सज्जाननपजाननविधुरं आरम्मणविजाननं उपलब्धि, तं विज्जाणं । विरागधम्मन्ति विरज्जनधम्मं, पलुज्जनसभावन्ति अत्थो । सब्बे उपधीति खन्धूपधि, किलेसूपधि, अभिसङ्खारूपधि, पञ्चकामगुणूपधीति एते “उपधीयति एत्थ दुक्ख”न्ति उपधिसज्जिता सब्बेपि उपादानक्खन्धकिलेसाभिसङ्खारपञ्चकामगुणधम्मा हुत्वा अभावट्ठेन अनिच्चा, उदयब्बयप्पटिपीठनट्ठेन दुक्खा, जराय मरणेन चाति द्विधा विपरिणामेतब्बसभावताय पकतिविजहनट्ठेन विपरिणामधम्मा । एवमेत्थ अनिच्चदस्सनसुखताय रूपधम्मे विज्जाणञ्च विसुं गहेत्वा पुन उपधिविभागेन सब्बेपि तेभूमकधम्मे एकज्झं गहेत्वा अनिच्चदुक्खानुपस्सनामुखेन तथाबुज्जनकानं पुग्गलानं अज्झासयेन सम्मसनचारो कथितो । कामञ्चेत्थ लक्खणद्वयमेव पाळियं आगतं, “यं दुक्खं, तदनत्ता”ति (सं० नि० ३.१५) पन वचनतो दुक्खलक्खणेनेव अनत्तलक्खणम्पि दस्सितमेवाति वेदितब्बं ।

गाथायं उपधीसु भयं दिस्वाति उपधीसु भयतुपट्टानजाणवसेन भयं दिस्वा, तेसं भायितब्बतं पस्सित्वा । इमिना बलवविपस्सनं दस्सेति । भयतुपट्टानजाणमेव हि विभजित्वा विसेसवसेन आदीनवानुपस्सना निब्बिदानुपस्सनाति च वुच्चति । जातिमरणमच्चगाति एवं सम्मसन्तो विपस्सनाजाणं मग्गेन घटेत्वा मग्गपरम्पराय अरहत्तं पत्तो जातिमरणं अतीतो नाम होति । कथं? सम्पत्त्वा परमं सन्तिन्ति परमं उत्तमं अनुत्तरं सन्तिं सब्बसङ्खारूपसमं निब्बानं अधिगन्त्वा । एवंभूतो च कालं कङ्कति भावितत्तोति चतुन्नं अरियमग्गानं वसेन भावनाभिसमयनिष्फत्तिया भावितकायसीलचित्तपञ्चत्ता भावितत्तो मरणं जीवितञ्च अनभिनन्दन्तो केवलं अत्तनो खन्धपरिनिब्बानकालं कङ्कति उदिक्खति, न तस्स कत्थचि पत्थना होतीति । तेनाह —

“नाभिनन्दामि मरणं, नाभिनन्दामि जीवितं ।

कालञ्च पटिकङ्कामि, निब्बिसं भतको यथा”ति ॥ (थेरगा० ६०६) ।

अट्टमसुत्तवण्णना निड्डिता ।

९. धातुसोसंसन्दनसुत्तवण्णना

७८. नवमे धातुसोति धातुतो । धातूति च अज्झासयधातु अज्झासयसभावो अधिप्पेतो, यो अधिमुत्तीतिपि वुच्चति । संसन्दन्तीति ताय धातुसभागताय यथाधातु यथाअज्झासयं अल्लीयन्ति एकतो होन्ति । समेन्तीति ताय एव समानज्झासयताय एकचित्ता हुत्वा समागच्छन्ति अज्जमज्जं भजन्ति उपसङ्कमन्ति, अत्तनो रुचिभावखन्तिदिट्ठियो वा तत्थ तत्थ समे करोन्ता पवत्तन्ति । हीनाधिमुत्तिकाति हीने कामगुणादिके अधिमुत्ति एतेसन्ति हीनाधिमुत्तिका, हीनज्झासया । कल्याणाधिमुत्तिकाति कल्याणे नेक्खम्मादिके अधिमुत्ति एतेसन्ति कल्याणाधिमुत्तिका, पणीतज्झासया । सचे हि

आचरियुपज्झाया न सीलवन्तो, अन्तेवासिकसद्धिविहारिका च सीलवन्तो, ते आचरियुपज्झायेपि न उपसङ्कमन्ति, अत्तनो सदिसे सारुप्पभिक्षूयेव उपसङ्कमन्ति । सचे पन आचरियुपज्झाया सीलवन्तो, इतरे न सीलवन्तो, तेषि न आचरियुपज्झाये उपसङ्कमन्ति, अत्तनो सदिसे हीनाधिमुत्तिकेयेव उपसङ्कमन्ति । एवं उपसङ्कमनं पन न केवलं एतरहि एव, अथ खो अतीतानागतेपीति दस्सेन्तो “अतीतम्पि, भिक्षवे”ति आदिमाह । सङ्खेपतो संकिलेसधम्मेषु अभिनिविट्ठा हीनाधिमुत्तिका, वोदानधम्मेषु अभिनिविट्ठा कल्याणाधिमुत्तिका ।

इदं पन दुस्सीलानं दुस्सीलसेवनमेव, सीलवन्तानं सीलवन्तसेवनमेव, दुप्पज्जानं दुप्पज्जसेवनमेव, पज्जवन्तानं पज्जवन्तसेवनमेव को नियामेतीति? अज्झासयधातु नियामेति । सम्बहुला किर भिक्षू एकस्मिं गामे भिक्षाचारं चरन्ति । ते मनुस्सा बहुं भत्तं आहरित्वा पत्तानि पूरेत्वा “यथासभागं परिभुज्जथा”ति वत्वा उय्योजेसुं । भिक्षू आहंसु “आवुसो, मनुस्सा धातुसंयुत्तकम्मे पयोजेन्ती”ति । एवं अज्झासयधातु नियामेतीति । धातुसंयुत्तेन अयमत्थो दीपेतब्बो — गिज्झकूटपब्बतस्मिज्झि गिलानसेय्याय निपन्नो भगवा आरक्खत्थाय परिवारेत्वा वसन्तेसु सारिपुत्तमोग्गल्लानादीसु एकमेकं अत्तनो परिसाय सद्धिं चङ्कमन्तं ओलोकेत्वा भिक्षू आमन्तेसि “पस्सथ नो तुम्हे, भिक्षवे, सारिपुत्तं सम्बहुलेहि भिक्षूहि सद्धिं चङ्कमन्तन्ति । एवं, भन्ते । सब्बे खो एते, भिक्षवे, भिक्षू महापज्जा”ति (सं० नि० २.९९) सब्बं वित्थारेतब्बं ।

गाथासु **संसग्गा**ति संकिलेसतो सहवासादिवसेन समायोगतो, अथ वा दस्सनसंसग्गो, सवनसंसग्गो, समुल्लापसंसग्गो, सम्भोगसंसग्गो, कायसंसग्गोति एवं पज्जविधे संसग्गे यतो कुतोचि संसग्गतो । **वनथो जातो**ति किलेसो उप्पन्नो मग्गेन असमूहतो । **असंसग्गेन छिज्जती**ति संसग्गपटिक्खेपेन कायविवेकादिना पुब्बभागे छिज्जित्वा पुन अच्चन्तासंसग्गेन समुच्छेदविवेकेन छिज्जति पहीयति । एत्तावता सङ्खेपतो हीनाधिमुत्तिया समुदयो अत्थङ्गमो च दस्सितो होति ।

यस्मा पन ते संसग्गा ते च किलेसा कोसज्जवसेन उप्पज्जन्ति चेव वड्डन्ति च, न वीरियारम्भवसेन, तस्मा हीनाधिमुत्तिके कुसीतपुग्गले वज्जेत्वा कल्याणाधिमुत्तिके आरद्धवीरिये सेवन्तेन असंसग्गेन संसग्गजो वनथो छिन्दितब्बोति यथावुत्तमत्थं वित्थारतो दस्सेन्तो कुसीतसेवनाय ताव आदीनवं पकासेतुं “**परित्तं दारु**”न्ति आदिमाह ।

तत्थ **परित्तं दारु**न्ति खुदकं कट्टमयं कुल्लं । **यथा सीदे महण्णवे**ति यथा खुदकं कुल्लं आरुहित्वा महासमुदं तरितुकामो तीरं अप्पत्वा समुदमज्जेयेव सीदेय्य, पतित्वा मच्छकच्छपभक्खो भवेय्य । **एवं कुसीतं आगम्म, साधुजीवीपि सीदती**ति एवमेव कुसीतं वीरियारम्भरहितं किलेसवासिकं पुग्गलं निस्साय तेन कतसंसग्गो साधुजीवीपि परिसुद्धाजीवो परिसुद्धसीलोपि समानो हीनसंसग्गतो उप्पन्नेहि कामवितक्कादीहि खज्जमानो पारं गन्तुं असमत्थो संसारणवेयेव सीदति । **तस्मा**ति यस्मा एवं अनत्थावहो कुसीतसंसग्गो, तस्मा तं आगम्म आलसियानुयोगेन कुच्छित्तं सीदतीति **कुसीतं** । ततो एव **हीनवीरियं** निब्बीरियं अकल्याणमित्तं **परिवज्जेय्य** । एकन्तेनेव पन कायविवेकादीनज्चेव तदङ्गविवेकादीनज्च वसेन **पविवित्तेहि**, ततो एव किलेसेहि आरक्कता **अरियेहि** परिसुद्धेहि निब्बानं पटिपेसितत्तभावतो **पहितत्तेहि** आरम्मणलक्खणूपनिज्झानानं वसेन ज्ञायनतो **ज्ञायीहि** सब्बकालं पग्गहितवीरियताय **आरद्धवीरियेहि पण्डितेहि** सप्पज्जेहियेव सह आवसेय्य संवसेय्याति ।

नवमसुत्तवण्णना निट्ठिता ।

१०. परिहानसुत्तवण्णना

७९. दसमे परिहानाय संवत्तन्तीति अवुद्धिया भवन्ति, मग्गाधिगमस्स परिपन्थाय होन्ति । अधिगतस्स पन मग्गस्स परिहानि नाम नत्थि । “तयो धम्मा”ति धम्माधिष्ठानवसेन उद्धिदुधम्मे पुग्गलाधिष्ठानाय देसनाय विभजन्तो “इध, भिक्खवे, सेखो भिक्खू”तिआदिमाह ।

तत्थ कम्मं आरमितब्बतो आरामो एतस्साति **कम्मरामो** । कम्मे रतोति **कम्मरतो** । कम्मरामतं कम्माभिरतिं अनुयुत्तो पयुत्तोति **कम्मरामतमनुयुत्तो** । तत्थ कम्मं नाम इतिकत्तब्बं कम्मं, सेय्यथिदं — चीवरविचारणं, चीवरकरणं, उपत्थम्भनं, पत्तत्थविकं, अंसबन्धनं, कायबन्धनं, धमकरणं, आधारकं, पादकथलिकं, सम्मज्जनीति एवमादीनं उपकरणानं करणं, यच्च विहारे खण्डफुल्लादिपटिसङ्करणं । एकच्चो हि एतानि करोन्तो सकलदिवसं एतानेव करोति । तं सन्धायेतं वुत्तं । यो पन एतेसं करणवेलायमेव एतानि करोति, उद्देसवेलायं उद्देसं गण्हाति, सज्झायवेलायं सज्झायति, चेतियङ्गणवत्तादिकरणवेलायं चेतियङ्गणवत्तादीनि करोति, मनसिकारवेलायं मनसिकारं करोति सब्बत्थककम्मट्टाने वा पारिहारिककम्मट्टाने वा, न सो कम्मरामो नाम । तस्स तं —

“यानि खो पन तानि सब्रह्मचारीनं उच्चावचानि किंकरणीयानि, तत्थ दक्खो होति अनलसो, ततुपायाय वीमंसाय समन्नागतो, अलं कातुं अलं संविधातु”न्ति (दी० नि० ३.३४५; अ० नि० १०.१८) —

आदिना सत्थारा अनुज्जातकरणमेव होति ।

भस्सारामोति यो भगवता पटिक्खित्तराजकथादिवसेन रत्तिन्दिवं वीतिनामेति, अयं भस्से परियन्तकारी न होतीति भस्सारामो नाम । यो पन रत्तिम्पि दिवापि धम्मं कथेति, पञ्हं विस्सज्जेति, अयं अप्पभस्सो भस्से परियन्तकारीयेव । कस्मा? “सन्निपतितानं वो, भिक्खवे, द्वयं करणीयं — धम्मी वा कथा, अरियो वा तुण्हीभावो”ति (म० नि० १.२७३) वुत्तविधिंयेव पटिपन्नोति ।

निद्वारामोति यो यावदत्थं उदरावदेहकं भुज्जित्वा सेय्यसुखं, पस्ससुखं, मिद्धसुखं अनुयुज्जति, यो च गच्छन्तोपि निसिन्नोपि ठितोपि थिनमिद्धाभिभूतो निद्वायति, अयं निद्वारामो नाम । यस्स पन करजकायगेलज्जेन चित्तं भवङ्गं ओतरति, नायं निद्वारामो, तेनेवाह —

“अभिजानामि खो पनाहं, अग्गिवेस्सन, गिम्हानं पच्छिमे मासे पच्छाभत्तं पिण्डपातप्पटिक्कन्तो चतुग्गुणं सङ्घाटिं पज्जापेत्वा दक्खिणेन पस्सेन सतो सम्पजानो निद्वं ओक्कमिता”ति (म० नि० १.३८७) ।

एत्थ च पुत्थुज्जनकल्याणकोपि सेखोत्वेव वेदितब्बो । तस्मा तस्स सब्बस्सपि विसेसाधिगमस्स इतरेसं उपरि विसेसाधिगमस्स च परिहानाय वत्तन्तीति वेदितब्बं । सुक्कपक्खस्स वुत्तविपरियायेन अत्थविभावना वेदितब्बा ।

गाथासु **उद्धतो**ति चित्तविकखेपकरेन उद्धच्चेन उद्धतो अवूपसन्तो । **अप्पकिच्चस्सा**ति अनुज्जातस्सपि वुत्तप्पकारस्स किच्चस्स युत्तप्पयुत्तकालेयेव करणतो अप्पकिच्चो अस्स भवेय्य । **अप्पमिद्धो**ति “दिवसं चङ्कमेन निसज्जाया”तिआदिना वुत्तजागरियानुयोगेन निद्वारहितो अस्स । **अनुद्धतो**ति भस्सारामताय उप्पज्जनकचित्तविकखेपस्स अभस्सारामो हुत्वा परिवज्जनेन न उद्धतो वूपसन्तचित्तो, समाहितोति अत्थो । सेसं पुब्बे वुत्तनयत्ता सुविज्जेय्यमेव । इति इमस्मिं वग्गे

पठमदुतियपञ्चमछट्टसत्तमअट्टमनवमेसु सुत्तेसु वट्ठं कथितं, इतरेसु वट्ठविवट्ठं ।

दसमसुत्तवण्णना निट्ठिता ।

ततियवग्गवण्णना निट्ठिता ।

४. चतुत्थवग्गो

१. वितक्कसुत्तवण्णना

८०. चतुत्थवग्गस्स पठमे **अकुसलवितक्का**ति अकोसल्लसम्भूता वितक्का, मिच्छावितक्काति अत्थो । **अनवज्जत्तिपटिसंयुत्तो**ति एत्थ **अनवज्जत्ती**ति अनवज्जा परेहि अत्तनो अहीळितता अपरिभूतता, “अहो वत मं परे न अवजानेय्यु”न्ति एवं पवत्तो इच्छाचारो, ताय अनवज्जत्तिया पटिसंयुत्तो संसट्ठो, तं वा आरब्भ पवत्तो अनवज्जत्तिपटिसंयुत्तो वितक्को । तस्मा “कथं नु खो मं परे गहट्ठा चेव पब्बजिता च न ओरकतो दहेय्यु”न्ति सम्भावनकम्यताय इच्छाचारे, ठत्वा पवत्तितवितक्कस्सेतं अधिवचनं । **लाभसक्कारसिलोकपटिसंयुत्तो**ति चीवरादिलाभेन चेव सक्कारेन च कित्तिसद्देन च आरम्माणकरणवसेन पटिसंयुत्तो । **परानुद्वयतापटिसंयुत्तो**ति परेसु अनुद्वयतापतिरूपकेन गेहसितपेमेन पटिसंयुत्तो । यं सन्धाय वुत्तं —

“संसट्ठो विहरति राजूहि राजमहामत्तेहि ब्राह्मणेहि गहपतिकेहि तित्थियेहि तित्थियसावकेहि सहनन्दी सहसोकी, सुखितेसु सुखितो, दुक्खितेसु दुक्खितो, उप्पन्नेसु किच्चकरणीयेसु अत्तनाव योगं आपज्जती”ति (सं० नि० ३.३; ४.२४१; विभ० ८८८) ।

गाथासु अनवज्जत्तिया पटिसंयुत्तो पुग्गलो **अनवज्जत्तिसंयुत्तो** । लाभसक्कारे गारवो एतस्स, न धम्मेति **लाभसक्कारगारवो** । सुखदुक्खेसु अमा सह भवाति अमच्चा, सहायसदिसा उपट्ठाका । तेहि गेहसितपेमवसेन सह नन्दनसीलो **सहनन्दी अमच्चेहि**, इमिना परानुद्वयतापटिसंयुत्तं वितक्कं दस्सेति । **आरा संयोजनक्खया**ति इमेहि तीहि वितक्केहि अभिभूतो पुग्गलो संयोजनक्खयतो अरहत्ततो दूरे, तस्स तं दुल्लभन्ति अत्थो ।

पुत्तपसुन्ति पुत्ते च पसवो च । पुत्तसद्देन चेत्थ दारादयो; पसुसद्देन अस्समहिंसखेत्तवत्थादयो च सङ्गहिता । **विवाहे**ति विवाहकारापने । इमिना आवाहोपि सङ्गहितो । **संहरानी**ति परिग्गहानि, परिक्रारसङ्गहानीति अत्थो । “सन्थवानी”ति च पठन्ति, मित्तसन्थवानीति अत्थो । सब्बत्थ हित्वाति सम्बन्धो । **भब्बो सो तादिसो भिक्खू**ति सो यथावुत्तं सब्बं पपज्जं परिच्चजित्वा यथा सत्थारा वुत्ताय सम्मापटिपत्तिया, तथा पस्सितब्बतो तादिसो संसारे भयं इक्खतीति **भिक्खु उत्तमं सम्बोधिं** अरहत्तं पत्तुं अरहति ।

पठमसुत्तवण्णना निट्ठिता ।

२. सक्कारसुत्तवण्णना

८१. दुतिये **सक्कारेना**ति सक्कारेन हेतुभूतेन, अथ वा **सक्कारेना**ति सक्कारहेतुना, सक्कारहेतुकेन वा । सक्कारज्झि

निस्साय इधेकच्चे पुगुला पापिच्छा इच्छापकता इच्छाचारे ठत्वा “सक्कारं निब्बत्तेस्सामा”ति अनेकविहितं अनेसनं अप्पतिरूपं आपज्जित्वा इतो चुता अपायेसु निब्बत्तन्ति, अपरे यथासक्कारं लभित्वा तन्निमित्तं मानमदमच्छरियादिवसेन पमादं आपज्जित्वा इतो चुता अपायेसु निब्बत्तन्ति । यं सन्धाय वुत्तं — “सक्कारेन अभिभूता परियादिन्नचित्ता”ति । तत्थ **अभिभूताति** अज्झोत्थटा । **परियादिन्नचित्ताति** खेपितचित्ता, इच्छाचारेण मानमदादिना च खयं पापितकुसलचित्ता । अथ वा **परियादिन्नचित्ताति** परितो आदिन्नचित्ता, वुत्तप्पकारेण अकुसलकोट्टासेन यथा कुसलचित्तस्स उप्पत्तिवारो न होति, एवं समन्ततो गहितचित्तसन्तानाति अत्थो । **असक्कारेनाति** हीळेत्वा परिभवित्वा परेहि अत्तनि पवत्तितेन असक्कारेण हेतुना, असक्कारहेतुकेन वा मानादिना । **सक्कारेण च असक्कारेण चाति** केहिचि पवत्तितेन सक्कारेण केहिचि पवत्तितेन असक्कारेण च । ये हि केहिचि पठमं सक्कता हुत्वा तेहियेव असारभावं जत्वा पच्छा असक्कता होन्ति, तादिसे सन्धाय वुत्तं “सक्कारेण च असक्कारेण चा”ति ।

एत्थ सक्कारेण अभिभूता देवदत्तादयो निदस्सेतब्बा । वुत्तम्पि चेत्तं —

“फलं वे कदलिं हन्ति, फलं वेळुं फलं नळं ।

सक्कारो कापुरिसं हन्ति, गम्भो अस्सतरिं यथा”ति ॥ (सं० नि० १.१८३; अ० नि० ४.६८; चूळव० ३३५) ।

साधूनं उपरि कतेन असक्कारेण अभिभूता दण्डकीराजकालिङ्गराजमज्झराजादयो निदस्सेतब्बा । वुत्तम्पि चेत्तं —

“किसिह्मि वच्छं अवकिरिय दण्डकी,

उच्छिन्नमूलो सजनो सरद्धो ।

कुक्कुळनामे निरयम्हि पच्चति,

तस्स फुलिङ्गानि पतन्ति काये ॥

“यो सज्जते पब्बजिते अवज्जयि,

धम्मं भणन्ते समणे अदूसके ।

तं नाळिकेरं सुनखा परत्थ,

सङ्गम्म खादन्ति विफन्दमानं” ॥ (जा० २.१७.७०-७१) ।

“उपहच्च मनं मज्झो, मातङ्गस्मिं यसस्सिने ।

सपारिसज्जो उच्छिन्नो, मज्झारज्जं तदा अहू”ति ॥ (जा० २.१९.९६) ।

सक्कारेण च असक्कारेण च अभिभूता अज्जतिथिया नाटपुत्तादयो निदस्सेतब्बा ।

गाथासु उभयन्ति उभयेन सक्कारेण च असक्कारेण च । **समाधि न विकम्पतीति** न चलति, एकग्गभावेन तिड्ढति । कस्स पन न चलतीति आह “अप्पमादविहारिनो”ति । यो पमादकरधम्मानं रागादीनं सुट्ठु पहीनत्ता अप्पमादविहारी अरहा, तस्स । सो हि लोकधम्मोहि न विकम्पति । **सुखुमदिट्ठिविपस्सकन्ति** फलसमापत्तिअत्थं सुखुमाय दिट्ठिया पज्जाय अभिण्हं पवत्तविपस्सन्ता सुखुमदिट्ठिविपस्सकं । **उपादानक्खयारामन्ति** चतुन्नं उपादानानं खयं परियोसानभूतं अरहत्तफलं आरमितब्बं एतस्साति उपादानक्खयारामं । सेसं वुत्तनयमेव ।

दुतियसुत्तवण्णना निड्ढिता ।

३. देवसद्वसुत्तवण्णना

८२. ततिये देवेसूति ठपेत्वा अरूपावचरदेवे चेव असज्जदेवे च तदज्जेसु उपपत्तिदेवेसु । देवसद्वाति देवानं पीतिसमुदाहारसद्वा । निच्छरन्तीति अज्जमज्जं आलापसल्लापवसेन पवत्तन्ति । समया समयं उपादायाति समयतो समयं पटिच्च । इदं वुत्तं होति — यस्मिं काले ठिता ते देवा तं कालं आगम्म नं पस्सिस्सन्ति, ततो तं समयं सम्पत्तं आगम्माति । “समयं समयं उपादाया”ति च केचि पठन्ति, तेसं तं तं समयं पटिच्चाति अत्थो । यस्मिं समयेति यदा “अट्टिकङ्कलूपमा कामा”तिआदिना (म० नि० १.२३४; पाचि० ४१७), “सम्बाधो घरावासो”तिआदिना (दी० नि० १.१९१; सं० नि० २.१५४) च कामेसु घरावासे च आदीनवा, तप्पटिपक्खतो नेक्खम्मे आनिसंसा च सुदिट्ठा होन्ति, तस्मिं समये । तदा हिस्स एकन्तेन पब्बज्जाय चित्तं नमति । अरियसावकोति अरियस्स बुद्धस्स भगवतो सावको, सावकभावं उपगन्तुकामो, अरियसावको वा अवस्संभावी । अन्तिमभविकं सावकबोधिसत्तं सन्धाय अयमारम्भो । केसमस्सुं ओहारेत्वाति केसे च मस्सुज्ज ओहारेत्वा अपनेत्वा । कासायानि वत्थानि अच्छादेत्वाति कसायेन रत्तताय कासायानि ब्रह्मचरियं चरन्तानं अनुच्छविकानि वत्थानि निवासेत्वा चेव पारुपित्वा च । अगारस्मा अनगारियं पब्बज्जाय चेतेतीति अगारस्मा घरा निक्खमित्वा अनगारियं पब्बज्जं पब्बजेय्यन्ति पब्बज्जाय चेतेति पक्कप्पेति, पब्बजतीति अत्थो । एत्थ च यस्मा अगारस्स हितं कसिक्खणज्जादिकम्मं अगारियन्ति वुच्चति, तज्ज पब्बज्जाय नत्थि, तस्मा पब्बज्जा अनगारियन्ति जातब्बा ।

मारेनाति किलेसमारेन । सङ्गामाय चेतेतीति युज्जनत्थाय चित्तं उप्पादेति, मारं अभिविजेतुं सन्नय्हति । यस्मा पन एवरूपस्स पटिपज्जनकपुगलस्स देवपुत्तमारोपि अन्तरायाय उपक्कमति, तस्मा तस्सपि वसेन मारेनाति एत्थ देवपुत्तमारेनातिपि अत्थो वेदितब्बो । तस्सापि अयं इच्छाविधातं करिस्सतेवाति । यस्मा पन पब्बजितदिवसतो पट्ठाय खुरगगतो वा पट्ठाय सीलानि समादियन्तो परिसोधेन्तो समथविपस्सनासु कम्मं करोन्तो यथारहं तदङ्गप्पहानविक्खम्भनप्पहानानं वसेन किलेसमारं परिपातेति नाम, न युज्जति नाम सम्पहारस्स अभावतो, तस्मा वुत्तं “मारेन सद्धिं सङ्गामाय चेतेती”ति ।

सत्तन्नन्ति कोट्टासतो सत्तन्नं, पभेदतो पन ते सत्तत्तिस होन्ति । कथं? चत्तारो सतिपट्ठाना, चत्तारो सम्मप्पधाना, चत्तारो इद्धिपादा, पच्चिन्द्रियानि, पच्च बलानि, सत्त बोज्झङ्गा, अरियो अट्ठङ्गिको मग्गोति । एवं पभेदतो सत्तत्तिसविधापि सतिपट्ठानादिकोट्टासतो सत्तेव होन्तीति वुत्तं “सत्तन्न”न्ति । बोधिपक्खियानन्ति बुज्जनट्टेन बोधीति लद्धनामस्स अरियपुगलस्स मग्गजाणस्सेव वा पक्खे भवानं बोधिपक्खियानं, बोधिकोट्टासियानन्ति अत्थो । “बोधिपक्खिकान”न्तिपि पाठो, बोधिपक्खवन्तानं, बोधिपक्खे वा नियुत्तानन्ति अत्थो । भावनानुयोगमनुयुत्तोति विपस्सनं उस्सुक्कापेत्वा अरियमग्गभावनानुयोगमनुयुत्तो । विपस्सनाक्खणे हि सतिपट्ठानादयो परियायेन बोधिपक्खिया नाम, मग्गक्खणेयेव पन ते निप्परियायेन बोधिपक्खिया नाम होन्ति ।

आसवानं खयाति कामासवादीनं सब्बेसं आसवानं खया । आसवेसु हि खीणेषु सब्बे किलेसा खीणायेव होन्ति । तेन अरहत्तमग्गो वुत्तो होति । अनासवन्ति आसवविरहितं । चेतोविमुत्तिं पज्जाविमुत्तिन्ति एत्थ चेतोवचनेन अरहत्तफलसमाधि, पज्जावचनेन तंसम्पयुत्ता च पज्जा वुत्ता । तत्थ समाधि रागतो विमुत्तत्ता चेतोविमुत्ति, पज्जा अविज्जाय विमुत्तत्ता पज्जाविमुत्तीति वेदितब्बा । वुत्तज्हेतं भगवता —

“यो हिस्स, भिक्खवे, समाधि, तदस्स समाधिन्द्रियं । या हिस्स, भिक्खवे, पज्जा, तदस्स पज्जिन्द्रियं । इति खो, भिक्खवे, रागविरागा चेतोविमुत्ति, अविज्जाविरागा पज्जाविमुत्ती”ति (सं० नि० ५.५१६) ।

अपिचेत्थ समथफलं चेतोविमुत्ति, विपस्सनाफलं पज्जाविमुत्तीति वेदितब्बा । **दिट्ठेव धम्मे**ति इमस्मिंयेव अत्तभावे । **सयं अभिज्जा सच्छिकत्वा**ति अत्तनायेव अभिविसिद्धाय पज्जाय पच्चक्खं कत्वा अपरप्पच्चयेन जत्वा । **उपसम्पज्ज विहरती**ति पापुणित्वा सम्पादेत्वा विहरति । **तमेव सङ्गमसीसं अभिविजिय अज्झावसती**ति मारं अभिविजिनित्वा विजितविजयत्ता तेन कतसङ्गमसङ्घातस्स अरियमग्गस्स सीसभूतं अरहत्तफलसमापत्तिइस्सरियद्वानं, अभिभवन्तो आवसति, समापज्जति इच्चेव अत्थो । इमे च देवसद्दा दिट्ठसच्चेसु देवेसु पवत्तन्ति, विसेसतो सुद्धावासदेवेसूति वेदितब्बं ।

गाथासु **महन्तन्ति** सीलादिगुणमहत्तेन महन्तं । **वीतसारदन्ति** सारज्जकरानं किलेसानं अभावेन विगतसारज्जं अपगतमङ्कुभावं । **पुरिसाजज्जा**ति अस्सादीसु अस्साजानीयादयो विय पुरिसेसु आजानीयभूता उत्तमपुरिसा । **दुज्जयमज्झभूति** पचुरजनेहि जेतुं असक्कुण्यं किलेसवाहिनिं अभिभवि अज्झोत्थरि । “अज्जयी”तिपि पठन्ति, अजिनीति अत्थो । **जेत्वान मच्चुनो सेनं, विमोक्खेन अनावरन्ति** लोकत्तयाभिब्यापनतो दियड्ढसहस्सादिविभागतो च विपुलत्ता अज्जेहि आवरितुं पटिसेधेतुं असक्कुण्यत्ता च अनावरं, मच्चुनो मारस्स सेनं विमोक्खेन अरियमग्गेन जेत्वा यो त्वं दुज्जयं अजयि, तस्स नमो, ते पुरिसाजज्जाति सम्बन्धो ।

इतीति वुत्तप्पकारेन । **हि-**इति निपातमत्तं । एतं **पत्तमानसं** अधिगतारहत्तं खीणासवं **देवता नमस्सन्ती**ति वुत्तमेवत्थं निगमनवसेन दस्सेति । अथ वा **इतीति** इमिना कारणेन । किं पन एतं कारणं? नमुचिसेनाविजयेन पत्तमानसत्तं । इमिना कारणेन तं देवता नमस्सन्तीति अत्थो । इदानीं तं कारणं फलतो दस्सेतुं “**तज्झि तस्स न पस्सन्ति, येन मच्चुवसं वजे**”ति वुत्तं । तस्सत्थो — यस्मा तस्स पुरिसाजज्जस्स पणिधाय गवेसन्तापि देवा अणुमत्तम्पि तं कारणं न पस्सन्ति, येन सो मच्चुनो मरणस्स वसं वजे उपगच्छेय्य । तस्मा तं विसुद्धिदेवा नमस्सन्तीति ।

ततियसुत्तवण्णना निड्डिता ।

४. पञ्चपुब्बनिमित्तसुत्तवण्णना

८३. चतुत्थे **यदाति** यस्मिं काले । **देवोति** उपपत्तिदेवो । तयो हि देवा — सम्मुत्तिदेवा, उपपत्तिदेवा, विसुद्धिदेवाति । तेसु **सम्मुत्तिदेवा** नाम राजानो खत्तिया । **उपपत्तिदेवा** नाम चातुमहाराजिकतो पट्ठाय तदुपरिदेवा । **विसुद्धिदेवा** नाम खीणासवा । इध पन कामावचरदेवो अधिप्पेतो । तेन वुत्तं “**देवोति उपपत्तिदेवो**”ति । **देवकायाति** देवसमूहतो, देवद्वानतो वा, देवलोकतोति अत्थो । समूहनिवासवाचको हि अयं कायसद्दो । **चवनधम्मो**ति मरणधम्मो, आयुक्खयेन वा पुज्जक्खयेन वा उपट्ठितमरणोति अत्थो ।

पञ्चस्स पुब्बनिमित्तानि पातुभवन्तीति अस्स उपट्ठितमरणस्स देवपुत्तस्स पञ्च मरणस्स पुब्बनिमित्तानि उपपज्जन्ति, पकासानि वा होन्ति । **माला मिलायन्ती**ति तेन पिळन्थितमाला मज्झन्हिकसमये आतपे खित्ता विय मिलाता विहतसोभा होन्ति ।

वत्थानि किलिस्सन्तीति सरदसमये विगतवलाहके आकासे अब्भुस्सक्कमानबालसूरियसदिसप्पभानि नानाविरागवण्णानि तेन निवत्थपारुतवत्थानि तं खणंयेव कदमे खिपित्वा मद्दितानि विय विहतप्पभानि मलिनानि होन्ति ।

कच्छेहि सेदा मुच्चन्तीति सुपरिसुद्धजातिमणि विय सुसिखितसिप्पाचरियरचितसुवण्णपटिमा विय च पुब्बे सेदमलजल्लिकारहितसरीरस्स तस्मिं खणे उभोहि कच्छेहि सेदधारा सन्दन्ति पग्घरन्ति । न केवलञ्च कच्छेहियेव, सकलसरीरतोपि पनस्स सेदजलकणिका मुच्चतियेव, येन आमुत्तमुत्ताजालगवच्छितो विय तस्स कायो होति ।

काये दुब्बणिण्यं ओक्कमतीति पुब्बे पटिसन्धितो पट्टाय यथानुभावं एकयोजनं द्वियोजनं याव द्वादसयोजनमत्तम्पि पदेसं आभाय फरित्वा विज्जोतमानो कायो होति खण्डिच्चपालिच्चादिविरहितो, न सीतं न उण्हं उपघातकं, देवधीता सोळसवस्सुद्देसिका विय होति, देवपुत्तो वीसतिवस्सुद्देसिको विय, तं खण्येव निष्पभे नित्तेजे काये विरूपभावो अनुपविसति सण्ठाति ।

सके देवो देवासने नाभिरमतीति अत्तनो अच्छरागणेहि सद्धिं कीळनपरिचरणकदिब्बासने न रमति, न चित्तस्सादं लभति । तस्स किर मनुस्सगणनाय सत्तहि दिवसेहि मरणं भविस्सतीति इमानि पुब्बनिमित्तानि पातुभवन्ति । सो तेसं उप्पत्तिया “एवरूपाय नाम सम्पत्तिया विना भविस्सामी”ति बलवसोकाभिभूतो होति । तेनस्स काये महापरिळाहो उप्पज्जति, तेन सब्बतो गत्तेहि सेदा मुच्चन्ति । चिरतरं कालं अपरिचितदुक्खो तं अधिवासेतुं असक्कोन्तो एकच्चो “दय्हामि दय्हामी”ति कन्दन्तो परिदेवन्तो कत्थचि अस्सादं अलभन्तो विजप्पन्तो विलपन्तो तहिं तहिं आहिण्डति । एकच्चो सतिं उपट्टपेत्वा कायवाचाहि विकारं अकरोन्तोपि पियविप्पयोगदुक्खं असहन्तो विहज्जमानो विचरति ।

इमानि पन पुब्बनिमित्तानि यथा लोके महापुज्जानं राजराजमहामत्तादीनयेव उक्कापातभूमिचालचन्दग्गाहादीनि निमित्तानि पज्जायन्ति, न सब्बेसं; एवमेव महेसक्खदेवानयेव पज्जायति । उप्पन्नानि च तानि “इमानि मरणस्स पुब्बनिमित्तानि नामा”ति केचि देवा जानन्ति, न सब्बे । तत्थ यो मन्देन कुसलकम्मेन निब्बत्तो, सो “इदानि को जानाति, कुहिं निब्बत्तिस्सामी”ति भायति । यो पन महापुज्जो, सो “बहुं मया दानं दिन्नं, सीलं रक्खितं, पुज्जं उपचितं, इतो चुतस्स मे सुगतियेव पाटिकङ्का”ति न भायति न विकम्पति । एवं उपट्टितपुब्बनिमित्तं पन तं गहेत्वा देवता नन्दनवनं पवेसेन्ति सब्बदेवलोकेसु नन्दनवनं अत्थियेव ।

तीहि वाचाहि अनुमोदेन्तीति इदानि वुच्चमानेहि तीहि वचनेहि अनुमोदेन्ति, मोदं पमोदं उप्पादेन्ति, अस्सासेन्ति, अभिवदनवसेन वा तंखणानुरूपं पमोदं करोन्ति । केचि पन “अनुमोदेन्ती”ति पदस्स “ओवदन्ती”ति वदन्ति । इतोति देवलोकोतो । भोति आलपनं । **सुगतिन्ति** सुन्दरगतिं, मनुस्सलोकं सन्धाय वदन्ति । **गच्छाति** पटिसन्धिगहणवसेन उपेहि ।

एवं वुत्तेति एवं तदा तेहि देवेहि तस्स “इतो भो सुगतिं गच्छा”तिआदिना वत्तब्बवचने भगवता वुत्ते **अज्जतरो** नामगोत्तेन अपाकटो तस्सं परिसायं निसिन्नो अनुसन्धिकुसलो एको भिक्खु “एते सुगतिआदयो भगवता अविसेसतो वुत्ता अविभूता, हन्द ते विभूततरे कारापेस्सामी”ति एतं “किंनु खो, भन्ते”तिआदिवचनं अवोच । सद्धादिगुणविसेसपटिलाभकारणतो देवूपपत्तिहेतुतो च मनुस्सत्तं देवानं अभिसम्मत्तन्ति आह “**मनुस्सत्तं खो भिक्खु देवानं सुगतिगमनसङ्घात**”न्ति ।

सुगतिगमनसङ्घातन्ति “सुगतिगमन”न्ति सम्मा कथितं, वणिगतं थोमितन्ति अत्थो । यं **मनुस्सभूतो**ति एत्थ यन्ति किरियापरामसनं, तेन **पटिलभतीति** एत्थ पटिलभनकिरिया आमसीयति, यो सद्धापटिलाभोति अत्थो । **मनुस्सभूतो**ति मनुस्सेसु उप्पन्नो, मनुस्सभावं वा पत्तो । यस्मा देवलोके उप्पन्नानं तथागतस्स धम्मदेसना येभ्य्येन दुल्लभा सवनाय, न तथा मनुस्सानं, तस्मा वुत्तं “मनुस्सभूतो”ति । **तथागतप्पवेदिते धम्मविनयेति** तथागतेन भगवता देसिते सिक्खत्तयसङ्गहे

सासने । तज्झि धम्मतो अनपेतत्ता धम्मो च, आसयानुरूपं विनेय्यानं विनयनतो विनयो चाति धम्मविनयो, उपनिस्सयसम्पत्तिया वा धम्मतो अनपेतत्ता धम्मं अप्परजक्खजातिकं विनेतीति धम्मविनयो । धम्मेनेव वा विनयो, न दण्डसत्थेहीति धम्मविनयो, धम्मयुत्तो वा विनयोति धम्मविनयो, धम्माय वा सह मग्गफलनिब्बानाय विनयोति धम्मविनयो, महाकरुणासब्बज्जुतज्जाणादिधम्मतो वा पवत्तो विनयोति धम्मविनयो । धम्मो वा भगवा धम्मभूतो धम्मकायो धम्मस्सामी, तस्स धम्मस्स विनयो, न तक्कियानन्ति धम्मविनयो, धम्मे वा मग्गफले निप्फादेतब्बविसयभूते वा पवत्तो विनयोति धम्मविनयोति वुच्चति । तस्मिं धम्मविनये ।

सद्धं पटिलभतीति “स्वाक्खातो भगवता धम्मो”तिआदिना सद्धं उप्पादेति । सद्धो हि इमस्मिं धम्मविनये यथानुसिद्धं पटिपज्जमानो दिट्ठधम्मिकसम्परायिकपरमत्थे आराधेस्सति । **सुलद्धलाभसद्धा**तन्ति एत्थ यथा हिरज्जसुवण्णखेत्तवत्थादिलाभो सत्तानं उपभोगसुखं आवहति, खुप्पिपासादिदुक्खं पटिबाहति, धनदालिद्वियं वूपसमेति, मुत्तादिरतनपटिलाभहेतु होति, लोकसन्ततिज्ज आवहति; एवं लोकियलोकुत्तरा सद्धापि यथासम्भवं लोकियलोकुत्तरं विपाकसुखमावहति, सद्धाधुरेन पटिपन्नानं जातिजरदिदुक्खं पटिबाहति, गुणदालिद्वियं वूपसमेति, सतिसम्बोज्झङ्गादिरतनपटिलाभहेतु होति, लोकसन्ततिज्ज आवहति । वुत्तज्हेतं —

“सद्धो सीलेन सम्पन्नो, यसो भोगसमप्पितो ।

यं यं पदेसं भजति, तत्थ तत्थेव पूजितो”ति ॥ (ध० प० ३०३) ।

एवं सद्धापटिलाभस्स सुलद्धलाभता वेदितब्बा । यस्मा पनायं सद्धापटिलाभो अनुगामिको अनज्जसाधारणो सब्बसम्पत्तिहेतु, लोकियस्स च हिरज्जसुवण्णादिधनलाभस्स कारणं । सद्धोयेव हि दानादीनि पुज्जानि कत्वा उळारुळारवित्तूपकरणानि अधिगच्छति, तेहि च अत्तनो परेसज्ज अत्थमेव सम्पादेति । अस्सद्धस्स पन तानि अनत्थावहानि होन्ति, इध चेव सम्पराये चाति, एवम्पि सद्धाय सुलद्धलाभता वेदितब्बा । तथा हि —

“सद्धा बन्धति पाथेय्यं” । (सं० नि० १.७९) ।

“सद्धा दुतिया पुरिसस्स होती”ति च । (सं० नि० १.३६, ५९) ।

“सद्धीध वित्तं पुरिसस्स सेट्ठ”न्ति च । (सं० नि० १.७३; सु० नि० १८४) ।

“सद्धाहत्थो महानागो”ति च । (अ० नि० ६.४३; थेरगा० ६९४) ।

“सद्धा बीजं तपो वुट्ठी”ति च । (सं० नि० १.१९७; सु० नि० ७७) ।

“सद्धेसिको, भिक्खवे, अरियसावको”ति (अ० नि० ७.६७) च ।

“सद्धाय तरति ओघ”न्ति च । (सं० नि० १.२४६) —

अनेकेसु ठानेसु अनेकेहि कारणेहि सद्धा संवण्णिता ।

इदानी याय सद्भाय सासने कुसलधम्मेषु सुप्पतिट्ठितो नाम होति नियामोक्कन्तिया, तं सद्धं दस्सेतुं “**सा खो पनस्सा**”तिआदि वुत्तं। तत्थ अस्साति इमस्स भवेय्याति अत्थो। **निविट्ठा**ति अभिनिविट्ठा चित्तसन्तानं अनुपविट्ठा। **मूलजाता**ति जातमूला। किं पन सद्भाय मूलं नाम? सद्धेय्यवत्थुस्मिं ओक्कप्पनहेतुभूतो उपायमनसिकारो। अपिच सप्पुरिससेवना सद्धम्मस्सवनं योनिमोमनसिकारो धम्मनुधम्मप्पटिपत्तीति चत्तारि सोतापत्तियङ्गानि मूलानि वेदितब्बानि। **पतिट्ठिता**ति अरियमग्गाधिगमेन केनचि अकम्पनीयभावेन अवट्ठिता। तेनेवाह “दळ्हा असंहारिया”ति। **दळ्हा**ति थिरा। **असंहारिया**ति केनचि संहारितुं वा हापेतुं वा अपनेतुं वा असक्कुणेय्या। इति ते देवा तस्स सोतापत्तिमग्गसमधिगमं आसीसन्ता एवं वदन्ति। अत्तनो देवलोके कामसुखूपभोगारहमेव हि अरियपुग्गलं ते इच्छन्ति। तेनाह “एहि, देव, पुनप्पुन”न्ति।

गाथासु पुज्जक्खयमरणम्पि जीवितिन्द्रियुपच्छेदेनेव होतीति आह “**चवति आयुसङ्ख्या**”ति। **अनुमोदन्ति** अनुमोदन्तानं। **मनुस्सानं सहब्यतन्ति** मनुस्सेहि सहभावं। सह ब्येतीति सहब्यो, सहपवत्तनको, तस्स भावो सहब्यता। **निविट्ठस्साति** निविट्ठा भवेय्य। **यावजीवन्ति** याव जीवितप्पवत्तिया, याव परिनिब्बानाति अत्थो।

अप्पमाणन्ति सक्कच्चं बहुं उळारं बहुक्खत्तुच्च करणवसेन पमाणरहितं। **निरूपधिन्ति** किलेसूपधिरहितं, सुविसुद्धं निम्मलन्ति अत्थो। यस्मा पन ते देवा महग्गतकुसलं न इच्छन्ति कामलोकसमतिक्कमनतो, कामावचरपुज्जमेव इच्छन्ति, तस्मा एवमेत्थ अत्थो वेदितब्बो — “इतो देवलोकतो चुतो मनुस्सेसु उप्पज्जित्वा विज्जुतं पत्तो कायदुच्चरितादिं सब्बं दुच्चरितं पहाय कायसुचरितादिं सब्बं सुचरितं उळारं विपुलं उपचिन्तिवा अरियमग्गेन आगतसद्धो भवाही”ति। यस्मा पन लोक्कुत्तरेसु पठममग्गं दुतियमग्गम्पि वा इच्छन्ति अत्तनो देवलोकूपपत्तिया अनतिवत्तनतो, तस्मा तेसम्पि वसेन “अप्पमाणं निरूपधि”न्तिपदानं अत्थो वेदितब्बो — पमाणकरानं दिट्ठेकट्ठओळारिककामरागादिकिलेसानं उपच्छेदेन **अप्पमाणं**, सत्तमभवतो वा उप्पज्जनारहस्स खन्धूपधिस्स तंनिब्बत्तकअभिसङ्खारूपधिस्स तंतंमग्गवज्झकिलेसूपधिस्स च पहानेन तेसं अनिब्बत्तनतो निरूपधिसङ्खारतनिब्बानसन्निस्सितत्ता च **निरूपधी**ति।

एवं अच्चन्तमेव अपायद्वारपिधायकं कम्मं दस्सेत्वा इदानी सग्गसम्पत्तिनिब्बत्तककम्मं दस्सेतुं “**ततो ओपधिक**”न्तिआदि वुत्तं। तत्थ **ओपधिकन्ति** उपधिवेपक्कं अत्तभावसम्पत्तिया चेव भोगसम्पत्तिया च निब्बत्तकन्ति अत्थो। **उपधी**ति हि अत्तभावो वुच्चति। यथाह “सन्तेकच्चानि पापकानि कम्मसमादानानि उपधिसम्पत्तिपटिबाहितानि न विपच्चन्ती”ति (विभ० ८१०)। कामगुणापि। यथाह “उपधीहि नरस्स सोचना”ति (सं० नि० १.१२; सु० नि० ३४)। तत्रायं वचनत्थो — उपधीयति एत्थ सुखदुक्खन्ति उपधि, अत्तभावो कामगुणा च। उपधिकरणं सीलं एतस्स, उपधिं वा अरहतीति ओपधिकं, पुज्जं, तं बहुं उळारं कत्वा। कथं? **दानेन**। दानज्झि इतरेहि सुकरन्ति एवं वुत्तं। दानेनाति वा पदेन अभयदानम्पि वुत्तं, न आमिसदानमेवाति सीलस्सापि सङ्गहो दट्ठब्बो। यस्मा पन ते देवा असुरकायहानिं एकन्तेनेव देवकायपारिपूरिज्ज इच्छन्ति, तस्मा तस्स उपायं दस्सेन्ता “**अज्जेपि मच्चे सद्धम्मे, ब्रह्मचरिये निवेसया**”ति धम्मदाने नियोजेन्ति। **यदा विदूति** यस्मिं काले देवा देवं चवन्तं विदू विजानेय्युं, तदा इमाय यथावुत्ताय अनुकम्पाय दुक्खापनयनकम्यताय “देव, इमे देवकाये पुनप्पुनं उप्पज्जनवसेन **एहि** आगच्छाही”ति च अनुमोदेन्तीति।

चतुत्थसुत्तवण्णना निट्ठिता।

५. बहुजनहितसुत्तवण्णना

८४. पञ्चमे लोकेति एत्थ तयो लोका — सत्तलोको, सङ्खारलोको, ओकासलोकोति । तेसु इन्द्रियबद्धानं रूपधम्मानं अरूपधम्मानं रूपारूपधम्मानञ्च सन्तानवसेन वत्तमानानं समूहो सत्तलोको, पथवीपब्बतादिभेदो ओकासलोको, उभयेपि खन्धा सङ्खारलोको । तेसु सत्तलोको इध अधिप्पेतो । तस्मा लोकेति सत्तलोके । तत्थापि न देवलोके, न ब्रह्मलोके, मनुस्सलोके । मनुस्सलोकेपि न अज्जस्मिं चक्कवाळे, इमस्मिंयेव चक्कवाळे । तत्रापि न सब्बट्टानेसु, “पुरत्थिमाय दिसाय गजङ्गलं नाम निगमो, तस्स अपरेन महासाला, ततो परं पच्चन्तिमा जनपदा, ओरतो मज्झे; पुरत्थिमदक्खिणाय दिसाय सल्लवती नाम नदी, ततो परं पच्चन्तिमा जनपदा, ओरतो मज्झे; दक्खिणाय दिसाय सेतकण्णिकं नाम निगमो, ततो परं पच्चन्तिमा जनपदा, ओरतो मज्झे; पच्छिमाय दिसाय थूणं नाम ब्राह्मणगामो, ततो परं पच्चन्तिमा जनपदा, ओरतो मज्झे; उत्तराय दिसाय उसिरद्धजो नाम पब्बतो, ततो परं पच्चन्तिमा जनपदा, ओरतो मज्झे”ति (महाव० २५९) एवं परिच्छिन्ने आयामतो तियोजनसते वित्थारतो अट्ठतेय्ययोजनसते परिक्खेपतो नवयोजनसते मज्झिमदेसे उप्पज्जति तथागतो । न केवलञ्च तथागतोव पच्चेकबुद्धा अग्गसावका असीतिमहाथेरा बुद्धमाता बुद्धपिता चक्कवत्तिराजा अज्जे च सारप्पत्ता ब्राह्मणगहपतिका एत्थेव उप्पज्जन्ति । इध पन तथागतवारेयेव सब्बत्थकवसेन अयं नयो लब्भति, इतरेसु एकदेसवसेन ।

उप्पज्जमाना उप्पज्जन्तीति इदं पन उभयम्पि विप्पकतवचनमेव, उप्पज्जन्ता बहुजनहितत्थाय उप्पज्जन्ति, न अज्जेन कारणेनाति एवमेत्थ अत्थो वेदितब्बो । एवरूपज्हेत्थ सहलक्खणं न सक्का अज्जेन सहलक्खणेन पटिबाहितुं ।

अपिच उप्पज्जमानो नाम उप्पज्जति नाम उप्पन्नो नामाति अयं पभेदो वेदितब्बो । तथागतो हि महाभिनीहारं करोन्तो, बुद्धकरे धम्मे परियेसन्तो, पारमियो पूरेन्तो, पञ्च महापरिच्चागे परिच्चजन्तो, जातत्थचरियं चरन्तो, लोकत्थचरियं, बुद्धत्थचरियं कोटिं पापेन्तो, पारमियो पूरेत्वा तुसितभवने तिट्ठन्तो, ततो ओतरित्वा चरिमभवे पटिसन्धिं गण्हन्तो, अगारमज्जे वसन्तो, अभिनिक्खमन्तो, महापधानं पदहन्तो, परिपक्कजाणो बोधिमण्डं आरुह्य मारबलं विधमेन्तो पठमयामे पुब्बेनिवासं अनुस्सरन्तो, मज्झिमयामे दिब्बचक्खुं विसोधेन्तो, पच्छिमयामे पटिच्चसमुप्पादे जाणं ओतारेत्वा अनेकाकारं सब्बसङ्खारे सम्मसित्वा सोतापत्तिमगं पटिविज्जन्तो याव अनागामिफलं सच्छिकरोन्तोपि **उप्पज्जमानो** एव नाम, अरहत्तमगगक्खणे **उप्पज्जति** नाम, अरहत्तफलक्खणे पन **उप्पन्नो** नाम । बुद्धानज्हि सावकानं विय न पटिपाटिया इद्धिविधजाणादीनं उप्पादनकिच्चं अत्थि, सहेव पन अरहत्तमग्गेन सकलोपि बुद्धगुणरासि आगतोव नाम होति । तस्मा ते निब्बत्तसब्बकिच्चत्ता अरहत्तफलक्खणे उप्पन्ना नाम होन्ति । इध अरहत्तफलक्खणं सन्धाय “उप्पज्जती”ति वुत्तो । उप्पन्नो होतीति अयज्हेत्थ अत्थो ।

सावकोपि खीणासवो सावकबोधिआ हेतुभूते पुज्जसम्भारे सम्भरन्तो पुब्बयोगं पुब्बचरियं गतपच्चागतवत्तं पूरेन्तो चरिमभवे निब्बत्तन्तो अनुक्कमेन विज्जुतं पत्वा संसारे आदीनवं दिस्वा पब्बज्जाय चेतयमानो पब्बज्जं मत्थकं पापेत्वा सीलादीनि परिपूरेन्तो धुतधम्मे समादाय वत्तमानो जागरियं अनुयुज्जन्तो जाणानि निब्बत्तेन्तो विपस्सनं पट्टपेत्वा हेट्ठिमग्गे अधिगच्छन्तोपि **उप्पज्जमानो** एव नाम, अरहत्तमगगक्खणे **उप्पज्जति** नाम, अरहत्तफलक्खणे पन **उप्पन्नो** नाम । सेक्खो पन पुब्बूपनिस्सयतो पट्टाय याव गोत्रभुजाणा **उप्पज्जमानो** नाम, पठममगगक्खणे **उप्पज्जति** नाम, पठमफलक्खणतो पट्टाय **उप्पन्नो** नाम । एत्तावता “तयोमे, भिक्खवे, पुग्गला लोके उप्पज्जमाना उप्पज्जन्ती”ति पदानं अत्थो वुत्तो होति ।

इदानीं बहुजनहितायाति आदीसु बहुजनहितायाति महाजनस्स हितत्थाय । बहुजनसुखायाति महाजनस्स सुखत्थाय । लोकानुकम्पायाति सत्तलोकस्स अनुकम्पं पटिच्च । कतरसत्तलोकस्साति? यो तथागतस्स धम्मदेसनं सुत्वा धम्मं पटिविज्झति, अमतपानं पिवति, तस्स । भगवतो हि धम्मचक्कप्पवत्तनसुत्तन्तदेसनाय अज्जातकोण्डज्जप्पमुखा

अद्वारस ब्रह्मकोटियो धम्मं पटिविज्झिंसु। एवं याव सुभदपरिब्बाजकविनयना धम्मं पटिविद्धसत्तानं गणना नत्थि, महासमयसुत्तन्तदेसनायं मङ्गलसुत्तं, चूळराहुलोवादं, समचित्तदेसनायन्ति इमेसु चतूसु ठानेसु अभिसमयं पत्तसत्तानं परिच्छेदो नत्थि। एवमेतस्स अपरिमाणस्स सत्तलोकस्स अनुकम्पाय। सावकस्स पन अरहतो सेक्खस्स च लोकानुकम्पाय उप्पत्ति धम्मसेनापतिआदीहि धम्मभण्डागारिकादीहि च देसितदेसनाय पटिवेधप्पत्तसत्तानं वसेन, अपरभागे च महामहिन्दत्थेरादीहि देसितदेसनाय पटिविद्धसच्चानं वसेन, यावज्जतना इतो परं अनागते च सासनं निस्साय सगमोक्खमगोसु पतिट्ठहन्तानं वसेनपि अयमत्थो विभावेतब्बो।

अपिच **बहुजनहितायाति** बहुजनस्स हितत्थाय, नेसं पज्जासम्पत्तिया दिट्ठधम्मिकसम्परायिकहितूपदेसकोति। **बहुजनसुखायाति** बहुजनस्स सुखत्थाय, चागसम्पत्तिया उपकरणसुखसम्पदायकोति। **लोकानुकम्पायाति** लोकस्स अनुकम्पनत्थाय, मेत्ताकरुणासम्पत्तिया मातापितरो विय लोकस्स रक्खिता गोपिताति। **अत्थाय हिताय सुखाय देवमनुस्सानन्ति** इध देवमनुस्सगहणेन भब्बपुग्गले वेनेय्यसत्ते एव गहेत्वा तेसं निब्बानमग्गफलाधिगमाय तथागतस्स उप्पत्ति दस्सिता पठमवारे, दुतियततियवारेसु पन अरहतो सेक्खस्स च वसेन योजेतब्बं। तत्थ **अत्थायाति** इमिना परमत्थाय, निब्बानायाति वुत्तं होति। **हितायाति** तंसम्पापकमग्गत्थायाति वुत्तं होति। निब्बानसम्पापकमग्गतो हि उत्तरिं हितं नाम नत्थि। **सुखायाति** फलसमापत्तिसुखत्थायाति वुत्तं होति, ततो उत्तरि सुखाभावतो। वुत्तज्हेतं “अयं समाधि पच्चुप्पन्नसुखो चेव आयतिज्च सुखविपाको”ति (दी० नि० ३.३५५; अ० नि० ५.२७; विभ० ८०४)।

तथागतोति आदीनं पदानं अत्थो हेट्ठा वुत्तो। **विज्जाचरणसम्पन्नोति** आदीसु तिस्सोपि विज्जा भयभेरवे (म० नि० १.३४ आदयो) आगतनयेन, छपि विज्जा छळभिज्जावसेन, अट्ठपि विज्जा अम्बट्टसुत्ते आगताति विज्जाहि, सीलसंवरादीहि, पन्नरसहि चरणधम्महि च, अनज्जसाधारणेहि सम्पन्नो समन्नागतोति **विज्जाचरणसम्पन्नो**। सोभनगमनत्ता, सुन्दरं ठानं गतत्ता, सम्मा गतत्ता, सम्मा गदत्ता च **सुगतो**। सब्बथा विदितलोकत्ता **लोकविदू**। नत्थि एतस्स उत्तरोति **अनुत्तरो**। पुरिसदम्मे पुरिसवेनेय्ये सारेति विनेतीति **पुरिसदम्मसारथि**। दिट्ठधम्मिकसम्परायिकपरमत्थेहि यथारहं अनुसासतीति **सत्था**। सब्बस्सापि नेय्यस्स सब्बप्पकारेन सयम्भुजाणेन बुद्धत्ता **बुद्धोति** अयमेत्थ सङ्खेपो, वित्थारो पन विसुद्धिमग्गतो (विसुद्धि० १.१३२-१३३) गहेतब्बो।

सो धम्मं देसेति आदि...पे०... परियोसानकल्याणन्ति सो भगवा सत्तेसु कारुज्जं पटिच्च हित्वापि अनुत्तरं विवेकसुखं धम्मं देसेति। तज्च खो अप्पं वा बहुं वा देसेन्तो आदिकल्याणादिप्पकारमेव देसेति। कथं? एकगाथापि हि समन्तभदकत्ता धम्मस्स पठमपादेन आदिकल्याणा, दुतियततियेहि मज्झेकल्याणा, पच्छिमेन परियोसानकल्याणा। एकानुसन्धिकं सुत्तं निदानेन आदिकल्याणं, निगमनेन परियोसानकल्याणं, सेसेन मज्झेकल्याणं। नानानुसन्धिकं सुत्तं पठमेन अनुसन्धिना आदिकल्याणं, पच्छिमेन परियोसानकल्याणं, सेसेहि मज्झेकल्याणं। सकलोपि वा सासनधम्मो अत्तनो अत्थभूतेन सीलेन आदिकल्याणो, समथविपस्सनामग्गफलेहि मज्झेकल्याणो, निब्बानेन परियोसानकल्याणो। सीलसमाधीहि वा आदिकल्याणो, विपस्सनामग्गेहि मज्झेकल्याणो, फलनिब्बानेहि परियोसानकल्याणो। बुद्धसुबुद्धताय वा आदिकल्याणो, धम्मसुधम्मताय मज्झेकल्याणो, सङ्घसुप्पटिपत्तिया परियोसानकल्याणो। तं सुत्वा तथत्ताय पटिपन्नेन अधिगन्तब्बाय अभिसम्बोधिवा वा आदिकल्याणो, पच्चेकबोधिवा मज्झेकल्याणो, सावकबोधिवा परियोसानकल्याणो। सुय्यमानो चेस नीवरणविक्खम्भनतो सवनेनपि कल्याणमेव आवहतीति आदिकल्याणो, पटिपज्जियमानो समथविपस्सनासुखावहनतो पटिपत्तियापि सुखमेव आवहतीति मज्झेकल्याणो, तथापटिपन्नो च पटिपत्तिफले निट्ठिते तादिभावावहनतो पटिपत्तिफलेनपि कल्याणमेव आवहतीति परियोसानकल्याणो। नाथप्पभवत्ता च पभवसुद्धिया

आदिकल्याणो, अत्थसुद्धिया मज्झेकल्याणो, किच्चसुद्धिया परियोसानकल्याणो । तेन वुत्तं “सो धम्मं देसेति आदि... पे०... परियोसानकल्याण”न्ति ।

यं पन भगवा धम्मं देसेन्तो सासनब्रह्मचरियं मग्गब्रह्मचरियञ्च पकासेति, नानानयेहि दीपेति, तं यथानुरूपं अत्थसम्पत्तिया **सात्थं**, ब्यञ्जनसम्पत्तिया **सब्यञ्जनं** । सङ्कासन, पकासन, विवरण, विभजन, उत्तानीकरण पञ्चत्तिअत्थपदसमायोगतो सात्थं, अक्खरपदव्यञ्जनाकारनिरुत्तिनिद्देससम्पत्तिया सब्यञ्जनं, अत्थगम्भीरतापटिवेधगम्भीरताहि वा सात्थं, धम्मगम्भीरतादेसनागम्भीरताहि सब्यञ्जनं । अत्थपटिभानपटिसम्भिदाविसयतो वा सात्थं, धम्मनिरुत्तिपटिसम्भिदाविसयतो सब्यञ्जनं । पण्डितवेदनीयतो परिक्वकजनप्पसादकन्ति सात्थं, सद्धेय्यतो लोकियजनप्पसादकन्ति सब्यञ्जनं । गम्भीराधिप्पायतो सात्थं, उत्तानपदतो सब्यञ्जनं । उपनेतब्बस्स अभावतो सकलपरिपुण्णभावेन **केवलपरिपुण्णं**, अपनेतब्बस्स अभावतो निद्दोसभावेन **परिसुद्धं**, अपिच पटिपत्तिया अधिगमव्यत्तितो **सात्थं**, परियत्तिया आगमव्यत्तितो **सब्यञ्जनं**, सीलादिपञ्चधम्मक्खन्धपारिपूरिया **परिपुण्णं**, निरुपक्किलेसतो नित्थरणत्थाय पवत्तितो लोकामिसनिरपेक्खतो च **परिसुद्धं**, सिक्खत्तयपरिग्गहितत्ता ब्रह्मभूतेहि सेट्ठेहि चरितब्बतो तेसं चरियभावतो च **ब्रह्मचरियं** । तस्मा “सात्थं सब्यञ्जनं...पे०... पकासेती”ति वुच्चति । **पठमो**ति गणनानुपुब्बतो सब्बलोकुत्तमभावतो च पठमो पुगगलो ।

तस्सेव सत्थु सावकोति तस्सेव यथावुत्तगुणस्स सत्थु सम्मासम्बुद्धस्स धम्मदेसनाय सवनन्ते जातो धम्मसेनापतिसदिसो सावको, न पूरणादि विय पटिज्जामत्तेन सत्थु सावको । **पाटिपदो**ति पटिपदासङ्घातेन अरियमग्गेन अरियाय जातिया जातो भवोति पाटिपदो, अनिट्ठितपटिपत्तिकिच्चो पटिपज्जमानोति अत्थो । सुत्तगेय्यादि परियत्तिधम्मो बहुं सुतो एतेनाति **बहुस्सुतो** । पातिमोक्खसंवरादिसीलेन चेव आरज्जिकङ्गादिधुतङ्गवतेहि च उपपन्नो सम्पन्नो समन्नागतोति **सीलवतूपपन्नो** । इति भगवा “लोकानुकम्पा नाम हितज्झासयेन धम्मदेसना, सा च इमेसु एव तीसु पुगगलेसु पटिबद्धा”ति दस्सेति । सेसं सुविज्जेय्यमेव ।

गाथासु **तस्सन्वयो**ति तस्सेव सत्थु पटिपत्तिया धम्मदेसनाय च अनुगमनेन तस्सन्वयो अनुजातो । अविज्जन्धकारं विधमित्वा सपरसन्तानेसु धम्मालोकसङ्घाताय पभाय करणतो **पभङ्करा** । **धम्ममुदीरयन्ता**ति चतुसच्चधम्मं कथेन्ता । **अपापुरन्ती**ति उग्घाटेन्ति । **अमतस्स** निब्बानस्स । **द्वारं** अरियमग्गं । **योगा**ति कामयोगादितो । **सत्थवाहेना**ति वेनेय्यसत्थवाहनतो भवकन्तारनित्थरणतो सत्थवाहो, भगवा, तेन सत्थवाहेन । **सुदेसितं मग्गमनुक्कमन्ती**ति तेन सम्मा देसितं अरियमग्गं तस्स देसनानुसारेन अनुगच्छन्ति पटिपज्जन्ति । **इधेवा**ति इमस्मिंयेव अत्तभावे । सेसं उत्तानमेव ।

पञ्चमसुत्तवण्णना निट्ठिता ।

६. असुभानुपस्सीसुत्तवण्णना

८५. छट्ठे **असुभानुपस्सी**ति असुभं अनुपस्सन्ता द्वत्तिसाकारवसेन चेव उद्धुमातकादीसु गहितनिमित्तस्स उपसंहरणवसेन च कायस्मिं असुभं असुभाकारं अनुपस्सका हुत्वा विहरथ । **आनापानस्सती**ति आनापाने सति, तं आरब्ध पवत्ता सति, अस्सासपस्सासपरिग्गाहिका सतीति अत्थो । वुत्तज्हेतं “आनन्ति अस्सासो, नो पस्सासो । पानन्ति पस्सासो, नो अस्सासो”तिआदि (पटि० म० १.१६०) ।

वोति तुम्हाकं । अज्झत्तन्ति इध गोचरज्झत्तं अधिप्पेतं । परिमुखन्ति अभिमुखं । सूपट्ठिताति सुट्ठु उपट्ठिता । इदं वुत्तं होति — आनापानस्सति च तुम्हाकं कम्मट्ठानाभिमुखं सुट्ठु उपट्ठिता होतूति । अथ वा परिमुखन्ति परिगगहितनिय्यानं । वुत्तज्हेतं पटिसम्भिदायं — “परीति परिगगहट्ठो, मुखन्ति निय्यानट्ठो, सतीति उपट्ठानट्ठो, तेन वुच्चति परिमुखं सति”न्ति (पटि० म० १.१६४) । इमिना चतुसतिपट्ठानसोळसप्पभेदा आनापानस्सतिकम्मट्ठानभावना दस्सिताति दट्ठब्बा ।

एवं सङ्खेपेनेव रागचरितवितक्कचरितानं सप्पायं पटिकूलमनसिकारकायानुपस्सनावसेन समथकम्मट्ठानं विपस्सनाकम्मट्ठानञ्च उपदिसित्वा इदानीं सुद्धविपस्सनाकम्मट्ठानमेव दस्सेन्तो “सब्बसङ्खारेसु अनिच्चानुपस्सिनो विहरथा”ति आह । तत्थ अनिच्चं, अनिच्चलक्खणं, अनिच्चानुपस्सना, अनिच्चानुपस्सीति इदं चतुक्कं वेदितव्वं । हुत्वा, अभावतो, उदयव्वययोगतो, तावकालिकतो, निच्चपटिक्खेपतो च खन्धपञ्चकं अनिच्चं नाम । तस्स यो हुत्वा अभावाकारो, तं अनिच्चलक्खणं नाम । तं आरब्ध पवत्ता विपस्सना अनिच्चानुपस्सना । तं अनिच्चन्ति विपस्सको अनिच्चानुपस्सी । एत्थ च एकादसविधा असुभकथा पठमज्झानं पापेत्वा, सोळसवत्थुका च आनापानकथा चतुत्थज्झानं पापेत्वा, विपस्सनाकथा च वित्थारतो वत्तब्बा, सा पन सब्बाकारतो विसुद्धिमग्गे (विसुद्धि० २.७३७-७४०) कथिताति तत्थ वुत्तनयेनेव वेदितव्वम् ।

इदानीं असुभानुपस्सनादीहि निष्फादेतव्वं फलविसेसं दस्सेतुं “असुभानुपस्सीन”न्ति आदिमाह । तत्थ सुभाय धातुयाति सुभभावे, सुभनिमित्तेति अत्थो । रागानुसयोति सुभारम्मणे उप्पज्जनारहो कामरागानुसयो । सो केसादीसु उद्धुमातकादीसु वा असुभानुपस्सीनं असुभनिमित्तं गहेत्वा तत्थ पठमज्झानं निव्वत्तेत्वा तं पादकं कत्वा विपस्सनं पट्टपेत्वा अधिगतेन अनागामिमग्गेन पहीयति, सब्बसो समुच्छिन्दीयतीति अत्थो । वुत्तज्हेतं “असुभा भावेतव्वम् कामरागस्स पहानाया”ति (अ० नि० ९.३; उदा० ३१) । बाहिराति बहिद्धावत्थुकत्ता अनत्थावहत्ता च बाहिरा बहिभूता । वितक्कासयाति कामसङ्कप्पादिमिच्छावितक्का । ते हि अप्पहीना आसयानुगता सति पच्चयसमवाये उप्पज्जनतो वितक्कासयाति वुत्ता । कामवितक्को चेत्थ कामरागगहणेन गहितो एवाति तदवसेसा वितक्का एव वुत्ताति वेदितव्वम् । विघातपक्खिकाति दुक्खभागिया, इच्छाविघातनिव्वत्तनका वा । ते न होन्तीति ते पहीयन्ति । ब्यापादवितक्को, विहिंसावितक्को, जातिवितक्को, जनपदवितक्को, अमरावितक्को, अनवज्जत्तिपटिसंयुत्तो वितक्को, लाभसक्कारसिलोकपटिसंयुत्तो वितक्को, परानुदयतापटिसंयुत्तो वितक्कोति अट्ठ, कामवितक्केन सद्धिं नवविधा महावितक्का आनापानस्सतिसमाधिना तन्निस्सिताय च विपस्सनाय पुव्वभागे विक्खम्भिता । तं पादकं कत्वा अधिगतेन अरियमग्गेन यथारहं अनवसेसतो पहीयन्ति । वुत्तम्पि चेत्तं “आनापानस्सति भावेतव्वम् वितक्कुपच्छेदाया”ति (अ० नि० ९.३; उदा० ३१) ।

या अविज्जा, सा पहीयतीति या सच्चसभावपटिच्छादिनी सब्बानत्थकारी सकलस्स वट्ठदुक्खस्स मूलभूता अविज्जा, सा अनिच्चानुपस्सीनं विहरतं समुच्छिज्जति । इदं किर भगवता अनिच्चाकारतो वुट्ठितस्स सुक्खविपस्सकखीणासवस्स वसेन वुत्तं । तस्सायं सङ्खेपत्थो — तेभूमकेसु सब्बसङ्खारेसु अनिच्चादितो सम्मसनं पट्टपेत्वा विपस्सन्तानं यदा अनिच्चन्ति पवत्तमाना वुट्ठानगामिनीविपस्सना मग्गेन घटीयति, अनुक्कमेन अरहत्तमग्गो उप्पज्जति, तेसं अनिच्चानुपस्सीनं विहरतं अविज्जा अनवसेसतो पहीयति, अरहत्तमग्गविज्जा उप्पज्जतीति । अनिच्चानुपस्सीनं विहरतन्ति इदं अनिच्चलक्खणस्स तेसं पाकटभावतो इतरस्स लक्खणद्वयस्स गहणे उपायभावतो वा वुत्तं, न पन एकस्सेव लक्खणस्स अनुपस्सितव्वतो । वुत्तज्हेतं “यदनिच्चं तं दुक्खं, यं दुक्खं तदनत्ता”ति (सं० नि० ३.१५) । अपरम्पि वुत्तं “अनिच्चसज्जिनो हि, मेघिय, अनत्तसज्जा सण्ठाति, अनत्तसज्जी अस्मिमानसमुग्धातं पापुणाती”ति ।

गाथासु आनापाने पटिस्सतोति आनापाननिमित्तस्मिं पटि पटि सतो, उपट्ठितस्सतीति अत्थो । पस्सन्ति आसवक्खयजाणचक्खुना सङ्खारूपसमं निब्बानं पस्सन्तो । आतापी सब्बदाति अन्तरावोसानं अनापज्जित्वा असुभानुपस्सनादीसु सततं आतापी युत्तप्पयुत्तो, ततो एव यतो वायममानो, नियतो वा सम्मत्तनियामेन तत्थ सब्बसङ्खारसमथे निब्बाने अरहत्तफलविमुत्तिया विमुच्चति । सेसं वुत्तनयमेव ।

छट्सुत्तवण्णना निट्ठिता ।

७. धम्मानुधम्मपटिपन्नसुत्तवण्णना

८६. सत्तमे धम्मानुधम्मपटिपन्नस्साति एत्थ धम्मो नाम नवविधो लोकुत्तरधम्मो, तस्स धम्मस्स अनुधम्मो सीलविसुद्धिआदि पुब्बभागपटिपदाधम्मो, तं धम्मानुधम्मं पटिपन्नस्स अधिगन्तुं पटिपज्जमानस्स । अयमनुधम्मो होतीति अयं अनुच्छविकसभावो पतिरूपसभावो होति । वेय्याकरणायाति कथनाय । धम्मानुधम्मपटिपन्नोयन्ति यन्ति करणत्थे पच्चत्तवचनं । इदं वुत्तं होति — येन अनुधम्मेन तं धम्मानुधम्मं पटिपन्नोति ब्याकरमानो सम्मदेव ब्याकरोन्तो नाम सिया, न ततोनिदानं विञ्जूहि गरहितब्बो सियाति । यन्ति वा किरियापरामसनं, तेनेतं दस्सेति “यदिदं धम्मस्सेव भासनं, धम्मवितक्कस्सेव च वितक्कनं तदुभयाभावे जाणुपेक्खाय, अयं धम्मानुधम्मपटिपन्नस्स भिक्खुनो तथारूपो अयन्ति कथनायानुरूपहेतु अनुच्छविककारणं । भासमानो धम्मंयेव भासेय्याति कथेन्तो चे दसकथावत्थुधम्मंयेव कथेय्य, न तप्पटिपक्खमहिच्छतादिअधम्मं । वुत्तज्हेतं —

“यायं कथा अभिसल्लेखिका चेतोविवरणसप्पाया एकन्तनिब्बिदाय विरागाय निरोधाय उपसमाय अभिञ्जाय सम्बोधाय निब्बानाय संवत्तति । सेय्यथिदं — अप्पिच्छकथा, सन्तुट्ठिकथा, पविवेककथा, असंसग्गकथा, वीरियारम्भकथा, सीलकथा, समाधिकथा, पञ्जाकथा, विमुत्तिकथा, विमुत्तिजाणदस्सनकथा, एवरूपाय कथाय निकामलाभी होति अकिच्छलाभी अकसिरलाभी”ति (अ० नि० ९.३; उदा० ३१) ।

अभिसल्लेखिकाय कथाय लाभी एव हि तं भासेय्य । एतेन कल्याणमित्तसम्पदा दस्सिता ।

धम्मवितक्कन्ति नेक्खम्मवितक्कादिं धम्मतो अनपेतं वितक्कयतो “सीलादिपटिपदं परिपूरेस्सामी”ति उपरूपरि उस्साहो अभिवट्ठिस्सति । सो पन वितक्को सीलादीनं अनुपकारधम्मे वज्जेत्वा उपकारधम्मे अनुबूहनवसेन हानभागियभावं अपनेत्वा ठितिभागियभावेपि अट्ठत्वा विसेसभागियतं निब्बेधभागियतञ्च पापनवसेन पवत्तिया अनेकप्पभेदो वेदितब्बो । नो अधम्मवितक्कन्ति कामवितक्कं नो वितक्केय्याति अत्थो । तदुभयं वा पनाति यदेतं परेसं अनुगहणत्थं धम्मभासनं अत्तनो अनुगहणत्थं धम्मवितक्कनञ्च वुत्तं । अथ वा पन तं उभयं अभिनिवज्जेत्वा अप्पटिपज्जित्वा अक्त्वा । उपेक्खकोति तथापटिपत्तियं उदासीनो समथविपस्सनाभावनमेव अनुबूहन्तो विहरेय्य, समथपटिपत्तियं उपेक्खको हुत्वा विपस्सनायमेव कम्मं करोन्तो विहरेय्य । विपस्सनम्पि उस्सुक्कापेत्वा तत्थपि सङ्खारुपेक्खाजाणवसेन उपेक्खको याव विपस्सनाजाणं मग्गेन घटीयति, ताव यथा तं तिवक्खं सूरं पसन्नं हुत्वा वहति, तथा विहरेय्य सतो सम्पजानोति ।

गाथासु समथविपस्सनाधम्मो आरमितब्बट्ठेन आरामो एतस्साति धम्मरामो । तस्मिंयेव धम्मे रतोति धम्मरतो । तस्सेव धम्मस्स पुनप्पुनं विचिन्तनतो धम्मं अनुविचिन्तयं तं धम्मं आवज्जेन्तो, मनसि करोन्तोति अत्थो । अनुस्सरन्ति

तमेव धम्मं उपरूपरिभावनावसेन अनुस्सरन्तो । अथ वा विमुत्तायतनसीसे उत्वा परेसं देसनावसेन सीलादिधम्मो आरमितब्बट्टेन आरामो एतस्साति **धम्मारामो** । तथेव तस्मिं धम्मे रतो अभिरतोति **धम्मरतो** । तेसंयेव सीलादिधम्मानं गतियो समन्वेसन्तो कामवितक्कादीनं ओकासं अदत्त्वा नेक्खम्मसङ्कप्पादिधम्मंयेव अनुविचिन्तनतो **धम्मं अनुविचिन्तयं** । तदुभयं वा पन ओळारिकतो दहन्तो अज्झुपेक्खित्वा समथविपस्सनाधम्ममेव उपरूपरि भावनावसेन अनुस्सरन्तो अनुबूहनवसेन पवत्तेन्तो । **सद्धम्मा**ति सत्ततिसप्पभेदा बोधिपक्खियधम्मा नवविधलोकुत्तरधम्मा च न परिहायति, न चिरस्सेव तं अधिगच्छतीति अत्थो ।

इदानी तस्स अनुस्सरणविधिं दस्सेन्तो “**चरं वा**”तिआदिमाह । तत्थ **चरं वा**ति भिक्खाचारवसेन चङ्कमनवसेन च चरन्तो वा । **यदि वा** तिट्ठन्ति तिट्ठन्तो वा **निसिन्नो** वा, **उद वा** सयन्ति सयन्तो वा । एवं चतूसुपि इरियापथेसु । **अज्झत्तं समयं चित्तन्ति** यथावुत्ते कम्मट्ठानसङ्घाते गोचरज्झत्ते अत्तनो चित्तं रागादिकिलेसानं वूपसमनवसेन पजहनवसेन समयं समेन्तो । **सन्तिमेवाधिगच्छतीति** अच्चन्तसन्तिं निब्बानमेव पापुणातीति ।

सत्तमसुत्तवण्णना निट्ठिता ।

८. अन्धकरणसुत्तवण्णना

८७. अट्टमे **अकुसलवितक्का**ति अकोसल्लसम्भूता वितक्का । **अन्धकरणा**तिआदीसु यस्स सयं उप्पज्जन्ति, तं यथाभूतदस्सननिवारणेन अन्धं करोन्तीति **अन्धकरणा** । न पज्जाचक्खुं करोन्तीति **अचक्खुकरणा** । अज्जाणं करोन्तीति **अज्जाणकरणा** । **पज्जानिरोधिका**ति कम्मस्सकतापज्जा, ज्ञानपज्जा, विपस्सनापज्जाति इमा तिससो पज्जा अप्पवत्तिकरणेन निरोधेन्तीति पज्जानिरोधिका । अनिट्ठफलदायकत्ता दुक्खसङ्घातस्स विघातस्स पक्खे वत्तन्तीति **विघातपक्खिका** । किलेसनिब्बानं न संवत्तयन्तीति **अनिब्बानसंवत्तनिका** ।

कामवितक्कोति कामपटिसंयुत्तो वितक्को । सो हि किलेसकामसहितो हुत्वा वत्थुकामेसु पवत्तति । ब्यापादपटिसंयुत्तो वितक्को **ब्यापादवितक्को** । विहिंसापटिसंयुत्तो वितक्को **विहिंसावितक्को** । इमे द्वे च सत्तेसुपि सङ्घारेसुपि उप्पज्जन्ति । कामवितक्को हि पियमनापे सत्ते वा सङ्घारे वा वितक्केन्तस्स उप्पज्जति, ब्यापादवितक्को अप्पिये अमनापे सत्ते वा सङ्घारे वा कुज्झित्वा ओलोकनकालतो पट्टाय याव नासना उप्पज्जति, विहिंसावितक्को सङ्घारेसु न उप्पज्जति, सङ्घारा दुक्खापेतब्बा नाम नत्थि, “इमे सत्ता हज्जन्तु वा बज्जन्तु वा उच्छिज्जन्तु वा विनस्सन्तु वा मा वा अहेसु”न्ति चिन्तनकाले पन सत्तेसु उप्पज्जति ।

इमेयेव पन कामसङ्कप्पादयो । अत्थतो हि कामवितक्कादीनं कामसङ्कप्पादीनञ्च नानाकरणं नत्थि, तंसम्पयुत्ता पन सज्जादयो कामसज्जादयो । कामधातुआदीनं पन यस्मा पाळियं —

“कामपटिसंयुत्तो तक्को वितक्को...पे०... मिच्छासङ्कप्पो, अयं वुच्चति कामधातु, सब्बेपि अकुसला धम्मा कामधातु । ब्यापादपटिसंयुत्तो तक्को वितक्को...पे०... मिच्छासङ्कप्पो, अयं वुच्चति ब्यापादधातु । दससु आघातवत्थूसु चित्तस्स आघातो पटिघातो...पे०... अनत्तमनता चित्तस्स, अयं वुच्चति ब्यापादधातु । विहिंसापटिसंयुत्तो तक्को वितक्को मिच्छासङ्कप्पो, अयं वुच्चति विहिंसाधातु । इधेकच्चो पाणिना वा लेडुना वा दण्डेन वा सत्थेन वा रज्जुया वा अज्जतरज्जतरेन सत्ते विहेठेति, अयं विहिंसाधातु”ति (विभ० १८२, ११०) —

आगतत्ता विसेसो लब्धति ।

तत्थ द्वे कथा सब्बसङ्गाहिका च असम्भिन्ना च । तत्थ कामधातुया गहिताय इतरा द्वेपि गहिता नाम होन्ति । ततो पन नीहरित्वा अयं व्यापादधातु, अयं विहिंसाधातूति दस्सेतीति अयं सब्बसङ्गाहिका नाम । कामधातुं कथेन्तो पन भगवा व्यापादधातुं व्यापादधातुद्धाने, विहिंसाधातुं विहिंसाधातुद्धाने ठपेत्ताव अवसेसं कामधातु नामाति कथेसीति अयं असम्भिन्नकथा नाम ।

सुक्कपक्खे वुत्तविपरियायेन अत्थो वेदितब्बो । नेक्खम्मपटिसंयुत्तो वितक्को **नेक्खम्मवितक्को** । सो असुभपुब्बभागे कामावचरो होति, असुभज्झाने रूपावचरो, तं ज्ञानं पादकं कत्वा उप्पन्नमग्गफलकाले लोकुत्तरो । अब्यापादपटिसंयुत्तो वितक्को **अव्यापादवितक्को** । सो मेत्तापुब्बभागे कामावचरो होति, मेत्ताज्ञाने रूपावचरो, तं ज्ञानं पादकं कत्वा उप्पन्नमग्गफलकाले लोकुत्तरो । अविहिंसापटिसंयुत्तो वितक्को **अविहिंसावितक्को** । सो करुणापुब्बभागे कामावचरो, करुणाज्झाने रूपावचरो, तं ज्ञानं पादकं कत्वा उप्पन्नमग्गफलकाले लोकुत्तरो । यदा पन अलोभो सीसं होति, तदा इतरे द्वे तदन्वायिका होन्ति । यदा मेत्ता सीसं होति, तदा इतरे द्वे तदन्वायिका होन्ति । यदा करुणा सीसं होति, तदा इतरे द्वे तदन्वायिका होन्ति ।

इमेयेव पन नेक्खम्मसङ्कप्पादयो । अत्थतो हि नेक्खम्मवितक्कादीनं नेक्खम्मसङ्कप्पादीनञ्च नानाकरणं नत्थि, तंसम्पयुत्ता पन सज्जादयो नेक्खम्मसज्जादयो । नेक्खम्मधातुआदीनं पन यस्मा पाळियं —

“नेक्खम्मपटिसंयुत्तो तक्को वितक्को सङ्कप्पो, अयं वुच्चति नेक्खम्मधातु, सब्बेपि कुसला धम्मा नेक्खम्मधातु । अब्यापादपटिसंयुत्तो तक्को वितक्को सङ्कप्पो, अयं वुच्चति अब्यापादधातु । या सत्तेसु मेत्ति मेत्तायना मेत्ताचेतोविमुत्ति, अयं वुच्चति अब्यापादधातु । अविहिंसापटिसंयुत्तो तक्को वितक्को सङ्कप्पो — अयं वुच्चति अविहिंसाधातु । या सत्तेसु करुणा करुणायना करुणाचेतोविमुत्ति — अयं वुच्चति अविहिंसाधातू”ति । (विभ० १८२) —

आगतत्ता विसेसो लब्धति । इधापि सब्बसङ्गाहिका, असम्भिन्नाति द्वे कथा वुत्तनयेनेव वेदितब्बा । सेसं सुविज्जेय्यमेव ।

गाथासु **वितक्कयेति** वितक्केय्य । **निराकरेति** अत्तनो सन्तानतो नीहरेय्य विनोदेय्य, पजहेय्याति अत्थो । **सवे वितक्कानि विचारितानि, समेति वुट्ठीव रजं समूहतन्ति** यथा नाम गिम्हानं पच्छिमे मासे पथवियं समूहतं समन्ततो उट्ठितं रजं महतो अकालमेघस्स वस्सतो वुट्ठि ठानसो वूपसमेति, एवमेव सो योगावचरो वितक्कानि मिच्छावितक्के च विचारितानि तंसम्पयुत्तविचारे च समेति वूपसमेति समुच्छिन्दति । तथाभूतो च **वितक्कूपसमेन चेतसा** सब्बेसं मिच्छावितक्कानं उपसमनतो वितक्कूपसमेन अरियमग्गचित्तेन । **इधेव** दिट्ठेव धम्मे, **सन्तिपदं** निब्बानं, **समज्झगा** समधिगतो होतीति ।

अट्ठमसुत्तवण्णना निट्ठिता ।

९. अन्तरामलसुत्तवण्णना

८८. नवमे अन्तरामलाति एत्थ अन्तरासद्दो —

“नदीतीरेसु सण्ठाने, सभासु रथियासु च ।
जना सङ्गम्म मन्तेन्ति, मञ्च तञ्च किमन्तर”न्ति ॥ —

आदीसु (सं० नि० १.२२८) कारणे आगतो । “अद्वसा मं, भन्ते, अञ्जतरा इत्थी विज्जन्तरिकाय भाजनं धोवन्ती”ति आदीसु (मं० नि० २.१४९) खणे । “अपिचायं तपोदा द्विन्नं महानिरयानं अन्तरिकाय आगच्छती”ति आदीसु (पारा० २३१) विवरे ।

“पीतवत्थे पीतधजे, पीतालङ्कारभूसिते ।
पीतन्तराहि वग्गूहि, अपिळन्धाव सोभसी”ति ॥ —

आदीसु (वि० व० ६५८) उत्तरिसाटके । “यस्सन्तरतो न सन्ति कोपा”ति आदीसु (उदा० २०) चित्ते । इधापि चित्ते एव दट्ठब्बो । तस्मा अन्तरे चित्ते भवा **अन्तरा** । यस्मिं सन्ताने उप्पन्ना, तस्स मलिनभावकरणतो **मला** । तत्थ मलं नाम दुविधं — सरीरमलं, चित्तमलन्ति । तेसु सरीरमलं सेदजल्लिकादि सरीरे निब्बत्तं, तत्थ लग्गं आगन्तुकरजञ्च, तं उदकेनपि नीहरणीयं, न तथा संकिलेसिकं । चित्तमलं पन रागादिसंकिलेसिकं, तं अरियमग्गेहेव नीहरणीयं । वुत्तञ्हेतं पोराणेहि —

“रूपेन संकिलिट्ठेन, संकिलिस्सन्ति माणवा ।
रूपे सुद्धे विसुज्झन्ति, अनक्खातं महेसिना ॥

“चित्तेन संकिलिट्ठेन, संकिलिस्सन्ति माणवा ।
चित्ते सुद्धे विसुज्झन्ति, इति वुत्तं महेसिना”ति ॥ (दी० नि० अट्ठ० २.३७३; मं० नि० अट्ठ० १.१०६) ।

तेनाह भगवा “चित्तसंकिलेसा, भिक्खवे, सत्ता संकिलिस्सन्ति, चित्तवोदाना विसुज्झन्ती”ति (सं० नि० ३.१००) । तस्मा भगवा इधापि चित्तमलविसोधनाय पटिपज्जितब्बन्ति दस्सेन्तो “तयोमे, भिक्खवे, अन्तरामला”ति आह ।

यथा चेते लोभादयो सत्तानं चित्ते उप्पज्जित्वा मलिनभावकरा नानप्पकारसंकिलेसविधायकाति अन्तरामला, एवं एकतो भुज्जित्वा, एकतो सयित्वा, ओतारगवेसी अमित्तसत्तु विय चित्ते एव उप्पज्जित्वा सत्तानं नानाविधअनत्थावहा, नानप्पकारदुक्खनिब्बत्तकाति दस्सेन्तो “**अन्तराअमित्ता**”ति आदिमाह । तत्थ मित्तपटिपक्खतो **अमित्ता**, सपत्तकिच्चकरणतो **सपत्ता**, हिंसनतो **वधका**, उजुविपच्चनीकतो **पच्चत्थिका** ।

तत्थ द्वीहि आकारेहि लोभादीनं अमित्तादिभावो वेदितब्बो । वेरीपुग्गलो हि अन्तरं लभमानो अत्तनो वेरिस्स सत्थेन वा सीसं पातेति, उपायेन वा महन्तं अनत्थं उप्पादेति । इमे च लोभादयो पञ्जासिरपातनेन योनिसम्पटिपादनेन च तादिसं ततो बलवतरं अनत्थं निब्बत्तेन्ति । कथं? चक्खुद्वारस्मिञ्चि इट्ठादीसु आरम्मणेषु आपाथगतेसु यथारहं तानि आरब्ध लोभादयो उप्पज्जन्ति, एत्तावतास्स पञ्जासिरं पातितं नाम होति । सोतद्वारादीसुपि एसेव नयो । एवं ताव पञ्जासिरपातनतो अमित्तादिसदिसता वेदितब्बा । लोभादयो पन कम्मनिदाना हुत्वा अण्डजादिभेदा चतस्सो योनियो उपनेन्ति । तस्स योनिउपगमनमूलकानि पञ्चवीसति महाभयानि द्वत्तिसं कम्मकरणानि च आगतानेव होन्ति । एवं योनिसम्पटिपादनतोपि नेसं अमित्तादिसदिसता वेदितब्बा । इति लोभादयो अमित्तादिसदिसताय चित्तसम्भूतताय च “अन्तराअमित्ता”ति आदिना वुत्ता । अपिच अमित्तेहि कातुं असक्कुण्यं लोभादयो करोन्ति, अमित्तादिभावो च लोभादीहि जायतीति तेसं अमित्तादिभावो वेदितब्बो । वुत्तञ्हेतं —

“दिसो दिसं यन्तं कयिरा, वेरी वा पन वेरिं ।
मिच्छापणिहितं चित्तं, पापियो नं ततो करे”ति ॥ (ध० प० ४२; उदा० ३३) ।

गाथासु अत्तनो परेसञ्च अनत्थं जनेतीति **अनत्थजननो** । वुत्तञ्हेतं —

“यदपि लुब्धो अभिसङ्खरोति कायेन वाचाय मनसा तदपि अकुसलं; यदपि लुब्धो लोभेन अभिभूतो परियादिन्नचित्तो परस्स असता दुक्खं उप्पादेति वधेन वा बन्धेन वा जानिया वा गरहाय वा पब्बाजनाय वा बलवमिह बलत्थो इति, तदपि अकुसलं, इतिस्समे लोभजा लोभनिदाना लोभसमुदया लोभपच्चया अनेके पापका अकुसला धम्मा सम्भवन्ती”ति (अ० नि० ३.७०) ।

अपरमि वुत्तं —

“रत्तो खो, ब्राह्मण, रागेन अभिभूतो परियादिन्नचित्तो अत्तब्याबाधायपि चेतेति, परब्याबाधायपि चेतेति, उभयब्याबाधायपि चेतेति, चेतसिकमि दुक्खं दोमनस्सं पटिसंवेदेती”तिआदि (अ० नि० ३.५४) ।

चित्तप्पकोपनोति चित्तसङ्खोभनो । लोभो हि लोभनीये वत्थुस्मिं उप्पज्जमानो चित्तं खोभेन्तो पकोपेन्तो विपरिणामेन्तो विकारं आपादेन्तो उप्पज्जति, पसादादिवसेन पवत्तितुं न देति । **भयमन्तरतो जातं, तं जनो नावबुज्झतीति** तं लोभसङ्खातं अन्तरतो अब्भन्तरे अत्तनो चित्तेयेव जातं अनत्थजननचित्तप्पकोपनादिं भयं भयहेतुं अयं बालमहाजनो नावबुज्झति न जानातीति ।

लुब्धो अत्थं न जानातीति अत्तत्थपरत्थादिभेदं अत्थं हितं लुब्धपुग्गलो यथाभूतं न जानाति । **धम्मं न पस्सतीति** दसकुसलकम्मपथधम्ममि लुब्धो लोभेन अभिभूतो परियादिन्नचित्तो न पस्सति पच्चक्खतो न जानाति, पगेव उत्तरिमनुस्सधम्मं । वुत्तमि चेतं —

“रत्तो खो, ब्राह्मण, रागेन अभिभूतो परियादिन्नचित्तो अत्तत्थमि यथाभूतं न पजानाति, परत्थमि यथाभूतं न पजानाति, उभयत्थमि यथाभूतं न पजानाती”तिआदि (अ० नि० ३.५५) ।

अन्धतमन्ति अन्धभावकरं तमं । यन्ति यत्थ । भुम्मत्थे हि एतं पच्चत्तवचनं । यस्मिं काले लोभो सहते अभिभवति नरं, अन्धतमं तदा होतीति । यन्ति वा कारणवचनं । यस्मा लोभो उप्पज्जमानो नरं सहते अभिभवति, तस्मा अन्धतमं तदा होतीति योजना, य-त-सद्धानं एकन्तसम्बन्धभावतो । अथ वा यन्ति किरियापरामसनं, “लोभो सहते”ति एत्थ यदेतं लोभस्स सहनं अभिभवनं वुत्तं । एतं अन्धभावकरस्स तमस्स गमनं उप्पादोति अत्थो । अथ वा यं नरं लोभो सहते अभिभवति, तस्स अन्धतमं तदा होति, ततो च लुब्धो अत्थं न जानाति, लुब्धो धम्मं न पस्सतीति एवमेत्थ अत्थो वेदितब्बो ।

यो च लोभं पहन्त्वानाति यो पुब्बभागे तदङ्गवसेन विक्खम्भनवसेन च यथारहं समथविपस्सनाहि लोभं पजहित्वा तथा पजहनहेतु **लोभेन्ये** दिब्बेपि रूपादिके उपट्ठिते **न लुब्धति**, बलवविपस्सनानुभावेन **लोभो पहीयते तम्हाति** तस्मा अरियपुग्गला अरियमग्गेन लोभो पहीयति पजहीयति, अच्चन्तमेव परिच्चजीयति । यथा किं? **उदबिन्दूव पोक्खराति** पदुमिनिपण्णतो उदकबिन्दु विय । सेसगाथानमि इमिना नयेन अत्थो वेदितब्बो ।

तथा दोसस्स —

“यदपि दुट्ठो अभिसङ्खरोति कायेन वाचाय मनसा तदपि अकुसलं; यदपि दुट्ठो दोसेन अभिभूतो परियादिन्नचित्तो परस्स असता दुक्खं उप्पादेति वधेन वा बन्धेन वा जानिया वा गरहाय वा पब्बाजनाय वा बलवम्हि बलत्थो इति, तदपि अकुसलं । इतिस्समे दोसजा दोसनिदाना दोससमुदया दोसपच्चया अनेके पापका अकुसला धम्मा सम्भवन्ती”ति (अ० नि० ३.७०) ।

तथा —

“दुट्ठो खो, ब्राह्मण, दोसेन अभिभूतो परियादिन्नचित्तो अत्तब्याबाधायपि चेतेति, परब्याबाधायपि चेतेति, उभयब्याबाधायपि चेतेति चेतसिकम्पि दुक्खं दोमनस्सं पटिसंवेदेती”ति (अ० नि० ३.५५) ।

तथा —

“दुट्ठो खो, ब्राह्मण, दोसेन अभिभूतो परियादिन्नचित्तो अत्तत्थम्पि यथाभूतं न पजानाति, परत्थम्पि यथाभूतं न पजानाति, उभयत्थम्पि यथा भूतं न पजानाती”ति (अ० नि० ३.५५) —

आदिसुत्तपदानुसारेण अनत्थजननता अत्थहानिहेतुता च वेदितव्वा ।

तथा मोहस्स “यदपि मूळ्हो अभिसङ्खरोति कायेन वाचाय मनसा”तिआदिना (अ० नि० ३.७०), “मूळ्हो खो, ब्राह्मण, मोहेन अभिभूतो परियादिन्नचित्तो अत्तब्याबाधायपि चेतेती”तिआदिना (अ० नि० ३.५५), “अत्तत्थम्पि यथाभूतं न पजानाती”तिआदिना (अ० नि० ३.५५) च आगतसुत्तपदानुसारेण वेदितव्वा ।

तालपक्कं व बन्धनाति तालफलं विय उस्सुमुप्पादेन वण्टतो, ततियमग्गजाणुप्पादेन तस्स चित्ततो दोसो पहीयति, परिच्चजीयतीति अत्थो । मोहं विहन्ति सो सव्वन्ति सो अरियपुग्गलो सव्वं अनवसेसं मोहं चतुत्थमग्गेन विहन्ति विधमति समुच्छिन्दति । आदिच्चोवुदयं तमन्ति आदिच्चो विय उदयं उग्गच्छन्तो तमं अन्धकारं ।

नवमसुत्तवण्णना निट्ठिता ।

१०. देवदत्तसुत्तवण्णना

८९. दसमे तीहि, भिक्खवे, असद्धम्मेहि अभिभूतोति का उप्पत्ति? देवदत्ते हि अवीचिमहानिरयं पविट्ठे देवदत्तपक्खिया अज्जतित्थिया च “समणेन गोतमेन अभिसपितो देवदत्तो पथविं पविट्ठो”ति अब्भाचिक्खिंसु । तं सुत्त्वा सासने अनभिप्पसन्ना मनुस्सा “सिया नु खो एतदेवं, यथा इमे भणन्ती”ति आसङ्कं उप्पादेसुं । तं पवत्तिं भिक्खू भगवतो आरोचेसुं । अथ भगवा “न, भिक्खवे, तथागता कस्सचि अभिसपं देन्ति, तस्मा न देवदत्तो मया अभिसपितो, अत्तनो कम्मेनेव निरयं पविट्ठो”ति वत्त्वा तेसं मिच्छागाहं पटिसेधेन्तो इमाय अट्ठप्पत्तिया इदं सुत्तं अभासि ।

तत्थ असद्धम्मेहीति असतं धम्मेहि, असन्तेहि वा धम्मेहि । अतेकिच्छोति बुद्धेहिपि अनिवत्तनीयत्ता अवीचिनिब्बत्तिया तिकिच्छाभावतो अतेकिच्छो, अतिकिच्छनीयोति अत्थो । असन्तगुणसम्भावनाधिप्पायेन पवत्ता पापा

इच्छा एतस्साति पापिच्छो, तस्स भावो **पापिच्छता**, ताय । “अहं बुद्धो भविस्सामि, सङ्गं परिहरिस्सामी”ति तस्स इच्छा उप्पन्ना । कोकालिकादयो पापा लामका मित्ता एतस्साति पापमित्तो, तस्स भावो **पापमित्तता**, ताय ।
उत्तरिकरणीयेति ज्ञानाभिज्जाहि उत्तरिकरणीये अधिगन्तब्बे मग्गफले अनधिगते सति एव, तं अनधिगन्त्वाति अत्थो ।
ओरमत्तकेनाति अप्पमत्तकेन ज्ञानाभिज्जामत्तेन । **विसेसाधिगमेनाति** उत्तरिमनुस्सधम्माधिगमेन । **अन्तराति** वेमज्झे ।
वोसानं आपादीति अकतकिच्चोव समानो “कतकिच्चोम्ही”ति मज्जमानो समणधम्मतो विगमं आपज्जि । इति भगवा इमिना सुत्तेन विसेसतो पुथुज्जनभावे आदीनवं पकासेसि भारियो पुथुज्जनभावो, यत्र हि नाम ज्ञानाभिज्जापरियोसाना सम्पत्तियो निब्बत्तेत्वापि अनेकानत्थावहं नानाविधं दुक्खहेतुं असन्तगुणसम्भावनं असप्पुरिससंसग्गं आलसियानुयोगज्ज अविजहन्तो अवीचिम्हि कप्पड्डियं अतेकिच्छं किब्बिसं पसविस्सतीति ।

गाथासु माति पटिसेधे निपातो । **जातूति** एकंसेन । **कोचीति** सब्बसङ्गाहकवचनं । **लोकस्मिन्ति** सत्तलोके । इदं वुत्तं होति “इमस्मिं सत्तलोके कोचि पुग्गलो एकंसेन पापिच्छो मा होतू”ति । **तदमिनापि जानाथ, पापिच्छानं यथा गतीति** पापिच्छानं पुग्गलानं यथा गति यादिसी निप्फत्ति, यादिसो अभिसम्परायो, तं इमिनापि कारणेन जानाथाति देवदत्तं निदस्सेन्तो एवमाह । **पण्डितोति समज्जातोति** परियत्तिबाहुसच्चेन पण्डितोति जातो । **भावितत्तोति सम्मतोति** ज्ञानाभिज्जाहि भावितचित्तोति सम्भावितो । तथा हि सो पुब्बे “महिद्धिको गोधिपुत्तो, महानुभावो गोधिपुत्तो”ति धम्मसेनापतिनापि पसंसितो अहोसि । **जलंव यससा अट्टा, देवदत्तोति विस्सुतोति** अत्तनो कित्तिया परिवारेन जलन्तो विय ओभासेन्तो विय ठितो देवदत्तोति एवं विस्सुतो पाकटो अहोसि । “**मे सुत्त**”न्तिपि पाठो, मया सुत्तं सुतमत्तं, कतिपाहेनेव अतथाभूतत्ता तस्स तं पण्डिच्चादि सवनमत्तमेवाति अत्थो ।

सो समानमनुचिण्णो, आसज्ज नं तथागतन्ति सो एवंभूतो देवदत्तो “बुद्धोपि सक्कपुत्तो, अहम्पि सक्कपुत्तो, बुद्धोपि समणो, अहम्पि समणो, बुद्धोपि इद्धिमा, अहम्पि इद्धिमा, बुद्धोपि दिब्बचक्खुको, अहम्पि दिब्बचक्खुको, बुद्धोपि दिब्बसोतको, अहम्पि दिब्बसोतको, बुद्धोपि चेतोपरियजाणलाभी, अहम्पि चेतोपरियजाणलाभी, बुद्धोपि अतीतानागतपच्चुप्पन्ने धम्मे जानाति, अहम्पि ते जानामी”ति अत्तनो पमाणं अजानित्वा सम्मासम्बुद्धं अत्तना समसमट्ठपनेन समानं आपज्जन्तो “इदानाहं बुद्धो भविस्सामि, भिक्खुसङ्गं परिहरिस्सामी”ति अभिमारपयोजना तथागतं आसज्ज आसादेत्वा विहेठेत्वा । “पमादमनुजीनो”तिपि पठन्ति । तस्सत्थो “वुत्तनयेन पमादं आपज्जन्तो पमादं निस्साय भगवता सद्धिं युगग्गाहचित्तुप्पादेन सहेव ज्ञानाभिज्जाहि अनुजीनो परिहीनो”ति । **अवीचिनिरयं पत्तो, चतुद्वारं भयानकन्ति** जालानं तत्थ उप्पन्नसत्तानं वा निरन्तरताय “अवीची”ति लद्धनामं चतूसु पस्सेसु चतुमहाद्वारयोगेन चतुद्वारं अतिभयानकं महानिरयं पटिसन्धिग्गहणवसेन पत्तो । तथा हि वुत्तं —

“चतुक्कण्णो चतुद्वारो, विभत्तो भागसो मितो ।

अयोपाकारपरियन्तो, अयसा पटिकुज्जितो ॥

“तस्स अयोमया भूमि, जलिता तेजसा युता ।

समन्ता योजनसत्तं, फरित्वा तिष्ठति सब्बदा”ति ॥ (म० नि० ३.२५०; अ० नि० ३.३६; पे० व० ६९३-६९४; जा० २.१९.८६-८७) ।

अदुट्टस्साति अदुट्टचित्तस्स । **दुब्भेति** दूसेय्य । **तमेव पापं फुसतीति** तमेव अदुट्टदुब्धिं पापपुग्गलं पापं निहीनं पापफलं फुसति पापुणाति अभिभवति । **भेस्माति** विपुलभावेन गम्भीरभावेन च भिसापेन्तो विय, विपुलगम्भीरोति अत्थो । **वादेनाति**

दोसेन । विहिंसतीति बाधति आसादेति । वादो तम्हि न रूहतीति तस्मिं तथागते परेन आरोपियमानो दोसो न रुहति, न तिड्ढति, विसकुम्भो विय समुदस्स, न तस्स विकारं जनेतीति अत्थो ।

एवं छहि गाथाहि पापिच्छतादिसमन्नागतस्स निरयूपगभावदस्सनेन दुक्खतो अपरिमुत्ततं दस्सेत्वा इदानीं तप्पटिपक्खधम्मसमन्नागतस्स दुक्खक्खयं दस्सेन्तो “तादिसं मित्तं”न्ति ओसानगाथमाह । तस्सत्थो — यस्स सम्मा पटिपन्नस्स मग्गानुगो पटिपत्तिमग्गं अनुगतो सम्मा पटिपन्नो अपिच्छतादिगुणसमन्नागमेन सकलवट्टदुक्खस्स खयं परियोसानं पापुणेय्य । तादिसं बुद्धं वा बुद्धसावकं वा पण्डितो सप्पज्जो, अत्तनो मित्तं कुब्बेथ तेन मेत्तिकं करेय्य, तज्ज्य सेवेय्य तमेव पयिरुपासेय्याति ।

इति इमस्मिं वग्गे छट्ठसत्तमसुत्तेसु विवट्ठं कथितं, इतरेसु वट्ठविवट्ठं कथितं ।

दसमसुत्तवण्णना निड्ढिता ।

चतुत्थवग्गवण्णना निड्ढिता ।

५. पञ्चमवग्गो

१. अग्गप्पसादसुत्तवण्णना

१०. पञ्चमवग्गस्स पठमे अग्गप्पसादाति एत्थ अयं अग्गसद्धो आदिकोटिकोट्टाससेट्ठेसु दिस्सति । तथा हेस “अज्जतग्गे, सम्म दोवारिक, आवरामि द्वारं निगण्ठानं निगण्ठीनं (म० नि० २.७०) । अज्जतग्गे पाणुपेतं सरणं गत”न्ति (दी० नि० १.२५०; पारा० १५) च आदीसु आदिमि दिस्सति । “तेनेव अङ्गुलग्गेन तं अङ्गुलग्गं परामसेय्य (कथा० ४४१) । उच्छग्गं वेळग्ग”न्ति च आदीसु कोटियं । “अम्बिलग्गं वा मधुरग्गं वा तित्तकग्गं वा (सं० नि० ५.३७४) । अनुजानामि, भिक्खवे, विहारग्गेन वा परिवेणग्गेन वा भाजेतु”न्ति (चूळव० ३१८) च आदीसु कोट्टासे । “अयं इमेसं चतुन्नं पुग्गलानं अग्गो च सेट्ठो च उत्तमो च पवरो च (अ० नि० ४.९५) । अग्गोहमस्मि लोकस्सा”ति च आदीसु (दी० नि० २.३१; म० नि० ३.२०७) सेट्ठे । स्वायमिधापि सेट्ठेयेव दट्ठब्बो । तस्मा अग्गेसु सेट्ठेसु पसादा, अग्गभूता सेट्ठभूता वा पसादा अग्गप्पसादाति अत्थो ।

पुरिमस्मिञ्च अत्थे अग्गसद्धेन बुद्धादिरतनत्तयं वुच्चति । तेसु भगवा ताव असदिसद्धेन, गुणविसिद्धेन, असमसमद्धेन च अग्गो । सो हि महाभिनीहारं दसन्नं पारमीनं पविचयज्ज आदिं कत्वा तेहि बोधिसम्भारगुणेहि चैव बुद्धगुणेहि च सेसजनेहि असदिसोति असदिसद्धेन अग्गो । ये चस्स गुणा महाकरुणादयो, ते सेससत्तानं गुणेहि विसिद्धाति गुणविसिद्धेनपि सब्बसत्तुत्तमताय अग्गो । ये पन पुरिमका सम्मासम्बुद्धा सब्बसत्तेहि असमा, तेहि सद्धिं अयमेव रूपकायगुणेहि चैव धम्मकायगुणेहि च समोति असमसमद्धेनपि अग्गो । तथा दुल्लभपातुभावतो अच्छरियमनुस्सभावतो बहुजनहितसुखावहतो अदुतियअसहायादिभावतो च भगवा लोके अग्गोति वुच्चति । यथाह —

“एकपुग्गलस्स, भिक्खवे, पातुभावो दुल्लभो लोकस्मिं, कतमस्स एकपुग्गलस्स? तथागतस्स अरहतो सम्मासम्बुद्धस्स ।

“एकपुगगलो, भिक्खवे, लोके उप्पज्जमानो उप्पज्जति अच्छरियमनुस्सो ।

“एकपुगगलो, भिक्खवे, लोके उप्पज्जमानो उप्पज्जति बहुजन...पे०... सम्मासम्बुद्धो ।

“एकपुगगलो, भिक्खवे, लोके उप्पज्जमानो उप्पज्जति, अदुतियो असहायो अप्पटिमो अप्पटिसमो अप्पटिभागो अप्पटिपुगगलो असमो असमसमो द्विपदानं अगो । कतमो एकपुगगलो? तथागतो अरहं सम्मासम्बुद्धो”ति (अ० नि० १.१७०-१७२, १७४) ।

धम्मसङ्घापि अज्जधम्मसङ्घेहि असदिसङ्घेन विसिद्धगुणताय दुल्लभपातुभावादिना च अग्गा । तथा हि तेसं स्वाक्खाततादिसुप्पटिपन्नतादिगुणविसेसेहि अज्जधम्मसङ्घा सदिसा अप्पतरनिहीना वा नत्थि, कुतो सेट्ठा । सयमेव च पन तेहि विसिद्धगुणताय सेट्ठा । तथा दुल्लभुप्पादअच्छरियभावबहुजनहितसुखावहा अदुतियअसहायादिसभावा च ते । यदग्गेन हि भगवा दुल्लभपातुभावो, तदग्गेन धम्मसङ्घापीति । अच्छरियादिभावोपि एसेव नयो । एवं अग्गेसु सेट्ठेसु उत्तमेसु पवरेसु गुणविसिद्धेसु पसादाति **अग्गप्पसादा** ।

दुतियस्मिं पन अत्थे यथावुत्तेसु अग्गेसु बुद्धादीसु उप्पत्तिया अग्गभूता पसादा अग्गप्पसादा । ये पन अरियमग्गेन आगता अवेच्चप्पसादा, ते एकन्तेनेव अग्गभूता पसादाति अग्गप्पसादा । यथाह “इध, भिक्खवे, अरियसावको बुद्धे अवेच्चप्पसादेन समन्नागतो होती”तिआदि (सं० नि० ५.१०२७) । अग्गविपाकत्तापि चेते अग्गप्पसादा । वुत्तज्झि “अग्गे खो पन पसन्नानं अग्गो विपाको”ति ।

यावताति यत्तका । **सत्ताति** पाणिनो । **अपदाति** अपादका । **द्विपदाति** द्विपादका । सेसपदद्वयेपि एसेव नयो । वा-सद्धो समुच्चयत्थो, न विकप्पत्थो । यथा “अनुप्पन्नो वा कामासवो उप्पज्जति, उप्पन्नो वा कामासवो पवड्ढती”ति (म० नि० १.१७) एत्थ अनुप्पन्नो च उप्पन्नो चाति अत्थो । यथा च “भूतानं वा सत्तानं ठितिया सम्भवेसीनं वा अनुग्गहाया”ति (म० नि० १.४०२; सं० नि० २.१२) एत्थ भूतानञ्च सम्भवेसीनञ्चाति अत्थो । यथा च “अगितो वा उदकतो वा मिथुभेदतो वा”ति (दी० नि० २.१५२; उदा० ७६; महाव० २८६) एत्थ अगितो च उदकतो च मिथुभेदतो चाति अत्थो, एवं “अपदा वा...पे०... अग्गमक्खायती”ति एत्थापि अपदा च द्विपदा चाति सम्पिण्डनवसेन अत्थो दट्ठब्बो । तेन वुत्तं “वा-सद्धो समुच्चयत्थो, न विकप्पत्थो”ति ।

रूपिनोति रूपवन्तो । न रूपिनोति **अरूपिनो** । **सज्जिनोति** सज्जावन्तो । न सज्जिनोति **असज्जिनो** । **नेवसज्जिनासज्जिनो** नाम भवग्गपरियापन्ना । एत्तावता च कामभवो, रूपभवो, अरूपभवो, एकवोकारभवो, चतुवोकारभवो, पञ्चवोकारभवो, सज्जीभवो, असज्जीभवो, नेवसज्जिनासज्जीभवोति नवविधेपि भवे सत्ते अनवसेसतो परियादियित्वा दस्सेसि धम्मराजा । एत्थ हि रूपिग्गहणेन कामभवो रूपभवो पञ्चवोकारभवो एकवोकारभवो च दस्सितो, अरूपिग्गहणेन अरूपभवो चतुवोकारभवो च दस्सितो । सज्जीभवादयो पन सरूपेनेव दस्सिता । अपदादिग्गहणेन कामभवपञ्चवोकारभवसज्जीभवानं एकदेसो दस्सितोति ।

कस्मा पनेत्थ यथा अदुतियसुत्ते “द्विपदानं अग्गो”ति द्विपदानं गहणमेव अकत्वा अपदादिग्गहणं कतन्ति? वुच्चते — अदुतियसुत्ते ताव सेट्ठतरवसेन द्विपदग्गहणमेव कतं । इमस्मिज्झि लोके सेट्ठो नाम उप्पज्जमानो अपदचतुप्पदबहुप्पदेसु न उप्पज्जति, द्विपदेसुयेव उप्पज्जति । कतरेसु द्विपदेसु? मनुस्सेसु चेव देवेसु च । मनुस्सेसु उप्पज्जमानो सकललोकं वसे

वत्तेतुं समत्थो बुद्धो हुत्वा उप्पज्जति । अङ्कुत्तरट्ठकथायं पन “तिसहस्सिमहासहस्सिलोकधातुं वसे वत्तेतुं समत्थो”ति (अ० नि० अट्ठ० १.१.१७४) वुत्तं । देवेसु उप्पज्जमानो दससहस्सिलोकधातुं वसे वत्तनको महाब्रह्मा हुत्वा उप्पज्जति, सो तस्स कप्पियकारको वा आरामिको वा सम्पज्जति । इति ततोपि सेट्ठतरवसेनेस “द्विपदानं अग्गो”ति तत्थ वुत्तो, इध पन अनवसेसपरियादानवसेन एवं वुत्तं । यावत्तका हि सत्ता अत्तभावपरियापन्ना अपदा वा...पे०... नेवसज्जीनासज्जिनो वा, तथागतो तेसं अग्गमक्खायतीति । निद्धारणे चेतं सामिवचनं, मकारो पदसन्धिकरो । अग्गो अक्खायतीति पदविभागो ।

अग्गो विपाको होतीति अग्गे सम्मासम्बुद्धे पसन्नानं यो पसादो, सो अग्गो सेट्ठो उत्तमो कोटिभूतो वा, तस्मा तस्स विपाकोपि अग्गो सेट्ठो उत्तमो कोटिभूतो उळारतमो पणीततमो होति । सो पन पसादो दुविधो लोकियलोकुत्तरभेदतो । तेसु लोकियस्स ताव —

“ये केचि बुद्धं सरणं गतासे, न ते गमिस्सन्ति अपायभूमिं ।

पहाय मानुसं देहं, देवकायं परिपूरेस्सन्ति ॥ (दी० नि० २.३३२; सं० नि० १.३७) ।

“बुद्धोति कित्तयन्तस्स, काये भवति या पीति ।

वरमेव हि सा पीति, कसिणेनपि जम्बुदीपस्स ॥

“सतं हत्थी सतं अस्सा, सतं अस्सतरी रथा ।

सतं कज्जासहस्सानि, आमुक्कमणिकुण्डला ।

एकस्स पदवीतिहारस्स, कलं नाग्घन्ति सोळसिं” ॥ (सं० नि० १.२४२; चूळव० ३०५) ।

“साधु खो, देवानमिन्द, बुद्धं सरणगमनं होति, बुद्धं सरणगमनहेतु खो, देवानमिन्द, एवमिधेकच्चे सत्ता कायस्स भेदा परं मरणा सुगतिं सगं लोकं उपपज्जन्ति । ते अज्जे देवे दसहि ठानेहि अधिगणहन्ति — दिब्बेन आयुना, दिब्बेन वण्णेन, दिब्बेन सुखेन, दिब्बेन यसेन, दिब्बेन आधिपतेय्येन, दिब्बेहि रूपेहि, दिब्बेहि सद्देहि, दिब्बेहि गन्धेहि, दिब्बेहि रसेहि, दिब्बेहि फोट्टब्बेही”ति (सं० नि० ४.३४१) —

एवमादीनं सुत्तपदानं वसेन पसादस्स फलविसेसयोगो वेदितब्बो । तस्मा सो अपायदुक्खविनिवत्तनेन सद्धिं सम्पत्तिभवेसु सुखविपाकदायकोति दट्ठब्बो । लोकुत्तरो पन सामज्जफलविपाकदायको वट्टदुक्खविनिवत्तको च । सब्बोपि चायं पसादो परम्पराय वट्टदुक्खं विनिवत्तेतियेव । वुत्तज्जेतं —

“यस्मिं, भिक्खवे, समये अरियसावको अत्तनो सद्धं अनुस्सरति, नेवस्स तस्मिं समये रागपरियुट्ठितं चित्तं होति, न दोसपरियुट्ठितं, न मोहपरियुट्ठितं चित्तं होति, उजुगतमेवस्स तस्मिं समये चित्तं होति । उजुगतचित्तस्स पामोज्जं जायति, पमुदितस्स पीति जायति...पे०... नापरं इत्थत्तायाति पजानाती”ति (अ० नि० ६.१०; २६) ।

धम्माति सभावधम्मा । **सङ्गताति** समेच्च सम्भुय्य पच्चयेहि कताति सङ्गता, सप्पच्चयधम्मा । हेतूहि पच्चयेहि च न केहिचि कताति **असङ्गता**, अप्पच्चयनिब्बानं । सङ्गतानं पटियोगिभावेन “असङ्गता”ति पुथुवचनं । **विरागो तेसं अग्गमक्खायतीति** तेसं सङ्गतासङ्गतधम्मानं यो विरागसङ्घातो असङ्गतधम्मा, सो सभावेनेव सण्हसुखुमभावतो सन्ततरपणीततरभावतो गम्भीरादिभावतो मदनिम्मदनादिभावतो च अगं सेट्ठं उत्तमं पवरन्ति वुच्चति । **यदिदन्ति** निपातो,

यो अयन्ति अत्थो । **मदनिम्मदनो**तिआदीनि सब्बानि निब्बानवेवचनानियेव । तथा हि तं आगम्म मानमदपुरिसमदादिको सब्बो मदो निम्मदीयति पमद्दीयति, कामपिपासादिका सब्बा पिपासा विनीयति, कामालयादिका सब्बेपि आलया समुग्घातीयन्ति, सब्बेपि कम्मवट्टकिलेसवट्टविपाकवट्टा उपच्छिज्जन्ति, अट्टसतभेदा सब्बापि तण्हा खीयति, सब्बेपि किलेसा विरज्जन्ति, सब्बं दुक्खं निरुज्झति, तस्मा मदनिम्मदनो...पे०... निरोधोति वुच्चति । या पनेसा तण्हा भवेन भवं, फलेन कम्मं विनति संसिब्बतीति कत्वा वानन्ति वुच्चति । तं वानं एत्थ नत्थि, एतस्मिं वा अधिगते अरियपुग्गलस्स न होतीति **निब्बानं** ।

अगगो विपाको होतीति एत्थापि —

“ये केचि धम्मं सरणं गतासे...पे०... ॥ (दी० नि० २.३३२; सं० नि० १.३७) ।

“धम्मोति कित्तयन्तस्स, काये भवति या पीति...पे०... ॥

“साधु खो, देवानमिन्द, धम्मं सरणगमनं होति । धम्मं सरणगमनहेतु खो, देवानमिन्द, एवमिधेकच्चे...पे०... दिब्बेहि फोड्ढेही”ति (सं० नि० ४.३४१) —

एवमादीनं सुत्तपदानं वसेन धम्मे पसादस्स फलविसेसयोगो वेदितब्बो । एवमेत्थ असङ्खतधम्मवसेनेव अगगभावो आगतो, सब्बसङ्खतनिस्सरणदस्सनत्थं अरियमगगवसेनपि अयमत्थो लब्धतेव । वुत्तज्हेतं —

“यावता, भिक्खवे, धम्मा सङ्गता, अरियो अट्ठङ्गिको मग्गो तेसं अगगमक्खायती”ति (अ० नि० ४.३४) ।

“मगगानट्ठङ्गिको सेट्ठो”ति च । (ध० प० २७३) ।

सङ्घा वा गणा वाति जनसमूहसङ्घाता यावता लोके सङ्घा वा गणा वा । **तथागतसावकसङ्घो**ति अट्ठअरियपुग्गलसमूहसङ्घातो दिट्ठिशीलसामञ्जेन संहतो तथागतस्स सावकसङ्घो । **तेसं अगगमक्खायतीति** अत्तनो शीलसमाधिपञ्जाविमुत्तिआदिगुणविसेसेन तेसं सङ्घानं अगगो सेट्ठो उत्तमो पवरोति वुच्चति । **यदिदन्ति** यानि इमानि । **चत्तारि पुरिसयुगानीति** युगळवसेन पठममग्गट्ठो पठमफलट्ठोति इदमेकं युगळं, याव चतुत्थमग्गट्ठो चतुत्थफलट्ठोति इदमेकं युगळन्ति एवं चत्तारि पुरिसयुगानि । **अट्ठ पुरिसपुग्गलाति** पुरिसपुग्गलवसेन एको पठममग्गट्ठो एको पठमफलट्ठोति इमिना नयेन अट्ठ पुरिसपुग्गला । एत्थ च पुरिसोति वा पुग्गलोति वा एकत्थानि एतानि पदानि, वेनेय्यवसेन पनेवं वुत्तं । **एस भगवतो सावकसङ्घो**ति यानिमानि युगवसेन चत्तारि पुरिसयुगानि, पाटेक्कतो अट्ठ पुरिसपुग्गला, एस भगवतो सावकसङ्घो ।

आहुनेय्योतिआदीसु आनेत्वा हुनितब्बन्ति आहुनं, दूरतोपि आगन्त्वा शीलवन्तेसु दातब्बन्ति अत्थो । चतुन्नं पच्चयानमेतं अधिवचनं । महप्फलभावकरणतो तं आहुनं पटिग्गहेतुं युत्तोति आहुनेय्यो । अथ वा दूरतोपि आगन्त्वा सब्बं सापतेय्यम्पि एत्थ हुनितब्बं, सक्कादीनम्पि आहवनं अरहतीति वा आहवनीयो । यो चायं ब्राह्मणानं आहवनीयो नाम अग्नि, यत्थ हुतं महप्फलन्ति तेसं लद्धि, सो चे हुतस्स महप्फलताय आहवनीयो, सङ्घोव आहवनीयो । सङ्घे हुतज्हि महप्फलं होति । यथाह —

“यो च वस्ससतं जन्तु, अग्निं परिचरे वने ।
 एकञ्च भावितत्तानं, मुहुत्तमपि पूजये ।
 सा एव पूजना सेय्यो, यञ्चे वस्ससतं हुत”न्ति ॥ (ध० प० १०७) ।

तयिदं निकायन्तरे “आहवनीयो”ति पदं इध “आहुनेय्यो”ति इमिना पदेन अत्थतो एकं, ब्यञ्जनतो पन किञ्चिमत्तमेव नानं, तस्मा एवमत्थवण्णना कता ।

पाहुनेय्योति एत्थ पन पाहुनं वुच्चति दिसाविदिसतो आगतानं पियमनापानं जातिमित्तानं अत्थाय सक्कारेन पटियत्तं आगन्तुकदानं, तम्पि ठपेत्वा ते तथारूपे पाहुनके सङ्खस्सेव दातुं युत्तं । तथा हेस एकबुद्धन्तरेपि दिस्सति अब्बोकिण्णञ्च । अयं पनेत्थ पदत्थो — “पियमनापत्तकरेहि धम्महेहि समन्नागतो”ति एवं पाहुनमस्स दातुं युत्तं, पाहुनञ्च पटिग्गहेतुं युत्तोति पाहुनेय्यो । येसं पन पाहवनीयोति पाळि, तेसं यस्मा सङ्खो पुब्बकारं अरहति, तस्मा सङ्खो सब्बपठमं आनेत्वा एत्थ हुनितब्बन्ति पाहवनीयो, सब्बप्पकारेन वा आहवनं अरहतीति पाहवनीयो । स्वायमिध तेनेव अत्थेन पाहुनेय्योति वुच्चति ।

“दक्खिणा”ति परलोकं सद्वहित्वा दातव्वदानं, तं दक्खिणं अरहति दक्खिणाय वा हितो महप्फलभावकरणेन विसोधनतोति **दक्खिणेय्यो** । उभो हत्थे सिरसि पतिट्टपेत्वा सब्बलोकेन करियमानं अञ्जलिकम्मं अरहतीति **अञ्जलिकरणीयो** । **अनुत्तरं पुञ्जक्खेत्तं लोकस्सा**ति सब्बलोकस्स असदिसं पुञ्जविरूहनट्टानं । यथा हि रत्तसालीनं वा यवानं वा विरूहनट्टानं “रत्तसालिक्खेत्तं यवक्खेत्तं”न्ति वुच्चति, एवं सङ्खो सदेवकस्स लोकस्स पुञ्जविरूहनट्टानं । सङ्खं निस्साय हि लोकस्स नानप्पकारहितसुखनिब्बत्तकानि पुञ्जानि विरूहन्ति, तस्मा सङ्खो अनुत्तरं पुञ्जक्खेत्तं लोकस्स । इधापि —

“ये केचि सङ्खं सरणं गतासे...पे०... ॥ (दी० नि० २.३३२; सं० नि० १.३७) ।

“सङ्खोति कित्तयन्तस्स, काये भवति या पीति...पे०...” ॥

“साधु खो, देवानमिन्द, सङ्खं सरणगमनं होति, सङ्खं सरणगमनहेतु खो देवानमिन्द...पे०... दिब्बेहि फोडुब्बेही”ति (सं० नि० ४.३४१) —

आदीनं सुत्तपदानं वसेन सङ्खे पसादस्स फलविसेसयोगो, तेनस्स अग्गता अग्गविपाकता च वेदितब्बा । तथा अनुत्तरियपटिलाभो सत्तमभवादितो पट्टाय वट्टदुक्खसमुच्छेदो अनुत्तरसुखाधिगमोति एवमादिउल्लारफलनिप्फादनवसेन अग्गविपाकता वेदितब्बा ।

गाथासु **अग्गतो**ति अग्गे रतनत्तये, अग्गभावतो वा पसन्नानं । **अग्गं धम्मन्ति** अग्गसभावं बुद्धसुबुद्धतं धम्मसुधम्मतं सङ्खसुप्पटिपत्तिं रतनत्तयस्स अनञ्जसाधारणं उत्तमसभावं, दसबलादिस्वाक्खाततादिसुप्पटिपन्नतादिगुणसभावं वा **विजानतं** विजानन्तानं । एवं साधारणतो अग्गप्पसादवत्थुं दस्सेत्वा इदानि असाधारणतो तं विभागेन दस्सेतुं “**अग्गे बुद्धे**”ति आदि वुत्तं । तत्थ **पसन्नानन्ति** अवेच्चप्पसादेन इतरप्पसादेन च पसन्नानं अधिमुत्तानं । **विरागूपसमे**ति विरागे उपसमे च, सब्बस्स रागस्स सब्बेसं किलेसानं अच्चन्तविरागहेतुभूते अच्चन्तउपसमहेतुभूते चाति अत्थो । **सुखे**ति वट्टदुक्खक्खयभावेन सङ्खारूपसमसुखभावेन च सुखे ।

अगगस्मिं दानं ददन्ति अगगे रतनत्तये दानं देन्तानं देय्यधम्मं परिच्चजन्तानं । तत्थ धरमानं भगवन्तं चतूहि पच्चयेहि उपडुहन्ता पूजेन्ता सक्करोन्ता परिनिब्बुतञ्च भगवन्तं उद्दिस्स धातुचेतियादिके उपडुहन्ता पूजेन्ता सक्करोन्ता बुद्धे दानं ददन्ति नाम । “धम्मं पूजेस्सामा”ति धम्मधरे पुगगले चतूहि पच्चयेहि उपडुहन्ता पूजेन्ता सक्करोन्ता धम्मञ्च चिरट्ठितिकं करोन्ता धम्मे दानं ददन्ति नाम । तथा अरियसङ्घं चतूहि पच्चयेहि उपडुहन्ता पूजेन्ता सक्करोन्ता तं उद्दिस्स इतरस्मिम्पि तथा पटिपज्जन्ता सङ्घे दानं ददन्ति नाम । **अगगं पुज्जं पवड्ढतीति** एवं रतनत्तये पसन्नेन चेतसा उळारं परिच्चागं उळारञ्च पूजासक्कारं पवत्तेन्तानं दिवसे दिवसे अगगं उळारं कुसलं उपचीयति । इदानि तस्स पुज्जस्स अगगविपाकताय अगगभावं दस्सेतुं “अगगं आयू”तिआदि वुत्तं । तत्थ अगगं आयूति दिब्बं वा मानुसं वा अगगं उळारतमं आयु । **पवड्ढतीति** उपरूपरि बूहति । **वण्णोति** रूपसम्पदा । **यसोति** परिवारसम्पदा । **कित्तीति** थुतिघोसो । **सुखन्ति** कायिकं चेतसिकञ्च सुखं । **बलन्ति** कायबलं जाणबलञ्च ।

अगगस्स दाताति अगगस्स रतनत्तयस्स दाता, अथ वा अगगस्स देय्यधम्मस्स दानं उळारं कत्वा तत्थ पुज्जं पवत्तेता । **अगगधम्मसमाहितोति** अगगेन पसादधम्मेन दानादिधम्मेन च समाहितो समन्नागतो अचलप्पसादयुत्तो, तस्स वा विपाकभूतेहि बहुजनस्स पियमनापतादिधम्मेहि युत्तो । **अगगप्पत्तो पमोदतीति** यत्थ यत्थ सत्तनिकाये उप्पन्नो, तत्थ तत्थ अगगभावं सेट्ठभावं अधिगतो, अगगभावं वा लोकुत्तरमग्गफलं अधिगतो पमोदति अभिरमति परितुस्सतीति ।

पठमसुत्तवण्णना निट्ठिता ।

२. जीविकसुत्तवण्णना

११. दुतियं अट्ठप्पत्तिवसेन देसितं । एकस्मिञ्चि समये भगवति कपिलवत्थुस्मिं निग्रोधारामे विहरन्ते भिक्खू आगन्तुकभिक्खून् सेनासनानि पज्जापेन्ता पत्तचीवरानि पटिसामेन्ता सामणेरा च लाभभाजनीयट्ठाने सम्पत्तसम्पत्तानं लाभं गणहन्ता उच्चासद्वा महासद्वा अहेसुं । तं सुत्वा भगवा भिक्खू पणामेसि । ते किर सब्बेव नवा अधुनागता इमं धम्मविनयं । तं जत्वा महाब्रह्मा आगन्त्वा “अभिनन्दतु, भन्ते, भगवा भिक्खुसङ्घ”न्ति (म० नि० २.१५८) तेसं पणामितभिक्खून् अनुगणहनं याचि । भगवा तस्स ओकासं अकासि । अथ महाब्रह्मा “कतावकासो खोमिहि भगवता”ति भगवन्तं अभिवादेत्वा पदक्खिणं कत्वा पक्कामि । अथ भगवा “भिक्खुसङ्घो आगच्छतू”ति आनन्दत्थेरेस्स आकारं दस्सेसि । अथ ते भिक्खू आनन्दत्थेरेन पक्कोसिता भगवन्तं उपसङ्कमित्वा सारज्जमानरूपा एकमन्तं निसीदिसु । भगवा तेसं सप्पायदेसनं वीमंसन्तो “इमे आमिसहेतु पणामिता, पिण्डियालोपधम्मदेसना नेसं सप्पाया”ति चिन्तेत्वा “अन्तमिदं, भिक्खवे”ति इमं देसनं देसेसि ।

तत्रायं अन्तसद्दो “सन्ति, भिक्खवे, एके समणब्राह्मणा पुब्बन्तकप्पिका पुब्बन्तानुदिट्ठिनो”तिआदीसु (दी० नि० १.२९) कोट्ठासे आगतो । “अन्तमकासि दुक्खस्स, अन्तवा अयं लोको परिवट्ठमो”तिआदीसु (दी० नि० १.५५) परिच्छेदे । “हरितन्तं वा पथन्तं वा सेलन्तं वा”तिआदीसु (म० नि० १.३०४) मरियादायं । “अन्तं अन्तगुण”न्तिआदीसु (दी० नि० २.३७७; खु० पा० ३.द्वित्तिसाकार) सरीरावयवे “चरन्ति लोके परिवारछन्ना, अन्तो असुद्धा बहि सोभमाना”तिआदीसु (सं० नि० १.१२२; महानि० १९१) चित्ते । “अप्पेकच्चाणि उप्पलानि वा पदुमानि वा पुण्डरीकानि वा उदके जातानि उदके संवड्ढानि उदकानुगगतानि अन्तो निमुग्गपोसीनी”तिआदीसु (दी० नि० २.६९; सं० नि० १.१७२; महाव० ९) अब्भन्तरे ।

“मिगानं कोट्ठुको अन्तो, पक्खीनं पन वायसो ।

एरण्डो अन्तो रुक्खानं, तयो अन्ता समागता'ति ॥ (जा० १.३.१३५) —

आदीसु लामके । इधापि लामके एव दट्ठब्बो । तस्मा अन्तमिदं भिक्खवे जीविकानन्ति भिक्खवे इदं जीविकानं अन्तं पच्छिमं लामकं, सब्बनिहीनं जीवितन्ति अत्थो । यदिदं पिण्डोल्यन्ति यं इदं पिण्डपरियेसनेन भिक्खाचरियाय जीविकं कप्पेन्तस्स जीवितं । अयं पनेत्थ पदत्थो — पिण्डाय उलतीति पिण्डोलो, तस्स कम्मं पिण्डोल्यं, पिण्डपरियेसनेन जीविकाति अत्थो ।

अभिसापोति अक्कोसो । कुपिता हि मनुस्सा अत्तनो पच्चत्थिकं “पिलोतिकखण्डं निवासेत्वा कपालहत्थो पिण्डं परियेसमानो चरेय्यासी”ति अक्कोसन्ति । अथ वा “किं तुय्हं अकातब्बं अत्थि, यो त्वं एवं बलवीरियूपपन्नोपि हिरोत्तपं पहाय कपणो पिण्डोलो विचरसि पत्तपाणी”ति एवम्पि अक्कोसन्तियेव । **तच्च खो एतन्ति** तं एतं अभिसपम्पि समानं पिण्डोल्यं । **कुलपुत्ता उपेन्ति अत्थवसिका**ति मम सासने जातिकुलपुत्ता च आचारकुलपुत्ता च अत्थवसिका कारणवसिका हुत्वा कारणवसं पटिच्च उपेन्ति उपगच्छन्ति ।

राजाभिनीताति आदीसु ये रज्जो सन्तकं खादित्वा रज्जा बन्धनागारे बन्धापिता पलायित्वा पब्बजन्ति, ते रज्जा बन्धनं अभिनीतत्ता **राजाभिनीता** नाम । ये पन चोरेहि अटवियं गहेत्वा एकच्चेसु मारियमानेसु एकच्चे “मयं सामि तुम्हेहि विस्सट्ठा गेहं अनज्झावसित्वा पब्बजिस्साम, तत्थ तत्थ यं यं बुद्धपूजादिपुज्जं करिस्साम, ततो ततो तुम्हाकं पत्तिं दस्सामा”ति तेहि विस्सट्ठा पब्बजन्ति, ते **चोराभिनीता** नाम चोरेहि मारेतब्बतं अभिनीतत्ता । ये पन इणं गहेत्वा पटिदातुं असक्कोन्ता पलायित्वा पब्बजन्ति, ते **इणट्ठा** नाम । तच्च खो एतं पिण्डोल्यं कुलपुत्ता मम सासने नेव राजाभिनीता...पे०... न आजीविकापकता उपेन्ति, अपिच खो “ओतिण्णम्हा जातिया...पे०... पज्जायेथा”ति उपेन्तीति पदसम्बन्धो ।

तत्थ **ओतिण्णम्हा**ति ओतिण्णा अम्हा । **जातिया**ति आदीसु तम्हि तम्हि सत्तनिकाये खन्धानं पठमाभिनिब्बत्ति **जाति**, परिपाको **जरा**, भेदो **मरणं** । जातिरोगभोगसीलदिट्ठिव्यसनेहि फुट्ठस्स सन्तापो अन्तो निज्झानं **सोको**, तेहि फुट्ठस्स वचीविप्पलापो **परिदेवो** । अनिट्ठफोट्ठब्बपटिहतकायस्स कायपीळनं **दुक्खं**, आघातवत्थूसु उपहतचित्तस्स चेतोपीळनं **दोमनस्सं** । जातिव्यसनादीहि एव फुट्ठस्स परिदेवेनपि अधिवासेतुं असमत्थस्स चित्तसन्तापसमुट्ठितो भुसो आयासो **उपायासो** । एतेहि जातिआदीहि ओतिण्णा **दुक्खोतिण्णा**, तेहि जातिआदिदुक्खेहि अन्तो अनुपविट्ठा । **दुक्खपरेता**ति तेहि दुक्खदुक्खवत्थूहि अभिभूता । जातिआदयो हि दुक्खस्स वत्थुभावतो दुक्खा, दुक्खभावतो च सोकपरिदेवदुक्खदोमनस्सुपायासा दुक्खाति । **अप्पेव नाम...पे०... पज्जायेथा**ति इमस्स सकलस्स वट्ठदुक्खरासिस्स परिच्छेदकरणं ओसानकिरिया अपि नाम पज्जायेय्य ।

सो च होति अभिज्झालूति इदं यो कुलपुत्तो “दुक्खस्सन्तं करिस्सामी”ति पुब्बे चित्तं उप्पादेत्वा पब्बजितो अपरभागे तं पब्बज्जं तथारूपं कातुं न सक्कोति, तं दस्सेतुं वुत्तं । तत्थ **अभिज्झालू**ति परभण्डानं अभिज्झायिता । **तिब्बसारागो**ति बलवरागो । **व्यापन्नचित्तो**ति व्यापादेन पूतिभूतत्ता विपन्नचित्तो । **पटुट्ठमनसङ्कप्पो**ति तिखिणसिङ्गो विय चण्डगोणो परेसं उपघातवसेन दुट्ठचित्तो । **मुट्ठस्सती**ति भत्तनिक्खित्तकाको विय, मंसनिक्खित्तसुनखो विय च नट्ठस्सति, इध कतं एत्थ न सरति । **असम्पजानो**ति निष्पज्जो खन्धादिपरिच्छेदरहितो । **असमाहितो**ति चण्डसोते बद्धनावा विय असण्ठितो । **विब्भन्तचित्तो**ति पन्थारुळ्हमिगो विय भन्तमनो । **पाकतिन्द्रियो**ति यथा गिही संवराभावेन परिग्गहपरिजने ओलोकेन्ति असंवृतिन्द्रिया, एवं असंवृतिन्द्रियो होति ।

छवालातन्ति छवानं दड्ढुट्ठाने अलातं । उभतोपदितं मज्झे गूथगतन्ति पमाणेन अड्ढुल्लमत्तं उभतो द्वीसु कोटीसु आदित्तं मज्झे गूथमक्खितं । नेव गामेति सचे हि तं युगनङ्गलगोपानसिपक्खपासकादीनं अत्थाय उपनेतुं सक्का अस्स गामे कट्ठत्थं फरेय्य । सचे खेत्तकुटिया कट्ठत्थरमञ्चकादीनं अत्थाय उपनेतुं सक्का अस्स, अरञ्जे कट्ठत्थं फरेय्य । यस्मा पन उभयत्थापि न सक्का, तस्मा एवं वुत्तं । तथूपमाहन्ति तथूपमं छवालातसदिसं अहं इमं यथावुत्तपुगलं वदामि । गिहिभोगा च परिहीनोति यो अगारे वसन्तेहि गिहीहि दायज्जे भाजियमाने अञ्जथा च भोगो लद्धब्बो अस्स, ततो च परिहीनो । सामञ्जत्थञ्चाति आचरियुपज्झायानं ओवादे ठत्वा परियत्तिपटिवेधवसेन पत्तब्बं सामञ्जत्थञ्च न परिपूरेति । इमं पन उपमं सत्था न दुस्सीलस्स वसेन आहरि, परिसुद्धसीलस्स पन अलसस्स अभिज्झादीहि दोसेहि दूसितचित्तस्स पुगलस्स वसेन आहरीति वेदितब्बं ।

गाथासु गिहिभोगाति कामसुखसम्भोगतो । परिहीनोति जीनो । सामञ्जत्थन्ति पटिवेधबाहुसच्चञ्चेव परियत्तिबाहुसच्चञ्च । तादिसो हि असुतं सोतुं सुतं परियोदापेतुं न सक्कोति अलसभावतो । दुट्ठ भगोति दुब्भगो, अलक्खिको काळकण्णिपुरिसो । परिधंसमानोति विनस्समानो । पकिरेतीति विकिरेति विद्धंसेति । सब्बमेतं भाविनो सामञ्जत्थस्स अनुप्पादनमेव सन्धाय वुत्तं । छवालातं नस्सतीति सो तादिसो पुगलो यथावुत्तं छवालातं विय कस्सचि अनुपयुज्जमानो एव नस्सति उभतो परिभट्टभावतो । एवं “कायवाचाहि अकतवीतिक्कमोपि चित्तं अविशोधेन्तो नस्सति, पगेव कतवीतिक्कमो दुस्सीलो”ति तस्स अपायदुक्खभागिभावदस्सनेन दुस्सीले आदीनवं दस्सेत्वा ततो सत्ते विवेचेतुकामो “कासावकण्ठा”ति आदिना गाथाद्वयमाह । तस्सत्थो हेट्ठा वुत्तो एव ।

दुतियसुत्तवण्णना निड्डिता ।

३. सङ्घाटिकणसुत्तवण्णना

१२. ततिये सङ्घाटिकण्णेति चीवरकोटियं । गहेत्वाति परामसित्वा । अनुबन्धो अस्साति अनुगतो भवेय्य । इदं वुत्तं होति — “भिक्षवे, इधेकच्चो भिक्षु अत्तनो हत्थेन मया पारुतस्स सुगतमहाचीवरस्स कण्णे परामसन्तो विय मं अनुगच्छेय्य, एवं मय्हं आसन्नतरो हुत्वा विहरेय्या”ति । पादे पादं निक्खिपन्तोति गच्छन्तस्स मम पादे पादं निक्खित्तद्धाने पादुद्धारणानन्तरं अत्तनो पादं निक्खिपन्तो । उभयेनापि “ठानगमनादीसु अविजहन्तो सब्बकालं मय्हं समीपे एव विहरेय्य चेपी”ति दस्सेति । सो आरकाव मय्हं, अहञ्च तस्साति सो भिक्षु मया वुत्तं पटिपदं अपूरेन्तो मम दूरेयेव, अहञ्च तस्स दूरेयेव । एतेन मंसचक्खुना तथागतदस्सनं रूपकायसमोधानञ्च अकारणं, जाणचक्खुनाव दस्सनं धम्मकायसमोधानमेव च पमाणन्ति दस्सेति । तेनेवाह “धम्मज्हि सो, भिक्षवे, भिक्षु न पस्सति, धम्मं अपस्सन्तो न मं पस्सती”ति । तत्थ धम्मो नाम नवविधो लोकुत्तरधम्मो । सो च अभिज्झादीहि दूसितचित्तेन न सक्का पस्सितुं, तस्मा धम्मस्स अदस्सनतो धम्मकायञ्च न पस्सतीति । तथा हि वुत्तं —

“किं ते, वक्कलि, इमिना पूतिकायेन दिट्ठेन? यो खो, वक्कलि, धम्मं पस्सति सो मं पस्सति; यो मं पस्सति, सो धम्मं पस्सती”ति (सं० नि० ३.८७) ।

“धम्मभूतो ब्रह्मभूतो”ति (म० नि० १.२०३; पटि० म० ३.५) च ।

“धम्मकायो इतिपि, ब्रह्मकायो इतिपी”ति (दी० नि० ३.११८) च आदि ।

योजनसतेति योजनसते पदेसे, योजनसतमत्थकेति अत्थो । सेसं वुत्तविपरियायेन वेदितब्बं । अरियमग्गाधिगमवसेन चस्स अनभिज्झालुआदिभावो दट्ठब्बो ।

गाथासु महिच्छोति कामेसु तिब्बसारागताय महाइच्छो । विघातवाति पदुट्टमनसङ्कप्पताय सत्तेसु आघातवसेन महिच्छताय इच्छितालाभेन च विघातवा । एजानुगोति एजासङ्घाताय तण्हाय दासो विय हुत्वा तं अनुगच्छन्तो । रागादिकिलेसपरिळाहाभिभवेन अनिब्बुतो । रूपादिविसयानं अभिकङ्खनेन गिद्धो । पस्स यावज्च आरकाति अनेजस्स निब्बुतस्स वीतगेधस्स सम्मासम्बुद्धस्स ओकासवसेन समीपेपि समानो महिच्छो विघातवा एजानुगो अनिब्बुतो गिद्धो बालपुथुज्जनो धम्मसभावतो यत्तकं दूरे, तस्स सो दूरभावो पस्स, वत्तुम्पि न सुकरन्ति अत्थो । वुत्तज्हेतं —

“नभज्च दूरे पथवी च दूरे,
पारं समुद्दस्स तथाहु दूरे ।
ततो हवे दूरतरं वदन्ति,
सतज्च धम्मो असतज्च राजा”ति ॥ (अ० नि० ४.४७; जा० २.२१.४१४) ।

धम्ममभिज्जायाति चतुसच्चधम्मं अभिज्जाय अज्जाय जाततीरणपरिज्जाहि यथारहं पुब्बभागे जानित्वा । धम्ममज्जायाति तमेव धम्मं अपरभागे मग्गजाणेन परिज्जादिवसेन यथामरियादं जानित्वा । पण्डितोति पटिवेधबाहुसच्चेन पण्डितो । रहदोव निवाते चाति निवातद्वाने रहदो विय अनेजो किलेसचलनरहितो उपसम्मति, यथा सो रहदो निवातद्वाने वातेन अनब्भाहतो सन्निसिन्नोव होति, एवं अयम्पि सब्बथापि पटिप्पस्सद्धकिलेसो किलेसचलनरहितो अरहत्तफलसमाधिना वूपसम्मति, सब्बकालं उपसन्तसभावोव होति । अनेजोति सो एवं अनेजादिसभावो अरहा अनेजादिसभावस्स सम्मासम्बुद्धस्स ओकासतो दूरेपि समानो धम्मसभावतो अदूरे सन्तिके एवाति ।

ततियसुत्तवण्णना निड्डिता ।

४. अगिसुत्तवण्णना

१३. चतुत्थे अनुदहनट्टेन अग्गि, रागो एव अग्गि रागग्गि । रागो हि उप्पज्जमानो सत्ते अनुदहति झापेति, तस्मा “अग्गी”ति वुच्चति । इतरेसुपि द्वीसु एसेव नयो । तत्थ यथा अग्गि यदेव इन्धनं निस्साय उप्पज्जति, तं निदहति, महापरिळाहो च होति, एवमिमेपि रागादयो यस्मिं सन्ताने सयं उप्पन्ना, तं निदहन्ति, महापरिळाहा च होन्ति दुन्निब्बापया । तेसु रागपरिळाहेन सन्तत्तहदयानं इच्छितालाभदुक्खेन मरणप्पत्तानं सत्तानं पमाणं नत्थि । अयं ताव रागस्स अनुदहनता । दोसस्स पन अनुदहनताय विसेसतो मनोपदोसिका देवा, मोहस्स अनुदहनताय खिड्डापदोसिका देवा च निदस्सनं । मोहवसेन हि तेसं सतिसम्मोसो होति, तस्मा खिड्डावसेन आहारवेलं अतिवत्तेन्ता कालं करोन्ति । अयं ताव रागादीनं दिट्ठधम्मिको अनुदहनभावो । सम्परायिको पन निरयादीसु निब्बत्तापनवसेन घोरतरो दुरधिवासो च । अयज्च अत्थो आदित्तपरियायेन विभावेतब्बो ।

गाथासु कामेसु मुच्छितेति वत्थुकामेसु पातव्यतावसेन मुच्छं बाल्यं पमादं मिच्छाचारं आपन्ने । व्यापन्नेति व्यापन्नचित्ते दहतीति सम्बन्धो । नरे पाणातिपातिनोति इदं दोसग्गिस्स । अरियधम्मे अकोविदेति ये खन्धायतनादीसु सब्बेन सब्बं उग्गहपरिपुच्छाय मनसिकाररहिता अरियधम्मस्स अकुसला, ते सम्मोहेन अभिभूता विसेसेन सम्मूळहा

नामाति वुत्ता । एते अग्गी अजानन्ताति “एते रागगिआदयो इध चेव सम्पराये च अनुदहन्ती”ति अजानन्ताआ परिज्जाभिसमयवसेन पहानाभिसमयवसेन च अप्पटिविज्झन्ता । सक्कायाभिरताति सक्काये उपादानक्खन्धपञ्चके तण्हादिट्ठिमाननन्दनाभिरता । वड्डयन्तीति पुनप्पुनं उप्पज्जनेन वड्डयन्ति आचिनन्ति । निरयन्ति अट्ठविधं महानिरयं, सोळसविधं उस्सदनिरयन्ति सब्बम्पि निरयं । तिरच्छानञ्च योनियोति तिरच्छानयोनियो च । असुरन्ति असुरकायं पेत्तिविसयञ्च वड्डयन्तीति सम्बन्धो ।

एत्तावता रागगिआदीनं इध चेव सम्पराये च अनुदहनभावदस्सनमुखेन वट्ठं दस्सेत्वा इदानी नेसं निब्बापनेन विवट्ठं दस्सेतुं “ये च रत्तिन्दिवा”तिआदि वुत्तं । तत्थ युत्ताति भावनानुयोगवसेन युत्ता । कत्थ? सम्मासम्बुद्धसासने । तेन अञ्जसासने रागगिआदीनं निब्बापनाभावं दस्सेति । तथा हि अनञ्जसाधारणं तेसं निब्बापनविधिं असुभकम्मट्ठानं सङ्खेपेनेव दस्सेन्तो —

“ते निब्बापेन्ति रागगिं, निच्चं असुभसज्जिनो ।
दोसगिं पन मेत्ताय, निब्बापेन्ति नरुत्तमा ।
मोहगिं पन पज्जाय, यायं निब्बेधगामिनी”ति ॥ —

आह । तत्थ असुभसज्जिनोति द्वित्तिंसाकारवसेन चेव उद्धुमातकादिवसेन च असुभभावानुयोगेन असुभसज्जिनो । मेत्तायाति “सो मेत्तासहगतेन चेतसा एकं दिसं फरित्वा विहरती”ति (अ० नि० ३.६४, ६६) वुत्ताय मेत्ताभावनाय । एत्थ च असुभज्झानञ्च पादकं कत्वा निब्बत्तितानागामिमग्गेन रागगिदोसगिं निब्बापनं वेदितव्वं । पज्जायाति विपस्सनापज्जासहिताय मग्गपज्जाय । तेनेवाह “यायं निब्बेधगामिनी”ति । सा हि किलेसक्खन्धं विनिविज्झन्ती गच्छति पवत्ततीति निब्बेधगामिनीति वुच्चति । असेसं परिनिब्बन्तीति अरहत्तमग्गेन असेसं रागगिआदिं निब्बापेत्वा सउपादिसेसाय निब्बानधातुया ठिता पज्जावेपुल्लप्पत्तिया निपका पुब्बेव सम्मप्पधानेन सब्बसो कोसज्जस्स सुप्पहीनत्ता फलसमापत्तिसमापज्जनेन अकिलासुभावेन च रत्तिन्दिमत्तन्दिता चरिमकचित्तनिरोधेन अनुपादिसेसाय निब्बानधातुया असेसं परिनिब्बन्ति । ततो च असेसं निस्सेसं वट्ठदुक्खं अच्चगुं अतिक्कमंसु ।

एवं ये रागगिआदिके निब्बापेन्ति, तेसं अनुपादिसेसनिब्बानेन निब्बुतिं दस्सेत्वा इदानी पटिविद्धगुणेहि थोमेन्तो ओसानगाथमाह । तत्थ अरियदसाति अरियेहि बुद्धादीहि पस्सितव्वं किलेसेहि वा आरकत्ता अरियं निब्बानं, अरियं चतुसच्चमेव वा दिट्ठवन्तोति अरियदसा । वेदस्स मग्गजाणस्स, तेन वा वेदेन संसारस्स परियोसानं गताति वेदगुनो । सम्मदज्जायाति सम्मदेव सब्बं आजानितव्वं कुसलादिं खन्धादिञ्च जानित्वा । सेसं वुत्तनयमेव ।

चतुत्थसुत्तवण्णना निट्ठिता ।

५. उपपरिक्खसुत्तवण्णना

१४. पञ्चमे तथा तथाति तेन तेन पकारेन । उपपरिक्खेय्याति वीमंसेय्य परितुलेय्य सम्मसेय्य वा । यथा यथास्स उपपरिक्खतोति यथा यथा अस्स भिक्खुनो उपपरिक्खन्तस्स । बहिद्धा चस्स विज्जाणं अविक्खित्तं अविसटन्ति बहिद्धा रूपादिआरम्भणे उप्पज्जनकविक्खेपाभावतो अविक्खित्तं समाहितं, ततो एव अविसटं सिया । इदं वुत्तं होति — भिक्खवे, येन येन पकारेन इमस्स आरद्धविपस्सकस्स भिक्खुनो उपपरिक्खतो सङ्खारे सम्मसन्तस्स पुब्बे

समाहिताकारसल्लक्खणवसेन समथनिमित्तं गहेत्वा सक्कच्चं निरन्तरं सम्मसनजाणं पवत्तेन्तस्स अत्तनो विपस्सनाचित्तं कम्मट्ठानतो बहिद्धा रूपादिआरम्मणे उप्पज्जनकं न सिया, अच्चारद्धवीरियताय उद्धच्चपक्खियं न सिया, तेन तेन पकारेन भिक्खु उपपरिक्खेय्य परितुलेय्याति । **अज्झत्तं असण्ठितन्ति** यस्मा वीरिये मन्दं वहन्ते समाधिस्स बलवभावतो कोसज्जाभिभवेन अज्झत्तं गोचरज्झत्तसङ्घाते कम्मट्ठानारम्मणे सङ्कोचवसेन ठितत्ता सण्ठितं नाम होति, वीरियसमताय पन योजिताय असण्ठितं होति वीथिं पटिपन्नं । तस्मा यथा यथास्स उपपरिक्खतो विज्जाणं अज्झत्तं असण्ठितं अस्स, वीथिपटिपन्नं सिया, तथा तथा उपपरिक्खेय्य । **अनुपादाय न परितस्सेय्याति** यथा यथास्स उपपरिक्खतो “एतं मम, एसो मे अत्ता”ति तण्हादिट्ठिग्गाहवसेन रूपादीसु कच्चि सङ्खारं अगगहेत्वा ततो एव तण्हादिट्ठिग्गाहवसेन न परितस्सेय्य, तथा तथा उपपरिक्खेय्याति सम्बन्धो । कथं पन उपपरिक्खतो तिविधम्पेतं सियाति? उद्धच्चपक्खिये कोसज्जपक्खिये च धम्मे वज्जेन्तो वीरियसमतं योजेत्वा पुब्बेव विपस्सनुपक्किलेसेहि चित्तं विसोधेत्वा यथा सम्मदेव विपस्सनाजाणं विपस्सनावीथिं पटिपज्जति, तथा सम्मसतो ।

इति भगवा चतुसच्चकम्मट्ठानिकस्स भिक्खुनो अनुक्कमेन पटिपदाजाणदस्सनविसुद्धिया आरद्धाय अच्चारद्धवीरियअतिसिथिलवीरियविपस्सनुपक्किलेसेहि चित्तस्स विसोधनूपायं दस्सेत्वा इदानीं तथा विसोधिते विपस्सनाजाणे न चिरस्सेव विपस्सनं मग्गेन घटेत्वा सकलवट्टदुक्खसमतिक्रमाय संवत्तन्तीति दस्सेन्तो “**बहिद्धा, भिक्खवे, विज्जाणे**”तिआदिमाह, तं वुत्तनयमेव । यं पन वुत्तं — “**आयतिं जातिजरामरणदुक्खसमुदयसम्भवो न होती**”ति, तस्सत्थो — एवं विपस्सनं मग्गेन घटेत्वा मग्गपटिपाटिया अगमग्गेन अनवसेसतो किलेसेसु खीणेषु आयतिं अनागते जातिजरामरणसकलवट्टदुक्खसमुदयसङ्घातो सम्भवो उप्पादो च न होति, जातिसङ्घातो वा दुक्खसमुदयो जरामरणसङ्घातो दुक्खसम्भवो च न होति ।

गाथायं **सत्तसङ्गप्पहीनस्साति** तण्हासङ्गो, दिट्ठिसङ्गो, मानसङ्गो, कोधसङ्गो, अविज्जासङ्गो, किलेससङ्गो, दुच्चरितसङ्गोति इमेसं सत्तन्नं सङ्गानं पहीनत्ता सत्तसङ्गप्पहीनस्स । केचि पन “सत्तानुसया एव सत्त सङ्गा”ति वदन्ति । **नेत्तिच्छिन्नस्साति** छिन्नभवनेत्तिकस्स । **विक्खीणो जातिसंसारोति** पुनप्पुनं जायनवसेन पवत्तिया जातिहेतुकत्ता च जातिभूतो संसारोति जातिसंसारो, सो भवनेत्तिया छिन्नत्ता विक्खीणो परिक्खीणो, ततो एव **नत्थि तस्स पुनब्भवोति** ।

पञ्चमसुत्तवण्णना निट्ठिता ।

६. कामूपपत्तिसुत्तवण्णना

१५. छट्ठे **कामूपपत्तियोति** कामपटिलाभा कामपटिसेवना वा । **पच्चुपट्टितकामाति** निबद्धकामा निबद्धारम्मणा यथा तं मनुस्सा । मनुस्सा हि निबद्धवत्थुस्मिं वसं वत्तेन्ति । यत्थ पटिबद्धचित्ता होन्ति, सतम्पि सहस्सम्पि दत्वा तमेव मातुगामं आनेत्वा निबद्धभोगं भुज्जन्ति । एकच्चे च देवा । चातुमहाराजिकतो पट्टाय हि चतुदेवलोकवासिनो निबद्धवत्थुस्मियेव वसं वत्तेन्ति । पञ्चसिखवत्थु चेत्थ निदस्सनं । तथा एकच्चे आपायिके नेरयिके ठपेत्वा सेसअपायसत्तापि निबद्धवत्थुस्मियेव वसं वत्तेन्ति । मच्छा हि अत्तनो मच्छिया, कच्छपो कच्छपियाति एवं सब्बेपि तिरच्छाना पेता विनिपातिका च । तस्मा नेरयिके ठपेत्वा सेसअपायसत्ते उपादाय याव तुसितकाया इमे सत्ता पच्चुपट्टितकामा नाम, **निम्मानरतिनोति** सयं निम्मिते निम्माने रति एतेसन्ति निम्मानरतिनो । ते हि नीलपीतादिवसेन यादिसं यादिसं रूपं इच्छन्ति, तादिसं तादिसं निम्मिनित्वा रमन्ति आयस्मतो अनुरुद्धस्स पुरतो मनापकायिका देवता विय । **परनिम्मितवसवत्तिनोति** परेहि निम्मिते कामे वसं वत्तेन्तीति परनिम्मितवसवत्तिनो । तेसज्हि मनं जत्वा परे यथारुचितं कामभोगं निम्मिनन्ति, ते तत्थ वसं वत्तेन्ति । कथं ते

परस्स मनं जानन्तीति? पकतिसेवनावसेन । यथा हि कुसलो सूदो रज्जो भुज्जन्तस्स यं यं रुच्चति, तं तं जानाति, एवं पकतिया अभिरुचितारम्मणं जत्वा तादिसेयेव निम्मिनन्ति, ते तत्थ वसं वत्तेन्ति, मेथुनसेवनादिवसेन कामे परिभुज्जन्ति । केचि पन “हसितमत्तेन ओलोकिमत्तेन आलिङ्गितमत्तेन हत्थग्गहणमत्तेन च तेसं कामकिच्चं इज्झती”ति वदन्ति, तं अट्ठकथायं “एतं पन नत्थी”ति पटिक्खितं । न हि कायेन अफुसन्तस्स फोड्डब्बं कामकिच्चं साधेति । छन्नम्पि कामावचरदेवानं कामा पाकतिका एव । वुत्तज्हेतं —

“छ एते कामावचरा, सब्बकामसमिद्धिनो ।

सब्बेसं एकसङ्घातं, आयु भवति कित्तक”न्ति ॥ (विभ० १०२३) ।

गाथासु ये चज्जेति ये यथावुत्तदेवेहि अज्जे च कामभोगिनो मनुस्सा चेव एकच्चे अपायूपगा च सब्बे ते । इत्थभावज्जथाभावन्ति इमं यथापटिलद्धत्तभावज्जेव, उपपत्तिभवन्तरसङ्घातं इतो अज्जथाभावज्जाति द्विप्पभेदं संसारं नातिवत्तरे न अतिक्कमन्ति । सब्बे परिच्चजे कामेति दिब्बादिभेदे सब्बेपि कामे वत्थुकामे च किलेसकामे च परिच्चजेय्य । किलेसकामे अनागामिमग्गेन पजहन्तोयेव हि वत्थुकामे परिच्चजति नाम । पियरूपसातगधितन्ति पियरूपेसु रूपादीसु सुखवेदनस्सादेन गधितं गिद्धं । छेत्वा सोतं दुरच्चयन्ति अज्जेहि दुरच्चयं दुरतिक्कमं तण्हासोतं अरहत्तमग्गेन समुच्छिन्दित्वा । सेसं हेट्ठा वुत्तनयमेवाति ।

छट्ठसुत्तवण्णना निड्डिता ।

७. कामयोगसुत्तवण्णना

९६. सत्तमे कामयोगयुत्तोति पज्चकामगुणिको रागो कामयोगो, तेन युत्तो कामयोगयुत्तो, असमुच्छिन्नकामरागस्सेतं अधिवचनं । रूपारूपभवेसु छन्दरागो भवयोगो, तथा ज्ञाननिकन्ति सस्सतदिट्ठिसहगतो च रागो, तेन युत्तो भवयोगयुत्तो, अप्पहीनभवरागोति अत्थो । आगामीति ब्रह्मलोके ठितोपि पटिसन्धिग्गहणवसेन इमं मनुस्सलोकं आगमनसीलो । तेनेवाह “आगन्ता इत्थत्त”न्ति । मनुस्सत्तभावसङ्घातं इत्थभावं आगमनधम्मो, मनुस्सेसु उपपज्जनसीलोति अत्थो । कामज्चेत्थ कामयोगो इत्थत्तं आगमनस्स कारणं । यो पन कामयोगयुत्तो, सो एकन्तेन भवयोगयुत्तोपि होतीति दस्सनत्थं “कामयोगयुत्तो, भिक्खवे, भवयोगयुत्तो”ति उभयम्पि एकज्झं कत्वा वुत्तं ।

कामयोगविसंयुत्तोति एत्थ असुभज्झानम्पि कामयोगविसंयोगो, तं पादकं कत्वा अधिगतो अनागामिमग्गो एकन्तेनेव कामयोगविसंयोगो नाम, तस्मा ततियमग्गफले ठितो अरियपुग्गलो “कामयोगविसंयुत्तो”ति वुत्तो । यस्मा पन रूपारूपभवेसु छन्दरागो अनागामिमग्गेन न पहीयति, तस्मा सो अप्पहीनभवयोगत्ता “भवयोगयुत्तो”ति वुत्तो । अनागामीति कामलोकं पटिसन्धिग्गहणवसेन अनागमनतो अनागामी । कामयोगविसंयोगवसेनेव हि सद्धिं अनवसेसओरम्भागियसंयोजनसमुग्घातेन अज्झत्तसंयोजनाभावसिद्धितो इत्थत्तं अनागन्त्वा होति, तत्थ परिनिब्बायी अनावत्तिधम्मो । यस्स पन अनवसेसं भवयोगो पहीनो, तस्स अविज्जायोगादिअवसिद्धिकिलेसापि तदेकट्ठभावतो पहीना एव होन्तीति, सो परिक्खीणभवसंयोजनो “अरहं खीणासवो”ति वुच्चति । तेन वुत्तं “कामयोगविसंयुत्तो, भिक्खवे, भवयोगविसंयुत्तो अरहं होति खीणासवो”ति । एत्थ च कामयोगविसंयोगो अनागामी चतुत्थज्झानस्स सुखदुक्खसोमनस्सदोमनस्सप्पहानं विय, ततियमग्गस्स दिट्ठिविचिकिच्छासीलब्बतपरामाससंयोजनपरिक्खयो विय च चतुत्थमग्गस्स वण्णभणनत्थं वुत्तोति दट्ठब्बं । पठमपदेन सोतापन्नसकदागामीहि सद्धिं सब्बो पुत्थुज्जनो गहितो, दुतियपदेन

पन सब्बो अनागामी, ततियपदेन अरहाति अरहत्तनिकूटेन देसनं निट्ठापेसि ।

गाथासु उभयन्ति उभयेन, कामयोगेन, भवयोगेन च संयुत्ताति अत्थो । सत्ता गच्छन्ति संसारन्ति पुथुज्जना सोतापन्ना सकदागामिनोति इमे तिविधा सत्ता कामयोगभवयोगानं अप्पहीनत्ता गच्छन्ति संसारन्ति । ततो एव जातिमरणगामिनो होन्ति । एत्थ एकबीजी, कोलंकोलो, सत्तक्खत्तुपरमोति तीसु सोतापन्नेसु सब्बमुदु सत्तक्खत्तुपरमो, सो अट्ठमं भवं न निब्बत्तेति, अत्तनो परिच्छिन्नजातिवसेन पन संसरति, तथा इतरेपि । सकदागामीसुपि यो इध सकदागामिमगं पत्वा देवलोके उप्पज्जित्वा पुन इध निब्बत्तति, सो अत्तनो परिच्छिन्नजातिवसेनेव संसरति । ये पन सकदागामिनो वोमिस्सकनयेन विना तत्थ तत्थ देवेसुयेव मनुस्सेसुयेव वा निब्बत्तन्ति, ते उपरिमग्गाधिगमाय याव इन्द्रियपरिपाका पुनप्पुनं उप्पज्जनतो संसरन्तियेव । पुथुज्जने पन वत्तब्बमेव नत्थि सब्बभवसंयोजनानं अपरिक्खीणत्ता । तेन वुत्तं —

“कामयोगेन संयुत्ता, भवयोगेन चूभयं ।

सत्ता गच्छन्ति संसारं, जातिमरणगामिनो”ति ॥

कामे पहन्त्वानाति कामरागसङ्घाते किलेसकामे अनागामिमग्गेन पजहित्वा । छिन्नसंसयाति समुच्छिन्नकङ्खा, तज्ज खो सोतापत्तिमग्गेनेव । वण्णभणनत्थं पन चतुत्थमग्गस्स एवं वुत्तं । अरहन्तो हि इध “छिन्नसंसया”ति अधिप्पेता । तेनेवाह “खीणमानपुनब्भवा”ति । सब्बसो खीणो नवविधोपि मानो आयतिं पुनब्भवो च एतेसन्ति खीणमानपुनब्भवा । मानग्गहणेन चेत्य तदेकट्ठताय लक्खणवसेन वा सब्बो चतुत्थमग्गवज्झो किलेसो गहितोति । खीणमानताय च सउपादिसेसा निब्बानधातु वुत्ता होति, खीणपुनब्भवताय अनुपादिसेसा । सेसं सुविज्जेय्यमेव ।

सत्तमसुत्तवण्णना निट्ठिता ।

८. कल्याणसीलसुत्तवण्णना

१७. अट्ठमे कल्याणसीलोति सुन्दरसीलो, पसत्थसीलो, परिपुण्णसीलो । तत्थ सीलपारिपूरी द्वीहि कारणेहि होति सम्मदेव सीलविपत्तिया आदीनवदस्सनेन, सीलसम्पत्तिया च आनिसंसदस्सनेन । इध पन सब्बपरिबन्धविष्णुमुत्तस्स सब्बाकारपरिपुण्णस्स मग्गसीलस्स फलसीलस्स च वसेन कल्याणता वेदितब्बा । कल्याणधम्मोति सब्बे बोधिपक्खियधम्मा अधिप्पेता, तस्मा कल्याणा सतिपट्ठानादिबोधिपक्खियधम्मा एतस्साति कल्याणधम्मो । कल्याणपज्जोति च मग्गफलपज्जावसेनेव कल्याणपज्जो । लोकुत्तरा एव हि सीलादिधम्मा एकन्तकल्याणा नाम अकुप्पसभावत्ता । केचि पन “चतुपारिसुद्धिरीलवसेन कल्याणसीलो, विपस्सनामग्गधम्मवसेन कल्याणधम्मो, मग्गफलपज्जावसेन कल्याणपज्जो”ति वदन्ति । असेक्खा एव ते सीलधम्मपज्जाति एके । अपरे पन भणन्ति — सोतापन्नसकदागामीनं मग्गफलसीलं कल्याणसीलं नाम, तस्मा “कल्याणसीलो”ति इमिना सोतापन्नो सकदागामी च गहिता होन्ति । ते हि सीलेसु परिपूरकारिनो नाम । अनागामिमग्गफलधम्मा अग्गमग्गधम्मा च कल्याणधम्मा नाम । तत्थ हि बोधिपक्खियधम्मा भावनापारिपूरिं गच्छन्ति । तस्मा “कल्याणधम्मो”ति इमिना ततियमग्गट्ठतो पट्ठाय तयो अरिया गहिता होन्ति । पज्जाकिच्चस्स मत्थकप्पत्तिया अग्गफले पज्जा कल्याणपज्जा नाम, तस्मा पज्जावेपुल्लप्पत्तो अरहा “कल्याणपज्जो”ति वुत्तो । एवमेव पुग्गला गहिता होन्तीति । किं इमिना पपज्जेन? अग्गमग्गफलधम्मा इध कल्याणसीलादयो वुत्ताति अयमम्हाकं खन्ति । धम्मविभागेन हि अयं पुग्गलविभागो, न धम्मविभागोति ।

केवलीति एत्थ केवलं वुच्चति केनचि अवोमिस्सकताय सब्बसङ्खतविवित्तं निब्बानं, तस्स अधिगतत्ता अरहा केवली । अथ वा पहानभावनापारिपूरिया परियोसाननवज्जधम्मपारिपूरिया च कल्याणकट्टेन अब्यासेकसुखताय च केवलं अरहत्तं, तदधिगमेन केवली खीणासवो । मग्गब्रह्मचरियवासं वसित्वा परियोसापेत्वा ठितोति **वुसितवा** । उत्तमेहि अगगभूतेहि वा असेक्खधम्मोहि समन्नागतत्ता **“उत्तमपुरिसो”**ति वुच्चति ।

सीलवाति एत्थ केनट्टेन सीलं? सीलनट्टेन सीलं । किमिदं सीलनं नाम? समाधानं, सुसील्यवसेन कायकम्मादीनं अविप्पकिण्णताति अत्थो । अथ वा उपधारणं, झानादिकुसलधम्मानं पतिट्ठानवसेन आधारभावोति अत्थो । तस्मा सीलति, सीलेतीति वा सीलं । अयं ताव सद्वलक्खणनयेन सीलट्ठो । अपरे पन “सिरट्ठो सीलट्ठो, सीतलट्ठो सीलट्ठो, सिवट्ठो सीलट्ठो”ति निरुत्तिनयेन अत्थं वण्णयन्ति । तयिदं पारिपूरितो अतिसयतो वा सीलं अस्स अत्थीति **सीलवा**, चतुपारिसुद्धिरीलवसेन सीलसम्पन्नोति अत्थो । तत्थ यं जेट्ठकसीलं, तं वित्थारेत्वा दस्सेतुं **“पातिमोक्खसंवरसंवृतो”**तिआदि वुत्तन्ति एकच्चानं आचरियानं अधिप्पायो ।

अपरेन पन भणन्ति — उभयत्थापि पातिमोक्खसंवरो भगवता वुत्तो । पातिमोक्खसंवरो एव हि सीलं, इतरेसु इन्द्रियसंवरो छद्धाररक्खणमत्तमेव, आजीवपारिसुद्धि धम्मेन पच्चयुप्पादनमत्तमेव, पच्चयसन्निस्सितं पटिलद्धपच्चये “इदमत्थ”न्ति पच्चवेक्खित्वा परिभुज्जनमत्तमेव । निप्परियायेन पातिमोक्खसंवरोव सीलं । यस्स सो भिन्नो, सो सीसच्छिन्नो पुरिसो विय हत्थपादे “सेसानि रक्खिस्सती”ति न वत्तब्बो । यस्स पन सो अरोगो, अच्छिन्नसीसो विय पुरिसो, तानि पुन पाकतिकानि कत्वा रक्खितुं सक्कोति । तस्मा **सीलवा**ति इमिना पातिमोक्खसीलमेव उद्दिसित्वा तं वित्थारेतुं **“पातिमोक्खसंवरसंवृतो”**तिआदि वुत्तन्ति ।

तत्थ **पातिमोक्खन्ति** सिक्खापदसीलं । तज्झि यो नं पाति रक्खति, तं मोक्खेति मोचेति आपायिकादीहि दुक्खेहीति पातिमोक्खं । संवरणं संवरो, कायवाचाहि अवीतिक्कमो । पातिमोक्खमेव संवरो पातिमोक्खसंवरो, तेन संवृतो पिहितकायवाचोति **पातिमोक्खसंवरसंवृतो** । इदमस्स तस्मिं सीले पतिट्ठितभावपरिदीपनं । **विहरतीति** तदनुरूपविहारसमङ्गिभावपरिदीपनं । **आचारगोचरसम्पन्नोति** हेट्ठा पातिमोक्खसंवरस्स, उपरि विसेसानुयोगस्स च उपकारकधम्मपरिदीपनं । **अणुमत्तेसु वज्जेसु भयदस्सावीति** पातिमोक्खसीलतो अचवनधम्मतापरिदीपनं । **समादायाति** सिक्खापदानं अनवसेसतो आदानपरिदीपनं । **सिक्खतीति** सिक्खाय समङ्गिभावपरिदीपनं । **सिक्खापदेसूति** सिक्खितब्बधम्मपरिदीपनं ।

अपरो नयो — किलेसानं बलवभावतो पापकिरियाय सुकरभावतो पुज्जकिरियाय च दुक्करभावतो बहुक्खत्तुं अपायेसु पतनसीलोति पाती, पुथुज्जनो । अनिच्चताय वा भवादीसु कम्मवेगक्खित्तो घटियन्तं विय अनवट्ठानेन परिभमनतो गमनसीलोति पाती, मरणवसेन वा तम्हि तम्हि सत्तनिकाये अत्तभावस्स पातनसीलोति पाती, सत्तसन्तानो, चित्तमेव वा । तं पातिनं संसारदुक्खतो मोक्खेतीति पातिमोक्खो । चित्तस्स हि विमोक्खेन सत्तो विमुत्तो । “चित्तवोदाना विसुज्झन्ती”ति (सं० नि० ३.१००) “अनुपादाय आसवेहि चित्तं विमुत्त”न्ति (म० नि० २.२०६) च वुत्तं । अथ वा अविज्जादिना हेतुना संसारे पतति गच्छति पवत्ततीति पाति । “अविज्जानीवरणानं सत्तानं तण्हासंयोजनानं सन्धावतं संसरत”न्ति (सं० नि० २.१२४; ५.५२०) हि वुत्तं । तस्स पातिनो सत्तस्स तण्हादिसंक्किलेसत्तयतो मोक्खो एतेनाति पातिमोक्खो । “कण्ठेकालो”तिआदीनं वियस्स समाससिद्धि वेदितब्बा ।

अथ वा पातेति विनिपातेति दुक्खेति पाति, चित्तं । वुत्तज्झि “चित्तेन नीयति लोको, चित्तेन परिकस्सती”ति (सं० नि०

१.६२) । तस्स पातिनो मोक्खो एतेनाति पातिमोक्खो । पतति वा एतेन अपायदुक्खे संसारदुक्खे चाति पाति, तण्हादिसंकिलेसो । वुत्तञ्जि “तण्हा जनेति पुरिसं (सं० नि० १.५६-५७), तण्हादुतियो पुरिसो”ति (इतिवु० १५, १०५; चूळनि० पारायनानुगीतिगाथानिद्देस १०७) च आदि । ततो पातितो मोक्खोति पातिमोक्खो । अथ वा पतति एत्थाति पाति, छ अज्झत्तिकानि बाहिरानि च आयतनानि । वुत्तञ्जि “छसु लोको समुप्पन्नो, छसु कुब्बति सन्थव”न्ति (सं० नि० १.७०) । ततो छअज्झत्तिकबाहिरायतनसङ्घाततो पातितो मोक्खोति पातिमोक्खो । अथ वा पातो विनिपातो अस्स अत्थीति पाती, संसारो । ततो मोक्खोति पातिमोक्खो । अथ वा सब्बलोकाधिपतिभावतो धम्मिस्सरो भगवा पतीति वुच्चति, मुच्चति एतेनाति मोक्खो, पतिनो मोक्खो तेन पज्जत्तत्ताति पतिमोक्खो, पतिमोक्खो एव पातिमोक्खो । सब्बगुणानं वा मूलभावतो उत्तमङ्गेन पति च सो यथावुत्तङ्गेन मोक्खो चाति पतिमोक्खो, पतिमोक्खो एव पातिमोक्खो । तथा हि वुत्तं “पातिमोक्खन्ति मुखमेतं पमुखमेतं”न्ति (महाव० १३५) वित्थारो ।

अथ वा पइति पकारे, अतीति अच्चन्तत्थे निपातो । तस्मा पकारेहि अच्चन्तं मोक्खेतीति पातिमोक्खो । इदञ्जि सीलं सयं तदङ्गवसेन, समाधिसहितं पज्जासहितञ्च विक्खम्भनवसेन समुच्छेदवसेन च अच्चन्तं मोक्खेति मोचेतीति पातिमोक्खं । पति पति मोक्खोति वा पतिमोक्खो, तम्हा तम्हा वीतिक्कमितब्बदोसतो पति पच्चेकं मोक्खोति अत्थो । पतिमोक्खो एव पातिमोक्खो । मोक्खोति वा निब्बानं, तस्स मोक्खस्स पटिबिम्बभूतन्ति पतिमोक्खं । पातिमोक्खसीलसंवरो हि सूरियस्स अरुणुग्गमनं विय निब्बानस्स उदयभूतो तप्पटिभागो विय होति यथारहं किलेसनिब्बापनतोति पतिमोक्खं, पतिमोक्खं एव पातिमोक्खं । अथ वा मोक्खं पति वत्तति मोक्खाभिमुखन्ति पतिमोक्खं, पतिमोक्खमेव पातिमोक्खन्ति एवं तावेत्थ पातिमोक्खसदस्स अत्थो वेदितब्बो ।

संवरति पिदहति एतेनाति **संवरो**, पातिमोक्खमेव संवरोति **पातिमोक्खसंवरो** । अत्थतो पन ततो ततो वीतिक्कमितब्बतो विरतियो चेतना वा, तेन पातिमोक्खसंवरेन उपेतो समन्नागतो **पातिमोक्खसंवरसंवृतो**ति वुत्तो । वुत्तञ्जेतं विभङ्गे —

“इमिना पातिमोक्खसंवरेन उपेतो होति समुपेतो उपगतो समुपगतो सम्पन्नो समन्नागतो । तेन वुच्चति पातिमोक्खसंवरसंवृतो”ति (विभ० ५११) ।

विहरतीति इरियापथविहारेण विहरति, इरियति, वत्तति । **आचारगोचरसम्पन्नो**ति वेळुदानादिमिच्छाजीवस्स कायपागब्भियादीनञ्च अकरणेन, सब्बसो अनाचारं वज्जेत्वा “कायिको अवीतिक्कमो, वाचसिको अवीतिक्कमो”ति एवं वुत्तभिक्षुसाराप्पआचारसम्पत्तिया वेसियादिअगोचरं वज्जेत्वा पिण्डपातादिअत्थं उपसङ्कमितुं युत्तट्ठानसङ्घातगोचरेण च सम्पन्नत्ता आचारगोचरसम्पन्नो । अपिच यो भिक्षु सत्थरि सगारवो सप्पतिस्सो सब्बहचारीसु सगारवो सप्पतिस्सो हिरोत्तप्पसम्पन्नो सुनिवत्थो सुपारुतो पासादिकेन अभिक्कन्तेन पटिक्कन्तेन आलोकितेन विलोकितेन समिज्जितेन पसारितेन ओक्खित्तचक्खु इरियापथसम्पन्नो इन्द्रियेसु गुत्तद्वारो भोजने मत्तज्जू जागरियानुयुत्तो सतिसम्पज्जेन समन्नागतो अप्पिच्छो सन्तुट्ठो पविचित्तो असंसट्ठो आभिसमाचारिकेसु सक्कच्चकारी गरुचित्तीकारबहुलो विहरति, अयं वुच्चति आचारसम्पन्नो ।

गोचरो पन — उपनिस्सयगोचरो, आरक्खगोचरो, उपनिबन्धगोचरोति तिविधो । तत्थ दसकथावत्थुगुणसमन्नागतो वुत्तलक्खणो कल्याणमित्तो यं निस्साय असुतं सुणाति, सुतं परियोदपेति, कङ्कं वितरति, दिट्ठिं उजुक्कं करोति, चित्तं पसादेति, यस्स च अनुसिक्खन्तो सद्भाय वड्ढति, सीलेन, सुतेन, चागेन, पज्जाय वड्ढति, अयं **उपनिस्सयगोचरो** । यो भिक्षु

अन्तरघरं पविट्टो वीथिं पटिपन्नो ओक्खित्तचक्खु युगमत्तदस्सावी संवुतो गच्छति, न हत्थिं ओलोकेन्तो, न अस्सं, न रथं, न पत्तिं, न इत्थिं, न पुरिसं ओलोकेन्तो, न उद्धं ओलोकेन्तो, न अधो ओलोकेन्तो, न दिसाविदिसा पेक्खमानो गच्छति, अयं **आरक्खगोचरो**। **उपनिबन्धगोचरो** पन चत्तारो सतिपट्ठाना, यत्थ भिक्खु अत्तनो चित्तं उपनिबन्धति। वुत्तज्जेतं भगवता —

“को च, भिक्खवे, भिक्खुनो गोचरो सको पेत्तिको विसयो? यदिदं — चत्तारो सतिपट्ठाना”ति (सं० नि० ५.३७२)।

इति यथावुत्ताय आचारसम्पत्तिया इमाय च गोचरसम्पत्तिया समन्नागतत्ता **आचारगोचरसम्पन्नो**।

अणुमत्तेसु वज्जेसु भयदस्सावीति अप्पमत्तकेसु अणुप्पमाणेसु असञ्चिच्च

आपन्नसेखियअकुसलचित्तुप्पादादिभेदेसु वज्जेसु भयदस्सनसीलो। यो हि भिक्खु परमाणुमत्तं वज्जं अट्ठसट्ठियोजनसतसहस्सुब्बेधसिनेरुपब्बतराजसदिसं कत्वा पस्सति, योपि भिक्खु सब्बलहुकं दुब्भासितमत्तं पाराजिकसदिसं कत्वा पस्सति, अयं अणुमत्तेसु वज्जेसु भयदस्सावी नाम। **समादाय सिक्खति सिक्खापदेसूति** यं किञ्चि सिक्खापदेसु सिक्खितब्बं, तं सब्बेन सब्बं सब्बथा सब्बं अनवसेसं समादियित्वा सिक्खति वत्तति, पूरेतीति अत्थो। **इति कल्याणसीलोति** इमिना पकारेन कल्याणसीलो समानो। पुग्गलाधिट्ठानवसेन हि निद्विट्ठं सीलं “एवं खो, भिक्खवे, भिक्खु कल्याणसीलो होती”ति वुत्तपुग्गलाधिट्ठानवसेनेव निगमेत्वा “कल्याणधम्मो”ति एत्थ वुत्तधम्मे निद्विसितुकामेन “तेसं धम्मानं इदं सीलं अधिट्ठान”न्ति दस्सेतुं पुन “इति कल्याणसीलो”ति वुत्तं। **सत्तन्नं बोधिपक्खियानन्ति** आदि सब्बं हेट्ठा वुत्तत्थमेव। पुन **कल्याणसीलोति** आदि निगमनं।

गाथासु **दुक्कटन्ति** दुट्ठ कतं, दुच्चरितन्ति अत्थो। **हिरिमनन्ति** हिरिमन्तं हिरिसम्पन्नं, सब्बसो पापपवत्तिया जिगुच्छनसभावन्ति अत्थो। **हिरिमनन्ति** वा हिरिसहितचित्तं। हिरिग्गहणेनेव चेत्य ओत्तप्पम्पि गहितन्ति वेदितब्बं। हिरोत्तप्पग्गहणेन च सब्बसो दुच्चरिताभावस्स हेतुं दस्सेन्तो कल्याणसीलतं हेतुतो विभावेति। **सम्बोधीति** अरियज्जाणं, तं गच्छन्ति भजन्तीति **सम्बोधिगामिनो**, बोधिपक्खिकाति अत्थो। **अनुस्सदन्ति** रागुस्सदादिरहितं। “तथाविध”न्तिपि पठन्ति। “बोधिपक्खिकानं धम्मानं भावनानुयोगमनुयुत्तो”ति यथा यथा पुब्बे वुत्तं, तथाविधं तादिसन्ति अत्थो। **दुक्खस्साति** वट्ठदुक्खस्स, वट्ठदुक्खहेतुनो वा। **इधेव खयमत्तनोति** आसवक्खयाधिगमेन अत्तनो वट्ठदुक्खहेतुनो समुदयपक्खयस्स किलेसगणस्स इधेव इमस्मिंयेव अत्तभावे खयं अनुप्पादं पजानाति, वट्ठदुक्खस्सेव वा इधेव चरिमकचित्तनिरोधेन खयं खीणभावं पजानाति। **तेहि धम्मेहि सम्पन्नन्ति** तेहि यथावुत्तसीलादिधम्मेहि समन्नागतं। **असितन्ति** तण्हादिट्ठिनिस्सयानं पहीनत्ता असितं, कत्थचि अनिस्सितं। **सब्बलोकस्साति** सब्बस्मिं सत्तलोके। सेसं वुत्तनयमेव।

अट्ठमसुत्तवण्णना निट्ठिता।

९. दानसुत्तवण्णना

९८. नवमे दानन्ति दातब्बं, सवत्थुका वा चेतना दानं, सम्पत्तिपरिच्चागस्सेतं अधिवचनं। **आमिसदानन्ति** चत्तारो पच्चया देय्यभाववसेन आमिसदानं नाम। ते हि तण्हादीहि आमिसितब्बतो आमिसन्ति वुच्चन्ति। तेसं वा परिच्चागचेतना

आमिसदानं । **धम्मदानं** इधेकच्चो “इमे धम्मा कुसला, इमे धम्मा अकुसला, इमे धम्मा सावज्जा, इमे धम्मा अनवज्जा, इमे विज्जुगरहिता, इमे विज्जुप्पसत्था; इमे समत्ता समादिन्ना अहिताय दुक्खाय संवत्तन्ति, इमे हिताय सुखाय संवत्तन्ती”ति कुसलाकुसलकम्मपथे विभजन्तो कम्मकम्मविपाके इधलोकपरलोके पच्चक्खतो दस्सेन्तो विय पाकटं करोन्तो अकुसलेहि धम्मोहि निवत्तापेन्तो, कुसलेसु धम्मेषु पटिद्वापेन्तो, धम्मं देसेति, इदं धम्मदानं । यो पन “इमे धम्मा अभिज्जेय्या, इमे परिज्जेय्या, इमे पहातब्बा, इमे सच्छिकातब्बा, इमे भावेतब्बा”ति सच्चानि विभावेन्तो अमताधिगमाय पटिपत्तिधम्मं देसेति, इदं सिखाप्पत्तं धम्मदानं नाम । **एतदग्गन्ति** एतं अगगं । **यदिदन्ति** यं इदं धम्मदानं वुत्तं, एतं इमेसु द्वीसु दानेसु अगगं सेट्ठं उत्तमं । विवट्ठगामिधम्मदानज्झि निस्साय सब्बानत्थतो परिमुच्चति, सकलं वट्ठदुक्खं अतिक्कमति । लोकियं पन धम्मदानं सब्बेसं दानानं निदानं सब्बसम्पत्तीनं मूलं । तेनाह —

“सब्बदानं धम्मदानं जिनाति, सब्बरसं धम्मरसो जिनाति ।

सब्बरतिं धम्मरती जिनाति, तण्हक्खयो सब्बदुक्खं जिनाती”ति ॥ (ध० प० ३५४) —

अभयदानमेत्थ धम्मदानेनेव सङ्गहितन्ति दट्ठब्बं ।

साधारणभोगिताधिप्पायेन अत्तना परिभुज्जितब्बतो चतुपच्चयतो सयमेव अभुज्जित्वा परेसं संविभजनं **आमिससंविभागो** । साधारणभोगिताधिप्पायेनेव अत्तना विदितस्स अधिगतस्स धम्मस्स अप्पोस्सुक्को अहुत्वा परेसं उपदेसो **धम्मसंविभागो** । चतूहि पच्चयेहि चतूहि च सङ्गहवत्थूहि परेसं अनुगगण्हनं अनुकम्पनं **आमिसानुगगहो** । वुत्तनयेनेव धम्मेन परेसं अनुगगण्हनं अनुकम्पनं **धम्मानुगगहो** । सेसं वुत्तनयमेव ।

गाथासु **यमाहु दानं परमन्ति** यं दानं चित्तखेतदेय्यधम्मानं उळारभावेन परमं उत्तमं, भोगसम्पत्तिआदीनं वा पूरणतो फलनतो, परस्स वा लोभमच्छरियादिकस्स पटिपक्खस्स मदनतो हिंसनतो “परम”न्ति बुद्धा भगवन्तो आहु । **अनुत्तरन्ति** यं दानं चेतनादिसम्पत्तिया सातिसयपवत्तिया अगगभावेन अगगविपाकत्ता च उत्तररहितं अनुत्तरभावसाधनं चाति आहु । यं **संविभागन्ति** एत्थापि “परमं अनुत्तर”न्ति पदद्वयं आनेत्वा योजेतब्बं । **अवण्णयीति** कित्तियि, “भोजनं, भिक्खवे, ददमानो दायको पटिग्गाहकानं पच्च ठानानि देती”तिआदिना (अ० नि० ५.३७), “एवं चे, भिक्खवे, सत्ता जानेय्युं दानसंविभागस्स विपाक”न्तिआदिना (इतिवु० २६) च पसंसयि । यथा पन दानं संविभागो च परमं अनुत्तरज्ज्य होति, तं दस्सेतुं “**अगग्गी**”तिआदि वुत्तं । तत्थ **अगग्गी**ति सीलादिगुणविसेसयोगेन सेट्ठे अनुत्तरे पुज्जक्खेत्ते सम्मासम्बुद्धे अरियसङ्गे च । **पसन्नचित्तो**ति कम्मफलसद्भाय रतनत्तयसद्भाय च चित्तं पसादेन्तो ओकप्पेन्तो । चित्तसम्पत्तिया हि खेत्तसम्पत्तिया च परित्तेपि देय्यधम्मे दानं महानुभावं होति महाजुतिकं महाविप्फारं । वुत्तज्हेतं —

“नत्थि चित्ते पसन्नम्हि, अप्पका नाम दक्खिणा ।

तथागते वा सम्बुद्धे, अथ वा तस्स सावके”ति ॥ (वि० व० ८०४; नेत्ति० ९५) ।

विज्जूति सप्पज्जो । **पजानन्ति** सम्मदेव दानफलं दानानिसंसं पजानन्तो । **को न यजेथ काले**ति युत्तप्पत्तकाले को नाम दानं न ददेय्य? सद्भा, देय्यधम्मो, पटिग्गाहकाति इमेसं तिण्णं सम्मुखिभूतकालेयेव हि दानं सम्भवति, न अज्जथा, पटिग्गाहकानं वा दातुं युत्तकाले ।

एवं पठमगाथाय आमिसदानसंविभागानुगगहे दस्सेत्वा इदानि धम्मदानसंविभागानुगगहे दस्सेतुं “**ये चेव**

भासन्ती”ति दुतियगाथमाह । तत्थ उभयन्ति “भासन्ति सुणन्ती”ति वुत्ता देसका पटिग्गाहकाति उभयं । अयं पनेत्थ सङ्खेपत्थो — ये **सुगतस्स** भगवतो **सासने** सद्धम्मे **पसन्नचित्ता** विमुत्तायतनसीसे उत्वा देसेन्ति पटिग्गहन्ति च, तेसं देसकपटिग्गाहकानं सो धम्मदानधम्मसंविभागधम्मानुगहसङ्घातो **अत्थो** । परमत्थसाधनतो **परमो** । तण्हासंकिलेसादिसब्बसंकिलेसमलविसोधनेन **विसुज्झति** । कीदिसानं? ये **अप्पमत्ता सुगतस्स सासने** । ये च —

“सब्बपापस्स अकरणं, कुसलस्स उपसम्पदा ।

सचित्तपरियोदपनं, एतं बुद्धान सासनं”न्ति ॥ (दी० नि० २.९०; ध० प० १८३) —

सङ्खेपतो एवं पकासिते सम्मासम्बुद्धस्स सासने ओवादे अनुसिद्धियं अप्पमत्ता अधिसीलसिक्खादयो सक्कच्चं सम्पादेन्ति । तेसं **विसुज्झति**, अरहत्तफलविसुद्धिया अतिविय वोदायतीति ।

नवमसुत्तवण्णना निट्ठिता ।

१०. तेविज्जसुत्तवण्णना

११. दसमे **धम्मेना**ति जायेन, सम्मापटिपत्तिसङ्घातेन हेतुना कारणेन । याय हि पटिपदाय तेविज्जो होति, सा पटिपदा इध धम्मोति वेदितब्बा । का पन सा पटिपदाति? चरणसम्पदा च विज्जासम्पदा च । **तेविज्जन्ति** पुब्बेनिवासानुस्सतिजाणादीहि तीहि विज्जाहि समन्नागतं । **ब्राह्मणन्ति** बाहितपापब्राह्मणं । **पञ्जापेमी**ति “ब्राह्मणो”ति जानापेमि पतिट्ठपेमि । **नाञ्जं लपितलापनमत्तेना**ति अञ्जं जातिमत्तब्राह्मणं अट्ठकादीहि लपितमत्तविप्पलपनमत्तेन ब्राह्मणं न पञ्जापेमीति । अथ वा **लपितलापनमत्तेना**ति मन्तानं अज्झेन अज्झापनमत्तेन । उभयथापि यं पन ब्राह्मणा सामवेदादिवेदत्तय अज्झेनेन तेविज्जं ब्राह्मणं वदन्ति, तं पटिक्खपति । भगवता हि “परमत्थतो अतेविज्जं ब्राह्मणंयेव चेते भोवादिनो अविज्जानिवुता ‘तेविज्जो ब्राह्मणो’ति वदन्ति, एवं पन तेविज्जो ब्राह्मणो होती”ति दस्सनत्थं तथा बुज्जनकानं पुग्गलानं अज्झासयेन अयं देसना आरब्धा ।

तत्थ यस्मा विज्जासम्पन्नो चरणसम्पन्नोयेव होति चरणसम्पदाय विना विज्जासम्पत्तिया अभावतो, तस्मा चरणसम्पदं अन्तोगधं कत्वा विज्जासीसेनेव ब्राह्मणं पञ्जापेतुकामो “**धम्मेनाहं, भिक्खवे, तेविज्जं ब्राह्मणं पञ्जापेमी**”ति देसनं समुट्ठापेत्वा “**कथञ्चाहं, भिक्खवे, धम्मेन तेविज्जं ब्राह्मणं पञ्जापेमी**”ति कथेतुकम्यताय पुच्छं कत्वा पुग्गलाधिष्ठानाय देसनाय विज्जत्तयं विभजन्तो “**इध, भिक्खवे, भिक्खू**”ति आदिमाह ।

तत्थ **अनेकविहितन्ति** अनेकविधं, अनेकेहि वा पकारेहि पवत्तितं, संवण्णितन्ति अत्थो । **पुब्बेनिवासन्ति** समनन्तरातीतभवं आदिं कत्वा तत्थ तत्थ निवुत्थक्खन्धसन्तानं । **निवुत्थन्ति** अज्झावुत्थं अनुभूतं, अत्तनो सन्ताने उप्पज्जित्वा निरुद्धं, निवुत्थधम्मं वा निवुत्थं, गोचरनिवासेन निवुत्थं, अत्तनो विज्जाणेन विज्जातं परविज्जाणविज्जातम्पि वा छिन्नवटुमकानुस्सरणादीसु । **अनुस्सरतीति** “एकम्पि जातिं द्वेपि जातियो”ति एवं जातिपटिपाटिवसेन अनुगन्त्वा सरति, अनुदेव वा सरति, चित्ते अभिनिन्नामिते परिकम्मसमनन्तरं सरति ।

सेय्यथिदन्ति आरद्धप्पकारदस्सनत्थे निपातो । तेनेव य्वायं पुब्बेनिवासो आरब्धो होति, तस्स पकारं दस्सेन्तो “**एकम्पि जाति**”न्ति आदिमाह । तत्थ **एकम्पि जातिन्ति** एकम्पि पटिसन्धिमूलकं चुतिपरियोसानं एकभवपरियापन्नं खन्धसन्तानं । एस नयो द्वेपि **जातियो**ति आदीसु । **अनेकेपि संवट्टकप्पे**ति आदीसु पन परिहायमानो कप्पो संवट्टकप्पो,

वट्टमानो विवट्टकप्पो । तत्थ संवट्ठेन संवट्ठट्ठायी गहितो होति तम्मूलकत्ता, विवट्ठेन च विवट्ठट्ठायी । एवञ्चि सति यानि तानि “चत्तारिमानि, भिक्खवे, कप्पस्स असङ्ख्येय्यानि । कतमानि चत्तारि? संवट्ठो, संवट्ठट्ठायी, विवट्ठो, विवट्ठट्ठायी”ति (अ० नि० ४.१५६) वुत्तानि चत्तारि असङ्ख्येय्यानि, तानि परिगहितानि होन्ति ।

तत्थ तयो संवट्ठा — तेजोसंवट्ठो, आपोसंवट्ठो, वायोसंवट्ठोति । तिस्सो संवट्ठसीमा — आभस्सरा, सुभकिण्हा, वेहप्फलाति । यदा कप्पो तेजेन संवट्ठति, आभस्सरतो हेट्ठा अग्गिना ड्य्हति । यदा उदकेन संवट्ठति, सुभकिण्हतो हेट्ठा उदकेन विलीयति । यदा वातेन संवट्ठति, वेहप्फलतो हेट्ठा वातेन विट्ठंसियति । वित्थारतो पन कोटिसतसहस्सचक्कवाळं एकतो विनस्सति । इति एवरूपो अयं पुब्बेनिवासं अनुस्सरन्तो भिक्खु अनेकेपि संवट्ठकप्पे अनेकेपि विवट्ठकप्पे अनेकेपि संवट्ठिविवट्ठकप्पे अनुस्सरति । कथं? **अमुत्रासिन्ति** आदिना नयेन ।

तत्थ **अमुत्रासिन्ति** अमुम्हि संवट्ठकप्पे अमुम्हि भवे वा योनिया वा गतिया वा विज्जाणड्डितिया वा सत्तावासे वा सत्तनिकाये वा अहमहोसिं । **एवंनामो**ति तिस्सो वा फुस्सो वा । **एवंगोत्तो**ति गोतमो वा कस्सपो वा । **एवंवण्णो**ति ओदातो वा सामो वा । **एवमाहारो**ति सालिमंसोदनाहारो वा पवत्तफलभोजनो वा । **एवंसुखदुक्खप्पटिसंवेदी**ति अनेकप्पकारानं कायिकचेतसिकानं सामिसनिरामिसादिप्पभेदानं वा सुखदुक्खानं पटिसंवेदी । **एवमायुपरियन्तो**ति एवं वस्ससतपरिमाणायुपरियन्तो वा चतुरासीतिकप्पसतसहस्सपरिमाणायुपरियन्तो वा । **सो ततो चुतो अमुत्र उदपादिति** सोहं ततो भवतो योनितो गतितो विज्जाणड्डितितो सत्तावासतो सत्तनिकायतो वा चुतो पुन अमुकस्मिं नाम भवे योनिया गतिया विज्जाणड्डितिया सत्तावासे सत्तनिकाये वा उदपादिं । **तत्रापासिन्ति** अथ तत्रपि भवे योनिया गतिया विज्जाणड्डितिया सत्तावासे सत्तनिकाये वा पुन अहोसिं । **एवंनामो**ति आदि वुत्तनयमेव ।

अथ वा यस्मा “अमुत्रासि”न्ति इदं अनुपुब्बेन आरोहन्तस्स अत्तनो अभिनीहारानुरूपं यथाबलं सरणं, “सो ततो चुतो”ति पटिनिवत्तन्तस्स पच्चवेक्खणं, तस्मा “इधूपपन्नो”ति इमिस्सा इधूपपत्तिया अनन्तरं “अमुत्र उदपादि”न्ति वुत्तं । **तत्रापासिन्ति** तत्रपि भवे...पे०... सत्तनिकाये वा आसिं । **एवंनामो**ति दत्तो वा मित्तो वा, **एवंगोत्तो**ति वासेट्ठो वा कस्सपो वा । **एवंवण्णो**ति काळो वा ओदातो वा । **एवमाहारो**ति सुधाहारो वा सालिओदनादिआहारो वा । **एवंसुखदुक्खप्पटिसंवेदी**ति दिब्बसुखप्पटिसंवेदी वा मानुससुखदुक्खप्पटिसंवेदी वा । **एवमायुपरियन्तो**ति एवं तंतं परमायुपरियन्तो । **सो ततो चुतो**ति सोहं ततो भवादितो चुतो । **इधूपपन्नो**ति इध इमस्मिं चरिमभवे मनुस्सो हुत्वा उपपन्नो निब्बत्तो ।

इतीति एवं । **साकारं सउद्देसन्ति** नामगोत्तादिवसेन सउद्देसं, वण्णादिवसेन साकारं । नामगोत्तेन हि सत्ता “तिस्सो गोतमो”ति उद्दिसीयन्ति, वण्णादीहि “सामो ओदातो”ति नानत्ततो पज्जायन्ति । तस्मा नामगोत्तं उद्देसो, इतरे आकारा । **अयमस्स पठमा विज्जा अधिगताति** अयं इमिना भिक्खुना पठमं अधिगमवसेन पठमा, विदितकरणट्ठेन विज्जा अधिगता सच्छिकता होति । किं पनायं विदितं करोति? पुब्बेनिवासं । **अविज्जाति** तस्सेव पुब्बेनिवासस्स अविदितकरणट्ठेन तस्स पटिच्छादकमोहो वुच्चति । **तमो**ति स्वेव मोहो पटिच्छादकट्ठेन तमोति वुच्चति । **आलोको**ति सा एव विज्जा ओभासकरणट्ठेन आलोको । एत्थ च विज्जा अधिगताति अयं अत्थो, सेसं पसंसावचनं । योजना पनेत्थ — अयं खो तेन भिक्खुना विज्जा अधिगता, तस्स अधिगतविज्जस्स अविज्जा विहता, विनट्ठाति अत्थो । कस्मा? यस्मा विज्जा उप्पन्नाति । सेसपदद्वयेपि एसेव नयो ।

यथा तन्ति एत्थ यथाति ओपम्मत्थे, तन्ति निपातमत्तं । सतिया अविप्पवासेन **अप्पमत्तस्स** । वीरियातापेन **आतापिनो** । काये च जीविते च अनपेक्खताय **पहितत्तस्स** पेसितचित्तस्साति अत्थो । इदं वुत्तं होति — यथा अप्पमत्तस्स

आतापिनो पहितत्तस्स विहरतो अविज्जा विहज्जेय्य, विज्जा उप्पज्जेय्य, तमो विहज्जेय्य, आलोको उप्पज्जेय्य; एवमेव तस्स भिक्खुनो अविज्जा विहता, विज्जा उप्पन्ना, तमो विहतो, आलोको उप्पन्नो, तस्स पधानानुयोगस्स अनुरूपमेव फलं लभित्वा विहरतीति ।

दिब्बेन चक्खुनाति एत्थ यं वत्तब्बं, तं हेट्ठा वुत्तमेव । **विसुद्धेना**ति चुतूपपातदस्सनेन दिट्ठिविसुद्धिहेतुभावतो विसुद्धं । यो हि चुतिमत्तमेव पस्सति न उपपातं, सो उच्छेददिट्ठिं गण्हाति । यो उपपातमत्तमेव पस्सति न चुतिं, सो नवसत्तपातुभावदिट्ठिं गण्हाति । यो पन तदुभयं पस्सति, सो यस्मा दुविधम्मि तं दिट्ठिगतं अतिवत्तति, तस्मास्स तं दस्सनं दिट्ठिविसुद्धिहेतु होति, तदुभयम्पायं बुद्धपुत्तो पस्सति । तेन वुत्तं “चुतूपपातदस्सनेन दिट्ठिविसुद्धिहेतुभावतो विसुद्धं”न्ति । एकादसउपक्विलेसविरहतो वा **विसुद्धं** । यथाह “विचिकिच्छा चित्तस्स उपक्विलेसोति — इति विदित्वा विचिकिच्छं चित्तस्स उपक्विलेसं पजहिं, अमनसिकारो... पे... थिनमिद्धं, छम्भितत्तं, उप्पिल्लं, दुट्ठुल्लं, अच्चारद्धवीरियं, अतिलीनवीरियं, अभिजप्पा, नानत्तसज्जा, अतिनिज्झायितत्तं रूपानं चित्तस्स उपक्विलेसो”ति (म० नि० ३.२४२) एवं वुत्तेहि एकादसहि उपक्विलेसेहि अनुपक्विलिट्ठत्ता **विसुद्धं** । मनुस्सूपचारं अतिक्कमित्वा रूपदस्सनेन **अतिक्कन्तमानुसकं**, मंसचक्खुं वा अतिक्कन्तत्ता अतिक्कन्तमानुसकं । तेन दिब्बेन चक्खुना विसुद्धेन अतिक्कन्तमानुसकेन । **सत्ते पस्सतीति** मनुस्समंसचक्खुना विय सत्ते पस्सति दक्खति आलोकेति ।

चवमाने उपपज्जमानेति एत्थ चुतिकखणे उपपत्तिकखणे वा दिब्बचक्खुनापि दट्ठं न सक्का । ये पन आसन्नचुतिका इदानीं चविस्सन्ति, ते चवमाना । ये च गहितपटिसन्धिका सम्पत्तिनिब्बत्ता वा, ते उपपज्जमानाति अधिप्पेता । ते एवरूपे चवमाने उपपज्जमाने च पस्सतीति दस्सेति । **हीने**ति मोहनस्सन्दयुत्तत्ता हीनानं जातिकुलभोगादीनं वसेन हीळिते परिभूते । **पणीते**ति अमोहनस्सन्दयुत्तत्ता तब्बिपरीते । **सुवण्णे**ति अदोसनिस्सन्दयुत्तत्ता इट्ठकन्तमनापवण्णयुत्ते । **दुब्बण्णे**ति दोसनिस्सन्दयुत्तत्ता अनिट्ठकन्तमनापवण्णयुत्ते । अभिरूपे विरूपेतिपि अत्थो । **सुगते**ति सुगतिगते, अलोभनिस्सन्दयुत्तत्ता वा अट्ठे महद्धने । **दुग्गते**ति दुग्गतिगते, लोभनिस्सन्दयुत्तत्ता वा दलिद्धे अप्पन्नपानभोजने । **यथाकम्मूपगते**ति यं यं कम्मं उपचितं, तेन तेन उपगते । तत्थ पुरिमेहि “चवमाने”ति आदीहि दिब्बचक्खुकिच्चं वुत्तं, इमिना पन पदेन यथाकम्मूपगजाणकिच्चं ।

तस्स च जाणस्स अयं उप्पत्तिकमो — इध भिक्खु हेट्ठा निरयाभिमुखं आलोकं वट्ठेत्वा नेरयिके सत्ते पस्सति महन्तं दुक्खं अनुभवमाने, इदं दस्सनं दिब्बचक्खुजाणकिच्चमेव । सो च एवं मनसि करोति “किं नु खो कम्मं कत्वा इमे सत्ता एतं दुक्खं अनुभवन्ती”ति, अथस्स “इदं नाम कत्वा”ति तंकम्माम्मणं जाणं उप्पज्जति । तथा उपरि देवलोकाभिमुखं आलोकं वट्ठेत्वा नन्दनवनमिस्सकवनफारुसकवनादीसु सत्ते पस्सति दिब्बसम्पत्तिं अनुभवमाने, इदम्पि दस्सनं दिब्बचक्खुजाणकिच्चमेव । सो एवं मनसि करोति “किं नु खो कम्मं कत्वा इमे सत्ता एतं सम्पत्तिं अनुभवन्ती”ति? अथस्स “इदं नाम कत्वा”ति तंकम्माम्मणं जाणं उप्पज्जति, इदं यथाकम्मूपगजाणं नाम । इमस्स विसुं परिकम्मं नाम नत्थि । यथा चिमस्स, एवं अनागतंसजाणस्सपि । दिब्बचक्खुपादकानेव हि इमानि दिब्बचक्खुना सहेव इज्झन्ति । **कायदुच्चरितेना**ति आदीसु यं वत्तब्बं, तं हेट्ठा वुत्तनयमेव । इध **विज्जा**ति दिब्बचक्खुजाणविज्जा । **अविज्जा**ति सत्तानं चुतिपटिसन्धिच्छादिका अविज्जा । सेसं वुत्तनयमेव ।

ततियवारे **विज्जा**ति अरहत्तमग्गजाणविज्जा । **अविज्जा**ति चतुसच्चप्पटिच्छादिका अविज्जा । सेसं हेट्ठा वुत्तनयत्ता सुविज्जेय्यमेव । **एवं खो**ति आदि निगमनं ।

गाथासु अयं सङ्ख्येपत्थो — यो यथावुत्तं पुब्बेनिवासं अवेति अवगच्छति, वुत्तनयेन पाकटं कत्वा जानाति । “योवेदी”तिपि पाठो, यो अवेदि विदितं कत्वा ठितोति अत्थो । छब्बीसतिदेवलोकसङ्घातं सगं चतुब्बिधं अपायञ्च वुत्तनयेनेव दिब्बचक्खुना पस्सति । अथोति ततो परं जातिक्खयसङ्घातं अरहत्तं निब्बानमेव वा पत्तो अधिगतो । ततो एव अभिज्जा अभिविसिद्धाय मग्गपज्जाय जानितब्बं चतुसच्चधम्मं जानित्वा किच्चवोसानेन वोसितो निट्ठानप्पत्तो । मोनेय्यधम्मसमन्नागमेन मुनि, खीणासवो यस्मा एताहि यथावुत्ताहि तीहि विज्जाहि समन्नागतत्ता ततो ततियविज्जाय सब्बथा बाहितपापत्ता च तेविज्जो ब्राह्मणो नाम होति । तस्मा तमेव अहं तेविज्जं ब्राह्मणं वदामि, अज्जं पन लपितलापनं यजुआदिमन्तपदानं अज्झापनपरं तेविज्जं ब्राह्मणं न वदामि, तेविज्जोति तं न कथेमीति ।

इति इमस्मिं वग्गे दुतियसुत्ते वट्ठं कथितं, पञ्चमअट्ठमदसमसुत्तेसु विवट्ठं कथितं, इतरेसु वट्ठविवट्ठं कथितन्ति वेदितब्बं ।

दसमसुत्तवण्णना निट्ठिता ।

पञ्चमवग्गवण्णना निट्ठिता ।

परमत्थदीपनिया खुट्ठकनिकाय-अट्ठकथाय

इतिवुत्तकस्स तिकनिपातवण्णना निट्ठिता ।

४. चतुक्कनिपातो

१. ब्राह्मणधम्मयागसुत्तवण्णना

१००. चतुक्कनिपातस्स पठमे अहन्ति अत्तनिद्देशो । यो हि परो न होति, सो नियकज्झत्तसङ्घातो अत्ता “अह”न्ति वुच्चति । अस्मीति पटिजानना । यो परमत्थब्राह्मणभावो “अह”न्ति वुच्चमानो, तस्स अत्तनि अत्थिभावं पटिजानन्तो हि सत्था “अस्मी”ति अवोच । “अहमस्मी”ति च यथा “अहमस्मि ब्रह्मा महाब्रह्मा, सेय्योहमस्मी”ति च अप्पहीनदिट्ठिमानानुसया पृथुज्जना अत्तनो दिट्ठिमानमज्जनाभिनिवेसवसेन अभिवदन्ति, न एवं वुत्तं । सब्बसो पन पहीनदिट्ठिमानानुसयो भगवा समज्जं अनतिधावन्तो लोकसमज्जानुरोधेन वेनेय्यसन्तानेसु धम्मं पतिट्ठपेन्तो केवलं तादिसस्स गुणस्स अत्तनि विज्जमानतं पटिजानन्तो “अहमस्मी”ति आह । ब्राह्मणोति बाहितपापत्ता ब्रह्मस्स च अणनतो ब्राह्मणो । अयञ्हेत्थ अत्थो — भिक्खवे, अहं परमत्थतो ब्राह्मणोस्मीति । भगवा सब्बाकारपरिपुण्णस्स दानसंयमादिवतसमादानस्स निरवसेसाय तपचरियाय पारं गतो सम्मदेव वुसितब्रह्मचरियवासो सकलवेदन्तगू सुविसुद्धविज्जाचरणो सब्बथा निन्हातपापमलो अनुत्तरस्स अरियमग्गसङ्घातस्स ब्राह्मणस्स वत्ता पवत्ता, सुपरिसुद्धस्स च सासनब्रह्मचरियस्स पवेदेता, तस्मा सब्बसो बाहितपापत्ता ब्रह्मस्स च अणनतो कथनतो परमत्थेन ब्राह्मणोति वुच्चति ।

इति भगवा सदेवके लोके अत्तनो अनुत्तरं ब्राह्मणभावं पवेदेत्वा यानि तानि ब्राह्मणदानादीनि छ कम्मानि ब्राह्मणस्स पज्जापेन्ति, तेसम्पि सुपरिसुद्धानं उक्कंसतो अत्तनि संविज्जमानतं दस्सेतुं “याचयोगो”तिआदिमाह ।

तत्थ याचयोगोति याचेहि युत्तो । याचन्तीति याचा, याचका, ते पनेत्थ वेनेय्या वेदितब्बा । ते हि “देसेतु, भन्ते भगवा,

धम्मं; देसेतु, सुगतो, धम्मं'न्ति भगवन्तं उपसङ्कमित्र्वा धम्मदेसनं याचन्ति । भगवा च तेसं इच्छाविधातं अकरोन्तो यथारुचि धम्मं देसेन्तो धम्मदानं देतीति याचयोगो, सदा सब्बकालं तेहि अविरहितो । अथ वा **याचयोगो**ति याचनयोगो, अधिप्पायपूरणतो याचितुं युत्तोति अत्थो “याजयोगो”तिपि पाठो । तत्थ याजो वुच्चति महादानं, यिट्ठन्ति अत्थो । इध पन धम्मदानं वेदितब्बं, याजे नियुत्तोति याजयोगा । **सदा**ति सब्बदा, अनवरतप्पवत्तसद्दम्ममहादानोति अत्थो । अथ वा याजेन योजेतीतिपि **याजयोगो** । तिविधदानसङ्घातेन याजेन सत्ते यथारहं योजेति, तत्थ दाने नियोजेतीति अत्थो । “याजयोगो सतत”न्तिपि पठन्ति । **पयतपाणी**ति परिसुद्धहत्थो । यो हि दानाधिमुत्तो आमिसदानं देन्तो सक्कच्चं सहत्थेन देय्यधम्मं दातुं सदा धोतहत्थोयेव होति, सो “पयतपाणी”ति वुच्चति । भगवापि धम्मदानाधिमुत्तो सक्कच्चं सब्बकालं धम्मदाने युत्तप्पयुत्तोति कत्वा वुत्तं “पयतपाणी”ति । “सदा”ति च पदं इमिनापि सद्धिं योजेतब्बं “सदा पयतपाणी”ति । अविभागेन हि सत्था वेनेय्यलोकस्स सद्दम्मदानं सदा सब्बकालं पवत्तेन्तो तत्थ युत्तप्पयुत्तो हुत्वा विहरति ।

अपरो नयो — योगो वुच्चति भावना । यथाह “योगा वे जायते भूरी”ति (ध० प० २८२) । तस्मा **याजयोगो**ति याजभावनं, परिच्चागभावनं अनुयुत्तोति अत्थो । भगवा हि अभिसम्बोधितो पुब्बे बोधिसत्तभूतोपि करुणासमुस्साहितो अनवसेसतो दानं परिब्रूहेन्तो तत्थ उक्कंसपारमिप्पत्तो हुत्वा अभिसम्बोधिं पापुणि, बुद्धो हुत्वापि तिविधं दानं परिब्रूहेसि विसेसतो धम्मदानं, परेपि तत्थ नियोजेसि । तथा हि सो वेनेय्ययाचकानं कस्सचि सरणानि अदासि, कस्सचि पञ्च सीलानि, कस्सचि दस सीलानि, कस्सचि चतुपारिसुद्धिसीलं, कस्सचि धुतधम्मे, कस्सचि चत्तारि ज्ञानानि, कस्सचि अट्ठ समापत्तियो, कस्सचि पञ्चाभिज्जायो, चत्तारो मग्गे, चत्तारि सामञ्जफलानि, तिस्सो विज्जा, चतस्सो पटिसम्भिदाति एवमादिलोकियलोकुत्तरभेदं गुणधनं धम्मदानवसेन यथाधिप्पायं देन्तो परे च “देथा”ति नियोजेन्तो परिच्चागभावनं परिब्रूहेसि । तेन वुत्तं “परिच्चागभावनं अनुयुत्तो”ति ।

पयतपाणीति वा आयतपाणी, हत्थगतं किञ्चि दातुं “एहि गण्हा”ति पसारितहत्थो विय आचरियमुट्ठिं अकत्वा सद्दम्मदाने युत्तप्पयुत्तोति अत्थो । **पयतपाणी**ति वा उस्साहितहत्थो, आमिसदानं दातुं उस्साहितहत्थो विय धम्मदाने कतुस्साहोति अत्थो । **अन्तिमदेहधरो**ति ब्रह्मचरियवसेन ब्राह्मणकरणानं धम्मानं पारिपूरिया पच्छिमत्तभावधारी । अवुसितवतो हि वसलकरणानं धम्मानं अप्पहानेन वसलादिसमञ्जा गति आयतिं गम्भसेय्या सिया । तेन भगवा अत्तनो अच्चन्तवुसितब्राह्मणभावं दस्सेति । **अनुत्तरो भिसक्को सल्लकत्तो**ति दुत्तिकिच्छस्स वट्ठदुक्खरोगस्स तिकिच्छनतो उत्तमो भिसक्को, अज्जेहि अनुद्धरणीयानं रागादिसल्लानं कन्तनतो समुच्छेदवसेन समुद्धरणतो उत्तमो सल्लकन्तनवेज्जो । इमिना निप्परियायतो ब्राह्मणकरणानं धम्मानं अत्तनि पतिट्ठितानं परसन्ततियं पतिट्ठापनेन परेसम्पि ब्राह्मणकरणमाह ।

तस्स मे तुम्हे पुत्ताति तस्स एवरूपस्स मम तुम्हे, भिक्खवे, पुत्ता अत्रजा होथ । **ओरसा**ति उरसि सम्बन्धा । यथा हि सत्तानं ओरसपुत्ता अत्रजा विसेसेन पितुसन्तकस्स दायज्जस्स भागिनो होन्ति, एवमेतेपि अरियपुग्गला सम्मासम्बुद्धस्स धम्मस्सवनन्ते अरियाय जातिया जाता । तस्स सन्तकस्स विमुत्तिसुखस्स अरियधम्मरतनस्स च एकंसभागियताय ओरसा । अथ वा भगवतो धम्मदेसनानुभावेन अरियभूमिं ओक्कममाना ओक्कन्ता च अरियसावका सत्थु उरे वायामज्जिताभिजातिताय निप्परियायेन “ओरसपुत्ता”ति वत्तब्बतं अरहन्ति । तथा हि ते भगवता आसयानुसयचरियाधिमुत्तिआदिवोलोकनेन वज्जानुचिन्तनेन च हृदये कत्वा वज्जतो निवारेत्वा अनवज्जे पतिट्ठपेन्तेन सीलादिधम्मसरीरपोसनेन संवट्ठिता । **मुखतो जाता**ति मुखतो जाताय धम्मदेसनाय अरियाय जातिया जातत्ता मुखतो जाता । अथ वा अनञ्जसाधारणतो सब्बस्स कुसलधम्मस्स मुखतो पातिमोक्खतो वुट्ठानगामिनिविपस्सनासङ्घाततो विमोक्खमुखतो वा अरियमग्गजातिया जातातिपि मुखतो जाता । सिक्खत्तयसङ्गहे सासनधम्मे अरियमग्गधम्मे वा जाताति

धम्मजा । तेनेव धम्मेन निम्मिता मापिताति **धम्मनिम्मिता** । सतिधम्मविचयादि **धम्मदायादा**, न लाभसक्कारादि **आमिसदायादा**, धम्मदायादा नो आमिसदायादा होथाति अत्थो ।

तत्थ धम्मो दुविधो — निप्परियायधम्मो, परियायधम्मोति । आमिसम्पि दुविधं — निप्परियायामिसं, परियायामिसन्ति । कथं? मग्गफलनिब्बानप्पभेदो हि नवविधो लोकुत्तरधम्मो निप्परियायधम्मो, निब्बत्तितधम्मोयेव, न केनचि परियायेन कारणेन वा लेसेन वा धम्मो । यं पनिदं विवट्ठपनिस्सितं कुसलं, सेय्यथिदं — इधेकच्चो विवट्ठं पत्थेन्तो दानं देति, सीलं समादियति, उपोसथकम्मं करोति, गन्धमालादीहि वत्थुपूजं करोति, धम्मं सुणाति, देसेति, ज्ञानसमापत्तियो निब्बत्तेति, एवं करोन्तो अनुपुब्बेन निप्परियायं अमतं निब्बानं पटिलभति, अयं परियायधम्मो । तथा चीवरादयो चत्तारो पच्चया निप्परियायामिसमेव, न अज्जेन परियायेन वा कारणेन वा लेसेन वा आमिसं । यं पनिदं वट्ठगामिकुसलं, सेय्यथिदं — इधेकच्चो वट्ठं पत्थेन्तो सम्पत्तिभवं इच्छमानो दानं देति...पे०... समापत्तियो निब्बत्तेति, एवं करोन्तो अनुपुब्बेन देवमनुस्ससम्पत्तियो पटिलभति, इदं परियायामिसं नाम ।

तत्थ निप्परियायधम्मोपि भगवतोयेव सन्तको । भगवता हि कथितत्ता भिक्खू मग्गफलनिब्बानानि अधिगच्छन्ति । वुत्तज्हेतं —

“सो, हि, ब्राह्मण, भगवा अनुप्पन्नस्स मग्गस्स उप्पादेता, असज्जातस्स मग्गस्स सज्जनेता...पे०... मग्गानुगा च पनेतरहि सावका विहरन्ति पच्छा समन्नागता”ति (म० नि० ३.७९; चूलनि० मोघराजमाणवपुच्छानिद्देस ८५) ।

“सो, हावुसो, भगवा जानं जानाति, पस्सं पस्सति, चक्खुभूतो जाणभूतो धम्मभूतो ब्रह्मभूतो, वत्ता पवत्ता, अत्थस्स निन्नेता, अमतस्स दाता, धम्मस्सामी तथागतो”ति (म० नि० १.२०३; ३.२८१) च ।

परियायधम्मोपि भगवतोयेव सन्तको । भगवता हि कथितत्ता एव जानन्ति “विवट्ठं पत्थेत्वा दानं देन्तो...पे०... समापत्तियो निब्बत्तेन्तो अनुक्कमेन अमतं निब्बानं पटिलभती”ति । निप्परियायामिसम्पि भगवतोयेव सन्तकं । भगवता हि अनुज्जातत्तायेव भिक्खूहि जीवकवत्थुं आदिं कत्वा पणीतचीवरं लद्धं । यथाह —

“अनुजानामि, भिक्खवे, गहपतिचीवरं । यो इच्छति, पंसुकूलिको होतु । यो इच्छति, गहपतिचीवरं सादियतु । इतरीतरेनपाहं, भिक्खवे, सन्तुट्ठियेव वण्णेमी”ति (महाव० ३३७) ।

एवं इतरेपि पच्चया भगवता अनुज्जातत्ता एव भिक्खूहि परिभुज्जितुं लद्धा । परियायामिसम्पि भगवतोयेव सन्तकं । भगवता हि कथितत्ता एव जानन्ति “सम्पत्तिभवं पत्थेन्तो दानं दत्वा सीलं...पे०... समापत्तियो निब्बत्तेत्वा अनुक्कमेन परियायामिसं दिब्बसम्पत्तिं मनुस्ससम्पत्तिञ्च पटिलभती”ति । यदेव यस्मा निप्परियायधम्मोपि परियायधम्मोपि निप्परियायामिसम्पि परियायामिसम्पि भगवतोयेव सन्तकं, तस्मा तत्थ अत्तनो सामिभावं दस्सेन्तो तत्थ च यं सेट्ठतरं अच्चन्तहितसुखावहं तत्थेव ने नियोजेन्तो एवमाह “तस्स मे तुम्हे पुत्ता ओरसा...पे०... नो आमिसदायादा”ति ।

इति भगवा परिपुण्णवतसमादानं तपचरियं सम्मदेव वुसितब्रह्मचरियं सुविसुद्धविज्जाचरणसम्पन्नं अनवसेसवेदन्तपारगुं बाहितसब्बपापं सततं याचयोगं सदेवके लोके अनुत्तरदक्खिण्येय्यभावप्पत्तं अत्तनो परमत्थब्राह्मणभावं अरियसावकानञ्च अत्तनो ओरसपुत्तादिभावं पवेदेसि । भगवा हि “सीहोति खो, भिक्खवे,

तथागतस्सेतं अधिवचनं अरहतो सम्मासम्बुद्धस्सा”ति (अ० नि० ५.१९) एत्थ सीहसदिसं, “पुरिसो मग्गकुसलोति खो, तिस्स, तथागतस्सेतं अधिवचन”न्ति (सं० नि० ३.८४) एत्थ मग्गदेसकपुरिससदिसं, “राजाहमस्मि सेला”ति (म० नि० २.३९९; सु० नि० ५५९) एत्थ राजसदिसं, “भिसक्को सल्लकत्तोति खो, सुनक्खत्त, तथागतस्सेतं अधिवचन”न्ति (म० नि० ३.६५) एत्थ वेज्जसदिसं, “ब्राह्मणोति खो, भिक्खवे, तथागतस्सेतं अधिवचन”न्ति (अ० नि० ८.८५) एत्थ ब्राह्मणसदिसं अत्तानं कथेसि । इधापि ब्राह्मण सदिसं कत्वा कथेसि ।

इदानीं येहि दानादीहि युत्तस्स इतो बाहिरकब्राह्मणस्स ब्राह्मणकिच्चं परिपुण्णं मज्जन्ति, तेहि अत्तनो दानादीनं अग्गसेट्ठभावं पकासेतुं “**द्वेमानि, भिक्खवे, दानानी**”तिआदि आरब्धं । तत्थ **यागाति** महायज्जा, महादानानीति अत्थो, यानि “यिद्वानी”तिपि वुच्चन्ति । तत्थ वेलामदानवेस्सन्तरदानमहाविजितयज्जसदिसा **आमिसयागा** वेदितब्बा, महासमयसुत्तमङ्गलसुत्तचूळराहुलोवादसुत्तसमचित्तसुत्तदेसनादयो **धम्मयागा** । सेसं हेट्ठा वुत्तनयमेव ।

गाथायं **अयजीति** अदासि । **अमच्छरीति** सब्बमच्छरियानं बोधिमूलेयेव सुप्पहीनत्ता मच्छेररहितो । **सब्बभूतानुकम्पीति** महाकरुणाय सब्बसत्ते पियपुत्तं विय अनुगणहनसीलो । वुत्तज्हेतं —

“वधके देवदत्ते च, चोरे अङ्गुलिमालके ।

धनपाले राहुले चैव, समचित्तो महामुनी”ति ॥ (मि० प० ६.६.५) —

सेसं सुविज्जेय्यमेव ।

पठमसुत्तवण्णना निट्ठिता ।

२. सुलभसुत्तवण्णना

१०१. दुतिये **अप्पानीति** परित्तानि । **सुलभानीति** सुखेन लब्धब्बानि, यत्थ कत्थचि वा सक्का होति लब्धुं । **अनवज्जानीति** वज्जरहितानि निदोसानि आगमनसुद्धितो कायमण्डनादिकिलेसवत्थुभावाभावतो च । तत्थ सुलभताय परियेसनदुक्खस्स अभावो दस्सितो, अप्पताय परिहरणदुक्खस्सपि अभावो दस्सितो, अनवज्जताय अगरहितब्बताय भिक्खुसारुपभावो दस्सितो होति । अप्पताय वा परित्तासस्स अवत्थुता, सुलभताय गेधाय अवत्थुता, अनवज्जताय आदीनववसेन निस्सरणपज्जाय वत्थुता दस्सिता होति । अप्पताय वा लाभेन न सोमनस्सं जनयन्ति, सुलभताय अलाभेन न दोमनस्सं जनयन्ति, अनवज्जताय विप्पटिसारनिमित्तं अज्जाणुपेक्खं न जनयन्ति अविप्पटिसारवत्थुभावतो ।

पंसुकूलन्ति रथिकासुसानसङ्कारकूटादीसु यत्थ कत्थचि पंसूनं उपरि ठितत्ता अब्भुगगतट्ठेन पंसुकूलं वियाति पंसुकूलं, पंसु विय कुच्छितभावं उलति गच्छतीति पंसुकूलन्ति एवं लब्धनामं रथिकादीसु पतितनन्तकानि उच्चिनित्वा कतचीवरं । **पिण्डियालोपोति** जङ्घपिण्डिया बलेन चरित्वा घरे घरे आलोपमतं कत्वा लब्धभोजनं । **रुक्खमूलन्ति** विवेकानुरूपं यंकिज्जि रुक्खसमीपं । **पूतिमुत्तन्ति** यंकिज्जि गोमुत्तं । यथा हि सुवण्णवण्णोपि कायो पूतिकायोव एवं अभिनवम्पि मुत्तं पूतिमुत्तमेव । तत्थ केचि गोमुत्तभावितं हरितकीखण्डं “पूतिमुत्त”न्ति वदन्ति, पूतिभावेन आपणादितो विस्सट्ठं छड्ढितं अपरिग्गहितं यंकिज्जि भेसज्जं पूतिमुत्तन्ति अधिप्पेतन्ति अपरे ।

यतो खोति पच्चत्ते निस्सक्कवचनं, यं खोति वुत्तं होति । तेन “तुट्ठो होती”ति वुत्तकिरियं परामसति । **तुट्ठोति** सन्तुट्ठो ।

इदमस्साहन्ति व्यायं चतुब्बिधेन यथावुत्तेन पच्चयेन अप्पेन सुलभेन सन्तोसो, इदं इमस्स भिक्खुनो सीलसंवरादीसु अज्जतरं एकं सामज्जङ्गं समणभावकारणन्ति अहं वदामि । सन्तुट्ठस्स हि चतुपारिसुद्धिसीलं सुपरिपुण्णं होति, समथविपस्सना च भावनापारिपूरिं गच्छन्ति । अथ वा सामज्जं नाम अरियमग्गो । तस्स सङ्खेपतो द्वे अङ्गानि — बाहिरं, अज्झत्तिकन्ति । तत्थ बाहिरं सप्पुरिसूपनिस्सयो सद्धम्मस्सवनञ्च, अज्झत्तिकं पन योनिसो मनसिकारो धम्मनुधम्मपटिपत्ति च । तेसु यस्मा यथारहं धम्मनुधम्मपटिपत्तिभूता तस्सा मूलभूता चेते धम्मा, यदिदं अप्पिच्छता सन्तुट्ठिता पविचित्ता असंसद्वता आरद्धवीरियताति एवमादयो, तस्मा वुत्तं “इदमस्साहं अज्जतरं सामज्जङ्गन्ति वदामी”ति ।

गाथासु **सेनासनमारब्भाति** विहारादिं मज्जपीठादिञ्च सेनासनं निस्साय । **चीवरं पानभोजनन्ति** निवासनादिचीवरं, अम्बपानकादिपानं, खादनीयभोजनीयादिभुज्जितव्यवस्थुञ्च आरब्भाति सम्बन्धो । **विघातो** विहतभावो चेतोदुक्खं न होतीति योजना । अयञ्हेत्थ सङ्खेपत्थो — “असुकस्मिं नाम आवासे पच्चया सुलभा”ति लभितव्वट्टानगमनेन वा “मय्हं पापुणाति न तुह”न्ति विवादापज्जनेन वा नवकम्मकरणादिवसेन वा सेनासनादीनि परियेसन्तानं असन्तुट्ठानं इच्छितलाभादिना यो विघातो चित्तस्स होति, सो तत्थ सन्तुट्ठस्स न होतीति । **दिसा नप्पटिहज्जतीति** सन्तुट्ठिया चातुहिसाभावेन दिसा नप्पटिहन्ति । वुत्तञ्हेतं —

“चातुहिसो अप्पटिघो च होति,

सन्तुस्समानो इतरीतरेना”ति ॥ (सु० नि० ४२; चूळनि० खग्गविसाणसुत्तनिद्देस १२८) ।

यस्स हि “असुकट्टानं नाम गतो चीवरादीनि लभिस्सामी”ति चित्तं उप्पज्जति, तस्स दिसा पटिहज्जति नाम । यस्स पन एवं न उप्पज्जति, तस्स दिसा न पटिहज्जति नाम । **धम्माति** पटिपत्तिधम्मा । **सामज्जस्सानुलोमिकाति** समणधम्मस्स समथविपस्सनाभावनाय अरियमग्गस्सेव वा अनुच्छविका अप्पिच्छतादयो । **अधिग्गहिताति** सब्बे ते तुट्ठचित्तस्स सन्तुट्ठचित्तेन भिक्खुना अधिग्गहिता पटिपक्खधम्मे अभिभवित्वा गहिता होन्ति अब्भन्तरगता, न बाहिरगताति ।

दुतियसुत्तवण्णना निट्ठिता ।

३. आसवक्खयसुत्तवण्णना

१०२. ततिये **जानतो**ति जानन्तस्स । **पस्सतो**ति पस्सन्तस्स । यदिपि इमानि द्वेपि पदानि एकत्थानि, ब्यज्जनमेव नानं, एवं सन्तेपि “जानतो”ति जाणलक्खणं उपादाय पुग्गलं निट्ठिसति । जाननलक्खणञ्हि जाणं । “पस्सतो”ति जाणप्पभावं उपादाय । दस्सनप्पभावञ्हि उपादाय जाणसमङ्गी पुग्गलो चक्खुमा विय पुग्गलो चक्खुना रूपानि, जाणेन विवटे धम्मे पस्सति । अथ वा **जानतो**ति अनुबोधजाणेन जानतो । **पस्सतो**ति पटिवेधजाणेन पस्सतो । पटिलोमतो वा दस्सनमग्गेन पस्सतो, भावनामग्गेन जानतो । केचि पन “जाततीरणपहानपरिज्जाहि जानतो, सिखाप्पत्तविपस्सनाय पस्सतो”ति वदन्ति । अथ वा दुक्खं परिज्जाभिसमयेन जानतो, निरोधं सच्छिकिरियाभिसमयेन पस्सतो । तदुभये च सति पहानभावनाभिसमया सिद्धा एव होन्तीति चतुसच्चाभिसमयो वुत्तो होति । यदा चेत्थ विपस्सनाजाणं अधिप्पेतं, तदा “जानतो पस्सतो”ति पदानं हेतुअत्थदीपनता दट्ठब्बा । यदा पन मग्गजाणं अधिप्पेतं, तदा मग्गकिच्चत्थदीपनता ।

आसवानं खयन्ति “जानतो, अहं भिक्खवे, पस्सतो आसवानं खयं वदामी”ति (म० नि० १.१५; सं० नि० ३.१०१;

५.१०९५) एवमागते सब्बासवसंवरपरियाये “आसवानं खया अनासवं चेतोविमुत्ति”न्तिआदीसु (म० नि० १.४३८) च सुत्तपदेसु आसवानं पहानं अच्चन्तक्खयो असमुप्पादो खीणाकारो नत्थिभावो “आसवक्खयो”ति वुत्तो। “आसवानं खया समणो होती”तिआदीसु (म० नि० १.४३८) फलं।

“परवज्जानुपस्सिस्स, निच्चं उज्झानसज्जिनो।

आसवा तस्स वड्ढन्ति, आरा सो आसवक्खया”ति॥ (ध० प० २५३)। —

आदीसु निब्बानं।

“सेखस्स सिक्खमानस्स, उजुमगगानुसारिनो।

खयस्मिं पठमं जाणं, ततो अज्जा अनन्तरा।

ततो अज्जाविमुत्तस्स, जाणं वे होति तादिनो”ति॥ (अ० नि० ३.८६; इतिवु० ६२) —

एवमागते इन्द्रियसुत्ते इध च मग्गो “आसवक्खयो”ति वुत्तो। तस्मा यथावुत्तनयेन जानन्तस्स पस्सन्तस्स अहं अरियमग्गाधिगमं वदामीति वुत्तं होति। **नो अजानतो नो अपस्सतो**ति यो पन न जानाति न पस्सति, तस्स नो वदामीति अत्थो। एतेन ये अजानतो अपस्सतोपि संसारसुद्धिं वदन्ति, ते पटिक्खपति। पुरिमेन वा पदद्वयेन उपायो वुत्तो, इमिना अनुपायपटिसेधो। सङ्खेपेन चेत्य जाणं आसवक्खयकरं, सेसं तस्स परिक्खारोति दस्सेति।

इदानीं यं जानतो यं पस्सतो आसवक्खयो होति, तं दस्सेतुं “**किञ्च, भिक्खवे, जानतो**”ति पुच्छं आरभि। तत्थ जानना बहुविधा। दब्बजातिको एव हि कोचि भिक्खु छत्तं कातुं जानाति, कोचि चीवरादीनं अज्जतरं, तस्स ईदिसानि कम्मनि वत्तसीसे ठत्वा करोन्तस्स सा जानना “मग्गफलानं पदद्वानं न होती”ति न वत्तब्बा। यो पन सासने पब्बजित्वा वेज्जकम्मादीनि कातुं जानाति, तस्सेवं जानतो आसवा वड्ढन्तियेव। तस्मा यं जानतो यं पस्सतो आसवानं खयो होति, तदेव दस्सेन्तो आह “**इदं दुक्ख**”न्तिआदि। तत्थ यं वत्तब्बं चतुसच्चकम्मद्वानं, तं हेट्ठा योनिमोमनसिकारसुत्ते सङ्खेपतो वुत्तमेव।

तत्थ पन “योनिमो, भिक्खवे, भिक्खु मनसि करोन्तो अकुसलं पजहति, कुसलं भावेती”ति (इतिवु० १६) आगतत्ता “**इदं दुक्खन्ति** योनिमो मनसि करोती”तिआदिना अत्थविभावना कता। इध “**इदं दुक्खन्ति, भिक्खवे, जानतो** पस्सतो आसवानं खयो होती”ति (म० नि० १.१५; सं० नि० ३.१०१; ५.१०९५) आगतत्ता “**इदं दुक्खन्ति** परिज्जापटिवेधवसेन परिज्जाभिसमयवसेन मग्गजाणेन जानतो पस्सतो आसवानं खयो होती”तिआदिना नयेन योजेतब्बं। आसवेसु च पठममग्गेन दिट्ठासवो खीयति, ततियमग्गेन कामासवो, चतुत्थमग्गेन भवासवो अविज्जासवो च खीयतीति वेदितब्बो।

गाथासु **विमुत्तिजाणन्ति** विमुत्तियं निब्बाने फले च पच्चवेक्खणजाणं। **उत्तमन्ति** उत्तमधम्मारम्मणत्ता उत्तमं। **खये जाणन्ति** आसवानं संयोजनानञ्च खये खयकरे अरियमग्गे जाणं। “खीणा संयोजना इति जाण”न्ति इधापि आनेत्वा सम्बन्धितब्बं। तेन पहीनकिलेसपच्चवेक्खणं दस्सेति। एवमेत्थ चत्तारिपि पच्चवेक्खणजाणानि वुत्तानि होन्ति। अवसिद्धिकिलेसपच्चवेक्खणा हि इध नत्थि अरहत्तफलाधिगमस्स अधिप्पेतत्ता। यथा चेत्य जानतो पस्सतोति निब्बानाधिगमेन सम्मादिट्ठिकिच्चं अधिकं कत्वा वुत्तं, एवं सम्मप्पधानकिच्चम्पि अधिकमेव इच्छितब्बन्ति दस्सेन्तो “**न त्वेविदं कुसीतेना**”ति ओसानगाथमाह।

तत्थ न त्वेविदन्ति न तु एव इदं । तुसद्धो निपातमत्तं । बालेनमविजानताति मकारो पदसन्धिकरो । अयज्हेत्थ सङ्खेपत्थो — इदं सेक्खमग्गेन असेक्खमग्गेन च पत्तब्बं अभिज्झाकायगन्थादिसब्बगन्थानं पमोचनं पमोचनस्स निमित्तभूतं निब्बानं “इदं दुक्ख”न्तिआदिना चत्तारि सच्चानि यथाभूतं **अविजानता** ततो एव **बालेन** अविदसुना यथा अधिगन्तुं न सक्का, एवं **कुसीतेन** निब्बीरियेनापि, तस्मा तदधिगमाय आरद्धवीरियेन भवितव्वन्ति । तेनाह भगवा “आरद्धवीरियस्सायं धम्मो, नो कुसीतस्स” (दी० नि० ३.३५८) ।

“आरम्भथ निक्कमथ, युज्जथ बुद्धसासने ।

धुनाथ मच्चुनो सेनं, नळागारं व कुज्जरो”ति ॥ (सं० नि० १.१८५; नेत्ति० २९; मि० प० ५.१.४) ।

ततियसुत्तवण्णना निड्डिता ।

४. समणब्राह्मणसुत्तवण्णना

१०३. चतुत्थे ये हि केचीति ये केचि । इदं दुक्खन्ति यथाभूतं नप्पजानन्तीति “इदं दुक्खं, एत्तकं दुक्खं, न इतो भिय्यो”ति अविपरीतं सभावसरसलक्खणतो विपस्सनापज्जासहिताय मग्गपज्जाय दुक्खसच्चं न जानन्ति न पटिविज्झन्ति । सेसेसुपि एसेव नयो । **न मे ते, भिक्खवे**तिआदीसु अयं सङ्खेपत्थो — भिक्खवे, चतुसच्चकम्मट्ठानं अननुयुत्ता पब्बज्जामत्तसमणा चेव जातिमत्तब्राह्मणा च न मया ते समितपापसमणेसु समणोति, बाहितपापब्राह्मणेसु ब्राह्मणोति च सम्मता अनुज्जाता । कस्मा? समणकरणानं ब्राह्मणकरणानञ्च धम्मानं अभावतोति । तेनेवाह “न च पन ते आयस्मन्तो”तिआदि । तत्थ **सामञ्जस्यन्ति** सामञ्जसङ्घातं अत्थं, चत्तारि सामञ्जफलानीति अत्थो । **ब्रह्मञ्जस्यन्ति** तस्सेव वेवचनं । अपरे पन “सामञ्जस्यन्ति चत्तारो अरियमग्गा, ब्रह्मञ्जस्यन्ति चत्तारि अरियफलानी”ति वदन्ति । सेसं वुत्तनयमेव । सुक्कपक्खो वुत्तविपरियायेन वेदितव्वो । गाथासु अपुब्बं नत्थि ।

चतुत्थसुत्तवण्णना निड्डिता ।

५. सीलसम्पन्नसुत्तवण्णना

१०४. पच्चमे **सीलसम्पन्ना**ति एत्थ सीलं नाम खीणासवानं लोकियलोक्तरसीलं, तेन सम्पन्ना समन्नागताति सीलसम्पन्ना । **समाधिपज्जासुपि** एसेव नयो । **विमुत्ति** पन फलविमुत्तियेव, **विमुत्तिजाणदस्सनं** पच्चवेक्खणजाणं । एवमेत्थ सीलादयो तयो लोकियलोक्तरा, विमुत्ति लोक्तराव, विमुत्तिजाणदस्सनं लोकियमेव । दिट्ठधम्मिकसम्परायिकपरमत्थेहि यथारहं परे ओवदन्ति अनुसासन्तीति **ओवादका** । **विज्जापका**ति कम्मनि कम्मफलानि च, विज्जापका, तत्थ च “इमे धम्मा कुसला, इमे धम्मा अकुसला । इमे धम्मा सावज्जा, इमे धम्मा अनवज्जा”तिआदिना कुसलादिविभागतो खन्धादिविभागतो सलक्खणतो सामञ्जलक्खणतोति विविधेहि नयेहि धम्मानं जापका अवबोधका । **सन्दस्सका**ति तेयेव धम्मे हत्थेन गहेत्वा विय परस्स पच्चक्खतो दस्सेतारो । **समादपका**ति यं सीलादि येहि असमादिन्नं, तस्स समादापेतारो, तत्थ ते पतिट्ठापेतारो । **समुत्तेजका**ति एवं कुसलधम्मेसु पतिट्ठितानं उपरि अधिचित्तानुयोगे नियोजनवसेन चित्तस्स सम्मा उत्तेजका, यथा विसेसाधिगमो होति, एवं निसामनवसेन तेजका । **सम्पहंसका**ति तेसं यथालब्धेहि उपरिलब्धेहि च गुणविसेसेहि चित्तस्स सम्मा पहंसका, लब्धस्सादवसेन सुट्ठु तोसका । **अलंसमक्खातारो**ति अलं परियत्तं यथावुत्तं अपरिहापेत्वा सम्मदेव अनुग्गहाधिप्पायेन अक्खातारो ।

अथ वा **सन्दस्सका**ति धम्मं देसेन्ता पवत्तिनिवत्तियो सभावसरसलक्खणतो सम्मदेव दस्सेतारो । **समादपका**ति चित्ते पतिट्ठापनवसेन तस्सेव अत्थस्स गाहापका । **समुत्तेजका**ति तदत्थगगहणे उस्साहजननेन सम्मदेव वोदपका जोतका वा । **सम्पहंसका**ति तदत्थपटिपत्तियं आनिसंसदस्सनेन सम्मदेव पहंसका तोसका । **अलंसमक्खातारो**ति समत्था हुत्वा वुत्तनयेन समक्खातारो । **सद्धम्मस्सा**ति पटिवेधसद्धम्मस्स, तिविधस्सापि वा सद्धम्मस्स देसेतारो ।

दस्सनम्पहन्ति दस्सनम्पि अहं । तं पनेतं चक्खुदस्सनं जाणदस्सनन्ति दुविधं । तत्थ पसन्नेहि चक्खूहि अरियानं ओलोकनं चक्खुदस्सनं नाम । अरियभावकरानं पन धम्मानं अरियभावस्स च विपस्सनामगगफलेहि अधिगमो जाणदस्सनं नाम । इमस्मिं पनत्थे चक्खुदस्सनं अधिप्पेतं । अरियानञ्चि पसन्नेहि चक्खूहि ओलोकनम्पि सत्तानं बहूपकारमेव । **सवनन्ति** “असुको नाम खीणासवो असुकस्मिं नाम रट्ठे वा जनपदे वा गामे वा निगमे वा विहारे वा लेणे वा वसती”ति कथेन्तानं सोतेन सवनं, एतम्पि बहूपकारमेव । **उपसङ्कमनन्ति** “दानं वा दस्सामि, पज्जं वा पुच्छिस्सामि, धम्मं वा सोस्सामि, सक्कारं वा करिस्सामी”ति एवरूपेन चित्तेन अरियानं उपसङ्कमनं । **पयिरुपासनन्ति** पज्जपयिरुपासनं, अरियानं गुणे सुत्वा ते उपसङ्कमित्वा निमन्तेत्वा दानं वा दत्त्वा वत्तं वा कत्वा “किं, भन्ते, कुसल”न्ति आदिना नयेन पज्जपुच्छन्ति अत्थो । वेय्यावच्चादिकरणं पयिरुपासनयेव । **अनुस्सरणन्ति** रत्तिट्ठानदिवाट्ठानेसु निसिन्नस्स “इदानीं अरिया गुम्बलेणमण्डपादीसु ज्ञानविपस्सनामगगफलसुखेहि वीतिनामेन्ती”ति तेसं दिब्बविहारादिगुणविसेसारम्मणं अनुस्सरणं । यो वा तेसं सन्निका ओवादो लद्धो होति, तं आवज्जित्वा “इमस्मिं ठाने सीलं कथितं, इमस्मिं समाधि, इमस्मिं विपस्सना, इमस्मिं मग्गो, इमस्मिं फल”न्ति एवं अनुस्सरणं ।

अनुपब्बज्जन्ति अरियेसु चित्तं पसादेत्वा घरा निक्खम्म तेसं सन्निके पब्बज्जं । अरियेसु हि चित्तं पसादेत्वा तेसंयेव सन्निके पब्बजित्वा तेसंयेव ओवादानुसासनिं पच्चासीसमानस्स चरतोपि पब्बज्जा अनुपब्बज्जा नाम, अज्जेसं सन्निके ओवादानुसासनिं पच्चासीसमानस्स चरतोपि पब्बज्जा अनुपब्बज्जा नाम, अरियेसु पसादेन अज्जत्थ पब्बजित्वा अरियानं सन्निके ओवादानुसासनिं पच्चासीसमानस्स चरतोपि पब्बज्जा अनुपब्बज्जाव । अज्जेसु पन पसादेन अज्जेसंयेव सन्निके पब्बजित्वा अज्जेसंयेव ओवादानुसासनिं पच्चासीसमानस्स चरतो पब्बज्जा अनुपब्बज्जा नाम न होति । वुत्तनयेन पब्बजितेसु पन महाकस्सपत्थेरस्स ताव अनुपब्बज्जं पब्बजिता सतसहस्समत्ता अहेसुं, तथा थेरस्सेव सद्धिविहारिकस्स चन्दगुत्तथेरस्स, तस्सापि सद्धिविहारिकस्स सूरियगुत्तथेरस्स, तस्सापि सद्धिविहारिकस्स अस्सगुत्तथेरस्स, तस्सापि सद्धिविहारिकस्स योनकधम्मरक्खितथेरस्स । तस्स पन सद्धिविहारिको असोकरज्जो कनिट्ठभाता तिसस्सथेरो नाम अहोसि । तस्स अनुपब्बज्जं पब्बजिता अट्ठतेय्यकोटिसङ्का अहेसुं । दीपप्पसादकमहामहिन्दथेरस्स पन अनुपब्बजितानं गणनपरिच्छेदो नत्थि । यावज्जदिवसा लङ्कादीपे सत्थरि पसादेन पब्बजन्ता महामहिन्दथेरस्सेव अनुपब्बज्जन्ति नाम ।

इदानीं येन कारणेन तेसं अरियानं दस्सनादि बहूपकारन्ति वुत्तं, तं दस्सेतुं “**तथारूपे**”ति आदिमाह । तत्थ **तथारूपे**ति तादिसे सीलादिगुणसम्पन्ने अरिये । यस्मा दस्सनसवनानुस्सरणानि उपसङ्कमनपयिरुपासनट्ठानानि, तस्मा तानि अनामसित्वा उपसङ्कमनपयिरुपासनानियेव दस्सेतुं “**सेवतो भजतो पयिरुपासतो**”ति वुत्तं । दस्सनसवनानुस्सरणतो हि अरियेसु उप्पन्नसद्धो ते उपसङ्कमित्वा पयिरुपासित्वा पज्जं पुच्छित्वा लद्धसवनानुत्तरियो अपरिपूरे सीलादिगुणे परिपूरेस्सतीति । तथा हि वुत्तं “सद्धाजातो उपसङ्कमति, उपसङ्कमन्तो पयिरुपासती”ति आदि (म० नि० २.१८३) ।

तत्थ **सेवतो**ति वत्तपटिवत्तकरणवसेन कालेन कालं उपसङ्कमतो । **भजतो**ति सम्पियायनभक्तिवसेन भजतो । **पयिरुपासतो**ति पज्जपुच्छनेन पटिपत्तिअनुकरणेन च पयिरुपासतोति तिण्णं पदानं अत्थविभागो दीपेतब्बो ।

विमुत्तिजाणदस्सनस्स पारिपूरि एकूनवीसतिमस्स पच्चवेक्खणजाणस्स उप्पत्तिया वेदितब्बा ।

एवरूपा च ते, भिक्खवे, भिक्खूतिआदीसु ये यथावुत्तगुणसमन्नागमेन एवरूपा एदिसा भिन्नसब्बकिलेसा भिक्खू, ते दिट्ठधम्मिकादिहितेसु सत्तानं नियोजनवसेन अनुसासनतो **सत्थारो**तिपि वुच्चन्ति । जातिकन्तारादिनित्थरणतो **सत्थवाहा**तिपि, रागादिरणानं जहनतो जहापनतो च **रणज्जहा**तिपि, अविज्जातमस्स विनोदनतो विनोदापनतो च **तमोनुदा**तिपि, सपरसन्तानेसु पज्जाआलोकपज्जाओभासपज्जापज्जोतानं करणेन निब्बत्तनेन **आलोकादिकरा**तिपि, तथा जाणुक्काजाणप्पभाधम्मक्काधम्मप्पभानं धारणेन करणेन च **उक्काधारा**तिपि, **पभङ्गरा**तिपि, आरकत्ता किलेसेहि, अनये न इरियनतो, अये च इरियनतो परेसं तथाभावहेतुभावतो, सदेवकेन लोकेन अरणीयतो **अरिया**तिपि, पज्जाचक्खुधम्मचक्खूनं सातिसयपटिलाभेन **चक्खुमन्तो**तिपि वुच्चन्ति ।

गाथासु **पामोज्जकरणं ठानन्ति** निरामिसस्स पमोदस्स निब्बत्तकं ठानं कारणं । एतन्ति इदानि वत्तब्बनिदस्सनं सन्धाय वदति । **विजानतन्ति** संकिलेसवोदाने याथावतो जानन्तानं । **भावितत्तानन्ति** भावितसभावानं, कायभावनादीहि भावितसन्तानानन्ति अत्थो । **धम्मजीविनन्ति** मिच्छाजीवं पहाय धम्मेन जायेन जीविककप्पनतो, धम्मेन वा जायेन अत्तभावस्स पवत्तनतो, समापत्तिबहुलताय वा अगगफलधम्मेन जीवनतो धम्मजीविनं । अयज्हेत्थ सङ्खेपत्थो — यदिदं भावितत्तानं परिनिद्धितसमाधिपज्जाभावानं ततो एव धम्मजीविनं अरियानं दस्सनं । एतं अविष्पटिसारनिमित्तानं सीलादीनं पारिपूरिहेतुभावतो विजानतं सप्पज्जजातिकानं एकन्तेनेव पीतिपामोज्जकारणन्ति ।

इदानि तं तस्स कारणभावं दस्सेतुं “**ते जोतयन्ती**”ति ओसानगाथाद्वयमाह । तत्थ तेति ते भावितत्ता धम्मजीविनो अरिया । **जोतयन्ती**ति पकासयन्ति । **भासयन्ती**ति सद्धम्मोभासेन लोकं पभासयन्ति, धम्मं देसेन्तीति अत्थो । **येसन्ति** येसं अरियानं । **सासनन्ति** ओवादं । **सम्मदज्जाया**ति पुब्बभागजाणेहि सम्मदेव जानित्वा । सेसं वुत्तनयमेव ।

पच्चमसुत्तवण्णना निड्डिता ।

६. तणहुप्पादसुत्तवण्णना

१०५. छट्ठे **तणहुप्पादा**ति एत्थ उप्पज्जति एतेसूति उप्पादा । का उप्पज्जति? तण्हा । तण्हाय उप्पादा तणहुप्पादा, तण्हावत्थूनि तण्हाकारणानीति अत्थो । **यत्था**ति येसु निमित्तभूतेसु । **उप्पज्जमाना**ति उप्पज्जनसीला । **चीवरहेतू**ति “कत्थ मनापं चीवरं लभिस्सामी”ति चीवरकारणा उप्पज्जति । सेसपदेसुपि एसेव नयो । **इतिभवाभवहेतू**ति एत्थ पन इतीति निदस्सनत्थे निपातो । यथा चीवरादिहेतु, एवं भवाभवहेतुपीति अत्थो । **भवाभवा**ति चेत्थ पणीतप्पणीतानि सप्पिनवनीतादीनि अधिप्पेतानि भवति आरोग्यं एतेनाति कत्वा । “सम्पत्तिभवेसु पणीतप्पणीततरो भवाभवो”तिपि वदन्ति । भवोति वा सम्पत्ति, अभवोति विपत्ति । भवोति वुट्ठि, अभवोति हानि । तं निमित्तज्च तण्हा उप्पज्जतीति वुत्तं “भवभावहेतु वा”ति ।

गाथा हेट्ठा वुत्तत्था एव । अपिच **तण्हादुतियो**ति तण्हासहायो । अयज्हि सत्तो अनमतगगे संसारवट्टे संसरन्तो न एककोव संसरति, तण्हं पन दुतियिकं सहायिकं लभित्वाव संसरति । तथा हि तं पपातपातं अचिन्तेत्वा मधुगणहनकलुदकं विय अनेकादीनवाकुलेसुपि भवेसु आनिसंसमेव दस्सेन्ती अनत्थजाले सा परिब्भमापेति । **एतमादीनवं जत्वा**ति एतं अतीतानागतपच्चुप्पन्नेसु खन्धेसु इत्थभावज्जथाभावसज्जितं आदीनवं जानित्वा । **तण्हं दुक्खस्स सम्भवन्ति** “तण्हा

चायं वट्टदुक्खस्स सम्भवो पभवो कारण’न्ति जानित्वा । एत्तावता च एकस्स भिक्खुनो विपस्सनं वट्ठेत्वा अरहत्तुप्पत्तिं दस्सिता । इदानीं तं खीणासवं थोमेन्तो “वीततण्हो”ति आदिमाह । यं पनेत्थ अवुत्तं, तं हेट्ठा वुत्तनयमेव ।

छट्टसुत्तवण्णना निट्ठिता ।

७. सब्रह्मकसुत्तवण्णना

१०६. सत्तमे सब्रह्मकानीति ससेट्ठकानि । येसन्ति येसं कुलानं । पुत्तानन्ति पुत्तेहि पूजितसदयोगेन हि इदं करणत्थे सामिवचनं । अज्झागारेति सके घरे । पूजिता होन्तीति यं घरे अत्थि, तेन पटिजग्गिता मनापेन चैव कायिकवाचसिकेन च पच्चुपट्ठिता होन्ति । इति मातापितृपूजकानि कुलानि “सब्रह्मकानी”ति पसंसित्वा उपरिपि नेसं पसंसनीयतं दस्सेन्तो “सपुब्बदेवतानी”ति आदिमाह ।

तत्थ ब्रह्माति आदीनि तेसं ब्रह्मादिभावसाधनत्थं वुत्तानि । तत्रायमत्थविभावना — ब्रह्माति सेट्ठाधिवचनं । यथा हि ब्रह्मनो चतस्सो भावना अविजहिता होन्ति मेत्ता, करुणा, मुदिता, उपेक्खाति, एवं मातापितृनं पुत्तेसु चतस्सो भावना अविजहिता होन्ति । ता तस्मिं तस्मिं काले वेदितब्बा — कुच्छिगतस्मिज्झि दारके “कदा न खो पुत्तकं अरोगं परिपुण्णङ्गपच्चङ्गं पस्सिस्सामा”ति मातापितृनं मेत्तचित्तं उप्पज्जति । यदा पनेस मन्दो उत्तानसेय्यको ऊकाहि वा मङ्कुलेहि वा दट्ठो दुक्खसेय्याय वा पीळितो परोदति विरवति, तदास्स सद्धं सुत्वा मातापितृनं कारुज्जं उप्पज्जति । आधावित्वा विधावित्वा कीळनकाले पन लोभनीयवयस्मिं वा ठितकाले दारकं ओलोकेत्वा मातापितृनं चित्तं सप्पिमण्डे पक्खित्तसतविहतकप्पासपिचुपटलं विय मुदुकं आमोदितं पमोदितं, तदा नेसं मुदिता लब्भति । यदा पन तेसं पुत्तो दारभरणं पच्चुपट्ठपेत्वा पाटियेक्कं अगारं अज्झावसति, तदा मातापितृनं “सक्कोति दानि नो पुत्तको अत्तनो धम्मताय जीवितु”न्ति मज्झत्तभावो उप्पज्जति । एवं तस्मिं काले उपेक्खा लब्भति । एवं मातापितृनं पुत्तेसु यथाकालं चतुब्बिधस्सपि ब्रह्मविहारस्स लब्भनतो ब्रह्मसदिसवुत्तिताय वुत्तं “ब्रह्माति, भिक्खवे, मातापितृनं एतं अधिवचन”न्ति ।

पुब्बदेवताति एत्थ देवा नाम तिविधा — सम्मुतिदेवा, उपपत्तिदेवा, विसुद्धिदेवाति । तेसु सम्मुतिदेवा नाम राजानो खत्तिया । ते हि “देवो, देवी”ति लोके वोहरीयन्ति, देवा विय लोकस्स निग्गहानुग्गहसमत्था च होन्ति । उपपत्तिदेवा नाम चातुमहाराजिकतो पट्टाय याव भवग्गा उप्पन्ना सत्ता । विसुद्धिदेवा नाम खीणासवा सब्बकिलेसविसुद्धितो । तत्रायं वचनत्थो — दिब्बन्ति, कीळन्ति, लळन्ति, जोतन्ति पटिपक्खं जयन्ति वाति देवा । तेसु सब्बसेट्ठा विसुद्धिदेवा । यथा ते बालजनेहि कतं अपराधं अगणेत्वा एकन्तेनेव तेसं अनत्थहानिं अत्थुप्पत्तिञ्च आकङ्खन्ताव यथावुत्तब्रह्मविहारयोगेन अत्थाय हिताय सुखाय पटिपज्जन्ति, दक्खिण्येय्यताय च तेसं कारानं महप्फलतं महानिसंसतञ्च आवहन्ति; एवमेव मातापितरोपि पुत्तानं अपराधं अगणेत्वा एकन्तेनेव तेसं अनत्थहानिं अत्थुप्पत्तिञ्च आकङ्खन्ता वुत्तनयेनेव चतुब्बिधस्सपि ब्रह्मविहारस्स लब्भनतो अत्थाय हिताय सुखाय पटिपज्जन्ता परमदक्खिण्येया हुत्वा अत्तनि कतानं कारानं महप्फलतं महानिसंसतञ्च आवहन्ति । सब्बदेवेहि च पठमं तेसं उपकारवन्तताय ते आदितोयेव देवा । तेसज्झि वसेन ते पठमं अज्जे देवे “देवा”ति जानन्ति आराधेन्ति पयिरुपासन्ति, आराधनविधिं जत्वा तथा पटिपज्जन्ता तस्सा पटिपत्तिया फलं अधिगच्छन्ति, तस्मा ते पच्छादेवा नाम । तेन वुत्तं “पुब्बदेवताति, भिक्खवे, मातापितृनं एतं अधिवचन”न्ति ।

पुब्बाचरियाति पठमआचरिया । मातापितरो हि पुत्ते सिक्खापेत्ता अतितरुणकालतो पट्टाय “एवं निसीद, एवं गच्छ, एवं तिट्ठ, एवं सय, एवं खाद, एवं भुज्ज, अयं ते ‘ताता’ति वत्तब्बो, अयं ‘भातिका’ति, अयं ‘भगिनी’ति, इदं नाम कातुं

वट्टति, इदं न वट्टति, असुकं नाम उपसङ्कमितुं वट्टति, असुकं नाम न वट्टती”ति गाहेन्ति सिक्खापेन्ति । अपरभागे अज्जे आचरियापि सिप्पं मुदं गणनन्ति एवमादिं सिक्खापेन्ति, अज्जे सरणानि देन्ति, सीलेसु पतिट्ठापेन्ति, पब्बाजेन्ति, धम्मं उग्गण्हापेन्ति, उपसम्पादेन्ति, सोतापत्तिमग्गादीनि पापेन्ति । इति सब्बेपि ते पच्छाआचरिया नाम । मातापितरो पन सब्बपठमं । तेनाह “पुब्बाचरियाति, भिक्खवे, मातापितूनं एतं अधिवचन”न्ति ।

आहुनेय्याति आनेत्वा हनितव्वन्ति आहुनं, दूरतोपि आनेत्वा फलविसेसं आकङ्खन्तेन गुणवन्तेसु दातव्वानं अन्नपानवत्थच्छादनादीनं एतं नामं, उपकारखेत्ताय तं आहुनं अरहन्तीति आहुनेय्या । तेन वुत्तं “आहुनेय्याति, भिक्खवे, मातापितूनं एतं अधिवचन”न्ति ।

इदानीं तेसं ब्रह्मादिभावे कारणं दस्सेतुं “तं किस्स हेतु? बहुकारा”तिआदि वुत्तं । तं किस्स हेतूति तं मातापितूनं ब्रह्मादिअधिवचनं केन कारणेनाति चेति अत्थो । **बहुकारा**ति बहूपकारा । **आपादका**ति जीवितस्स आपादका, पालका । पुत्तानञ्चि मातापितूहि जीवितं आपादितं पालितं घटितं अनुप्पबन्धेन पवत्तितं सम्पादितं । **पोसका**ति हत्थपादे वट्टेत्वा हृदयलोहितं पायेत्वा पोसेतारो । **इमस्स लोकस्स दस्सेतारो**ति पुत्तानं इमस्मिं लोके इट्ठानिट्ठारम्मणदस्सनं नाम मातापितरो निस्साय जातन्ति ते नेसं इमस्स लोकस्स दस्सेतारो नाम । इति तेसं बहुकारत्तं ब्रह्मादिभावस्स कारणं दस्सितं, येन पुत्तो मातापितूनं लोकियेन उपकारेन केनचि परियायेन परियन्तं पटिकारं कातुं न समत्थोयेव । सचे हि पुत्तो “मातापितूनं उपकारस्स पच्चुपकारं करिस्सामी”ति उट्ठाय समुट्ठाय वायमन्तो दक्खिणे अंसकूटे मातरं, इतरस्मिं पितरं ठपेत्वा वस्ससतायुको सकलं वस्ससतम्पि परिहरेय्य चतूहि पच्चयेहि उच्छादनपरिमदनन्हापनसम्बाहनादीहि च यथारुचि उपट्ठहन्तो तेसं मुत्तकरीसम्पि अजिगुच्छन्तो, न एत्तावता पुत्तेन मातापितूनं पटिकारो कतो होति अज्जत्र सद्दादिगुणविसेसे पतिट्ठापना । वुत्तज्हेतं भगवता —

“द्विन्नाहं, भिक्खवे, न सुप्पटिकारं वदामि । कतमेसं द्विन्नं? मातु च पितु च । एकेन, भिक्खवे, अंसेन मातरं परिहरेय्य, एकेन अंसेन पितरं परिहरेय्य वस्ससतायुको वस्ससतजीवी, सो च नेसं उच्छादनपरिमदनन्हापनसम्बाहनेन, ते च तत्थेव मुत्तकरीसं चजेय्युं, न त्वेव, भिक्खवे, मातापितूनं कतं वा होति पटिकतं वा । इमिस्सा च, भिक्खवे, महापथविद्या पटूतरत्तरतनाय मातापितरो इस्सरियाधिपच्चे रज्जे पतिट्ठापेय्य, न त्वेव, भिक्खवे, मातापितूनं कतं वा होति पटिकतं वा । तं किस्स हेतु? बहुकारा, भिक्खवे, मातापितरो पुत्तानं आपादका पोसका इमस्स लोकस्स दस्सेतारो ।

“यो च खो, भिक्खवे, मातापितरो अस्सद्धे सद्दासम्पदाय समादपेति निवेसेति पतिट्ठापेति । दुस्सीले सीलसम्पदाय, मच्छरिनो चागसम्पदाय, दुप्पज्जे पज्जासम्पदाय समादपेति निवेसेति पतिट्ठापेति । एत्तावता खो, भिक्खवे, मातापितूनं कतज्ज होति पटिकतज्जा”ति (अ० नि० २.३४) ।

तथा —

“मातापितुपट्ठानं, पुत्तदारस्स सङ्गहो”ति । (खु० पा० ५.६) ।

“मातापितुपट्ठानं, भिक्खवे, पण्डितपज्जत्त”न्ति च —

एवमादीनि मातापितूनं पुत्तस्स बहूपकारभावसाधकानि सुत्तानि दट्ठव्वानि ।

गाथासु वुच्चरेति वुच्चन्ति कथीयन्ति । पजाय अनुकम्पकाति परेसं पाणं छिन्दित्वापि अत्तनो सन्तकं यंकिञ्चि चजित्वापि अत्तनो पजं पटिजगन्ति गोपयन्ति, तस्मा पजाय अत्तनो पुत्तानं अनुकम्पका अनुग्गाहका ।

नमस्सेय्याति सायं पातं उपट्ठानं गन्त्वा “इदं मय्हं उत्तमं पुञ्जक्खेत्त”न्ति नमक्कारं करेय्य । सक्करेय्याति सक्कारेण पटिमानेय्य । इदानीं तं सक्कारं दस्सेन्तो “अन्नेना”ति आदिमाह । तत्थ अन्नेनाति यागुभत्तखादनीयेन । पानेनाति अट्ठविधपानेन । वत्थेनाति निवासनपारुपनेन । सयनेनाति मज्जपीठभिसिबिम्बोहनादिना सयनेन । उच्छादनेनाति दुग्गन्धं पटिविनोदेत्वा सुगन्धकरणुच्छादनेन । न्हाणेनाति सीतकाले उण्होदकेन, उण्हकाले सीतोदकेन गत्तानि परिसिञ्चित्वा न्हापनेन । पादानं धोवनेन चाति उण्होदकसीतोदकेहि पादधोवनेन चेव तेलमक्खनेन च ।

ताय नं पारिचरियायाति एत्थ नन्ति निपातमत्तं, यथावुत्तपरिचरणेन । अथ वा पारिचरियायाति भरणकिच्चकरणकुलवंसपटिट्ठापनादिना पञ्चविधउपट्ठानेन । वुत्तज्हेतं —

“पञ्चहि खो, गहपतिपुत्त, ठानेहि पुत्तेन पुरत्थिमा दिसा मातापितरो पच्चुपट्ठातब्बा ‘भतो ने भरिस्सामि, किच्चं नेसं करिस्सामि, कुलवंसं ठपेस्सामि, दायज्जं पटिपज्जिस्सामि । अथ वा पन नेसं पेतानं कालकतानं दक्खिणमनुप्पदस्सामी’ति । इमेहि खो, गहपतिपुत्त, पञ्चहि ठानेहि पुत्तेन पुरत्थिमा दिसा मातापितरो पच्चुपट्ठिता पञ्चहि ठानेहि पुत्तं अनुकम्पन्ति — पापा निवारेन्ति, कल्याणे निवेसेन्ति, सिप्पं सिक्खापेन्ति, पतिरूपेण दारेण संयोजेन्ति, समये दायज्जं निव्यादेन्ती”ति (दी० नि० ३.२६७) ।

अपिच यो मातापितरो तीसु वत्थूसु अभिप्पसन्ने कत्वा सीलेसु वा पतिट्ठापेत्वा पब्बज्जाय वा नियोजेत्वा उपट्ठहति, अयं मातापितुपट्ठाकानं अग्गोति वेदितब्बो । सा पनायं पारिचरिया पुत्तस्स उभयलोकहितसुखावहाति दस्सेन्तो “इधेव नं पसंसन्ति, पेच्च सग्गे पमोदती”ति आह । तत्थ इधाति इमस्मिं लोके । मातापितुपट्ठाकज्हि पुग्गलं पण्डितमनुस्सा तत्थ पारिचरियाय पसंसन्ति वण्णेन्ति थोमेन्ति, तस्स च दिट्ठानुगतिं आपज्जन्ता सयम्पि अत्तनो मातापितूसु तथा पटिपज्जित्वा महन्तं पुञ्जं पसवन्ति । पेच्चाति परलोकं गन्त्वा सग्गे ठितो मातापितुपट्ठाको दिब्बसम्पत्तीहि मोदति पमोदति अभिनन्दतीति ।

सत्तमसुत्तवण्णना निट्ठिता ।

८. बहुकारसुत्तवण्णना

१०७. अट्ठमे ब्राह्मणगहपतिकाति ब्राह्मणा चेव गहपतिका च । ठपेत्वा ब्राह्मणे ये केचि अगारं अज्झावसन्ता इध गहपतिकाति वेदितब्बा । येति अनियमतो निट्ठिद्वपरामसनं । वोति उपयोगबहुवचनं । अयज्हेत्थ सङ्केपत्थो — भिक्खवे, तुम्हाकं बहुपकारा ब्राह्मणगहपतिका, ये ब्राह्मणा चेव सेसअगारिका च “तुम्हे एव अम्हाकं पुञ्जक्खेत्तं, यत्थ मयं उद्भगिगं दक्खिणं पतिट्ठापेम सोवगिगं सुखविपाकं सग्गसंवत्तनिक”न्ति चीवरादीहि पच्चयेहि पतिउपट्ठिताति ।

एवं “आमिसदानेन आमिससंविभागेन आमिसानुगहेन गहट्ठा भिक्खूनं उपकारवन्तो”ति दस्सेत्वा इदानीं धम्मदानेन धम्मसंविभागेन धम्मानुगहेन भिक्खूनम्पि तेसं उपकारवन्ततं दस्सेतुं “तुम्हेपि, भिक्खवे,”ति आदि वुत्तं, तं वुत्तनयमेव ।

इमिना किं कथितं? पिण्डापचायनं नाम कथितं । अयज्हेत्थ अधिप्पायो — भिक्खवे, यस्मा इमे ब्राह्मणगहपतिका नेव

तुम्हाकं जातका, न मित्ता, न इणं वा धारेन्ति, अथ खो “इमे समणा सम्मग्गता सम्मा पटिपन्ना, एत्थ नो कारा महप्फला भविस्सन्ति महानिसंसा”ति फलविसेसं आकङ्खन्ता तुम्हे चीवरादीहि उपट्ठहन्ति । तस्मा तं तेसं अधिप्पायं परिपूरेन्ता अप्पमादेन सम्पादेथ, धम्मदेसनापि वो कारकानंयेव सोभति, आदेय्या च होति, न इतरेसन्ति एवं सम्मापटिपत्तियं अप्पमादो करणीयोति ।

एवमिदं, भिक्खवेति आदीसु अयं सङ्खेपत्थो — भिक्खवे, एवं इमिना वुत्तप्पकारेन गहट्ठपब्बजितेहि आमिसदानधम्मदानवसेन अज्जमज्जं सन्निस्साय कामादिवसेन चतुब्बिधस्सपि ओघस्स नित्थरणत्थाय सकलस्सपि वट्ठदुक्खस्स सम्मदेव परियोसानकरणाय उपोसथसीलनियमादिवसेन चतुपरिसुद्धिसीलादिवसेन वा इदं सासनब्रह्मचरियं मग्गब्रह्मचरियञ्च वुस्सति चरीयतीति ।

गाथासु **सागाराति** गहट्ठा । **अनगाराति** परिच्चत्तअगारा पब्बजिता । **उभो अज्जोज्जनिस्सिताति** ते उभोपि अज्जमज्जसन्निस्सिता । सागारा हि अनगारानं धम्मदानसन्निस्सिता, अनगारा च सागारानं पच्चयदानसन्निस्सिता । **आराधयन्तीति** साधेन्ति सम्पादेन्ति । **सद्धम्मन्ति** पटिपत्तिसद्धम्मं पटिवेधसद्धम्मञ्च । तत्थ यं उत्तमं, तं दस्सेन्तो आह “योगक्खेमं अनुत्तर”न्ति अरहत्तं निब्बानञ्च । **सागारेसूति** सागारेहि, निस्सक्के इदं भुम्मवचनं, सागारानं वा सन्तिके । **पच्चयन्ति** वुत्तावसेसं दुविधं पच्चयं पिण्डपातं भेसज्जञ्च । **परिस्सयविनोदन्ति** उतुपरिस्सयादिपरिस्सयहरणं विहारादिआवसथं । **सुगतन्ति** सम्मा पटिपन्नं कल्याणपुथुज्जनेन सद्धिं अट्ठविधं अरियपुग्गलं । सावको हि इध सुगतोति अधिप्पेतो । **घरमेसिनोति** घरं एसिनो, गेहे ठत्वा घरावासं वसन्ता भोगूपकरणानि चेव गहट्ठसीलादीनि च एसनसीलाति अत्थो । **सद्धहानो अरहन्ति** अरहन्तानं अरियानं वचनं, तेसं वा सम्मापटिपत्तिं सद्धहन्ता । “अद्धा इमे सम्मा पटिपन्ना, यथा इमे कथेन्ति, तथा पटिपज्जन्तानं सा पटिपत्ति सग्गमोक्खसम्पत्तिया संवत्तती”ति अभिसद्धहन्ताति अत्थो । “सद्धहन्ता”तिपि पाठो । **अरियपज्जायाति** सुविसुद्धपज्जाय । **झायिनोति** आरम्मणलक्खणूपनिज्झानवसेन दुविधेनपि झानेन झायिनो ।

इध धम्मं चरित्वानाति इमस्मिं अत्तभावे, इमस्मिं वा सासने लोकियलोकुत्तरसुखस्स मग्गभूतं सीलादिधम्मं पटिपज्जित्वा याव परिनिब्बानं न पापुणन्ति, तावदेव सुगतिगामिनो । **नन्दिनोति** पीतिसोमनस्सयोगेन नन्दनसीला । केचि पन “धम्मं चरित्वान मग्गन्ति सोतापत्तिमग्गं पापुणित्वा”ति वदन्ति । **देवलोकस्मिन्ति** छब्बिधेपि कामावचरदेवलोके । **मोदन्ति कामकामिनोति** यथिच्छितवत्थुनिप्फत्तितो कामकामिनो कामवन्तो हुत्वा पमोदन्तीति ।

अट्ठमसुत्तवण्णना निट्ठिता ।

९. कुहसुत्तवण्णना

१०८. नवमे **कुहाति** सामन्तजप्पनादिना कुहनवत्थुना कुहका, असन्तगुणसम्भावनिच्छाय कोहज्जं कत्वा परेसं विम्हापकाति अत्थो । **थद्धाति** कोधेन च मानेन च थद्धमानसा । “कोधनो होति उपायासबहुलो, अप्पम्पि वुत्तो समानो अभिसज्जति कुप्पति ब्यापज्जति पतित्थीयती”ति (अ० नि० ३.२५; पु० प० १०१) एवं वुत्तेन कोधेन च, “दुब्बचो होति दोवचस्सकरणेहि धम्मेहि समन्नागतो अक्खमो अप्पदक्खिणग्गाही अनुसासनि”न्ति (म० नि० १.१८१) एवं वुत्तेन दोवचस्सेन च, “जातिमदो, गोत्तमदो, सिप्पमदो, आरोग्यमदो, योब्बनमदो, जीवितमदो”ति (विभ० ८३२) एवं वुत्तेन जातिमदादिभेदेन मदेन च गरुकातब्बेसु गरूसु परमनिपच्चकारं अकत्वा अयोसलाकं गिलित्वा ठिता विय अनोनता हुत्वा

विचरणका । लपाति उपलापका मिच्छाजीववसेन कुलसङ्गाहका पच्चयत्थं पयुत्तवाचावसेन निष्पेसिकतावसेन च लपकाति वा अत्थो ।

सिङ्गीति “तत्थ कतमं सिङ्गं? यं सिङ्गं सिङ्गारता चातुरता चातुरियं परिकखत्तता पारिकखत्तिय”न्ति (विभ० ८५२) एवं वुत्तेहि सिङ्गसदिसेहि पाकटकिलेसेहि समन्नागता । उन्नळाति उगतनळा, नळसदिसं तुच्छमानं उक्खिपित्वा विचरणका । असमाहिताति चित्तेकग्गतामत्तस्सापि अलाभिना । न मे ते, भिक्खवे, भिक्खू मामकाति ते मय्हं भिक्खू मम सन्तका न होन्ति । मेति इदं पदं अत्तानं उद्दिस्स पब्बजितत्ता भगवता वुत्तं । यस्मा पन ते कुहनादियोगतो न सम्मा पटिपन्ना, तस्मा “न मामका”ति वुत्ता । अपगताति यदिपि ते मम सासने पब्बजिता, यथानुसिद्धं पन अप्पटिपज्जनतो अपगता एव इमस्मा धम्मविनया, इतो ते सुविदूरविदूरे ठिताति दस्सेति । वुत्तज्जेतं —

“नभञ्च दूरे पथवी च दूरे,
पारं समुद्दस्स तदाहु दूरे ।
ततो हवे दूरतरं वदन्ति,
सतञ्च धम्मं असतञ्च राजा”ति ॥ (अ० नि० ४.४७; जा० २.२१.४१४) ।

वुद्धिं विरूळ्हि वेपुल्लं आपज्जन्तीति सीलादिगुणेहि वड्डनवसेन वुद्धिं, तत्थ निच्चलभावेन विरूळ्हि, सब्बत्थ पत्थटभावेन सीलादिधम्मक्खन्धपारिपूरिया वेपुल्लं । न च ते कुहादिसभावा भिक्खू आपज्जन्ति, न च पापुणन्तीति अत्थो । ते खो मे, भिक्खवे, भिक्खू मामकाति इधापि मेति अत्तानं उद्दिस्स पब्बजितत्ता वदति, सम्मा पटिपन्नत्ता पन “मामका”ति आह । वुत्तविपरियायेन सुक्कपक्खो वेदितब्बो । तत्थ याव अरहत्तमग्गा विरूहन्ति नाम, अरहत्तफले पन सम्पत्ते विरूळ्हि वेपुल्लं आपन्ना नाम । गाथा सुविज्जेय्या एव ।

नवमसुत्तवण्णना निट्ठिता ।

१०. नदीसोतसुत्तवण्णना

१०९. दसमे सेय्यथापीति ओपम्मदस्सनत्थे निपातो, यथा नामाति अत्थो । नदिया सोतेन ओवुद्धेय्याति सीघसोताय हारहारिनिया नदिया उदकवेगेन हेड्डतो वुद्धेय्य अधो हरियेथ । पियरूपसातरूपेनाति पियसभावेन सातसभावेन च कारणभूतेन, तस्सं नदियं तस्सा वा परतीरे मणिसुवण्णादि अज्जं वा पियवत्थु वित्तूपकरणं अत्थि, तं गहेस्सामीति नदियं पतित्वा सोतेन अवकड्डेय्य । किञ्चापीति अनुजाननअसम्भावनत्थे निपातो । किं अनुजानाति, किं न सम्भावेति? तेन पुरिसेन अधिप्पेतस्स पियवत्थुस्स तत्थ अत्थिभावं अनुजानाति, तथागमनं पन आदीनववन्तताय न सम्भावेति । इदं वुत्तं होति — अम्भो, पुरिस, यदिपि तया अधिप्पेतं पियवत्थु तत्थ उपलब्धति, एवं गमने पन अयमादीनवो, यं त्वं हेड्डा रहदं पत्वा मरणं मरणमत्तं वा दुक्खं पापुणेय्यासीति ।

अत्थि चेत्थ हेड्डा रहदोति एतिस्सा नदिया हेड्डा अनुसोतभागे अतिविय गम्भीरवित्थतो एको महासरो अत्थि । सो च समन्ततो वाताभिघातसमुट्ठिताहि मणिमयपब्बतकूटसन्निभाहि महतीहि ऊमीहि वीचीहि सऊमि, विसमेसु भूमिप्पदेसेसु सवेगं अनुपक्खन्दन्तेन इमिस्सा ताव नदिया महोघेन तहिं तहिं आवट्टमानविपुलजलताय बलवामुखसदिसेहि सह आवट्टेहीति सावट्टो । तं रहदं ओतिण्णसत्तेयेव अत्तनो निबद्धामिसगोचरे कत्वा अज्झावसन्तेन अतिविय भयानकदस्सनेन

घोरचेतसा दकरक्खसेन सगहो सरक्खसो, चण्डमच्छमकरादिना वा सगहो, यथावुत्तरक्खसेन सरक्खसो ।

यन्ति एवं सप्पटिभयं यं रहदं । अम्भो पुरिसाति आलपनं । मरणं वा निगच्छसीति ताहि वा ऊमीहि अज्झोत्थटो, तेसु वा आवट्टेसु निपतितो सीसं उक्खिपितुं असक्कोन्तो तेसं वा चण्डमच्छमकरादीनं मुखे निपतितो । तस्स वा दकरक्खसस्स हत्थं गतो मरणं वा गमिस्ससि, अथ वा पन आयुसेसे सति ततो मुच्चित्वा अपगच्छन्तो तेहि ऊमिआदीहि जनितघट्टितवसेन मरणमत्तं मरणप्पमाणं दुक्खं निगच्छसि । पटिसोतं वायमेय्याति सो पुब्बे अनुसोतं वुहमानो तस्स पुरिसस्स वचनं सुत्वा “अनत्थो किर मे उपट्ठितो, मच्चुमुखे किराहं परिवत्तामी”ति उप्पन्नबलवभयो सम्भमन्तो दिगुणं कत्वा उस्साहं हत्थेहि च पादेहि च वायमेय्य तरेय्य, न चिरेनेव तीरं सम्पापुणेय्य ।

अत्थस्स विज्जापनायाति चतुसच्चपटिवेधानुकूलस्स अत्थस्स सम्बोधनाय उपमा कता । अयज्जेत्थ अत्थोति अयमेव इदानीं वुच्चमानो इध मया अधिप्पेतो उपमेय्यत्थो, यस्स विज्जापनाय उपमा आहटा ।

तण्हायेतं अधिवचनन्ति एत्थ चतूहि आकारेहि तण्हाय सोतसदिसता वेदितब्बा अनुक्कमपरिवुड्ढितो अनुप्पबन्धतो ओसीदापनतो दुरुत्तरणतो च । यथा हि उपरि महामेघे अभिष्पवुड्ढे उदकं पब्बतकन्दरपदरसाखायो पूरेत्वा ततो भस्सित्वा कुसुब्भे पूरेत्वा ततो भस्सित्वा कुन्नदियो पूरेत्वा ततो महानदियो पक्खन्दित्वा एकोधं हुत्वा पवत्तमानं “नदीसोतो”ति वुच्चति, एवमेव अज्झत्तिकबाहिरादिवसेन अनेकभेदेसु रूपादीसु आरम्भणेसु लोभो उप्पज्जित्वा अनुक्कमेन परिवुड्ढिं गच्छन्तो “तण्हासोतो”ति वुच्चति, यथा च नदीसोतो आगमनतो याव समुद्वप्पत्ति, ताव सति विच्छेदपच्चयाभावे अविच्छिज्जमानो अनुप्पबन्धेन पवत्तति, एवं तण्हासोतोपि आगमनतो पट्टाय असति विच्छेदपच्चये अविच्छिज्जमानो अपायसमुद्वाभिमुखो अनुप्पबन्धेन पवत्तति । यथा पन नदीसोतो तदन्तो गधे सत्ते ओसीदापेति, सीसं उक्खिपितुं न देति, मरणं वा मरणमत्तं वा दुक्खं पापेति, एवं तण्हासोतोपि अत्तनो सोतन्तो गते सत्ते ओसीदापेति, पज्जासीसं उक्खिपितुं न देति, कुसलमूलच्छेदनेन संकिलेसधम्मसमापज्जनेन च मरणं वा मरणमत्तं वा दुक्खं पापेति ।

यथा च नदिया सोतो महोघभावेन पवत्तमानो उळुम्पं वा नावं वा बन्धितुं नेतुञ्च छेकं पुरिसं निस्साय परतीरं गन्तुं अज्झासयं कत्वा तज्जं वायामं करोन्तेन तरितब्बो, न येन वा तेन वाति दुरुत्तरो, एवं तण्हासोतोपि कामोघभवोघभूतो सीलसंवरं पूरेतुं समथविपस्सनासु कम्मं कातुं “निपकेन अरहत्तं पापुणिस्सामी”ति अज्झासयं समुद्वापेत्वा कल्याणमित्ते निस्साय समथविपस्सनानावं अभिरुहित्वा सम्मावायामं करोन्तेन तरितब्बो, न येन वा तेन वाति दुरुत्तरो । एवं अनुक्कमपरिवुड्ढितो अनुप्पबन्धतो ओसीदापनतो दुरुत्तरणतो चतूहि आकारेहि तण्हाय नदीसोतसदिसता वेदितब्बा ।

पियरूपं सातरूपन्ति पियजातिकं पियसभावं पियरूपं, मधुरजातिकं मधुरसभावं सातरूपं, इड्डसभावन्ति अत्थो । छन्नेतन्ति छन्नं एतं । अज्झत्तिकानन्ति एत्थ “एवं मयं अत्ताति गहणं गमिस्सामा”ति इमिना विय अधिप्पायेन अत्तानं अधिकारं कत्वा पवत्तानीति अज्झत्तिकानि । तत्थ गोचरज्झत्तं, नियकज्झत्तं, विसयज्झत्तं, अज्झत्तज्झत्तन्ति चतुब्बिधं अज्झत्तं । तेसु “अज्झत्तरतो समाहितो”ति एवमादीसु (ध० प० ३६२) वुत्तं इदं गोचरज्झत्तं नाम । “अज्झत्तं सम्पसादन”न्ति (दी० नि० १.२२८; ध० स० १६१) आगतं इदं नियकज्झत्तं नाम । “सब्बनिमित्तानं अमनसिकारा अज्झत्तं सुज्जत्तं उपसम्पज्ज विहरती”ति (म० नि० ३.१८७) एवमागतं इदं विसयज्झत्तं नाम । “अज्झत्तिका धम्मा, बाहिरा धम्मा”ति (ध० स० तिकमातिका २०) एत्थ वुत्तं अज्झत्तं अज्झत्तज्झत्तं नाम । इधापि एतदेव अधिप्पेतं, तस्मा अज्झत्तानियेव अज्झत्तिकानि । अथ वा यथावुत्तेनेव अत्थेन “अज्झत्ता धम्मा, बहिद्वा धम्मा”ति आदीसु विय तेसु अज्झत्तेसु भवानि अज्झत्तिकानि, चक्खादीनि । तेसं अज्झत्तिकानं ।

आयतनानन्ति एत्थ आयतनतो, आयानं तननतो, आयतस्स च नयनतो आयतनानीति । चक्खादीसु हि तंतद्वारवत्थुका चित्तचेतसिका धम्मा सकेन सकेन अनुभवनादिना किच्चेन आयतन्ति उड्डहन्ति घटन्ति वायमन्ति, ते च आयभूते धम्मे एतानि तनोन्ति वित्थारेन्ति, यच्च अनमतगगे संसारे पवत्तं अतिविय आयतं वट्टदुक्खं, तं नयन्ति पवत्तेन्ति । इति सब्बथापिमे धम्मा आयतनतो, आयानं तननतो, आयतस्स च नयनतो आयतनानीति वुच्चन्ति । अपिच निवासट्टानट्टेन, आकरट्टेन, समोसरणट्टानट्टेन, सज्जातिदेसट्टेन, कारणट्टेन च आयतनं वेदितब्बं । तथा हि लोके “इस्सरायतनं देवायतनं”न्ति आदीसु निवासट्टानं आयतनन्ति वुच्चति । “सुवण्णायतनं रजतायतनं”न्ति आदीसु आकरो । सासने पन “मनोरमे आयतने, सेवन्ति नं विहङ्गमा”ति आदीसु समोसरणट्टानं । “दक्खिणापथो गुणं आयतनं”न्ति आदीसु सज्जातिदेसो । “तत्र तत्रेव सक्खिभब्बतं पापुणाति सति सति आयतने”ति आदीसु (म० नि० ३.१५८; अ० नि० ३.१०२) कारणं आयतनन्ति वुच्चति । चक्खादीसु च ते ते चित्तचेतसिका धम्मा निवसन्ति तदायत्तवुत्तितायाति चक्खादयो तेसं निवासट्टानं । तत्थ च ते आकिण्णा तन्निस्सितत्ताति ते नेसं आकरो, समोसरणट्टानञ्च तत्थ वत्थुद्वारभावेन समोसरणतो, सज्जातिदेसो च तन्निस्सयभावेन तेसं तत्थेव उप्पत्तितो, कारणञ्च तदभावे तेसं अभावतोति । इति निवासट्टानट्टेन, आकरट्टेन, समोसरणट्टानट्टेन, सज्जातिदेसट्टेन, कारणट्टेनाति इमेहि कारणेहि चक्खादीनि आयतनानीति वुच्चन्ति । तेन वुत्तं “छन्नेतं अज्झत्तिकानं आयतनानं”न्ति ।

यदिपि रूपादयोपि धम्मा “रूपं लोके पियरूपं सातरूपं, एत्थेसा तण्हा उप्पज्जमाना उप्पज्जती”ति तण्हावत्थुभावतो पियरूपसातरूपभावेन वुत्ता । चक्खादिके पन मुञ्चित्वा अत्तभावपज्जत्तिया अभावतो “मम चक्खु मम सोत”न्ति आदिना अधिकसिनेहवत्थुभावेन चक्खादयो सातिसयं पियरूपं सातरूपन्ति निद्वेसं अरहन्तीति दस्सेतुं “पियरूपं सातरूपन्ति खो, भिक्खवे, छन्नेतं अज्झत्तिकानं आयतनानं अधिवचनं”न्ति वुत्तं ।

ओरम्भागियानन्ति एत्थ ओरं वुच्चति कामधातु, तप्परियापन्ना ओरम्भागा, पच्चयभावेन तेसं हिताति ओरम्भागिया । यस्स संविज्जन्ति, तं पुगलं वट्टस्मिं संयोजेन्ति बन्धन्तीति संयोजनानि । सक्कायदिट्ठिविचिकिच्छासीलब्बतपरामासकामरागब्यापादानं एतं अधिवचनं । ते हि कामभवूपगानं सङ्खारानं पच्चया हुत्वा रूपारूपधातुतो हेट्ठाभावेन निहीनभावेन ओरम्भागभूतेन कामभावेन सत्ते संयोजेन्ति । एतेनेव तेसं हेट्ठारहदसदिसता दीपिताति दट्टब्बा । ऊमिभयन्ति खो, भिक्खवे, कोधुपायासस्सेतं अधिवचनन्ति भायति एतस्माति भयं, ऊमि एव भयन्ति ऊमिभयं । कुज्झनट्टेन कोधो, स्वेव चित्तस्स सरीरस्स च अभिप्पमहनपवेधनुप्पादनेन दळ्हं आयासनट्टेन उपायासो ।

एत्थ च अनेकवारं पवत्तित्वा अत्तना समवेतं सत्तं अज्झोत्थरित्वा सीसं उक्खिपितुं अदत्त्वा अनयब्यसनापादनेन कोधुपायासस्स ऊमिसदिसता दट्टब्बा । तथा कामगुणानं किलेसाभिभूते सत्ते इतो च एत्तो, एत्तो च इतोति एवं मनापियरूपादिविसयसङ्घाते अत्तनि संसारेत्वा यथा ततो बहिभूते नेक्खम्मे चित्तम्पि न उप्पज्जति एवं आवट्टेत्वा व्यसनापादनेन आवट्टसदिसता दट्टब्बा । यथा पन गहरक्खसोपि आरक्खरहितं अत्तनो गोचरभूमिगतं पुरिसं अभिभुय्य गहेत्वा अगोचरे ठितम्पि रक्खसमायाय गोचरं नेत्वा भेरवरूपदस्सनादिना अवसं अत्तनो उपकारं कातुं असमत्थं कत्वा अन्वाविसित्वा वण्णबलभोगयससुखेहिपि वियोजेन्तो महन्तं अनयब्यसनं आपादेति, एवं मातुगामोपि योनिसोमनसिकाररहितं अवीरपुरिसं इत्थिक्कुत्तभूतेहि अत्तनो हावभावविलासेहि अभिभुय्य गहेत्वा वीरजातियम्पि अत्तनो रूपादीहि पलोभनवसेन इत्थिमायाय अन्वाविसित्वा अवसं अत्तनो उपकारधम्मे सीलादयो सम्पादेतुं असमत्थं करोन्तो गुणवण्णादीहि वियोजेत्वा महन्तं अनयब्यसनं आपादेति, एवं मातुगामस्स गहरक्खससदिसता दट्टब्बा । तेन वुत्तं “आवट्टन्ति खो, भिक्खवे, पञ्चन्नेतं कामगुणानं अधिवचनं, गहरक्खसोति खो, भिक्खवे, मातुगामस्सेतं अधिवचनं”न्ति ।

पटिसोतोति खो भिक्खवे नेक्खम्मस्सेतं अधिवचनन्ति एत्थ पब्बज्जा सह उपचारेण पठमज्झानं विपस्सनापज्जा च निब्बानञ्च नेक्खम्मं नाम । सब्बेपि कुसला धम्मा नेक्खम्मं नाम । वुत्तहेतं —

“पब्बज्जा पठमं ज्ञानं, निब्बानञ्च विपस्सना ।
सब्बेपि कुसला धम्मा, नेक्खम्मन्ति पवुच्चरे”ति ॥

इमेसं पन पब्बज्जादीनं तण्हासोतस्स पटिलोमतो पटिसोतसदिसता वेदितब्बा । अविसेसेन हि धम्मविनयो नेक्खम्मं, तस्स अधिष्ठानं पब्बज्जा च, धम्मविनयो च तण्हासोतस्स पटिसोतं वुच्चति । वुत्तहेतं —

“पटिसोतगामिं निपुणं, गम्भीरं दुद्दसं अणुं ।
रागरत्ता न दक्खन्ति, तमोखन्धेन आवुता”ति ॥ (दी० नि० २.६५; म० नि० १.२८१; सं० नि० १.१७२) ।

वीरियारम्भस्साति चतुब्बिधसम्मप्यधानवीरियस्स । तस्स कामोघादिभेदतण्हासोतसन्तरणस्स हत्थेहि पादेहि चतुरङ्गनदीसोतसन्तरणवायामस्स सदिसता पाकटायेव । तथा नदीसोतस्स तीरे ठितस्स चक्खुमतो पुरिसस्स कामादिं चतुब्बिधम्पि ओघं तरित्वा तस्स परतीरभूते निब्बानथले ठितस्स पञ्चहि चक्खूहि चक्खुमतो भगवतो सदिसभावो । तेन वुत्तं “चक्खुमा पुरिसो...पे० ... सम्मासम्बुद्धस्सा”ति ।

तत्रिदं ओपम्मसंसन्दनं — नदीसोतो विय अनुपबन्धवसेन पवत्तमानो तण्हासोतो, तेन वुद्दमानो पुरिसो विय अनमतगो संसारवट्टे परिब्भमनतो तण्हासोतेन वुद्दमानो सतो, तस्स तत्थ पियरूपसातरूपवत्थुस्मिं अभिनिवेशो विय इमस्स चक्खादीसु अभिनिवेशो, सऊमिसावट्टसगहरक्खसो हेट्टारहदो विय कोधुपायासपञ्चकामगुणमातुगामसमाकुलो पञ्चोरम्भागियसंयोजनसमूहो, तमतथं यथाभूतं विदित्वा तस्स नदीसोतस्स परतीरे ठितो चक्खुमा पुरिसो विय सकलं संसारादीनवं सब्बञ्च जेय्यधम्मं यथाभूतं विदित्वा तण्हासोतस्स परतीरभूते निब्बानथले ठितो समन्तचक्खु भगवा, तस्स पुरिसस्स तस्मिं नदिया सोतेन वुद्दमाने पुरिसे अनुकम्पाय रहदस्स रहदादीनवस्स च आचिक्खनं विय तण्हासोतेन वुद्दमानस्स सत्तस्स महाकरुणाय भगवतो तण्हादीनं तदादीनवस्स च विभावना, तस्स वचनं असद्वहित्वा अनुसोतगामिनो तस्स पुरिसस्स तस्मिं रहदे मरणप्पत्तिमरणमत्तदुक्खप्पत्तियो विय भगवतो वचनं असम्पटिच्छन्तस्स अपायुप्पत्ति, सुगतियं दुक्खुप्पत्ति च, तस्स पन वचनं सद्वहित्वा हत्थेहि च पादेहि च वायामकरणं विय तेन च वायामेन परतीरं पत्वा सुखेन यथिच्छित्तानगमनं विय भगवतो वचनं सम्पटिच्छित्वा तण्हादीसु आदीनवं पस्सित्वा तण्हासोतस्स पटिसोतपब्बज्जादिनेक्खम्मवसेन वीरियारम्भो, आरद्धवीरियस्स च तेनेव वीरियारम्भेन तण्हासोतातिक्कमनं निब्बानतीरं पत्वा अरहत्तफलसमापत्तिवसेन यथारुचि सुखविहारोति ।

गाथासु **सहापि दुक्खेन जहेय्य कामेति** ज्ञानमग्गाधिगमत्थं समथविपस्सनानुयोगं करोन्तो भिक्खु यदिपि तेसं पुब्बभागपटिपदा किच्छेन कसिरेन सम्पज्जति, न सुखेन वीथिं ओतरति पुब्बभागभावनाय किलेसानं बलवभावतो, इन्द्रियानं वा अतिक्खभावतो । तथा सति सहापि दुक्खेन जहेय्य कामे, पठमज्झानेन विक्खम्भेन्तो ततियमग्गेन समुच्छिन्दन्तो किलेसकामे पजहेय्य । एतेन दुक्खपटिपदे ज्ञानमग्गे दस्सेति ।

योगक्खेमं आयतिं पत्थयानोति अनागामितं अरहत्तं इच्छन्तो आकङ्खमानो । अयज्हेत्थ अधिप्पायो — यदिपि एतरहि किच्छेन कसिरेन ज्ञानपुरिममग्गे अधिगच्छामि, इमे पन निस्साय उपरि अरहत्तं अधिगन्त्वा कतकिच्चो

पहीनसब्बदुक्खो भविस्सामीति सहापि दुक्खेन ज्ञानादीहि कामे पजहेय्याति । अथ वा यो कामवितक्कबहुलो पुग्गलो कल्याणमित्तस्स वसेन पब्बज्जं सीलविसोधनं ज्ञानादीनं पुब्बभागपटिपत्तिं वा पटिपज्जन्तो किच्छेन कसिरेन अस्सुमुखो रोदमानो तं वितक्कं विक्खम्भेति, तं सन्धाय वुत्तं “सहापि दुक्खेन जहेय्य कामे”ति । सो हि किच्छेनपि कामे पजहन्तो ज्ञानं निब्बत्तेत्वा तं ज्ञानं पादकं कत्वा विपस्सन्तो अनुक्कमेन अरहत्ते पतिट्ठहेय्य । तेन वुत्तं “योगक्खेमं आर्यतिं पत्थयानो”ति ।

सम्मप्यजानोति विपस्सनासहिताय मग्गपज्जाय सम्मदेव पजानन्तो । **सुविमुत्तचित्तोति** तस्स अरियमग्गाधिगमस्स अनन्तरं फलविमुत्तिया सुट्ठु विमुत्तचित्तो । **विमुत्तिया फस्सये तत्थ तत्थाति** तस्मिं तस्मिं मग्गफलाधिगमनकाले विमुत्तिं निब्बानं फस्सये फुसेय्य पापुणेय्य अधिगच्छेय्य सच्छिकरेय्य । उपयोगत्थे हि “विमुत्तिया”ति इदं सामिवचनं । विमुत्तिया वा आरम्मणभूताय तत्थ तत्थ तंतंफलसमापत्तिकाले अत्तनो फलचित्तं फस्सये फुसेय्य पापुणेय्य, निब्बानोगधाय फलसमापत्तिया विहरेय्याति अत्थो । **स वेदगूति** सो वेदसङ्घातेन मग्गजाणेन चतुन्नं सच्चानं गतत्ता पटिविद्धत्ता वेदगू । **लोकन्तगूति** खन्धलोकस्स परियन्तं गतो । सेसं सुविज्जेय्यमेव ।

दसमसुत्तवण्णना निट्ठिता ।

११. चरसुत्तवण्णना

११०. एकादसमे चरतोति गच्छन्तस्स, चङ्कमन्तस्स वा । **उप्पज्जति कामवितक्को** वाति वत्थुकामेसु अवीतरागताय तादिसे पच्चये कामपटिसंयुत्तो वा वितक्को उप्पज्जति चे, यदि उप्पज्जति । **ब्यापादवितक्को वा विहिंसावितक्को** वाति आघातनिमित्तब्यापादपटिसंयुत्तो वा वितक्को, लेड्डुदण्डादीहि परविहेठनवसेन विहिंसापटिसंयुत्तो वा वितक्को उप्पज्जति चेति सम्बन्धो । **अधिवासेतीति** तं यथावुत्तं कामवितक्कादिं यथापच्चयं अत्तनो चित्ते उप्पन्नं “इतिपायं वितक्को पापको, इतिपि अकुसलो, इतिपि सावज्जो, सो च खो अत्तब्याबाधायपि संवत्तती”तिआदिना नयेन पच्चवेक्खणाय अभावतो **अधिवासेति** अत्तनो चित्तं आरोपेत्वा वासेति चे । अधिवासेन्तोयेव च **नप्पजहति** तदङ्गादिपिहानवसेन न पटिनिस्सज्जति, ततो एव **न विनोदेति** अत्तनो चित्तसन्तानतो न नुदति न नीहरति, तथा अविनोदनतो **न व्यन्तीकरोति** न विगतन्तं करोति । आतापी पहितत्तो यथा तेसं अन्तोपि नावसिस्सति अन्तमसो भङ्गमत्तम्पि एवं करोति, अयं पन तथा न करोतीति अत्थो । तथाभूतोव **न अनभावं गमेति** अनु अनु अभावं न गमेति । न पजहति चे, न विनोदेति चेतिआदिना चे-सद्वं योजेत्वा अत्थो वेदितब्बो ।

चरन्ति चरन्तो । **एवंभूतोति** एवं कामवितक्कादिपापवितक्केहि समङ्गीभूतो । **अनातापी अनोत्तापीति** किलेसानं आतापनस्स वीरियस्स अभावेन अनातापी, पापुत्रासआतापनपरितापनलक्खणस्स ओत्तप्पस्स अभावेन अनोत्तापी । **सततं समितन्ति** सब्बकालं निरन्तरं । **कुसीतो हीनवीरियोति** कुसलेहि धम्मेहि परिहायित्वा अकुसलपक्खे कुच्छित्तं सीदनतो कोसज्जसमन्नागमेन च कुसीतो, सम्मप्यधानवीरियाभावेन हीनवीरियो वीरियविरहितोति वुच्चति कथीयति । **ठितस्साति** गमनं उपच्छिन्दित्वा तिट्ठतो । सयनइरियापथस्स विसेसतो कोसज्जपक्खिकत्ता यथा तंसमङ्गिनो वितक्का सम्भवन्ति, तं दस्सेतुं “**जागरस्सा**”ति वुत्तं ।

सुक्कपक्खे तज्जे, भिक्खवे, भिक्खु नाधिवासेतीति आरद्धवीरियस्सापि विहरतो अनादिमति संसारे चिरकालभावितेन तथारूपपच्चयसमायोगेन सतिसम्मोसेन वा कामवितक्कादि उप्पज्जति चे, तं भिक्खु अत्तनो चित्तं आरोपेत्वा न वासेति चे, अब्भन्तरे न वासेति चेति अत्थो । अनधिवासेन्तो किं करोतीति? **पजहति** छुट्टेति । किं कचवरं

विय पिटकेन? न हि, अपिच खो तं **विनोदेति** नुदति नीहरति । किं बलीबद्धं विय पतोदेन? न हि, अथ खो नं **व्यन्तीकरोति** विगतन्तं करोति । यथा तेसं अन्तोपि नावसिस्सति अन्तमसो भङ्गमत्तम्पि, तथा ते करोति । कथं पन ते तथा करोति? **अनभावं गमेति** अनु अनु अभावं गमेति, विक्खम्भनप्पहानेन यथा सुविक्खम्भिता होन्ति तथा ने करोतीति वुत्तं होति ।

एवंभूतोति आदीसु एवं कामवितक्कादीनं अनधिवासनेन सुविसुद्धासयो समानो ताय च आसयसम्पत्तिया तन्निमित्ताय च पयोगसम्पत्तिया परिसुद्धसीलो इन्द्रियेसु गुत्तद्वारो भोजने मत्तज्जू सतिसम्पज्जेन समन्नागतो जागरियं अनुयुत्तो तदङ्गादिवसेन किलेसानं आतापनलक्खणेन वीरियेन समन्नागतत्ता **आतापी**, सब्बसो पापुत्रासेन समन्नागतत्ता । **ओत्तापी सततं** रत्तिन्दिवं, **समितं** निरन्तरं समथविपस्सनाभावानुयोगवसेन चतुब्बिधसम्मप्पधानसिद्धिया, **आरद्धवीरियो पहितत्तो** निब्बानं पटिपेसितचित्तोति **वुच्चति** कथीयतीति अत्थो । सेसं वुत्तनयमेव ।

गाथासु **गेहनिस्सितन्ति** एत्थ गेहवासीहि अपरिच्चत्तत्ता गेहवासीनं सभावत्ता गेहधम्मत्ता वा गेहं वुच्चति वत्थुकामो । अथ वा गेहपटिबद्धभावतो किलेसकामानं निवासट्ठानभावतो तंवत्थुकत्ता वा कामवितक्कादि गेहनिस्सितं नाम । **कुम्मगं पटिपन्नोति** यस्मा अरियमग्गस्स उप्पथभावतो अभिज्झादयो तदेकद्वधम्मा च कुम्मगो, तस्मा कामवितक्कादिबहुलो पुग्गलो कुम्मगं पटिपन्नो नाम । **मोहनेय्येसु मुच्छितोति** मोहसंवत्तनियेसु रूपादीसु मुच्छितो सम्मत्तो अज्झोपन्नो । **सम्बोधिन्ति** अरियमग्गजाणं । **फुट्टन्ति** फुसितुं पत्तुं, **सो तादिसो** मिच्छासङ्कप्पगोचरो अभब्बो, न कदाचि तं पापुणातीति अत्थो ।

वितक्कं समयित्वानाति यथावुत्तं मिच्छावितक्कं पटिसङ्खानभावनाबलेहि वूपसमेत्वा । **वितक्कूपसमे रतोति** नवन्नम्पि महावितक्कानं अच्चन्तवूपसमभूते अरहत्ते निब्बाने एव वा अज्झासयेन रतो अभिरतो । **भब्बो सो तादिसोति** सो यथावुत्तो सम्मा पटिपज्जमानो पुग्गलो पुब्बभागे समथविपस्सनाबलेन सब्बवितक्के यथारहं तदङ्गादिवसेन वूपसमेत्वा ठितो, विपस्सनं उस्सुक्कापेत्वा मग्गपटिपाटिया अरहत्तमग्गजाणसङ्घातं निब्बानसङ्घातज्च अनुत्तरं सम्बोधिं फुट्टुं अधिगन्तुं भब्बो समत्थोति ।

एकादसमसुत्तवण्णना निट्ठिता ।

१२. सम्पन्नसीलसुत्तवण्णना

१११. द्वादसमे **सम्पन्नसीलाति** एत्थ तिविधं सम्पन्नं परिपुण्णसमङ्गीमधुरवसेन । तेसु —

“सम्पन्नं सालिकेदारं, सुवा भुज्जन्ति कोसिय ।

पटिवेदेमि ते ब्रह्मे, न ने वारेतुमुस्सहे”ति ॥ (जा० १.१४.१) —

एत्थ परिपुण्णत्थो सम्पन्नसद्दो । “इमिना पातिमोक्खसंवरेन उपेतो होति समुपेतो उपगतो समुपगतो सम्पन्नो समन्नागतो”ति (विभ० ५११) एत्थ समङ्गिभावत्थो सम्पन्नसद्दो । “इमिस्सा, भन्ते, महापथविद्या हेट्ठिमतलं सम्पन्नं — सेय्यथापि खुद्धमधुं अनीलकं, एवमस्साद”न्ति (पारा० १७) एत्थ मधुरत्थो सम्पन्नसद्दो । इध पन परिपुण्णत्थेपि समङ्गिभावेपि वट्ठति, तस्मा **सम्पन्नसीलाति** परिपुण्णसीला हुत्वातिपि, सीलसमङ्गिनो हुत्वातिपि एवमेत्थ अत्थो वेदितब्बो ।

तत्थ “परिपुण्णसीला”ति इमिना अत्थेन खेत्तदोसविगमेन खेत्तपारिपूरि विय परिपुण्णं नाम होति । तेन वुत्तं “खेत्तदोसविगमेन खेत्तपारिपूरि विय सीलदोसविगमेन सीलपारिपूरि वुत्ता”ति । “सीलसमङ्गिनो”ति इमिना पन अत्थेन सीलेन समङ्गीभूता समोधानगता समन्नागता हुत्वा विहरथाति वुत्तं होति । तत्थ द्वीहि कारणेहि सम्पन्नसीलता होति सीलविपत्तिया आदीनवदस्सनेन, सीलसम्पत्तिया आनिसंसदस्सनेन च । तदुभयम्पि **विसुद्धिमग्गे** (विसुद्धि० १.२०-२१) वुत्तनयेन वेदितब्बं । तत्थ “सम्पन्नसीला”ति एत्तावता किर भगवा चतुपारिसुद्धिसीलं उद्दिसित्वा “पातिमोक्खसंवरसंवुता”ति इमिना जेट्ठकसीलं दस्सेतीतिआदिना एत्थ यं वत्तब्बं, तं हेट्ठा वुत्तमेव । **किमस्स उत्तरि करणीयन्ति** एवं सम्पन्नसीलानं विहरतं तुम्हाकं किन्ति सिया उत्तरि कातब्बं, पटिपज्जितब्बन्ति चेति अत्थो ।

एवं “सम्पन्नसीला, भिक्खवे, विहरथा”तिआदिना सम्पादनूपायेन सद्धिं सीलसम्पदाय भिक्खू नियोजेन्तो अनेकपुग्गलाधिट्ठानं कत्वा देसनं आरभित्वा इदानीं यस्मा एकपुग्गलाधिट्ठानवसेन पवत्तितापि भगवतो देसना अनेकपुग्गलाधिट्ठानाव होति सब्बसाधारणत्ता, तस्मा तं एकपुग्गलाधिट्ठानवसेन दस्सेन्तो “**चरतो चेपि, भिक्खवे, भिक्खुनो**”तिआदिमाह ।

तत्थ अभिज्झायति एतायाति **अभिज्झा**, परभण्डाभिज्झायनलक्खणस्स लोभस्सेतं अधिवचनं । व्यापज्जति पूतिभवति चित्तं एतेनाति **व्यापादो**, “अनत्थं मे अचरी”तिआदिनयप्पवत्तस्स एकूनवीसतिआघातवत्थुविसयस्स दोसस्सेतं अधिवचनं । उभिन्नम्पि “तत्थ कतमो कामच्छन्दो? यो कामेसु कामच्छन्दो कामस्नेहो कामपिपासा कामपरिळाहो काममुच्छा कामज्झोसान”न्ति (ध० स० ११५९), तथा “लोभो लुब्भना लुब्भितत्तं सारागो सारज्जना सारज्जितत्तं अभिज्झा लोभो अकुसलमूल”न्तिआदिना (ध० स० ३९१), “दोसो दुस्सना दुस्सितत्तं व्यापत्ति व्यापज्जना व्यापज्जितत्तं विरोधो पटिविरोधो चण्डिकं असुरोपो अनत्तमनता चित्तस्सा”तिआदिना (ध० स० ४१८, १२३७) च वित्थारो वेदितब्बो । **विगतो होतीति** अयञ्च अभिज्झा, अयञ्च व्यापादो विगतो होति अपगतो, पहीनो होतीति अत्थो । एत्तावता कामच्छन्दनीवरणस्स च व्यापादनीवरणस्स च पहानं दस्सितं होति ।

थिनमिद्धन्ति थिनज्जेव मिद्धज्ज । तेसु चित्तस्स अकम्मज्जता थिनं, आलसियस्सेतं अधिवचनं, वेदनादीनं तिण्णं खन्धानं अकम्मज्जता मिद्धं, पचलायिकभावस्सेतं अधिवचनं । उभिन्नम्पि “तत्थ कतमं थिनं? या चित्तस्स अकल्लता अकम्मज्जता ओलीयना सल्लीयना । तत्थ कतमं मिद्धं? या कायस्स अकल्लता अकम्मज्जता ओनाहो परियोनाहो”तिआदिना (ध० स० ११६२-११६३) नयेन वित्थारो वेदितब्बो ।

उद्धच्चकुक्कुच्चन्ति उद्धच्चज्जेव कुक्कुच्चज्ज । तत्थ उद्धच्चं नाम चित्तस्स उद्धताकारो, कुक्कुच्चं नाम अकतकल्याणस्स कतपापस्स तप्पच्चया विप्पटिसारो । उभिन्नम्पि “तत्थ कतमं उद्धच्चं? यं चित्तस्स उद्धच्चं अवूपसमो चेतसो विक्खेपो भन्तत्तं चित्तस्सा”तिआदिना (ध० स० ११६५) वित्थारो । “अकतं वत मे कल्याणं, अकतं कुसलं, अकतं भीरुत्तानं; कतं पापं, कतं लुद्धं, कतं किब्बिस”न्तिआदिना (म० नि० ३.२४८; नेत्ति० १२०) पवत्तिआकारो वेदितब्बो ।

विचिकिच्छाति बुद्धादीसु संसयो । तस्सा “सत्थरि कङ्कति विचिकिच्छति, नाधिमुच्चति न सम्पसीदती”तिआदिना (विभ० ९१५), “तत्थ कतमा विचिकिच्छा? या कङ्का कङ्कायना कङ्कायितत्तं विमति विचिकिच्छा द्वेळ्हकं द्वेधापथो संसयो अनेकंसग्गाहो आसप्पना परिसप्पना अपरियोगाहना छम्भितत्तं चित्तस्स मनोविलेखो”तिआदिना (ध० स० १००८) च नयेन वित्थारो वेदितब्बो ।

एत्थ च अभिज्झाब्यापादादीनं विगमवसेन च पहानवसेन च तेसं विक्खम्भनमेव वेदितब्बं । यं सन्धाय वुत्तं —

“सो अभिज्झं लोके पहाय विगताभिज्झेन चेतसा विहरति, अभिज्झाय चित्तं परिसोधेति । ब्यापादपदोसं पहाय अब्यापन्नचित्तो विहरति, ब्यापादपदोसा चित्तं परिसोधेति । थिनमिद्धं पहाय विगतथिनमिद्धो विहरति आलोकसञ्जी सतो सम्पजानो, थिनमिद्धा चित्तं परिसोधेति । उद्धच्चकुक्कुच्चं पहाय अनुद्धतो विहरति अज्झत्तं उपसन्तचित्तो उद्धच्चकुक्कुच्चा चित्तं परिसोधेति । विचिकिच्छं पहाय तिण्णविचिकिच्छो विहरति अकथंकथी कुसलेसु धम्मेषु, विचिकिच्छाय चित्तं परिसोधेती”ति (विभ० ५०८) ।

तत्थ यथा नीवरणानं पहानं होति, तं वेदितब्बं । कथञ्च नेसं पहानं होति? **कामच्छन्दस्स** ताव असुभनिमित्ते योनिमोमनसिकारेन पहानं होति, सुभनिमित्ते अयोनिमोमनसिकारेनस्स उप्पत्ति । तेनाह भगवा —

“अत्थि, भिक्खवे, सुभनिमित्तं । तत्थ अयोनिमोमनसिकारबहुलीकारो अयमाहारो अनुप्पन्नस्स वा कामच्छन्दस्स उप्पादाय, उप्पन्नस्स वा कामच्छन्दस्स भिय्योभावाय वेपुल्लाया”ति (सं० नि० ५.२३२) ।

एवं सुभनिमित्ते अयोनिमोमनसिकारेन उप्पज्जन्तस्स कामच्छन्दस्स तप्पटिपक्खतो असुभनिमित्ते योनिमोमनसिकारेन पहानं होति । तत्थ असुभनिमित्तं नाम असुभम्पि असुभारम्मणम्पि, योनिमोमनसिकारो नाम उपायमनसिकारो, पथमनसिकारो, अनिच्चे अनिच्चन्ति वा, दुक्खे दुक्खन्ति वा, अनत्तनि अनत्ताति वा, असुभे असुभन्ति वा मनसिकारो । तं तत्थ बहुलं पवत्तयतो कामच्छन्दो पहीयति । तेनाह भगवा —

“अत्थि, भिक्खवे, असुभनिमित्तं । तत्थ योनिमोमनसिकारबहुलीकारो — अयमाहारो अनुप्पन्नस्स वा कामच्छन्दस्स अनुप्पादाय, उप्पन्नस्स वा कामच्छन्दस्स पहानाया”ति (सं० नि० ५.२३२) ।

अपिच छ धम्मा कामच्छन्दस्स पहानाय संवत्तन्ति — असुभनिमित्तस्स उग्गहो, असुभभावनानुयोगो, इन्द्रियेसु गुत्तद्वारता, भोजने मत्तञ्जुता, कल्याणमित्तता, सप्पायकथाति । दसविधञ्हि असुभनिमित्तं उग्गणहन्तस्सपि कामच्छन्दो पहीयति, भावेन्तस्सपि, इन्द्रियेसु पिहितद्वारस्सपि चतुन्नं पञ्चन्नं आलोपानं ओकासे सति उदकं पिवित्वा यापनसीलताय भोजने मत्तञ्जनोपि । तेन वुत्तं —

“चत्तारो पञ्च आलोपे, अभुत्वा उदकं पिवे ।

अलं फासुविहाराय, पिहितत्तस्स भिक्खुनो”ति ॥ (थेरगा० ९८३) ।

असुभकम्मिकतिस्सत्थेरसदिसे कल्याणमित्ते सेवन्तस्सपि कामच्छन्दो पहीयति, ठाननिसज्जादीसु दसअसुभनिस्सितसप्पायकथायपि पहीयति । तेन वुत्तं “छ धम्मा कामच्छन्दस्स पहानाय संवत्तन्ती”ति ।

पटिघनिमित्ते आयोनिमोमनसिकारेन **ब्यापादस्स** उप्पादो होति । तत्थ पटिघम्पि पटिघनिमित्तं, पटिघारम्मणम्पि पटिघनिमित्तं । अयोनिमोमनसिकारो सब्बत्थ एकलक्खणो एव । तं तस्मिं निमित्ते बहुलं पवत्तयतो ब्यापादो उप्पज्जति । तेनाह भगवा —

“अत्थि, भिक्खवे, पटिघनिमित्तं । तत्थ अयोनिमोमनसिकारबहुलीकारो — अयमाहारो अनुप्पन्नस्स वा

ब्यापादस्स उप्पादाय, उप्पन्नस्स वा ब्यापादस्स भिय्योभावाय वेपुल्लाया”ति (सं० नि० ५.२३२)।

मेत्ताय पन चेतोविमुत्तिया योनिसोमनसिकारेनस्स पहानं होति । तत्थ “मेत्ता”ति वुत्ते अप्पनापि उपचारोपि वट्ठति, “चेतोविमुत्ती”ति पन अप्पनाव । योनिसोमनसिकारो वुत्तलक्खणोव । तं तत्थ बहुलं पवत्तयतो ब्यापादो पहीयति । तेनाह भगवा —

“अत्थि, भिक्खवे, मेत्ताचेतोविमुत्ति । तत्थ योनिसोमनसिकारबहुलीकारो अयमाहारो अनुप्पन्नस्स वा ब्यापादस्स अनुप्पादाय उप्पन्नस्स वा ब्यापादस्स पहानाया”ति (सं० नि० ५.२३२)।

अपिच छ धम्मा ब्यापादस्स पहानाय संवत्तन्ति — मेत्तानिमित्तस्स उग्गहो, मेत्ताभावना, कम्मस्सकतापच्चवेक्खणा, पटिसङ्खानबहुलता, कल्याणमिच्छता, सप्पायकथाति । ओधिसकानोधिसकदिसाफरणानज्झि अज्जतरवसेन मेत्तं उग्गण्हन्तस्सपि ब्यापादो पहीयति, ओधिसो अनोधिसो दिसाफरणवसेन मेत्तं भावेन्तस्सपि ब्यापादो पहीयति, “त्वं एतस्स कुद्धो किं करिस्ससि, किमस्स सीलादीनि विनासेतुं सक्खिस्ससि ननु त्वं अत्तनो कम्मेन आगन्त्वा अत्तनो कम्मेनेव गमिस्ससि, परस्स कुज्जनं नाम वीतच्चिकङ्गारतत्तअयसलाकगूथादीनि गहेत्वा परं पहरितुकामता विय होति । एसोपि तव कुद्धो किं करिस्सति, किं ते सीलादीनि विनासेतुं सक्खिस्सति एस अत्तनो कम्मेन आगन्त्वा अत्तनो कम्मेनेव गमिस्सति, अप्पटिच्छितपहेणकं विय, पटिवातं खित्तरजोमुट्ठि विय च एतस्सेव एस कोधो मत्थके पतिस्सती”ति एवं अत्तनो च परस्स चाति उभयेसं कम्मस्सकतं पच्चवेक्खतोपि, पच्चवेक्खित्वा पटिसङ्खाने ठितस्सपि, अस्सगुत्तथेरसदिसे मेत्ताभावनारते कल्याणमिच्छे सेवन्तस्सपि ब्यापादो पहीयति, ठाननिसज्जादीसु मेत्तानिस्सितसप्पायकथायपि पहीयति । तेन वुत्तं “छ धम्मा ब्यापादस्स पहानाय संवत्तन्ती”ति ।

अरतिआदीसु अयोनिसोमनसिकारेन **थिनमिद्धस्स** उप्पादो होति । **अरति** नाम उक्कण्ठितता, **तन्दी** नाम कायालसियं, **विजम्भिता** नाम कायविनमना, **भत्तसम्मदो** नाम भत्तमुच्छा भत्तपरिळाहो, **चेतसो लीनत्तं** नाम चित्तस्स लीनाकारो । इमेसु अरतिआदीसु अयोनिसोमनसिकारं बहुलं पवत्तयतो थिनमिद्धं उप्पज्जति । तेनाह भगवा —

“अत्थि, भिक्खवे, अरति तन्दी विजम्भिता भत्तसम्मदो चेतसो लीनत्तं । तत्थ अयोनिसोमनसिकारबहुलीकारो — अयमाहारो अनुप्पन्नस्स वा थिनमिद्धस्स उप्पादाय, उप्पन्नस्स वा थिनमिद्धस्स भिय्योभावाय वेपुल्लाया”ति (सं० नि० ५.२३२)।

आरम्भधातुआदीसु पन योनिसोमनसिकारेन थिनमिद्धस्स पहानं होति । **आरम्भधातु** नाम पठमारम्भवीरियं, **निक्कमधातु** नाम कोसज्जतो निक्खन्तताय ततो बलवतरं, **परक्कमधातु** नाम परं परं ठानं अक्कमनतो ततोपि बलवतरं । इमस्मिं तिप्पभेदे वीरिये योनिसोमनसिकारं बहुलं पवत्तयतो थिनमिद्धं पहीयति । तेनाह —

“अत्थि, भिक्खवे, आरम्भधातु, निक्कमधातु, परक्कमधातु । तत्थ योनिसोमनसिकारबहुलीकारो — अयमाहारो अनुप्पन्नस्स वा थिनमिद्धस्स अनुप्पादाय, उप्पन्नस्स वा थिनमिद्धस्स पहानाया”ति (सं० नि० ५.२३२)।

अपिच छ धम्मा थिनमिद्धस्स पहानाय संवत्तन्ति, अतिभोजने निमित्तग्गाहो — इरियापथसम्परिवत्तनता,

आलोकसज्जामनसिकारो, अब्भोकासवासो, कल्याणमित्तता, सप्पायकथाति ।

आहरहत्थकभुत्तवमितकतत्थवट्टकअलंसाटककाकमासकभोजनं भुज्जित्वा रत्तिट्ठानदिवाट्ठाने निसिन्नस्स हि समणधम्मं करोतो थिनमिद्धं महाहत्थी विय ओत्थरन्तं आगच्छति, चतुपञ्चआलोपओकासं पन ठपेत्वा पानीयं पिवित्वा यापनसीलस्स भिक्खुनो तं न होति । एवं अतिभोजने निमित्तं गणहन्तस्सपि थिनमिद्धं पहीयति । यस्मिं इरियापथे थिनमिद्धं ओक्कमति, ततो अज्जं परिवत्तेन्तस्सपि, रत्तिं चन्दालोकं दीपालोकं उक्कालोकं दिवा सूरियालोकं मनसिकरोन्तस्सपि, अब्भोकासे वसन्तस्सपि महाकस्सपत्थेरसदिसे विगतथिनमिद्धे कल्याणमित्ते सेवन्तस्सपि थिनमिद्धं पहीयति, ठाननिसज्जादीसु धुतङ्गनिस्सितसप्पायकथायपि पहीयति । तेन वुत्तं “छ धम्मा थिनमिद्धस्स पहानाय संवत्तन्ती”ति ।

चेतसो अवूपसमे अयोनिसोमनसिकारेन उद्धच्चकुक्कुच्चस्स उप्पादो होति । अवूपसमो नाम अवूपसन्ताकारो, अत्थतो तं उद्धच्चकुक्कुच्चमेव । तत्थ अयोनिसोमनसिकारं बहुलं पवत्तयतो उद्धच्चकुक्कुच्चं उप्पज्जति । तेनाह —

“अत्थि, भिक्खवे, चेतसो अवूपसमो । तत्थ अयोनिसोमनसिकारबहुलीकारो — अयमाहारो अनुप्पन्नस्स वा उद्धच्चकुक्कुच्चस्स उप्पादाय, उप्पन्नस्स वा उद्धच्चकुक्कुच्चस्स भिय्योभावाय वेपुल्लाया”ति (सं० नि० ५.२३२) ।

समाधिसङ्घाते पन चेतसो वूपसमे योनिसोमनसिकारेनस्स पहानं होति । तेनाह —

“अत्थि, भिक्खवे, चेतसो वूपसमो । तत्थ योनिसोमनसिकारबहुलीकारो — अयमाहारो अनुप्पन्नस्स वा उद्धच्चकुक्कुच्चस्स अनुप्पादाय, उप्पन्नस्स वा उद्धच्चकुक्कुच्चस्स पहानाया”ति (सं० नि० ५.२३२) ।

अपिच छ धम्मा उद्धच्चकुक्कुच्चस्स पहानाय संवत्तन्ति — बहुस्सुतता, परिपुच्छकता, विनये पकतज्जुता, वुट्ठसेविता, कल्याणमित्तता, सप्पायकथाति । बाहुसच्चेनपि हि एकं वा द्वे वा तयो वा चत्तारो वा पञ्च वा निकाये पाळिवसेन च अत्थवसेन च उग्गणहन्तस्सपि उद्धच्चकुक्कुच्चं पहीयति, कप्पियाकप्पियपरिपुच्छाबहुलस्सपि, विनयपज्जत्तियं चिण्णवसीभावताय पकतज्जुनोपि, वुट्ठे महल्लकत्थेरे उपसङ्गमन्तस्सपि, उपालित्थेरसदिसे विनयधरे कल्याणमित्ते सेवन्तस्सपि उद्धच्चकुक्कुच्चं पहीयति, ठाननिसज्जादीसु कप्पियाकप्पियनिस्सितसप्पायकथायपि पहीयति । तेन वुत्तं “छ धम्मा उद्धच्चकुक्कुच्चस्स पहानाय संवत्तन्ती”ति ।

विचिकिच्छाट्ठानियेसु धम्मेसु अयोनिसोमनसिकारेन विचिकिच्छाय उप्पादो होति । विचिकिच्छाट्ठानिया धम्मा नाम पुनप्पुनं विचिकिच्छाय कारणत्ता विचिकिच्छाव । तत्थ अयोनिसोमनसिकारं बहुलं पवत्तयतो विचिकिच्छा उप्पज्जति । तेनाह —

“अत्थि, भिक्खवे, विचिकिच्छाट्ठानिया धम्मा । तत्थ अयोनिसोमनसिकारबहुलीकारो — अयमाहारो अनुप्पन्नाय वा विचिकिच्छाय उप्पादाय, उप्पन्नाय वा विचिकिच्छाय भिय्योभावाय वेपुल्लाया”ति (सं० नि० ५.२३२) ।

कुसलादिधम्मेसु पन योनिसोमनसिकारेन विचिकिच्छाय पहानं होति । तेनाह —

“अत्थि, भिक्खवे, कुसलाकुसला धम्मा, सावज्जानवज्जा धम्मा, सेवितब्बासेवितब्बा धम्मा, हीनपणीता

धम्मा, कण्हसुक्कसप्पटिभागा धम्मा । तत्थ योनिसोमनसिकारबहुलीकारो अयमाहारो अनुप्पन्नाय वा विचिकिच्छाय अनुप्पादाय, उप्पन्नाय वा विचिकिच्छाय पहानायां'ति (सं० नि० ५.२३२) ।

अपिच छ धम्मा विचिकिच्छाय पहानाय संवत्तन्ति बहुस्सुतता, परिपुच्छकता, विनये पकतञ्जुता, अधिमोक्खबहुलता, कल्याणमित्ता, सप्पायकथाति । बाहुसच्चवसेनपि हि एकं वा...पे०... पञ्च वा निकाये पाळिवसेन च अत्थवसेन च उग्गण्हन्तस्सपि विचिकिच्छा पहीयति, तीणि रतनानि आरब्भ कुसलादिभेदेसु धम्मेसु परिपुच्छाबहुलस्सपि, विनये चिण्णवसीभावस्सपि, तीसु रतनेसु ओकप्पनीय, सद्भासङ्गात, अधिमोक्खबहुलस्सपि, सद्भाधिमुत्ते वक्कलित्थेरसदिसे कल्याणमित्ते सेवन्तस्सपि विचिकिच्छा पहीयति, ठाननिसज्जादीसु तिण्णं रतनानं गुणनिस्सितसप्पायकथायपि पहीयति । तेन वुत्तं “छ धम्मा विचिकिच्छाय पहानाय संवत्तन्ती”ति ।

एत्थ च यथावुत्तेहि तेहि तेहि धम्मेहि विक्खम्भनवसेन पहीनानं इमेसं नीवरणानं कामच्छन्दनीवरणस्स ताव अरहत्तमग्गेन अच्चन्तप्पहानं होति, तथा थिनमिद्धनीवरणस्स उद्धच्चनीवरणस्स च । ब्यापादनीवरणस्स पन कुक्कुच्चनीवरणस्स च अनागामिमग्गेन, विचिकिच्छानीवरणस्स सोतापत्तिमग्गेन अच्चन्तप्पहानं होति । तस्मा तेसं तथा पहानाय उपकारधम्मे दस्सेतुं “आरब्धं होति वीरियं”न्तिआदि आरब्धं । इदमेव वा यथावुत्तं अभिज्झादीनं नीवरणानं पहानं, यस्मा हीनवीरियताय कुसीतेन, अनुपट्टितस्सतिताय मुट्ठस्सतिना, अपटिप्पस्सद्धदरथताय सारद्धकायेन, असमाहितताय विक्खित्तचित्तेन न कदाचिपि ते सक्का निब्बत्तेतुं, पगेव इतरं, तस्मा यथा पटिपन्नस्स सो अभिज्झादीनं विगमो पहानं सम्भवति, तं दस्सेतुं “आरब्धं होति वीरियं”न्तिआदि आरब्धं । तस्सत्थो — तेसं नीवरणानं पहानाय सब्बेसम्पि वा संकिलेसधम्मानं समुच्छिन्दनत्थाय वीरियं आरब्धं होति, पग्गहितं असिथिलप्पवत्तन्ति वुत्तं होति । आरब्धत्ता एव च अन्तरा सङ्कोचस्स अनापज्जनतो असल्लीनं ।

उपट्टिता सति असम्मुट्ठाति न केवलञ्च वीरियमेव, सतिपि आरम्भणाभिमुखभावेन उपट्टिता होति, तथा उपट्टितत्ता एव च चिरकतचिरभासितानं सरणसमत्थताय असम्मुट्ठा । **पस्सद्धो**ति कायचित्तदरथप्पस्सम्भनेन कायोपिस्स पस्सद्धो होति । तत्थ यस्मा नामकाये पस्सद्धे रूपकायोपिस्स पस्सद्धो एव होति, तस्मा “नामकायो रूपकायो”ति अविसेसेत्त्वा “पस्सद्धो कायो”ति वुत्तं । **असारद्धो**ति सो च पस्सद्धत्ता एव असारद्धो, विगतदरथोति वुत्तं होति । **समाहितं चित्तं एकगगन्ति** चित्तम्पिस्स सम्मा आहितं सुट्ठु ठपितं अप्पितं विय होति, समाहितत्ता एव च एकगं अचलं निप्फन्दनं निरिज्जनन्ति ।

एत्तावता ज्ञानमग्गानं पुब्बभागपटिपदा कथिता । तेनेवाह —

“चरम्पि, भिक्खवे, भिक्खु एवंभूतो आतापी ओत्तापी सततं समितं आरब्धवीरियो पहितत्तोति वुच्चती”ति (इतिवु० ११०) ।

तस्सत्थो हेट्ठा वुत्तो एव ।

गाथासु **यतं चरेति** यतमानो चरेय्य, चङ्कमनादिवसेन गमनं कप्पेन्तोपि “अनुप्पन्नानं पापकानं अकुसलानं धम्मानं अनुप्पादाय छन्दं जनेति वायमती”तिआदिना (सं० नि० ५.६५१-६६२; विभ० ३९०) नयेन वुत्तसम्मप्पधानवीरियवसेन यतन्तो घटेन्तो वायमन्तो यथा अकुसला धम्मा पहीयन्ति, कुसला धम्मा भावनापारिपूरिं गच्छन्ति, एवं गमनं कप्पेय्याति

अत्थो । एस नयो सेसेसुपि । केचि पन “यत्”न्ति एतस्स संयतोति अत्थं वदन्ति । तिद्देति तिद्देय्य ठानं कप्पेय्य । अच्चेति निसीदेय्य । सयेति निपज्जेय्य । यतमेनं पसारयेति एतं पसारेतब्बं हत्थपादादिं यतं यतमानो यथावुत्तवीरियसमङ्गीयेव हुत्वा पसारेय्य, सब्बत्थ पमादं विजहेय्याति अधिप्पायो ।

इदानीं यथा पटिपज्जन्तो यतं यतमानो नाम होति, तं पटिपदं दस्सेतुं “उद्ध”न्ति आदि वुत्तं । तत्थ उद्धन्ति उपरि । तिरियन्ति तिरियतो, पुरत्थिमदिसादिवसेन समन्ततो दिसाभागेसूति अत्थो । अपाचीनन्ति हेट्ठा । यावता जगतो गतीति यत्तका सत्तसङ्खारभेदस्स लोकस्स पवत्ति, तत्थ सब्बत्थाति अत्थो । एत्तावता अनवसेसतो सम्मसनजाणस्स विसयं सङ्गहेत्वा दस्सेति । समवेक्खिताति सम्मा हेतुना जायेन अवेक्खिता, अनिच्चादिवसेन विपस्सकोति वुत्तं होति । धम्मानन्ति सत्तसुज्जानं । खन्धानन्ति रूपादीनं पञ्चन्नं खन्धानं । उदयब्बयन्ति उदयञ्च वयञ्च । इदं वुत्तं होति — उपरि तिरियं अधोति तिसङ्गहे सब्बस्मिं लोके अतीतादिभेदभिन्नानं पञ्चुपादानक्खन्धसङ्घातानं सब्बेसं रूपारूपधम्मानं अनिच्चतादिसम्मसनाधिगतेन उदयब्बयजाणेन पञ्चवीसतिया आकारेहि उदयं, पञ्चवीसतिया आकारेहि वयञ्च समवेक्खिता समनुपस्सिता भवेय्याति ।

चेतोसमथसामीचिन्ति चित्तसंकिलेसानं अच्चन्तवूपसमनतो चेतोसमथसङ्घातस्स अरियमग्गस्स अनुच्छविकपटिपदं जाणदस्सनविसुद्धिं । सिक्खमानन्ति पटिपज्जमानं भावेन्तं जाणपरम्परं निब्बत्तेन्तं । सदाति सब्बकालं, रत्तिञ्चेव दिवा च । सतन्ति चतुसम्पज्जेन समन्नागताय सतिया सतोकारिं । सततं पहितत्तोति सब्बकालं पहितत्तो निब्बानं पटिपेसितत्तोति तथाविधं भिक्खुं बुद्धादयो अरिया आहु आचिक्खन्ति कथेन्ति । सेसं वुत्तनयमेव ।

द्वादसमसुत्तवण्णना निट्ठिता ।

१३. लोकसुत्तवण्णना

११२. तेरसमे लोकोति लुज्जनपलुज्जनट्ठेन लोको, अत्थतो पुरिमं अरियसच्चद्वयं इध पन दुक्खं अरियसच्चं वेदितब्बं । स्वायं सत्तलोको, सङ्खारलोको, ओकासलोकोति विभागतो सरूपतो च हेट्ठा वुत्तोयेव । अपिच खन्धलोकादिवसेन च अनेकविधो लोको । यथाह —

“लोकोति खन्धलोको, धातुलोको, आयतनलोको, विपत्तिभवलोको, विपत्तिसम्भवलोको, सम्पत्तिभवलोको, सम्पत्तिसम्भवलोको, एको लोको सब्बे सत्ता अहारट्ठितिका, द्वे लोका नामञ्च रूपञ्च, तयो लोका तिस्सो वेदना, चत्तारो लोका चत्तारो आहारा, पञ्च लोका पञ्चुपादानक्खन्धा, छ लोका छ अज्झत्तिकानि आयतनानि, सत्त लोका सत्त विज्जाणट्ठितियो, अट्ठ लोका अट्ठ लोकधम्मा, नव लोका नव सत्तावासा, दस लोका दसायतनानि, द्वादस लोका द्वादसायतनानि, अट्ठारस लोका अट्ठारस धातुर्यो”ति (महानि० ३; चूळनि० अजितमाणवपुच्छानिद्देस २) ।

एवमनेकधा विभत्तोपि लोको पञ्चसु उपादानक्खन्धेसु एव सङ्गहं समोसरणं गच्छति, उपादानक्खन्धा च दुक्खं अरियसच्चं जातिपि दुक्खा ...पे०... संखित्तेन पञ्चुपादानक्खन्धापि दुक्खाति । तेन वुत्तं “अत्थतो पुरिमं अरियसच्चद्वयं, इध पन दुक्खं अरियसच्चं वेदितब्बं”न्ति । ननु च लुज्जनपलुज्जनट्ठो अविसेसेन पञ्चसु खन्धेसु सम्भवतीति? सच्चं सम्भवति । यं पन न लुज्जतीति गहितं, तं तथा न होति, एकंसेनेव लुज्जति पलुज्जतीति सो लोकोति उपादानक्खन्धेस्वेव लोकसद्वो निरूळ्होति वेदितब्बो । तस्मा लोकोति दुक्खं अरियसच्चं एव ।

यदिपि तथागत-सदस्स हेट्ठा तथागतसुत्ते नानानयेहि वित्थारतो अत्थो विभत्तो, तथापि पाळिया अत्थसंवण्णनामुखेन अयमत्थविभावना — **अभिसम्बुद्धो**ति “अभिज्जेय्यतो परिज्जेय्यतो”ति पुब्बे वुत्तविभागेन वा अविसेसतो ताव आसयानुसयचरियाधिमुत्तिआदिभेदतो कुसलाकुसलादिविभागतो वट्टप्पमाणसण्ठानादिभेदतो, विसेसतो वा पन “अयं सस्सतासयो, अयं उच्छेदासयो”तिआदिना “कक्खळलक्खणा पथवीधातु, पग्घरणलक्खणा आपोधातू”तिआदिना च अभिविसिट्ठेन सयम्भुजाणेन सम्मा अविपरीतं यो यो अत्थो यथा यथा बुज्झितब्बो, तथा तथा बुद्धो जातो अत्तपच्चक्खो कतोति अभिसम्बुद्धो ।

लोकस्माति यथावुत्तलोकतो । **विसंयुत्तो**ति विसंसट्ठो, तप्पटिबद्धानं सब्बेसं संयोजनानं सम्मदेव समुच्छिन्नत्ता ततो विप्पमुत्तोति अत्थो । **लोकसमुदयो**ति सुत्तन्तनयेन तण्हा, अभिधम्मनयेन पन अभिसङ्गारेहि सद्धिं दियट्ठकिलेससहस्सं । **पहीनो**ति बोधिमण्डे अरहत्तमग्गजाणेन समुच्छेदप्पहानवसेन सवासनं पहीनो । **लोकनिरोधो**ति निब्बानं । **सच्छिकतो**ति अत्तपच्चक्खो कतो । **लोकनिरोधगामिनी पटिपदा**ति सीलादिक्खन्धत्तयसङ्गहो अरियो अट्ठङ्गिको मग्गो । सो हि लोकनिरोधं निब्बानं गच्छति अधिगच्छति, तदत्थं अरियेहि पटिपज्जीयति चाति लोकनिरोधगामिनी पटिपदाति वुच्चति ।

एत्तावता तथानि अभिसम्बुद्धो याथावतो गतोति तथागतोति अयमत्थो दस्सितो होति । चत्तारि हि अरियसच्चानि तथानि नाम । यथाह —

“चत्तारिमानि, भिक्खवे, तथानि अवितथानि अनज्जथानि । कतमानि चत्तारि? इदं दुक्खन्ति, भिक्खवे, तथमेतं अवितथमेतं, अनज्जथमेतं”न्ति (सं० नि० ५.१०९०) वित्थारो ।

अपिच तथाय गतोति तथागतो, तथं गतोति तथागतो, गतोति च अवगतो अतीतो पत्तो पटिपन्नोति अत्थो । इदं वुत्तं होति — यस्मा भगवा सकललोकं तीरणपरिज्जाय तथाय अविपरीताय गतो अवगतो, तस्मा लोको तथागतेन अभिसम्बुद्धोति तथागतो । लोकसमुदयं प्हानपरिज्जाय तथाय गतो अतीतोति तथागतो । लोकनिरोधं सच्छिकिरियाय तथाय गतो पत्तोति तथागतो । लोकनिरोधगामिनि पटिपदं तथं अविपरीतं गतो पटिपन्नोति तथागतोति । एवं इमिस्सा पाळिया भगवतो तथागतभावदीपनवसेन अत्थो वेदितब्बो ।

इति भगवा चतुसच्चाभिसम्बोधनवसेन अत्तनो तथागतभावं पकासेत्वा इदानि तत्थ दिट्ठादिअभिसम्बोधिवसेनपि तं दस्सेतुं “यं, **भिक्खवे**”तिआदिमाह । अङ्गुत्तरट्ठकथायं (अ० नि० अट्ठ० २.४.२३) पन “चतूहि सच्चोहि अत्तनो बुद्धभावं कथेत्वा”तिआदि वुत्तं । तं तथागतसद्व-बुद्धसद्धानं अत्थतो निन्नानाकरणतं दस्सेतुं वुत्तं । तथा चेव हि पाळि पवत्ताति । तत्थ दिट्ठन्ति रूपायतनं । सुतन्ति सद्दायतनं । मुतन्ति पत्वा गहेतब्बतो गन्धायतनं, रसायतनं, फोटुब्बायतनञ्च । **विज्जातन्ति** सुखदुक्खादिधम्मरम्मणं । **पत्तन्ति** परियेसित्वा वा अपरियेसित्वा वा पत्तं । **परियेसितन्ति** पत्तं वा अप्पत्तं वा परियेसितं । **अनुविचरितं मनसा**ति चित्तेन अनुसज्जरितं । कस्स पन अनुविचरितं मनसाति? **सदेवकस्स... पे०... सदेवमनुस्सायाति** सम्बन्धनीयं । तत्थ सह देवेहीति सदेवको, तस्स **सदेवकस्स** । सेसपदेसुपि एसेव नयो ।

सदेवकवचनेन चेत्य पञ्चकामावचरदेवग्गहणं वेदितब्बं, समारकवचनेन छट्ठकामावचरदेवग्गहणं, सब्रह्मकवचनेन ब्रह्मकायिकादिब्रह्मग्गहणं, सस्समणब्राह्मणवचनेन सासनस्स पच्चत्थिकसमणब्राह्मणग्गहणञ्चेव समितपापबाहितपापसमणब्राह्मणग्गहणञ्च, पजावचनेन सत्तलोकग्गहणं, सदेवमनुस्सवचनेन सम्मुतिदेवअवसेसमनुस्सग्गहणं । एवमेत्थ तीहि पदेहि देवमारब्रह्मेहि सद्धिं सत्तलोको, द्वीहि पजावसेन सत्तलोको गहितोति

वेदितब्बो ।

अपरो नयो — सदेवकगहणेन अरूपावचरदेवलोको गहितो, समारकवचनेन छकामावचरदेवलोको, सब्रह्मकवचनेन रूपीब्रह्मलोको, सस्समणब्राह्मणादिवचनेन सम्मुतिदेवेहि सह अवसेससत्तलोको गहितो । अपिचेत्थ सदेवकवचनेन उक्कट्टुपरिच्छेदतो सब्बलोकविसयस्स भगवतो अभिसम्बुद्धभावे पकासिते येसमेवं सिया “मारो नाम महानुभावो छकामावचरिस्सरो वसवत्ती, ब्रह्मा पन ततोपि महानुभावतरो दसहि अङ्गुलीहि दससु चक्कवाळसहस्सेसु आलोकं फरति, उत्तमज्झानसमापत्तिसुखं पटिसंवेदेति । पुथू च समणब्राह्मणा इद्धिमन्तो दिब्बचक्खुका परचित्तविदुनो महानुभावा संविज्जन्ति । अयञ्च सत्तकायो अनन्तो अपरिमाणो, किमेतेसं सब्बेसंयेव विसयो अनवसेसतो भगवता अभिसम्बुद्धो”ति? तेसं विमतिं विधमेन्तो भगवा “सदेवकस्स लोकस्सा”तिआदिमाह ।

पोराणा पनाहु — “सदेवकस्सा”ति देवताहि सद्धिं अवसेसलोकं परियादियति, “समारकस्सा”ति मारेन सद्धिं अवसेसलोकं, “सब्रह्मकस्सा”ति ब्रह्मेहि सद्धिं अवसेसलोकं । एवं सब्बेपि तिभवूपगे सत्ते तीसु पदेसु पक्खिपित्वा पुन द्वीहि पदेहि परियादियन्तो “सस्समणब्राह्मणिया पजाय सदेवमनुस्साया”ति आह । एवं पञ्चहिपि पदेहि खन्धत्तयपरिच्छिन्ने सब्बसत्ते परियादियति ।

यस्मा तं तथागतेन अभिसम्बुद्धन्ति इमिना इदं दस्सेति — यं अपरिमाणासु लोकधातूसु इमस्स सदेवकस्स लोकस्स “नीलं पीतक”न्तिआदि रूपारम्मणं चक्खुद्वारे आपाथं आगच्छति, तं सब्बं “अयं सत्तो इमस्मिं खणे इमं नाम रूपारम्मणं दिस्वा सुमनो वा दुम्मनो वा मज्झत्तो वा जातो”ति तथागतस्स एवं अभिसम्बुद्धं । तथा यं अपरिमाणासु लोकधातूसु इमस्स सदेवकस्स लोकस्स “भेरिसद्धो मुदिङ्गसद्धो”तिआदि सद्धारम्मणं सोतद्वारे आपाथं आगच्छति, “मूलगन्धो तचगन्धो”तिआदि गन्धारम्मणं घानद्वारे आपाथमागच्छति, “मूलरसो खन्धरसो”तिआदि रसारम्मणं जिह्वाद्वारे आपाथमागच्छति, “कक्खळं मुदुक”न्तिआदि पथवीधातुतेजोधातुवायोधातुभेदं फोडुब्बारम्मणं कायद्वारे आपाथमागच्छति, “अयं सत्तो इमस्मिं खणे इमं नाम फोडुब्बं फुसित्वा सुमनो वा दुम्मनो वा मज्झत्तो वा जातो”ति सब्बं तं तथागतस्स एवं अभिसम्बुद्धं ।

तथा यं अपरिमाणासु लोकधातूसु इमस्स सदेवकस्स लोकस्स सुखादिभेदं धम्मारम्मणं मनोद्वारे आपाथमागच्छति, “अयं सत्तो इमस्मिं खणे इमं नाम धम्मारम्मणं जानित्वा सुमनो वा दुम्मनो वा मज्झत्तो वा जातो”ति सब्बं तं तथागतस्स एवं अभिसम्बुद्धं । एवं यं इमस्स सदेवकस्स लोकस्स दिट्ठं सुतं मुतं विज्जातं, तं तथागतेन अदिट्ठं वा असुतं वा अमुतं वा अविज्जातं वा नत्थि । इमस्स पन महाजनस्स परियेसित्वा अप्पत्तम्पि अत्थि, अपरियेसित्वा अप्पत्तम्पि अत्थि, परियेसित्वा पत्तम्पि अत्थि, अपरियेसित्वा पत्तम्पि अत्थि । सब्बम्पि तथागतस्स अप्पत्तं नाम नत्थि जाणेन असच्छिकतं । ततो एव यं अपरिमाणासु लोकधातूसु अपरिमाणानं सत्तानं चक्खुद्वारे आपाथमागच्छन्तं रूपारम्मणं नाम अत्थि, तं भगवा सब्बं सब्बाकारेण जानाति पस्सति । एवं जानता पस्सता चानेन तं इड्ढानिड्ढादिवसेन वा दिट्ठसुतमुतविज्जातेसु लब्धमानपदवसेन वा “कतमं तं रूपं रूपायतनं? यं रूपं चतुन्नं महाभूतानं उपादाय वण्णनिभा सनिदस्सनं सप्पटिघं नीलं पीतक”न्तिआदिना (ध० स० ६१७) नयेन अनेकेहि नामेहि तेरसहि वारेहि द्वेपज्जासाय नयेहि विभज्जमानं तथेव होति, वितथं नत्थि । एस नयो सोतद्वारादीसुपि आपाथमागच्छन्तेसु सद्वादीसु ।

तस्मा तथागतोति वुच्चतीति यं यथा लोकेन गतं, तस्स तथेव गतत्ता तथागतोति वुच्चति । पाळियं पन “अभिसम्बुद्ध”न्ति वुत्तं, तं तथागतसद्देन समानत्थं । इमिना तथादस्सिभावतो तथागतोति अयमत्थो दस्सितो होति ।

वुत्तज्जेतं धम्मसेनापतिना —

“न तस्स अदिट्ठमिधत्थि किञ्चि,

अथो अविज्जातमजानितब्बं ।

सब्बं अभिज्जासि यदत्थि नेय्यं,

तथागतो तेन समन्तचक्खू”ति ॥ (महानि० १५६; चूळनि० मोघराजमाणवपुच्छानिद्देस ८५; पटि० म० १.१२१) ।

सुत्तन्तेपि वुत्तं भगवता —

“यं, भिक्खवे, सदेवकस्स लोकस्स...पे०... सदेवमनुस्साय पजाय दिट्ठं सुतं मुतं विज्जातं पत्तं परियेसितं अनुविचरितं मनसा, तमहं जानामि, तमहं अब्भज्जासिं, तं तथागतस्स विदितं, तं तथागतो न उपट्ठासी”ति (अ० नि० ४.२४) ।

यच्च, भिक्खवे, रत्तिं तथागतो अनुत्तरं सम्मासम्बोधिं अभिसम्बुज्झतीति यस्सच्च विसाखपुण्णमरत्तियं तथा आगतादिअत्थेन तथागतो भगवा बोधिमण्डे अपराजितपल्लङ्के निसिन्नो तिण्णं मारानं मत्थकं महित्वा उत्तरितराभावतो अनुत्तरं सम्मासम्बोधिं आसवक्खयजाणेन सद्धिं सब्बज्जुतज्जाणं अधिगच्छति । **यच्च रत्तिं अनुपादिसेसाय निब्बानधातुया परिनिब्बायतीति** यस्सच्च विसाखपुण्णमरत्तियंयेव कुसिनारायं उपवत्तने मल्लानं सालवने यमकसालानमन्तरे अनुपादिसेसाय निब्बानधातुया परिनिब्बायति । **यं एतस्मिं अन्तरेति** इमासं द्विन्नं सउपादिसेसअनुपादिसेसनिब्बानधातूनं वेमज्जे पच्चचत्तालीसवस्सपरिमाणे काले पठमबोधियम्पि, मज्झिमबोधियम्पि, पच्छिमबोधियम्पि यं सुत्तगेय्यादिप्पभेदं धम्मं **भासति** निद्विसनवसेन, **लपति** उद्विसनवसेन, **निद्विसति** पटिनिद्विसनवसेन । **सब्बं तं तथेव होतीति** तं एत्थन्तरे देसितं सब्बं सुत्तगेय्यादिनवङ्गं बुद्धवचनं अत्थतो ब्यज्जनतो च अनुपवज्जं अनूनं अनधिकं सब्बाकारपरिपुण्णं रागमदनिम्मदं...पे०... मोहमदनिम्मदं, नत्थि तत्थ वालग्गमत्तम्पि अवक्खलितं, एकमुद्दिकाय लज्जितं विय एकनाळिया मितं विय एकतुलाय तुलितं विय च तं तथेव होति यस्सत्थाय भासितं, एकन्तेनेव तस्स साधनतो, **नो अज्जथा** । तस्मा तथं, अवितथं, अनज्जथं । एतेन तथावादिताय तथागतोति दस्सेति । गदअत्थो अयं गतसद्दो दकारस्स तकारं कत्वा, तस्मा तथं गदतीति तथागतोति अत्थो । अथ वा आगदनं आगदो, वचनन्ति अत्थो । तथो अविपरीतो आगदो यस्साति दकारस्स तकारं कत्वा तथागतोति एवमेत्थ पदसिद्धि वेदितब्बा ।

यथावादी तथाकारीति ये धम्मे भगवा “इमे धम्मा अकुसला सावज्जा विज्जुगरहिता समत्ता समादिन्ना अहिताय दुक्खाय संवत्तन्ती”ति परेसं धम्मं देसेन्तो वदति, ते धम्मे एकन्तेनेव सयं पहासि । ये पन धम्मे भगवा “इमे धम्मा कुसला अनवज्जा विज्जुप्पसत्था समत्ता समादिन्ना हिताय सुखाय संवत्तन्ती”ति वदति, ते धम्मे एकन्तेनेव सयं उपसम्पज्ज विहासि । तस्मा यथावादी भगवा, तथाकारीति वेदितब्बो । **यथाकारी तथावादीति** सम्मदेव सीलादिपरिपूरणवसेन सम्मा पटिपन्नो सयं यथाकारी भगवा, तथेव धम्मदेसनाय परेसं तत्थ पटिपन्नवसेन तथावादी । भगवतो हि वाचाय कायो अनुलोमेति, कायस्सपि वाचा । तस्मा यथावादी तथाकारी, यथाकारी तथावादी च होति । एवंभूतस्स चस्स यथा वाचा, कायोपि तथा गतो पवत्तो । यथा च कायो, वाचापि तथा गता पवत्ताति अत्थो ।

अभिभू अनभिभूतोति उपरि भवगं हेट्ठा अवीचिनिरयं परियन्तं कत्वा तिरियं अपरिमाणासु लोकधातूसु भगवा सब्बसत्ते अभिभवति सीलेनपि समाधिनापि पज्जायपि विमुत्तियापि विमुत्तिजाणदस्सनेनपि, न तस्स तुला वा पमाणं वा

अत्थि, असमो असमसमो अप्पटिमो अप्पटिभागो अप्पटिपुगलो अतुलो अप्पमेय्यो अनुत्तरो धम्मराजा देवानं अतिदेवो सक्कानं अतिसक्को ब्रह्मानं अतिब्रह्मा । ततो एव सयं न केनचि अभिभूतोति अनभिभूतो । **अञ्जदत्थू**ति एकंसत्थे निपातो । यच्चि किञ्चि नेय्यं नाम, सब्बं तं हत्थतले आमलकं विय पस्सतीति **दसो** । अविपरीतं आसयादिअवबोधेन हितूपसंहारादिना च सत्ते, भावञ्जथत्तूपनयवसेन सङ्खारे सब्बाकारेन सुचिण्णवसिताय समापत्तियो चित्तञ्च वसे वत्तेतीति **वसवत्ती** । एत्तावता अभिभवनट्टेन भगवा अत्तनो तथागतभावं दस्सेति ।

तत्रेवं पदसिद्धि वेदितब्बा — अगदो विय अगदो । को पनेस? देसनाविलासो चेव पुञ्जुस्सयो च । तेनेव हेस महानुभावो भिसक्को विय दिब्बागदेन सप्पे, सब्बे परप्पवादिनो सदेवकञ्च लोकं अभिभवति । इति सब्बलोकाभिभवने तथो अविपरीतो देसनाविलासो चेव पुञ्जुस्सयो च अगदो अस्साति दकारस्स तकारं कत्वा तथागतोति वेदितब्बो । तेन वुत्तं “सदेवके, भिक्खवे, लोके...पे०... वसवत्ती, तस्मा तथागतोति वुच्चती”ति ।

गाथासु **सब्बलोकं अभिज्जायाति** तेधातुकलोकसन्निवासं जानित्वा । **सब्बलोके यथातथन्ति** तस्मिं तेधातुकलोकसन्निवासे यंकिञ्चि नेय्यं, तं सब्बं यथातथं अविपरीतं जानित्वा । **सब्बलोकविसंयुत्तो**ति चतुन्नं योगानं अनवसेसप्पहानेन सब्बेनपि लोकेन विसंयुत्तो विप्पमुत्तो । **अनूपयो**ति सब्बस्मिम्पि लोके तण्हादिट्ठिउपयेहि अनूपयो तेहि उपयेहि विरहितो ।

सब्बाभिभूति रूपादीनि सब्बारम्मणानि, सब्बं सङ्खारगतं, सब्बेपि मारे अभिभवित्वा ठितो । **धीरो**ति धितिसम्पन्नो । **सब्बगन्थप्पमोचनो**ति सब्बे अभिज्झाकायगन्थादिके मोचेत्वा ठितो वेनेय्यसन्तानेपि अत्तनो देसनाविलासेन तेसं पमोचनतो सब्बगन्थप्पमोचनो । **फुट्टास्साति** फुट्टा अस्स । करणत्थे इदं सामिवचनं, फुट्टा अनेनाति अत्थो । **परमा सन्तीति** निब्बानं । तच्चि तेन आणफुसनेन फुट्टं । तेनेवाह “निब्बानं अकुतोभय”न्ति । अथ वा **परमा सन्तीति** उत्तमा सन्ति । कतरा साति? निब्बानं । यस्मा पन निब्बाने कुतोचि भयं नत्थि, तस्मा तं **अकुतोभयन्ति** वुच्चति ।

अनीघोति निहुक्खो । **सब्बकम्मक्खयं पत्तो**ति सब्बेसं कम्मानं खयं परियोसानं अच्चन्ताभावं पत्तो । **विमुत्तो उपधिसङ्खये**ति उपधिसङ्खयसङ्खाते निब्बाने तदारम्मणाय फलविमुत्तिया विमुत्तो । **एस सो**ति एसो सो । **सीहो अनुत्तरो**ति परिस्सयानं सहनट्टेन, किलेसानं हननट्टेन च, तथागतो अनुत्तरो सीहो नाम । **ब्रह्मन्ति** सेट्ठं । **चक्कन्ति** धम्मचक्कं । **पवत्तयी**ति तिपरिवट्टं द्वादसाकारं पवत्तेसि ।

इतीति एवं तथागतस्स गुणे जानित्वा । **सङ्गम्माति** समागन्त्वा । **तं नमस्सन्तीति** तं तथागतं ते सरणं गता देवमनुस्सा नमस्सन्ति । महन्तेहि सीलादिगुणेहि समन्नागतत्ता **महन्तं**, चतुवेसारज्जयोगेन **वीतसारदं** । इदानि यं वदन्ता ते नमस्सन्ति, तं दस्सेतुं **दन्तो**तिआदि वुत्तं । तं उत्तानत्थमेव ।

इति इमस्मिं चतुक्कनिपाते छट्ठे सत्तमे च सुत्ते वट्ठं कथितं, पठमदुतियततियद्वादसमतेरसमेसु विवट्ठं कथितं, सेसेसु वट्ठविवट्ठं कथितन्ति वेदितब्बं ।

तेरसमसुत्तवण्णना निट्ठिता ।

इति परमत्थदीपनिया

खुदकनिकाय-अट्टकथाय

इतिवुत्तकस्स चतुक्कनिपातवण्णना निट्ठिता ।

निगमनकथा

एत्तावता च —

धम्मिस्सरेन जगतो, धम्मालोकविधायिना ।
धम्मनं बोधनेय्यानं, जानता देसनाविधिं ॥

तं तं निदानमागम्म, सब्बलोकहितेसिना ।
एककादिप्पभेदेन, देसितानि महेसिना ॥

दसुत्तरसतं द्वे च, सुत्तानि इतिवुत्तकं ।
इतिवुत्तप्पभेदेन, सङ्गायिसु महेसयो ॥

छळभिज्जा वसिप्पत्ता, पभिन्नपटिसम्भिदा ।
यं तं सासनधोरह्हा, धम्मसङ्गाहका पुरे ॥

तस्स अत्थं पकासेतुं, पोराणट्टकथानयं ।
निस्साय या समारद्धा, अत्थसंवण्णना मया ॥

सा तत्थ परमत्थानं, सुत्तन्तेसु यथारहं ।
पकासना परमत्थ-दीपनी नाम नामतो ॥

सम्पत्ता परिनिट्ठानं, अनाकुलविनिच्छया ।
अट्ठत्तिसप्पमाणाय, पाळिया भाणवारतो ॥

इति तं सङ्खरोन्तेन, यं तं अधिगतं मया ।
पुज्जं तस्सानुभावेन, लोकनाथस्स सासनं ॥

ओगाहेत्वा विसुद्धाय, सीलादिपटिपत्तिया ।
सब्बेपि पाणिनो होन्तु, विमुत्तिरसभागिनो ॥

चिरं तिट्ठतु लोकस्मिं, सम्मासम्बुद्धसासनं ।
तस्मिं सगारवा निच्चं, होन्तु सब्बेपि पाणिनो ॥

सम्मा वस्सतु कालेन, देवोपि जगतिप्पति ।

सद्धम्मनिरतो लोकं, धम्मेनेव पसासतूति ॥

इति बदरतित्थविहारवासिना आचरियधम्मपालेन कता

इतिवुत्तकस्स अट्ठकथा निद्धिता ।